

Namo tassa bhagavato arahato sammāsambuddhassa

## Saddanītippakaraṇaṃ (padamālā)

### Ganthārambhakathā

Dhīrehi magganāyena, yena buddhena desitaṃ;  
Sitaṃ dhammamidhaññāya, ñāyate amataṃ padaṃ.

Taṃ namitvā mahāvīraṃ, sabbaññuṃ lokanāyakaṃ;  
Mahākāruṇikaṃ seṭṭhaṃ, visuddhaṃ suddhidāyakaṃ.

Saddhammañcassa pūjetvā, suddhaṃ santamasāṅkhatam;  
Atakkāvacaraṃ suṭṭhu, vibhattaṃ madhuraṃ sivaṃ.

Saṅghassa ca'ñjalim katvā, puññakkhattassa tādino;  
Sīlasamādhipaññādi-visuddhaguṇajotino.

Namassanādipuññassa, katassa ratanattaye;  
Tejasāhaṃ pahantvāna, antarāye asesato.

Lokanītiviyattassa, satthu saddhammanītino;  
Sāsanatthaṃ pavakkhāmi, **saddanītimanākulaṃ**.

Āsavakkhayalābhena, hoti sāsanasampadā;  
Āsavakkhayalābho ca, saccādhigamahetuko.

Saccādhigamaṃ tañca, paṭipattissitaṃ mataṃ;  
Paṭipatti ca sā kāmaṃ, pariyattiparāyaṇā.

Pariyattābhiyuttānaṃ, viditvā saddalakkhaṇaṃ;  
Yasmā na hoti sammoho, akkharesu padesu ca.

Yasmā cāmohabhāvena, akkharesu padesu ca;  
Pāḷiyatthaṃ vijānanti, viññū sugatasāsane.

Pāḷiyatthāvabodhena, yoniso satthusāsane;  
Sappaññā paṭipajjanti, paṭipattimatandikā.

Yoniso paṭipajjitvā, dhammaṃ lokuttaraṃ varam;  
Pāpuṇanti visuddhāya, sīlādipaṭipattiyā.

Tasmā tadatthikā suddhaṃ, nayaṃ nissāya viññunaṃ;  
Bhaññamānaṃ mayā **sadda-nītim** gaṇhantu sādhukaṃ.

Dhātu dhātūhi nipphanna-rūpāni ca salakkhaṇa;  
Sandhināmādibhedo ca, padānaṃ tu vibhatti ca.

Pāḷinayādayocceva-mettha nānappakārato;  
Sāsanassopakārāya, bhavissati vibhāvanā.

## 1. Savikaraṇākhyātavibhāga

Tattha **dhātū**ti kenatthēna dhātu? Sakatthampi dhāretīti dhātu, atthātisayayogato paratthampi dhāretīti dhātu, vīsatiyā upasaggesu yena kenaci upasaggena atthavisesakāraṇena paṭibaddhā atthavisesampi dhāretīti dhātu, “ayaṃ imissā attho, ayamito paccayo paro”tiādīnā anekappakārena paṇḍitehi dhāriyati esātipi dhātu, vidahanti viduno etāya saddanipphattiṃ ayalohādīmayam ayalohādīdhātūhi viyātipi dhātu. Evaṃ tāva **dhātus**addassattho veditabbo.

**Dhātus**addo jinamate, itthilīngattane mato;  
Satthe pullīngabhāvasmiṃ, kaccāyanamate dvisu.

Atha vā jinamate “tato gotamidhātūnī”ti ettha **dhātus**addo līngavipallāse vattati “pabbatāni vanāni cā”ti ettha **pabbatas**addo viya, na panettha vattabbaṃ “atthivācakattā napuṃsakaniddeso”ti atthivācakattepi “dhātuyo”ti itthilīngadassanato. Bhūvādayo saddā dhātavo. Seyyathidaṃ? Bhū i ku ke takka taka taki sukaiccādayo. Gaṇato te atthavidhā bhūvādigaṇo rudhādigaṇo divādigaṇo svādigaṇo kiyādigaṇo gahādigaṇo tanādigaṇo curādigaṇo cāti. Idāni tesam vikaṇasaññite paccaye dassessāma. Anekavidhā hi paccayā nānappakāresu nāmanāma kitanāma samāsanāma taddhitanāmākhyātesu pavattanato. Saṅkhepato pana duvidhāva nāmapaccayo ākhyātapaccayo cāti. Tatrāpi ākhyātapaccayā duvidhā vikaṇapaccayanovikaṇapaccayavasena. Tattha vikaṇapaccayo **akārādisattarasavidho** aggahitaggahaṇena pannarasavidho ca. Novikaṇapaccayo pana **kha cha sādī**nekavidho. Ye rūpanipphattiyā upakārakā atthavisesassa jotakā vā ajotakā vā lopaṇiyā vā alopaṇiyā vā, te saddā paccayā.

Paṭicca kāraṇaṃ taṃ taṃ, entīti **paccayā**tha vā;  
Paṭicca saddanipphatti, ito etīti paccayā.

Nāmikappaccayānaṃ yo, vibhāgo āvi hessati;  
Nāmakappe yato tasmā, na taṃ vitthārayāmase.

Yo novikaṇānaṃ tu, paccayānaṃ vibhāgato;  
So panākhyātakappamhi, vitthārenā’gamissatīti.

Iccānekavidhesu paccayesu “vikaṇapaccayā nāma ime”ti sallakkhetabbā. Kathaṃ? Bhūvādigaṇato **apaccayo** hoti kattari, rudhādigaṇato **akārivaṇṇekārokārapaccayā** honti kattari, pubbamajjhaṭṭhāne niggahītāgamo ca, divādigaṇato **yapaccayo** hoti kattari, svādigaṇato **ṇu ṇā uṇā**paccayā honti kattari, kiyādigaṇato **nāpaccayo** hoti kattari, gahādigaṇato **ppa ṇhā**paccayā honti kattari, tanādigaṇato **o yirapaccayā** honti kattari, curādigaṇato **ṇe ṇayapaccayā** honti kattari.

Akāro ca **ivaṇṇo** ca, e okārā ca **yo** tathā;  
**Ṇu ṇā uṇā** ca **nā ppa ṇhā-yirā ṇe ṇayapaccayā**.

Aggahitaggahaṇena, evaṃ pannarase’ritā;  
Vikaṇavhayā ete, paccayāti vibhāvaye.

Ye evaṃ niddiṭṭhehi vikaṇapaccayehi tadaññehi ca sappaccayā atthavidhā dhātugaṇā suttantesu bahūpakārā, tesvāyaṃ **bhūvādigaṇo**. **Bhū** sattāyaṃ, **bhū**dhātu vijjamānatāyaṃ vattati. Sakammikākammikāsu dhātūsu ayaṃ akammikā dhātu, na pana “dhammabhūto”tiādīsū pattiatthavācīkā aparā **bhū**dhātu viya sakammikā. Esā hi **pariabhi**ādīhi upasaggehi yuttāyeva sakammikā bhavati, na **upa parā pātu**ādīhi upasagganipātehi yuttāpi. Ato imissā siddhāni rūpāni dvidhā ñeyyāni akammakapādāni sakammakapādāni cāti.

### Suddhakattukriyāpadaniddesa

Tatra bhavati ubbhavati samubbhavati pabhavati parābhavati sambhavati vibhavati, bhoti sambhoti vibhoti pātubhavati pātubbhavati pātubhoti, imāni akammakapādāni. Ettha **pātu**iti nipāto, so “āvibhavati tirobhavati”tiādīsū **āvi tironipātā** viya **bhū**dhātuto nipphannākhyātasaddassa neva

visesakaro, na ca sakammakattasādhako. Uiccādayo upasaggā, te pana visesakarā, na sakammakattasādhakā. Yesamattho kammaena sambandhanīyo na hoti, tāni padāni **akammakāni**. Akammakapadānaṃ yathārahaṃ sakammakākammakavasena attho kathetabbo. Paribhoti paribhavati, abhibhoti abhibhavati, adhibhoti adhibhavati, atibhoti atibhavati, anubhoti anubhavati, samanubhoti samanubhavati, abhisambhoti abhisambhavati, imāni sakammakapadāni. Ettha **pariiccādayo** upasaggā, te **bhūdhātuto** nipphannākhyātasaddassa visesakarā ceva sakammakattasādhakā ca. Yesamattho kammaena sambandhanīyo, tāni padāni **sakammakāni**. Sakammakapadānaṃ sakammakavasena attho kathetabbo, kvaci akammakavasenapi. Evaṃ suddhakattukriyāpadāni bhavanti. Uddesoyaṃ.

Tatra **bhavatīti** hoti vijjati paññāyati sarūpaṃ labhati. **Ubbhavatīti** uppajjati sarūpaṃ labhati. **Samubbhavatīti** samuppajjati sarūpaṃ labhati. **Pabhavatīti** hoti sambhavati. Atha vā **pabhavatīti** yato kutoci sandati, na vicchijjati, avicchinnaṃ hoti, taṃ taṃ ṭhānaṃ visarati. **Parābhavatīti** parābhavo hoti byasanaṃ āpajjati avuddhiṃ pāpuṇāti. **Sambhavatīti** suṭṭhu bhavati vuddhiṃ virūhiṃ vepullaṃ āpajjati. **Vibhavatīti** ucchijjati vinassati vipajjati, visesato vā bhavati sampajjati. **Bhoti sambhoti vibhotīti** imāni “bhavati sambhavati vibhavati”ti imehi yathākkamaṃ samānaniddesāni. **Pātubhavatīti** pakāsati dissati paññāyati pākaṭaṃ hoti. **Pātubbhavatīti** pātubhotīti imāni “pātubhavati”ti iminā samānaniddesāni. Evaṃ akammakapadānaṃ yathārahaṃ sakammakākammakavasena atthakathanaṃ daṭṭhabbaṃ. Evamuttaratrāpi aññesampi akammakapadānaṃ.

**Paribhotidukādīsu** pana sattu dukesu yathākkamaṃ dve dve padāni samānatthāni, tasmā dve dve padāniyeva gahetvā niddisissāma. Tatra **paribhoti paribhavatīti** paraṃ hiṃsati pīleti, atha vā hīleti avajānāti. **Abhibhoti abhibhavatīti** paraṃ ajjhottharati maddati. **Adhibhoti adhibhavatīti** paraṃ abhimadditvā bhavati attano vasaṃ vattāpeti. **Atibhoti atibhavatīti** paraṃ atikkamitvā bhavati. **Anubhoti anubhavatīti** sukhadukkhaṃ vedeti paribhuñjati sukhadukkhaṭṭisaṃvedī hoti. **Samanubhoti samanubhavatīti** sukhadukkhaṃ suṭṭhu vedeti suṭṭhu paribhuñjati suṭṭhu sukhadukkhaṭṭisaṃvedī hoti. **Abhisambhoti abhisambhavatīti** paraṃ ajjhottharati maddati. Evaṃ sakammakapadānaṃ sakammakavasena atthakathanaṃ daṭṭhabbaṃ. Katthaci pana gacchatīti pavattatīti evaṃ akammakavasenapi. Evamuttaratrāpi aññesaṃ sakammakapadānaṃ.

Apaccayo paro hoti, bhūvādigaṇato sati;  
Suddhakattukriyākhyāne, sabbadhātukanissite.

Ayaṃ suddhakattukriyāpadānaṃ niddeso.

### Hetukattukriyāpadaniddesa

Bhāveti vibhāvetisambhāveti paribhāveti, evaṃ hetukattukriyāpadāni bhavanti. Ekakammakavasenesamattho gahetabbo. Pacchimassa pana dvikammakavasenapi. Paribhāvāpeti abhibhāvāpeti anubhāvāpeti, evampi hetukattukriyāpadāni bhavanti. Dvikammakavasenesamattho gahetabbo. Icevaṃ dvidhā hetukattukriyāpadāni ñeyyāni, aññānīpi gahetabbāni.

Tatra **bhāvetīti** puggalo bhāvetabbaṃ yaṃ kiñci bhāveti āsevati bahulīkaroti, atha vā **bhāvetīti** vaḍḍheti. **Vibhāvetīti** bhāvetabbaṃ yaṃ kiñci vibhāveti visesena bhāveti, vividhena vā ākārena bhāveti bhāvayati vaḍḍheti, atha vā **vibhāvetīti** abhāveti antaradhāpeti. **Sambhāvetīti** yassa kassaci guṇaṃ sambhāveti sambhāvayati suṭṭhu pakāseti ukkaṃseti. **Paribhāvetīti** paribhāvetabbaṃ yaṃ kiñci paribhāveti paribhāvayati samantato vaḍḍheti. Evaṃ ekakammakavasena attho gahetabbo. Atha vā **paribhāvetīti** vāsetabbaṃ vatthum paribhāveti paribhāvayati vāseti gandhaṃ gāhāpeti. Evaṃ dvikammakavasenāpi attho gahetabbo. **Paribhāvāpetīti** puggalo puggalena sapattaṃ paribhāvāpeti hiṃsāpeti, atha vā **paribhāvāpetīti** hīlāpeti avajānāpeti. **Abhibhāvāpetīti** puggalo puggalena sapattaṃ abhibhāvāpeti ajjhottharāpeti. **Anubhāvāpetīti** puggalo puggalena sampattiṃ anubhāvāpeti paribhojēti.

Payutto kattunā yoge, ʘhitoyevāppadhāniye;  
Kriyaṃ sādheti etassa, dīpakam sāsane padaṃ.

Karaṇavacanamyeva, yebhuyyena padissati;  
Ākhyāte kāritaṭṭhānaṃ, sandhāya kathitaṃ idaṃ.

Na nāme kāritaṭṭhānaṃ, “bodhetā” itiādikaṃ;  
“Sunakhehipi khādāpenti”, iccādīni padāni ca;  
Āharitvāna dīpeyya, payogakusalo budho.

Tatridaṃ karaṇavacanam kammaṭṭhadīpakam, upayogasāmivacanānīpi taddīpakāni yojetabbāni. Kathaṃ? **Paribhāvāpetīti** puggalo puggalaṃ sapattaṃ paribhāvāpetīti, tathā **paribhāvāpetīti** puggalo puggalassa sapattaṃ paribhāvāpetīti. Sesāni nayānusārena niddisitaṭṭhāni. Evaṃ sabbānetāni karaṇopayogasāmivacanāni kammaṭṭhadīpakāniyeva honti, tasmā dvikammakavasenaṭṭho gahetabbo.

Ayaṃ hetukattukriyāpadānaṃ niddeso.

### Kammakriyāpadaniddesa

Bhaviyate vibhaviyate paribhaviyate abhibhaviyate anubhaviyate paribhūyate abhibhūyate anubhūyate, evaṃ kammuno kriyāpadāni bhavanti. Aññathā ca bhaviyyate vibhaviyyate paribhaviyyate abhibhaviyyate anubhaviyyate paribhuyyate abhibhuyyate anubhuyyate. Ettha kammuno kriyāpadāniyeva kammakattuno kriyāpadāni katvā yojetabbāni. Visuñhi kammakattuno kriyāpadāni na labbhanti.

Tatra **bhaviyateti** bhāvetabbaṃ yaṃ kiñci puggalena bhāviyate āseviyate bahulīkariyate, atha vā **bhaviyateti** vaḍḍhiyate. **Vibhaviyateti** vibhāvetabbaṃ yaṃ kiñci puggalena vibhaviyate visesena bhaviyate, vividhena vā ākārena bhaviyate vaḍḍhiyate, atha vā **vibhaviyateti** abhaviyate antaradhāpiyate. **Paribhaviyateti** sapatto puggalena paribhaviyate hiṃsiyate, atha vā **paribhaviyateti** hīṇiyate avajāniyate. **Abhibhaviyateti** sapatto puggalena abhibhaviyate ajjhotthariyate abhimaddiyate. **Anubhaviyateti** sampatti puggalena anubhaviyate paribhuñjīyate. **Paribhūyateti**ādīni tīṇi “paribhaviyate”tiādīhi tīhi samānaniddesāni. Sesāni pana yathāvutṭhehi yaṃ kammameva padhānato gahetvā niddisiyati padaṃ, taṃ kammaṭṭhadīpakam. Tasmā kattari ekavacanena niddiṭṭhepi yadi kammaṃ bahuvacanavasena vattabbaṃ, bahuvacanantaññeva kammuno kriyāpadaṃ dissati. Yadi panekavacanavasena vattabbaṃ, ekavacanantaññeva. Tathā kattari bahuvacanena niddiṭṭhepi yadi kammaṃ ekavacanavasena vattabbaṃ, ekavacanantaññeva kammuno kriyāpadaṃ dissati. Yadi pana bahuvacanavasena vattabbaṃ, bahuvacanantaññeva. Kathaṃ? Bhikkhunā dhammo bhaviyate, bhikkhunā dhammā bhaviyante, bhikkhūhi dhammo bhaviyate, bhikkhūhi dhammā bhaviyanteti. Iminā nayena sabbattha kammuno kriyāpadesu vohāro kātabbo. Yasmiṃ pana kammuno kriyāpade kammaṭṭhadīpake kammabhūtassevattassa kattubhāvaparikappo hoti, taṃ kammakattutṭhadīpakam, taṃ kammuno kriyāpadato visuṃ na labbhati. Ayaṃ panettha atthaviññāpane payogaraṇā. Sayameva paribhaviyate dubbhāsitaṃ bhaṇaṃ bālo tappaccayā aññehi paribhūtopi, sayameva abhibhaviyate pāpakārī niraye nirayapālehi abhibhūtopi tathārūpassa kammaṃ sayam katattāti. Ettha hi sayameva pīyate pānīyaṃ, sayameva kaṭo kariyatetiādīsū viya sukhābhisaṅkharāṇiyatā labbhateva, tato kammakattutā ca.

Ayaṃ kammuno kriyāpadānaṃ niddeso.

### Bhāvakriyāpadaniddesa

Bhūyate bhaviyate ubbhaviyate, evaṃ bhāvassa kriyāpadāni bhavanti. Aññathā ca bhuyyate bhaviyyate ubbhaviyyate. Tatra yathā **ṭhīyatē**padassa ṭhānanti bhāvavasena atthakathanamicchanti, evaṃ bhūyatetiādīnampi bhavanantiādīnā bhāvavasena atthakathanamicchitabbaṃ. Yathā ca ṭhānaṃ ṭhīti bhavanantiādīhi bhāvavācākakāntānāmapadehi saddhiṃ sambandhe chaṭṭhiyojanamicchanti,

na tathā thīyate bhūyatetiādīhi bhāvavācakākhyātapadehi saddhiṃ sambandhe chaṭṭhiyojanā icchitabbā sambandhe pavattachaṭṭhiyantasaddehi asambandhanīyattā ākhyātikapadānaṃ. Yasmiṃ payoge yaṃ kammuno kriyāpadena samānagatikaṃ katvā vinā kammaena niddisiyati kriyāpadaṃ, kattuvācakapadaṃ pana paccattavacanena vā karaṇavacanena vā niddisiyati, taṃ tattha bhāvattadīpakāṃ. Na hi sabbathā kattāraṇaṃ bhāvo pavattati. Evaṃ santepi bhāvo nāma kevalo bhavanalavanapacanaṃ dhātuatthoyeva. Akkharacintakā pana “thīyate bhūyate” tiādīsu bhāvavisayesu karaṇavacanameva payuñjanti “nanu nāma pabbajitena sunivatthena bhavitabbaṃ supārutena ākappasampannaṃ” tiādīsu viya, tasmā tesam mate “tena ubbhaviyate” ti karaṇavacanena yojetabbaṃ. Jinamatena pana “so bhūyate” tiādīnaṃ paccattavacaneneva. **Saccasaṅkhepappakaraṇe** hi dhammapālācariyena, **niddesapāliyaṃ** pana dhammasenāpatinā, **dhajaggasuttante** bhagavatā ca bhāvapadaṃ paccattavacanāpekkhavasenu’ccāritam.

Kathito saccasaṅkhepe, paccattavacanena ve,  
“Bhūyate” iti saddassa, sambandho bhāvādīpano.

Niddesapāliyaṃ “rūpaṃ, vibhoti vibhaviyyati”;  
Iti dassanato vāpi, paccattavacanam thiram.

Tathā dhajaggasuttante, munināhaccabhāsīte;  
“So pahīyissati” iti, pālīdassanatopi ca.

Pāramitānubhāvena, mahesīnaṃva dehato;  
Santi nipphādanā, neva, sakkatādivaco viya.

Paccattadassaneneva, purisattayayojanaṃ;  
Ekavacanikañcāpi, bahuvacanikampi ca;  
Kātabbamiti no khanti, parassapadaādike.

Tasmā rūpaṃ vibhaviyyati, rūpāni vibhaviyyanti, tvaṃ vibhaviyyasi, tumhe vibhaviyyatha, ahaṃ vibhaviyyāmi, mayaṃ vibhaviyyāma, rūpaṃ vibhaviyyate, rūpāni vibhaviyyante iccevaṃ mādi jīnavacanānurūpato yojetabbaṃ. Atrāyaṃ padasodhanā –

**Vibhaviyyatī** idaṃ, kamma padasamānakaṃ;  
Na ca kamma padaṃ nāpi, kamma kattupadādikaṃ.

Yadi kamma padaṃ etaṃ, paccattavacanam pana;  
Kammaṃ dīpeyya karaṇa-vacanam kattudīpakam.

Yadi kamma kattupadam, “pīyate” ti padaṃ viya;  
Siyā sakammakaṃ, netam, tathā hotīti dīpaye.

Yadi kattupadam etaṃ, **vibhavatipadam** viya;  
Vinā yapaccayaṃ tiṭṭhe, na tathā tiṭṭhate idaṃ.

Na kattari bhuvādīnaṃ, gaṇe yapaccayo ruto;  
Divādīnaṃ gaṇeyeva, kattari samudīrito.

Na **bhū**dhātu divādīnaṃ, dhātūnaṃ dissate gaṇe;  
Bhūvādīkacurādīnaṃ, gaṇesuyeva dissati.

“Vibhaviyyati” iccādo, tasmā yapaccayo pana;  
Bhāveyevāti viññeyyaṃ, viññunā samayaññunā.

Ettha hi pākāṃ katvā, bhāvakāraṇakalakkhaṃ;

Dassayissāmaḥaṃ dāni, sakkaccaṃ me nibodhatha.

“Tisso gacchati” iccatra, kattāraṃ kattuno padaṃ;  
“Dhammo desiyati” ccatra, kammaṃ tu kammuno padaṃ.

Sarūpato pakāseti, tasmā te pākaṭā ubho;  
Tathā vibhaviyyatīti-ādibhāvapadaṃ pana.

Sarūpato na dīpeti, kāraḥaṃ bhāvanāmaḥaṃ;  
Dabbabhūtaṃ tu kattāraṃ, pakāseti sarūpato.

Kattāraṃ pana dīpentaṃ, kattusannissitampi taṃ;  
Bhāvaṃ dīpeti svākāro, paccayena vibhāvito.

Yasmā ca kattubhāvena, bhāvo nāma na tiṭṭhati;  
Kattāva kattubhāvena, bhāvaṭṭhāne ṭhito tato.

Yajjevaṃ kattuvohāro, bhāvassa tu kathaṃ siyā;  
“Sāvakānaṃ sannipāto, ahosi” itīadisū.

Iti ce nissayānaṃ tu, vasā nissitasambhavā;  
Kattuṭṭhānepi bhāvassa, kattupaññatti sijaṭṭhi.

Kāraḥe kattukammavhe, kriyāsannissaye yathā;  
Dhārentī āsanathālī, kriyādhāroṭi kappitā.

Tathā bhāvapadaṃ dhīrā, kattāraṃ bhāvanissayaṃ;  
Dīpayantampi kappenti, bhāvassa vācakaṃ iti.

Keci adabbabhūtassa, bhāvassekattato bravuṃ;  
Bhāvedekavacovādi-purissasseva hotiti.

Pāḷiṃ patvāna tesāṃ tu, vacanaṃ appamāṇakaṃ;  
“Te saṃkilesikā dhammā, pahīyissanti” itī hi.

Pāṭho pāvācane diṭṭho, tasmā evaṃ vademase;  
Paccattadassaneneva, purisattayayojanaṃ.

Vacanehi yutaṃ dvīhi, icchitabbanti no ruci;  
Bhāve kriyāpadaṃ nāma, pāḷiyaṃ atiduddasaṃ;  
Tasmā taggahaṇūpāyo, vutto ettāvātā mayāti.

Ayaṃ bhāvassa kriyāpadānaṃ niddeso.

Evaṃ suddhakattukriyāpadāni hetukattukriyāpadāni kammuno kriyāpadāni, bhāvassa kriyāpadāni cāti catudhā, kammakattukriyāpadehi vā pañcadhā **bhū**dhātuto nipphannāni kriyāpadāni nānappakārena niddiṭṭhāni, etāni lokiyānaṃ bhāvabhedaḥasena vohārabhedo hotīti dassanattaṃ visuṃ visuṃ vuttāni. Atthato pana kammakattubhāvākāraḥattayavasena tividhāneva. Hetukattā hi suddhakattusaṅkhāte kāraḥe tassaṅgabhāvato saṅghamaḥupagacchati, tathā kammakattā kammakāraḥe, bhāvo pana kevalo. So hi gamaḥapacanaḥavanādivasenaṅekavidhopi kriyāsabhāvattā bhedaḥaraho kāraḥantaro. Evaṃ santeḥi dabbasannissitattā dabbabhedeḥa bhijaṭṭhi. Tena pāvācane bhāvavācakaṃ padaṃ bahuvacanaḥantampi dissati. Ākhyāṭikaḥpade bhāvākāraḥavohāro niruttinayaṃ nissāya gato, atthato pana bhāvassa kāraḥatā nupaḥajjati. So hi na kiṅci janeti, na ca kriyāya nimittaṃ. Kriyānimittabhāvoyeva hi kāraḥalakkaṇaṃ. Iti mukhyato vā hetuto vā bhāvassa kāraḥatā

na labbhati. Evaṃ santepi so karaṇamattattā kārakam. Tathā hi karaṇam kāro, kriyā, tadeva kārakanti bhāvassa kārakatā daṭṭhabbā. Yasmā pana kriyānimittabhāvoyeva kārakalakkhaṇam, tasmā nāmikapade kārakalakkhaṇe bhāvakārakanti vohāraṃ pahāya kattukammakaraṇasampadānāpādānādihikaraṇānaṃ channaṃ vatthūnaṃ kattukārakakammakārakantiādi vohāro kariyati veyyākaraṇehi. Evaṃ niruttinayaṃ nissāya vuttaṃ bhāvakāraṇaṃ dve ca kammakattukārakānīti kārakattayaṃ bhavati. Taddīpakañcākyātikapadaṃ tikārakam.

Imamatthañhi sandhāya, vuttamācariyehipi;  
Mahāveyyākaraṇehi, niruttinayadassibhi.

“Yaṃ tikālaṃ tipurisaṃ, kriyāvāci tikārakam;  
Atiṅgaṃ dvivacanaṃ, tadākhyātanti vuccatī”ti.

Idha bhāvakammesu attanopaduppattiṃ keci akkharacintakā avassamicchantīti tesam mativibhāvanatthamamehi bhāvakammānaṃ kriyāpadāni attanopadavasenuddiṭṭhāni ceva niddiṭṭhāni ca. Sabbānīpi panetāni tikārakāni kriyāpadāni kriyāpadamālamicchatā parassapadattanopadavasena yojetabbāni. Pālīādīsu hi tikārakāni kriyāpadāni parassapadattanopadavasena dvidhā ṭhitāni. Seyyathidaṃ? Bhagavā sāvatthiyaṃ viharati. Samādhijjhānakusalā, vandanti lokanāyakaṃ. Monaṃ vuccati ñāṇaṃ. Atthābhisamayā dhīro, paṇḍitoti pavuccati. Kathaṃ paṭipannaṃ puggalassa rūpaṃ vibhoti vibhaviyyati. So pahīyissati. Paṇḍukambale nikkhattaṃ bhāsate tapate. Pūjako labhate pūjaṃ. Puttakāmā thiyo yācaṃ, labhante tādisaṃ suttaṃ. Asito tādi vuccate sabrahmā. Aggijādi pubbeva bhūyate. So pahīyethāpi no pahīyethāti evaṃ dvidhā ṭhitāni. Atridaṃ pālīvatthānaṃ –

Tikārakāni sabbāni, kriyāpadāni pāyato;  
Parassapadayogena, dissanti piṭakattaye.

Attanopadayuttāni, cuṇṇīyesu padesu hi;  
Atīvappāni gāthāsu, padānīti bahūni tu.

Gāthāsu cevitarāni, cuṇṇīyesu padesu ca;  
Subahūneva hutvāna, dissantīti pakāsaye.

Padānaṃ niddeso panati antiādīnaṃ tesam tesam vacanānāmanurūpena yojetabbo. Evaṃ tikārakakriyāpadāni sarūpato vavatthānato niddesato ca veditabbāni.

Idāni nopasaggākammikādivasena bhavatissa dhātussa vinicchayaṃ vadāma –

Nopasaggā akammā ca, sopasaggā akammikā;  
Sopasaggā sakammā ca, iti **bhūti** vibhāvītā.

Idaṃ tu vacanaṃ “dhamma-bhūto bhutvā”tiādīsu;  
Pattānubhavanatthaṃ me, vivajjetvā udīritaṃ.

Etena pana atthena, nopasaggasakammikam;  
Gahetvā catudhā hoti, iti ñeyyaṃ visesato.

Nopasaggā akammā ca, sopasaggā akammikā;  
**Bhūdhātu** kārite sante, ekakammā bhavanti hi.

“Bhāveti kusalaṃ dhammaṃ, vibhāvetī”timānidha;  
Dassetabbāni viññūhi, sāsanaññūhi sāsane.

Sopasaggā sakammā tu, kārītapaccaye sati;  
Dvikammāyeva hotīti, ñātappaṃ viññunā kammaṃ.

Abhibhāventi purisā, purise paṇajātikaṃ;  
Anubhāveti puriso, sampattiṃ purisaṃ iti.

Idaṃ sakammakaṃ nāma, akammakamidaṃ iti;  
Kathamamhehi ñātappaṃ, vitthārena vadetha no.

Vitthāreneva kiṃ vattaṃ, sakkomi ekadesato;  
Kathayissāmi sakkaccaṃ, vadato me nibodhatha.

Ākhyātikapadaṃ nāma, duvidhaṃ samudīritaṃ;  
Sakammakamakammañca, iti viññū vibhāvaye.

Tatra yassa payogamhi, padassa kattunā kriyā;  
Nippādītā vinā kammaṃ, na hoti taṃ sakammakaṃ.

“Pacatī”ti hi vutte tu, yena kenaci jantunā;  
Odanaṃ vā panaññaṃ vā, kiñci vatthunti ñāyati.

Yassa pana payogamhi, kammaena rahitā kriyā;  
Padassa ñāyate etaṃ, akammakanti tīraye.

“Tiṭṭhati devadatto”ti, vutte kenaci jantunā;  
Ṭhānaṃva buddhivisaṃ, kammabhūtaṃ na kiñcipi.

Sakammakapadaṃ tattha, kattāraṃ kammameva ca;  
Pakāseti yathāyoga-miti viññū vibhāvaye.

“Odanaṃ pacati poso, odano paccate sayam”;  
Iccudāharaṇā ñeyyā, avuttepi ayaṃ nayo.

Akammakapadaṃ nāma, kattāraṃ bhāvameva ca;  
Yathārahaṃ pakāseti, iti dhīropalakkhaye.

Kattāraṃ “tiṭṭhati”ccatra, sūceti bhāvanāmakam;  
“Upaṭṭhīyati” iccatra, avuttepi ayaṃ nayo.

Evaṃ sakammakākammaṃ, ñatvā yojeyya buddhimā;  
Tikammakañca jāneyya, karādo kārīte sati.

“Suvannaṃ kaṭakaṃ poso, kāreti purisa”nti ca;  
“Puriso purise gāmaṃ, rathaṃ vāheti”iccapī.

Ettha **bhavati**dhātumhi, nayo eso na labbhati;  
Tasmā dvikammakaññeva, padamettha vibhāvitaṃ.

Ediso ca nayo nāma, pāliyaṃ tu na dissati;  
Ekaccānaṃ mateneva, mayā evaṃ pakāsito.

Ettha ca “tameṇaṃ rājā, vividhā kammakāraṇā;  
Kārāpetī”ti yo pāṭho, **niddese** taṃ suniddise.



“Manussehī”’ti āharitvā, pāṭhasesaṃ sumedhaso;  
 “Sunakhehīpi khādāpentī”’, iti pāṭhassa dassanā.

Etaṃ nayaṃ vidū ñatvā, yoje pāṭhānurūpato;  
 “Suvannaṃ kaṭakaṃ poso, kāreti purisenī”’ti.

Vikaraṇappaccayāva, vuttā ettha sarūpato;  
 Sagaṇe sagaṇe tesāṃ, vuttiṃ dīpetumeva ca.

“Asmiṃ gaṇe ayaṃ dhātu, hotī”’ti tehi viññuno;  
 Viññāpetuñca aññehi, ñāpanā paccayehi na.

Tathā hi bhāvakammesu, vihito paccayo tu yo;  
 Aṭṭhavidhepi dhātūnaṃ, gaṇasmiṃ sampavattati.

**Bhū**dhātujesu rūpesu, asammohāya sotunaṃ;  
 Nānāvidho nayo evaṃ, mayā ettha pakāsito.

Ye loke appayuttā vividhavikaraṇākhyātasaddesvachekā,  
 Te patvākhyātasadde avigatavimatī hontī ñāṇīpi tasmā;  
 Accantaññeva dhīro saparahitarato sāsane daḷhapemo,  
 Yogaṃ tesāṃ payoge paṭutaramatitaṃ patthayāno kareyya.

Iti navaṅge sātṭhakathe piṭakattaye byappathagatīsu

Viññūnaṃ kosallatthāya kate saddanītipparāṇe

Savikaraṇākhyātavibhāgo nāma

Paṭhamo paricchedo.

## 2. Bhavatikriyāpadamālāvibhāga

Ito paraṃ pavakkhāmi, sotūnaṃ mativaḍḍhanaṃ;  
 Kriyāpadakkamaṃ nāma, vibhattādīni dīpayāṃ.

Tatra ākhyātikassa kriyālakkaṇattasūcikā tyādayo vibhattiyo, tā aṭṭhavidhā  
 vattamānāpañcamīsattamīparokkhāhiyyattanajjatanībhavissantī kālātipattivasena.

Tatthati anti, si tha, mi ma, te ante, se vhe, e mhe iccetā vattamānāvibhattiyo nāma.

Tu antu, hi tha, mi ma, taṃ antaṃ, su vho, e āmase iccetā pañcamīvibhattiyo nāma.

Eyya eyyuṃ, eyyāsi eyyātha, eyyāmi eyyāma, etha eraṃ, etho eyyāvho, eyyaṃ eyyāmhe iccetā  
 sattamīvibhattiyo nāma.

A u, e ttha, aṃ mha, ttha re, ttho vho, iṃ mhe iccetā parokkhāvibhattiyo nāma.

Ā ū, o ttha, aṃ mhā, ttha tthuṃ, se vhaṃ, iṃ mhase iccetā hiyyattanīvibhattiyo nāma.

Ī uṃ, o ttha, iṃ mhā, ā ū, se vhaṃ, aṃ mhe iccetā ajjatanīvibhattiyo nāma.

Ssati ssanti, ssasi ssatha, ssāmi ssāma, ssate ssante, ssase ssavhe, ssaṃ ssāmhe iccetā

bhavissantīvibhattiyo nāma.

Ssā ssaṃsu, sse ssatha, ssaṃ ssāmhā, ssatha ssiṣu, ssase ssavhe, ssiṃ ssāmhase iccētā  
kālātipattivibhattiyo nāma.

Sabbāsametāsaṃ vibhattīnaṃ yāni yāni pubbakāni cha padāni, tāni tāni parassapadāni nāma.  
Yāni yāni pana parāni cha padāni, tāni tāni attanopadāni nāma. Tattha parassapadāni vattamānā cha,  
pañcamiyo cha, sattamiyo cha, parokkhā cha, hiyyattaniyo cha, ajjatanīyo cha, bhavissantīyo cha,  
kālātipattīyo chāti aṭṭhacattālīsavidhāni honti, tathā itarāni, sabbāni tāni piṇḍitāni channavutivīdhāni.

Parassapadānamattanopadānañca dve dve padāni paṭhamamajjhimmuttamapurisā nāma. Te  
vattamānādīsu cattāro cattāro, aṭṭhannaṃ vibhattīnaṃ vasena dvattiṃsa, piṇḍitāni parimāṇāneva.

Dvīsu dvīsu padesu paṭhamamaṃ paṭhamamaṃ ekavacanaṃ, dutiyamaṃ dutiyamaṃ bahuvacanaṃ.

Tatra vattamānavibhattīnanti anti, si tha, mi ma iccētāni parassapadāni. Te ante, se vhe, e mhe  
iccētāni attanopadāni. Parassapadattanopadesupiti anti iti paṭhamapurisā, sitha iti majjhimapurisā, mi  
ma iti uttamapurisā, te ante iti paṭhamapurisā, se vhe iti majjhimapurisā, e mhe iti uttamapurisā.

Paṭhamamajjhimmuttamapurisesupi ti-iti ekavacanaṃ, anti-iti bahuvacanaṃ anti evamaṃ  
ekavacanabahuvacanaṃ kamato ñeyyāni. Evamaṃ sesāsu vibhattīsu  
parassapadattanopadapaṭhamamajjhimmuttamapurisekavacanabahuvacanaṃ ñeyyāni.

Tattha **vibhattī**ti kenatthena vibhatti? Kālādivasena dhātvatthamaṃ vibhajātīti vibhatti, syādīhi  
nāmikavibhattīhi saha sabbasaṅgāhakavasena pana sakatthaparattādhībhedo atthe vibhajātīti vibhatti,  
kammādayo vā kārake ekavacanabahuvacanasena vibhajātīti vibhatti, vibhajitabbā ñāṇenātipi  
vibhatti, vibhajanti atthe etāyātipi vibhatti, atha vā satipi jīnasāsane avibhattikaniddeso sabbena  
sabbamaṃ vibhattīhi vinā atthassā’ niddisitabbato visesena vividhena vā ākāreṇa bhajanti sevanti naṃ  
paṇḍitātīpi vibhatti. Tattha avibhattikaniddesalakkhaṇamaṃ vadāma saha payogānidassanādīhi.

Avibhattikaniddeso, nāmikesupalabbhati;  
Nākhyātesūti viññeyya-midamettha nidassanaṃ.

Nigrodhova mahārukkho, therā vādānamuttamo;  
Anūnaṃ anadhikañca, kevalamaṃ jīnasāsanaṃ.

Tatra therā-iti avibhattiko niddeso, therānaṃ ayanti therō. Ko so? Vādo. Theravādo aññesaṃ  
vādānaṃ uttamoti ayamatto veditabbo.

“Kāyo te sabba sovaṇṇo”, iccādimhipi nāmike;  
Avibhattikaniddeso, gahetabbo nayaññunā.

Avibhattikaniddeso, nanvākhyātepi dissati;  
“Bho khāda piva” iccitra, vade yo koci codako.

Yadi evamaṃ matenassa, bhavyeṃ avibhattikamaṃ;  
“Bhikkhu, bho purisi” ccādi, padampi, na hidamaṃ tathā.

“Bhikkhu, bho purisi” ccādi, **si ga** lopena vuccati;  
Tathā “khāda” tiādīni, **hi** lopena pavuccare.

Evamaṃ avibhattikaniddeso ākhyātesu na labbhati, nāmesuyeva labbhati. Tatrāpi “aṭṭha ca  
puggala dhammasā te” ti ettha chandavasena **puggala** iti rassakaraṇamaṃ daṭṭhabbamaṃ, na  
“kakusandha koṇāgamaṇo ca kassapo” ti ettha **kakusandha** iti avibhattikaniddeso viya

avibhattikaniddeso daṭṭhabbo. “Bhikkhu nisinne mātugāmo upanisinno vā hoti upanipanno vā”’ti ettha pana bhikkhūti idaṃ bhikkhumhīti vattabhattatā bhumme paccattanti pi adiṭṭhavibhattikaniddesotipi vattum yujjati. Tattha pana chandavasena katarassattā tāni padāni avibhattikaniddesapakkhampi bhajantīti vattum na yujjati.

Tattha **parassapadānīti** parassa atthabhūtāni padāni parassapadāni. Etthuttamapurisesu attano atthesupi attanopadavohāro na kariyati.

Kiñcāpi attano atthā, purisā uttamavhayā;  
Tathāpi itaresāna-mussannattāva tabbasā;  
Tabbohāro imesānaṃ, porāṇehi niropito.

**Attanopadānīti** attano atthabhūtāni padāni attanopadāni. Ettha pana paṭhamamajjhimapurisesu parassatthesupi parassapadavohāro na kariyati.

Paṭhamamajjhimā cete, parassatthā tathāpi ca;  
Itaresaṃ nirūḷhattā, tabbohārassa saccato.

Imassa panimesānaṃ, pubbavohāratāya ca;  
Tathā saṅkaradosassa, haraṇatthāya so ayaṃ;  
Attanopadavohāro, esaṃāropito dhuvaṃ.

Parassapadasaññādi-saññāyo bahukā idha;  
Porāṇehi katattātā, saññā porāṇikā matā.

Tasmā idha paṭhamapurisādīnaṃ tiṇṇaṃ purisānaṃ vacanatthaṃ na pariyesāma. Rūḷhiyā hi porāṇehi tyādīnaṃ purisasaññā vihitā.

Ekavacanabahuvacanesu pana ekassatthassa vacanaṃ **ekavacanaṃ**. Bahūnamatthānaṃ vacanaṃ **bahuvacanaṃ**. Atha vā bahuttepi sati samudāyavasena jātivāsena vā cittena sampiṇḍetvā ekīkatassatthassa ekassa viya vacanampi ekavacanaṃ, bahutte nissitassa nissayavohārena vuttassa nissayavasena ekassa viya vacanampi ekavacanaṃ, ekattalakkhaṇena bavhatthānaṃ ekavacanaṃ viya vacanampi ekavacanaṃ. Abahuttepi sati attagarukārāparicchedamātikānusandhinayapucchāsabhāgaputhucitta-samāyogaputhuārammaṇavasena ekatthassa bahūnaṃ viya vacanaṃ bahuvacanaṃ, tathā ye ye bahavo tannivāsataṃputtasāṅkhātassekassatthassa rūḷhīvasena bahūnaṃ viya vacanampi bahuvacanaṃ, ekassatthassa aññenatthena ekābhīdhānavasena bahūnaṃ viya vacanampi bahuvacanaṃ, ekassatthassa nissitavasena bahūnaṃ viya vacanampi bahuvacanaṃ, ekassatthassa ārammaṇabhedakiccabhedavasena bahūnaṃ viya vacanampi bahuvacanaṃ. Evamimehi ākārehi ekamhi vattabbe, ekamhi viya ca vattabbe ekavacanaṃ, bahumhi vattabbe, bahumhi viya ca vattabbe bahuvacanaṃ hotīti daṭṭhabbaṃ. **Puthuvacanaṃ, anekavacanaṃ** ca imasseva nāmaṃ.

Vacanesu ayaṃ attho, nāmākhyātavibhattinaṃ;  
Vasena adhigantabbo, sāsanatthagavesinā.

Tasmā tadatthaviññāpanatthaṃ idha nāmikapayogehi sahevākhyātapayoge pavakkhāma – “rājā āgacchati, sahāyo me āgacchati, ekaṃ citta” miccevamādayo ekassatthassa ekavacanapayogā. “Rājāno āgacchanti, sahāyā me āgacchanti, na me dessā ubho puttā, dve tīṇi” iccevamādayo bavhatthānaṃ bahuvacanapayogā.

“Sā senā mahatī āsi, bahujjano pasannosi, sabbo taṃ jano ojināyatu, itthigumbassa pavarā, buddhassāhaṃ vatthayugaṃ adāsīṃ, dvayaṃ vo bhikkhave desessāmi, pemaṃ mahantaṃ ratanattayassa, kare pasādañca naro avassaṃ, bhikkhusaṅgho, balakāyo, devanikāyo, ariyagaṇo”- iccevamādayo, “dvikaṃ tika” miccādayo ca samudāyavasena bavhatthānaṃ ekavacanapayogā.

Katthaci pana īdisesu thānesu bahuvacanapayogāpi dissanti. Tathā hi “pūjitā ñātisaṅghehi, devakāyā samāgatā, sabbete devanikāyā, dve devasaṅghā, tīṇi dukāni, cattāri navakāni” iccevamādayo payogāpi dissanti. Ime ekavacanavasena vattabbassa samudāyassa bahusamudāyavasena bahuvacanapayogāti gahetabbā, saṅgayhamānā ca bavhatthabahuvacane saṅgahaṃ gacchanti visuṃyeva vā, tasmā bahusamudāyāpekkhabahuvacananti etesaṃ nāmaṃ veditabbaṃ.

“Pāṇaṃ na hane, sasso sampajjati” iccevamādayo jātivasena bavhatthānaṃ ekavacanapayogā, tabbhāvasāmaññaena bavhatthānaṃ ekavacanapayogātipi vattuṃ vaṭṭati.

“Nāgaṃ raṭṭhassa pūjitaṃ, sāvattḥī saddhā ahosi pasannā” iccevamādayo nissayavasena pavattānaṃ nissayavohārena vuttānamekavacanapayogā.

“Tilakkhaṇaṃ, kusalākusalaṃ, viññāpaccayā nāmarūpaṃ, nāmarūpapaccayā saḷāyatanam, dhammavinayo, cittaseno ca gandhabbo, natiyā asati āgatigati na hoti, āgatigatiyā asati cutūpapāto na hoti” iccevamādayo ekattalakkhaṇe bavhatthānaṃ ekavacanapayogā.

“Evaṃ mayaṃ gaṇhāma, amhākaṃ pakati, padhānanti kho meghiya vadamānaṃ kinti vadeyyāma” iccevamādayo ekassatthassa attavasena bahuvacanapayogā.

“Te manussā taṃ bhikkhuṃ etadavocuṃ ‘bhuñjatha bhante’ ti, ahaṃ manussesu manussabhūtā, abbhāgatānā’ sanakaṃ adāsīm” iccevamādayo ekassatthassa garukāravasena bahuvacanapayogā.

“Appaccayā dhammā, asaṅkhatā dhammā” iccevamādayo ekassatthassa aparicchedavasena bahuvacanapayogā, aniyamitasāṅkhāvasena bahuvacanapayogā vā.

Keci pana “desanāsotapātavasena bahuvacanapayogā” tipī vadanti, taṃ na gahetabbaṃ. Na hi tathāgato satisampajaññarahito dhammaṃ deseti, yutti ca na dissati “mātikāyaṃ pucchāyaṃ vissajjane cāti tīsupi thānesu appaccayādiddhamme desento sathā punappunaṃ bahuvacanavasena desanāsote patitvā dhammaṃ deseti” ti.

“Katame dhammā appaccayā” iccevamādayo ekassatthassa mātikānusandhinayena bahuvacanapayogā.

“Ime dhammā appaccayā” iccevamādayo ekassatthassa pucchānusandhinayena bahuvacanapayogā.

“Katame dhammā no parāmāsā, te dhamme thapetvā avasesā kusalākusalābyākatā dhammā” iccevamādayo ekassatthassa pucchāsabhāgena bahuvacanapayogā.

“Atthi bhikkhave aññaeva dhammā gambhīrā duddasā duranubodhā santā paṇītā atakkāvacarā nipuṇā paṇḍitavedanīyā, ye tathāgato sayam abhiñña sacchikatvā pavedeti” ti ayamekassatthassa puthucittasamāyogaputhuārammaṇavasena bahuvacanapayogo.

“Ekaṃ samayaṃ bhagavā sakkesu viharati kapilavatthusmiṃ mahāvane,

Santi puttā videhānaṃ, dīghāvu raṭṭhavaḍḍhano;  
Te rajjaṃ kārayissanti, mithilāyaṃ pajāpati” –

Icevamādayo saddā ye ye bahavo, tannivāsataṃputtasāṅkhātassekatthassa rūḷhīvasena bahuvacanapayogā.

“Sāriputtamoggallāne āmantesi ‘gacchatha tumhe sāriputtā kīṭāgiriṃ gantvā assajipunabbasukānaṃ bhikkhūnaṃ kīṭāgiriṃ pabbājanīyakammaṃ karotha, tumhākaṃ ete

saddhivihārino'ti”, “kacci vo kulaputtā, etha byagghā nivattavho” iccevamādayo ekassatthassa aññenatthena ekābhīdhānavasena bahuvacanapayogā.

“Mañcā ukkuṭṭhiṃ karonti” iccevamādayo ekassatthassa nissitavasena bahuvacanapayogā.

“Cattāro satipaṭṭhānā”ti ayamārammaṇabhedena ekassatthassa bahuvacanapayogo.

“Cattāro sammappadhānā”ti ayamā pana kiccabhedena ekassatthassa bahuvacanapayogo.

Tattha ekatthe kavacaṃ, samudāyāpekkhekavacaṃ, jātyāpekkhekavacaṃ, tannissayāpekkhekavacaṃ, ekattalakkaṇekavacaṃ pañcavidhaṃ ekavacaṃ bhavati. Ettha pana jātyāpekkhekavacaṃ atthato sāmāññāpekkhekavacanamevāti daṭṭhabbaṃ.

Bavhatthabahuvacaṃ, bahusamudāyāpekkhabahuvacaṃ, attabahuvacaṃ, garukārabahuvacaṃ, aparicchedabahuvacaṃ, mātikānusandhinayabahuvacaṃ, pucchānusandhinayabahuvacaṃ, pucchāsabhāgabahuvacaṃ, puthucittasamāyogaputhuārammaṇabahuvacaṃ, tannivāsabahuvacaṃ, taṃputtabahuvacaṃ, ekābhīdhānahuvacaṃ, tannissitāpekkhabahuvacaṃ, ārammaṇabhedabahuvacaṃ, kiccabhedabahuvacaṃ pannarasavidhaṃ bahuvacaṃ bhavati. Iccevaṃ vīsadhā sabbāni ekavacanabahuvacaṃ sāṅgahitāni. Atridaṃ pālīvavattānaṃ –

Ekatthe deka vacana-ñcitarasmitarampi ca;  
Samudāyajātiēkatta-lakkhaṇekavacopi ca;  
Sāṭṭhakathe piṭakamhi, pāṭhe pāyena dissare.

Garumhi cattanekasmim, bahuvacanakaṃ pana;  
Pālīyaṃ appakaṃ aṭṭha-kathāṭṭikāsu taṃ bahum.

Tathā hi bahukaṃ deka-vacanaṃyeva pālīyaṃ;  
Garumhi cattanekasmim, idamettha nidassanaṃ.

“Namo te purisajāñña, namo te purisuttama;  
Tava sāsanaṃāgama, pattomhi amataṃ padaṃ”.

Iccevamādayo pāṭhā, bahudhā jinasāsane;  
Dissantūti vijāneyya, vidvā akkharacintako.

Sāṭṭisayaṃ garukārā-rahassāpi mahesino;  
Ekavacanayogena, niddeso dissate yato.

Tato vohāra kusalo, kareyyatthānurūpato;  
Ekavacanayogaṃ vā, itaraṃ vā sumedhaso.

Pāyena tannivāsamhi, bahuvacanakaṃ ṭhitam;  
Taṃputte appakaṃ tanni-ssayekavacanampi ca.

Puthucittāpariccheda-mātikāsandhiādisu;  
Bahuvacanakañcāpi, appakanti pakāsaye.

Ekābhīdhānato kiccā, tathā gocaratopi ca;  
Bahuvacanakaṃ tanni-ssitāpekkhañca appakaṃ.

Iccevaṃ sappayogaṃ tu, ñatvāna vacanadvayaṃ;  
Kātabbo pana vohāro, yathāpālī vibhāvinā.

Idāni kālādivasena ākhyātappavattiṃ dīpayissāma – kālākārapurisaparidīpakam kriyālakkaṇaṃ **ākhyātikam**. Tatra **kālanti** atītānāgatapaccuppannavasena tayo kālā, atītānāgatapaccuppannāṇattiparikappakālātipattivasena pana cha, te ekekā tipurisakā.

Vuttappakārakālesu, yadidaṃ vattate yato;  
Ākhyātikam tato tassa, kālādīpanatā matā.

**Kārakanti** kammakattubhāvā. Te hi upacāramukhyasabhāvavasena karonti karaṇanti ca “kārakā”ti vuccanti. Teva yathākkamaṃ kriyānimitta taṃsādhaka taṃsabhāvāti vedītabbā.

Kammaṃ kattā ca bhāvo ca, iccevaṃ kārakā tidhā;  
Vibhattipaccayā ettha, vuttā nāññatra saccato.

“Paribhaviyyati”ccādī, kamme sījjhanti kārake;  
“Sambhavatī”tiādīni, sījjhare kattukārake.

“Vibhaviyyati”iccādī, bhāve sījjhanti kārake;  
Tividhesvevamesu, vibhattipaccayā matā.

Kārakattayamuttaṃ yaṃ, ākhyātaṃ natthi sabbaso;  
Tasmā taddīpanattampi, tassākhyātassa bhāsitaṃ.

Kārakattaṃ tu bhāvassa, sacepi na samīritaṃ;  
Kārakalakkhaṇe tena, bhāvena ca avatthunā.

Kriyānipphatti natthīti, yuttitopi ca natthi taṃ;  
Tathāpākhyātike tassa, tabbōhāro niruttiyaṃ;  
Patiṭṭhitanayovāti, mantvā amhehi bhāsito.

**Purisoti** ekavacanabahuvacanakā paṭhamamajjhimmuttamapurisā. Tattha paṭhamapuriso ākhyātapadena tulyādhikaraṇe sādhakavācāke vā kammavācāke vā **tumhā’ mhasaddavajjite** paccattavacanabhūte nāmamhi “abhinīhāro samijjhati, bodhi vuccati catūsu maggesuñña”ntiādīsu viya payujjamānepi, taṭṭhānīyatte satī “bhāsati vā karoti vā, pīṭiyakkhoti maṃ vidū, vuccatīti vacana”ntiādīsu viya appayujjamānepi sabbadhātūhi paro hoti. Katthaci pana pāḷipadese nāmassa appayuttattā paṭhamapurisapayogatto duranubodho bhavati, yathā “dukkhaṃ te vedayissāmi, tattha assāsayaṃtu ma”nti. Tathā hi ettha “pādā”ti pāṭhaseso, tasmīṃ dukkhasāsanārocane vattum avisahanavasena kilamantaṃ maṃ devassa ubho pādā assāsentu, vissattho kathehīti maṃ vadathāti adhippāyo ca bhavati.

Adhippāyo sudubbodho, yasmā vijjati pāḷiyaṃ;  
Tasmā upaṭṭhahaṃ gaṇhe, garuṃ garumataṃ vidū.

Tatrimāni **bhūdhātādhikārattā bhūdhātuvasena** nidassanapadāni. So paribhavati, te paribhavanti, paribhavati, paribhavanti. Sapatto abhibhaviyate, sabbā vityā’ nubhūyate, abhibhaviyate, anubhūyateti. Yattha satipi nāmassa sādhakavācākatte apaccattavacanattā ākhyātapadena tulyādhikaraṇatā na labbhanti, tattha kammavācākaṃ paccattavacanabhūtaṃ tulyādhikaraṇapadaṃ paṭicca paṭhamapurisādayo tayo labbhanti. Taṃ yathā? Paribhaviyyate puriso devadattena, paribhaviyyase tvaṃ devadattena, paribhaviyyamhe mayaṃ akusalehi dhammehi. Ettha panidaṃ vacanaṃ na vattabbaṃ “nindanti tuṇhimāsina”ntiādīsu satipi nāmassa kammavācākatte apaccattavacanattā ākhyātapadena tulyādhikaraṇatā na labbhanti paṭhamapurisuppatti na siyā”ti. Kasmāti ce? “Nindanti tuṇhimāsina”ntiādīsu “janā”ti ajjhāharitabbassa sādhakavācākassa nāmassa saddhimākhyātapadena tulyādhikaraṇabhāvassa icchitattā. Evamuttarāpi nayo.

Majjhimapuriso ākhyātapadena tulyādhikaraṇe sādhakavācāke vā kammavācāke vā

paccattavacanabhūte **tumhasadde** payujjamānēpi, taṭṭhāniyatte sati appayujjamānēpi sabbadhātūhi paro hoti. Tvaṃ atibhvasi, tumhe atibhavatha, atibhvasi, atibhavatha. Tvaṃ paribhaviyase devadattena, tumhe paribhaviyavhe. Yattha satipi **tumhasaddassa** sādhakavācakatte apaccattavacanattā ākhyātapadena tulyādhikaraṇatā na labbhati, na tattha majjhimapuriso hoti. Itare pana dve honti kammavācakaṃ paccattavacanabhūtaṃ tulyādhikaraṇapadaṃ paṭicca. Taṃ yathā? Tayā abhibhaviyate sapatto, tayā abhibhaviye ahaṃ.

Uttamapuriso ākhyātapadena tulyādhikaraṇe sādhakavācāke vā kammavācāke vā paccattavacanabhūte **amhasadde** payujjamānēpi, taṭṭhāniyatte sati appayujjamānēpi sabbadhātūhi paro hoti. Ahaṃ paribhavāmi, mayāṃ paribhavāma, paribhavāmi, paribhavāma. Ahaṃ paribhaviyyāmi akusalehi dhammehi, mayāṃ paribhaviyyāma, paribhaviyyāmi, paribhaviyyāma. Yattha satipi **amhasaddassa** sādhakavācakatte apaccattavacanattā ākhyātapadena tulyādhikaraṇatā na labbhati, na tattha uttamapuriso hoti. Itare pana dve honti kammavācakaṃ paccattavacanabhūtaṃ tulyādhikaraṇapadaṃ paṭicca. Taṃ yathā? Mayā anubhaviyate sampatti, mayā abhibhaviyase tvaṃ. Evaṃ yattha yattha sādhakavācakānaṃ vā kammavācakānaṃ vā nāmādīnaṃ paccattavacanabhūtānaṃ ākhyātapadehi tulyādhikaraṇatte laddhe tattha tattha paṭhamapurisādayo labbhanti, tasmā nāmādīnaṃ paccattavacanabhūtānaṃ tulyādhikaraṇabhāvoyeva paṭhamapurisādīnamuppattiyā kāraṇaṃ.

Dvinnaṃ tiṇṇaṃ vā purisānamekābhīdhāne paro puriso gahetabbo. Ettha ekābhīdhānaṃ nāma ekato abhīdhānaṃ ekakālābhīdhānaṃ. Taṅca kho **casaddapayogeyeva**, acasaddapayoge bhinnakālābhīdhāne taggahaṇābhāvato. “Tumhe atthakusalā bhavatha, mayamatthakusalā bhavāma” iccevaṃādayo tappayogā. Tattha tumhe atthakusalā bhavatha – iccetasmiṃ vohāre “so ca atthakusalo bhavati, tvaṅca atthakusalo bhavasi, tumhe atthakusalā bhavathā”ti evaṃ dvinnamekābhīdhāne paro puriso gahetabbo. “Mayamatthakusalā bhavāma” iccetasmiṃ pana “so ca atthakusalo bhavati, ahaṅca atthakusalo bhavāmi, mayamatthakusalā bhavāmā”ti vā “tvaṅca atthakusalo bhavasi, ahaṅca atthakusalo bhavāmi, mayamatthakusalā bhavāmā”ti vā evampi dvinnamekābhīdhāne paro puriso gahetabbo. “So ca atthakusalo bhavati, tvaṅca atthakusalo bhavasi, ahaṅca atthakusalo bhavāmi, mayamatthakusalā bhavāmā”ti vā “so ca atthakusalo bhavati, te ca atthakusalā bhavanti, tvaṅca atthakusalo bhavasi, tumhe ca atthakusalā bhavatha, ahaṅca atthakusalo bhavāmi, mayamatthakusalā bhavāmā”ti vā evaṃ tiṇṇamekābhīdhāne paro puriso gahetabbo.

Aparopi atthanayo vuccati – “tvaṅca atthakusalo bhavasi, so ca atthakusalo bhavati, tumhe atthakusalā bhavathā”ti vā “ahaṅca atthakusalo bhavāmi, so ca atthakusalo bhavati, mayamatthakusalā bhavāmā”ti vā iminā nayena anekappabhedo atthanayo. Evaṃ sesāsu vibhattīsu pañcamīsattamiyādīsu paropuriso gahetabbo. Sabbesu ca kriyāpadesu bavhatthavācākesu bahuvacanantesu, na pana bahuvacanantesupi ekassattano vācākesu garukātabbassekassatthassa vācākesu ca kriyāpadesu. Ettha codanāsandīpaniyo imā gāthā –

“Tvaṅca bhavasi so cāpi, bhavati”ccādibhāsane;  
“Tumhe bhavatha” iccādi, paroposo kathaṃ siyā?;

“Ahaṃ bhavāmi so cāpi, bhavati”ccādibhāsane;  
“Mayāṃ bhavāma”iccādi, uttamo ca kathaṃ siyā?;

Ettha ca vuccate –

Pacchā vutto paro nāma, saññāya paṭipāṭiyā;  
Evaṃ pana gahetabbo, paropurisanāmako.

Paṭhamamhā paro nāma, majjhimo uttamopi ca;  
Majjhimamhā paro nāma, uttamo puriso ruto.

Evaṃ tu gahaṇaṅhettha, vohārassānulomakaṃ;  
Doso taḍānulomamhi, gahaṇasmim na vijjati.

“Tvañca bhaddhe sukhī hohi, eso cāpi mahāmigo”;  
Iti pātho yato diṭṭho, tasmā evaṃ vademase.

“Tumhe dve sukhitā hotha”, iccattho tathā dissati;  
Evampyaṃ nayo vutto, attanomatīyā mama.

Attanomati kiñcāpi, kathitā sabbadubbālā;  
Tathāpi nayamādāya, kathitattā akopiya.

“Dhammena rajjaṃ kārentaṃ, raṭṭhā pabbājayittha maṃ;  
Tvañca jānapadā ceva, negamā ca samāgatā”.

“Ahañca maddidevī ca, jālikāñhājina cubho;  
Aññamaññaṃ sokanudā, vasāma assame tadā”.

Etā gāthāpi etassa, atthassa pana sādhiṇā;  
Tāsu vuttanayeneva, attho supākaṭo siyā;  
Evaṃ viññūhi viññeyyaṃ, bahunā bhāsitenā kiṃ.

Ākārena manāpena, kathane yena kenaci;  
Na virujjhati ce attho, taṃ pamāṇaṃ sudhīmataṃ.

Purisattayato eso, paropurisanāmako;  
Nupalabbhati paccekaṃ, tadantogadhatova yaṃ.

Pāṭavattāya sotūnaṃ, vohāratthesu sabbaso;  
Visuṃ alabbhamānopi, labbhamānova uddhaṭo.

Saṅkhepatopettha purisappavatti evaṃ upalakkhitabbā “**amh**avacanatthe uttamo,  
**tumh**avacanatthe majjhimo, aññesaṃ vacanatthe paṭhamo”’ti.

Tyādīnaṃ purisasaññā, yasmā vuttā tato idaṃ;  
Tabbantākhyātikaṃ ñeyyaṃ, purisaparidīpakāṃ.

Evaṃ sabbathāpi ākhyātikassa kālakārapurisaparidīpanatā vuttā.

**Kriyālakkaṇanti** ettha kathaṃ ākhyātikassa kriyālakkaṇatā veditabbā?

Lakkhiyati kriyāyetaṃ, kriyā vā assa lakkhaṇaṃ;  
Kriyālakkaṇatā evaṃ, veditabbā tathā hi ca.

“Gacchati”’ccādikaṃ sutvā, kriyāsandīpanaṃ padaṃ;  
“Ākhyātika”’nti dhīrehi, ākhyātaññūhi saññitaṃ.

Lakkhaṇaṃ hoti nāmassa, yathā satvābhīdhānatā;  
Kriyābhīdhānatā evaṃ, ākhyātasēva lakkhaṇaṃ.

Atthato pana etassa, kriyāvācakatā idha;  
Lakkhaṇaṃ iti viññeyyaṃ, lakkhaṇaññūhi lakkhitaṃ.

“Kiṃ karosī”’ti puṭṭhassa, “pacāmi”’ccādinā “ahaṃ”’;  
Paṭivācāya dānena, kriyāvācakatā matā.

Evaṃākhyātikassa kriyālakkaṇatā veditabbā;



Idāni kālesu vibhattippavatti evaṃ veditabbā –

Paccuppannamhi kālasmiṃ, vattamānā pavattati;  
Āsiṭṭhānāpanatthesu, paccuppannamhi pañcamī.

Paccuppanne parikappā-numatyatthesu sattamī;  
Appaccakkhe atītamhi, parokkhā sampavattati.

Hiyyo pabhuti kālasmiṃ, atītamhi pavattati;  
Paccakkhe vā apaccakkhe, hiyyattani niruttitā.

Ajjappabhuti kālasmiṃ, atītamhi pavattati;  
Paccakkhe vā apaccakkhe, samīpejjatanavhayā.

Anāgate bhavissantī, kālasmiṃ sampavattati;  
Kriyātipannamattamhi, tīte kālātipattikā;  
Anāgatepi hotīti, niruttaññūhi bhāsītā.

Evaṃ kālesu vibhattippavattimñ natvā ye te suttantesu vicittā  
suvisadavipulatikhīṇabuddhivisayabhūtā payogā dissanti, tesu pāṭavamicchantehi tyādikkamena  
vuccamānā kriyāpadamālā sallakkhitabbā – bhavati, bhavanti. Bhavasi, bhavatha. Bhavāmi,  
bhavāma. Bhavate, bhavante. Bhavase, bhavavhe. Bhave, bhavāmhe. Ayaṃ aññayogādirahitā  
kriyāpadamālā.

Dissanti ca suttantesu atthasambhavepi aññayogādirahitāni kriyāpadāni. Seyyathidaṃ? “Sabbe  
saṅkhārā aniccāti, yadā paññāya passati. Yaṃ maṃ bhaṇasi sārathi. Aññaṃ sepaṇṇi gacchāmi”  
iccevamādīni etassatthassa paridīpaniyā kriyāpadamālā.

Ettha tividho kriyāpadesu yogo **ta**yogo, **ma**yogo, aññayogo ca. Tattha majjhimapurisā  
**ta**yogavasena gahetabbā, uttamapurisā **ma**yogavasena. Paṭhamapurisā aññayogavasena.  
Tyādīnamettha paṭipāṭiyā ayaṃ anugīti –

Aññayogena paṭhamā, **ta**yogena tu majjhimā;  
Mayogenuddamā honti, gahetabbā vibhāvinā.

Sotūnaṃ payogesū kosallatthaṃ aññayogādisahitamaparampi kriyāpadamālaṃ vadāma – so  
bhavati, te bhavanti. Tvaṃ bhavasi, tumhe bhavatha. Ahaṃ bhavāmi, mayaṃ bhavāma. So bhavate,  
te bhavante. Tvaṃ bhavase, tumhe bhavavhe. Ahaṃ bhave, mayaṃ bhavāmhe. Ayaṃ  
aññayogādisahitā kriyāpadamālā.

Dissanti ca suttantesu aññayogādisahitānipi kriyāpadāni. Seyyathidaṃ? “**Ya**ṃpāyaṃ deva  
kumāro suppatiṭṭhitapādo, idampimassa mahāpurisassa mahāpurisalakkhaṇaṃ bhavati, tassimāni  
satta ratanāni bhavanti. Yo dandhakāle tarati, taraṇīye ca dandhati, tvaṃsī ācariyo mama, ahampi  
daṭṭhukāmosmi, pitaraṃ me idhāgataṃ” iccevamādīni etassatthassa paridīpaniyā kriyāpadamālā.

Yo **tum**hasaddena vattabbe atthe nipatati, na pana hoti tumhatthavācako, neso saddo  
kriyāpadassa **ta**yogasahitattaṃ sādheti, aññadatthu aññayogasahitattaññeva sādheti. Yo ca  
**am**hasaddena vattabbe atthe nipatati, na pana hoti amhatthavācako, na sopi saddo kriyāpadassa  
**ma**yogasahitattaṃ sādheti, aññadatthu aññayogasahitattaññeva sādheti.

Tatra **tum**hasaddena tāva vattabbatthe – “na bhavaṃ eti puññatthaṃ, sivrājassa dassanaṃ.  
Māyasmā samaggassa saṅghassa bhedāya parakkamī. Idha bhante bhagavā paṃsukūlaṃ dhovatū”ti  
iccevamādāyo payogā. **Am**hasaddena pana vattabbatthe “upālī taṃ mahāvīra, pāde vandati satthuno.  
Sāvako te mahāvīra, saraṇo vandati satthuno”ti ca iccevamādāyo payogā. Idametthupalakkhitabbaṃ

“tvam tumhe aham maya”nti atthadīpaka **tayoga mayogato añño aññatthadīpano payogoyeva aññayogo nāma, tattha paṭhamapuriso bhavati**.

Yajjevam “sabbāyasam kūṭamatippamāṇam, paggayha so tiṭṭhasi antalikkhe. Esa sutvā pasīdāmi, vaco te isisattamā”tiādīsu katham. Ettha hi majjhimuttamapurisasambhavoyeva dissati, na tu paṭhamapurisasambhavoti? Vuccate – “sabbāyasam kūṭamatippamāṇam, paggayha so tiṭṭhasi antalikkhe”tiādīsu “so”tiādīkassa nāmasaddassa **tumha’ mhasaddassatthavācakasaddehi** “tiṭṭhasī”tiādīnam syādyantānam padānam dassanato accantamajjhāharitabbehi samānādhikarāṇattā tagguṇabhūtattā ca majjhimuttamapurisasambhavo samadhigantabbo. Idisesu payogesu syādyantānam dassanavasena avijjamānānīpi ajjhāharitabbāni “tvamaha”miccādīni padāni bhavanti. Katthaci pana paripuṇṇāni dissanti “sātvaṃ vaṅkamanuppattā, katham maddi karissasi. So aham vicarissāmi, gāmā gāmaṃ purā pura”nti iccevamādisu.

Ākhyātikassa kriyālakkaṇattā aliṅgabhedattā ca tiṇṇam liṅgānam sādharmaṇabhāvaparidīpanattham aparampi kriyāpadamālam vadāma –

Puriso bhavati, kaññā bhavati, cittaṃ bhavati, purisā bhavanti, kaññāyo bhavanti, cittāni bhavanti. Bho purisa tvam bhavasi, bhoti kaññe tvam bhavasi, bho citta tvam bhavasi, bhavanto purisā tumhe bhavatha, bhotiyo kaññāyo tumhe bhavatha, bhavanto cittāni tumhe bhavatha. Aham puriso bhavāmi, aham kaññā bhavāmi, aham cittaṃ bhavāmi, mayaṃ purisā bhavāma, mayaṃ kaññāyo bhavāma, mayaṃ cittāni bhavāma.

Esa nayo attanopadesu, sesavibhattīnam sabbapadesupi. Ayamākhyātikassa tiṇṇam liṅgānam sādharmaṇabhāvaparidīpanī kriyāpadamālāva.

Vuttañhetam **niruttipiṭake** “kriyālakkaṇamākhyātikamaliṅgabhedā”miti. Tatra **aliṅgabhedam**iti ko attho? Itthipumanapūṃsakānam avisesattho vuccate “aliṅgabhedā”miti. Yathā “puriso gacchati, kaññā gacchati, cittaṃ gacchati”ti. Catudhā uddiṭṭhakriyāpadesu yathā “bhavati”ti akārānantaratyantapadam gahetvā “bhavati bhavanti bhavasi”tiādīnā kriyāpadamālā sabbathā katā, evaṃ “ubbhavati”ccādīnīpi akārānantaratyantapadāni gahetvā “ubbhavati ubbhavanti ubbhavasi”tiādīnā kriyāpadamālā sabbathā kātābbā. “Bhoti sambhoti”tiādīni pana okārānantaratyantapadāni, “bhāveti vibhāveti”tiādīni ca ekārānantaratyantapadāni gahetvā pālīnayānusāreṇeva padamālā kātābbā, nayidha vuttanayānusāreṇa. Idisesu hi ṭhānesu duranubodhā kriyāpadagati. Ato labbhamānavasena kriyāpadamālā kātābbā. Na hi loke lokiyā sabbe dhātusadde paccekaṃ sabbehipi channavutiyā vacanehi yojetvā vadanti, evaṃ avadantānampi nesaṃ kathā aparipuṇṇā nāma na hoti, tasmā vajjetabbaṭṭhānam vajjetvā yathāsambhavaṃ padamālā kātābbā. Evaṃ pañcamiyādīsūpi vibhattīsu. Ayam vattamānavibhattivasena kriyāpadamālāniddeho.

Ito paṭṭhāya pana yathuddiṭṭhapadāneva pariṇāmetvā pariṇāmetvā pañcamiyādīnam mātikābhāvena gahetābbāni. Idāni pana tayogādisahitāsahitavasena dvidhā kriyāpadamālāyo dassessāma kvacādesavasena sambhūtāni ca rūpantarāni sotūnam sukhadhāraṇatthañceva purisappayoge asammoḥatthañca.

Bhavatu, bhavantu. Bhavāhi, bhava, bhavatha. Bhavāmi, bhavāma. Bhavataṃ, bhavantaṃ. Bhavassu, bhavavho. Bhave, bhavāse. So bhavatu, te bhavantu. Tvam bhavāhi, bhava, tumhe bhavatha. Aham bhavāmi, mayaṃ bhavāma. So bhavataṃ, te bhavantaṃ. Tvam bhavassu, tumhe bhavavho. Aham bhave, mayaṃ bhavāse. Ayam pañcamīvibhattivasena kriyāpadamālāniddeho.

Bhaveyya, bhave, bhaveyyuṃ. Bhaveyyāsi, bhaveyyātha. Bhaveyyāmi, bhaveyyāma, bhavemu. Bhavetha, bhaveram. Bhavetho, bhaveyyāvho. Bhaveyyaṃ, bhaveyyāme iti vā, so bhaveyya, bhave, te bhaveyyuṃ. Tvam bhaveyyāsi, tumhe bhaveyyātha. Aham bhaveyyāmi, mayaṃ bhaveyyāma, bhavemu. So bhavetha, te bhaveram. Tvam bhavetho, tumhe bhaveyyāvho. Aham bhaveyyaṃ, mayaṃ bhaveyyāme iti vā. Ayam sattamīvibhattivasena kriyāpadamālāniddeho.

Babhūva, babhūvu. Babhūve, babhūvittha. Babhūvaṃ, babhūvimha. Babhūvittha, babhūvire. Babhūvittho, babhūvivho. Babhūviṃ, babhūvimhe iti vā, so babhūva, te babhūvu. Tvaṃ babhūve, tumhe babhūvittha. Ahaṃ babhūvaṃ, mayaṃ babhūvimha. So babhūvittha, te babhūvire. Tvaṃ babhūvittho, tumhe babhūvivho. Ahaṃ babhūviṃ, mayaṃ babhūvimhe iti vā. Ayaṃ parokkhāvibhattivāsena kriyāpadamālāniddeṣo.

Abhavā, abhavū. Abhavo, abhavattha. Abhavaṃ, abhavamhā. Abhavattha, abhavatthum. Abhavase, abhavavhaṃ. Abhaviṃ, abhavamhase iti vā, so abhavā, te abhavū. Tvaṃ abhavo, tumhe abhavattha. Ahaṃ abhavaṃ, mayaṃ abhavamhā. So abhavattha, te abhavatthum. Tvaṃ abhavase, tumhe abhavavhaṃ. Ahaṃ abhaviṃ, mayaṃ abhavamhase iti vā. Ayaṃ hiyyattanīvibhattivāsena kriyāpadamālāniddeṣo.

Abhavi, abhavuṃ. Abhavo, abhavittha. Abhaviṃ, abhaviṃhā. Abhavā, abhavū. Abhavase, abhavivhaṃ. Abhavhaṃ, abhaviṃhe iti vā, so abhavi, te abhavuṃ. Tvaṃ abhavo, tumhe abhavittha. Ahaṃ abhaviṃ, mayaṃ abhaviṃhā. So abhavā, te abhavū. Tvaṃ abhavase, tumhe abhavivhaṃ. Ahaṃ abhavaṃ, mayaṃ abhaviṃhe iti vā. Ayaṃ ajjatanīvibhattivāsena kriyāpadamālāniddeṣo.

Ettha panajjatanīyā **uṃ**vacanassa **iṃsumā**desavasena bhavatino rūpantarānīpi veditabbāni. Seyyathidaṃ? Te bhaviṃsu, samubbhaviṃsu, pabhaviṃsu, parābhaviṃsu, sambhaviṃsu, pātubhaviṃsu, pātubbhaviṃsu, imāni akammakapadāni. Paribhaviṃsu, abhibhaviṃsu, adhibhaviṃsu, atibhaviṃsu, anubhaviṃsu, samanubhaviṃsu, abhisambhaviṃsu.

“Adhibhosu”nti rūpampi, yasmā dissati pāḷiyaṃ;  
Tasmā hi nayato ñe yyaṃ, “paribhosu”ntiādikaṃ.

Tatrāyaṃ pāḷi – “evaṃvihāriṇcāvuso bhikkhuṃ rūpā adhibhosuṃ, na bhikkhu rūpe adhibhosī”ti. Imāni sakammakapadāni, evamajjatanīyā **uṃ**vacanassa **iṃsumā**desavasena bhavatino rūpantarāni bhavanti. Apica

“Anvabhi” itirūpampi, ajjatanīyā padissati;  
Tasmā hi nayato ñeyyaṃ, “ajjhabhi”ccādikampi ca.

Tatrāyaṃ pāḷi – so tena kammaṃ divaṃ samakkami, sukhañca khiḍḍaratiyo ca anvabhīti. Tattha **anvabhīti** anu abhīti chedo. **Anūti** upasaggo. **Abhīti** ākhyātikapadanti daṭṭhabbaṃ.

Bhavissati, bhavissanti. Bhavissasi, bhavissatha. Bhavissāmi, bhavissāma. Bhavissate, bhavissante. Bhavissase, bhavissavhe. Bhavissaṃ, bhavissāme iti vā, so bhavissati, te bhavissanti. Tvaṃ bhavissasi, tumhe bhavissatha. Ahaṃ bhavissāmi, mayaṃ bhavissāma. So bhavissate, te bhavissante. Tvaṃ bhavissase, tumhe bhavissavhe. Ahaṃ bhavissaṃ, mayaṃ bhavissāme iti vā. Ayaṃ bhavissantīvibhattivāsena kriyāpadamālāniddeṣo.

Abhavissā, abhavissaṃsu. Abhavisse, abhavissatha. Abhavissaṃ, abhavissāmhā. Abhavissatha, abhavissisu. Abhavissase, abhavissavhe. Abhavissaṃ, abhavissāmhase iti vā, so abhavissā, te abhavissaṃsu. Tvaṃ abhavisse, tumhe abhavissatha. Ahaṃ abhavissaṃ, mayaṃ abhavissāmhā. So abhavissatha, te abhavissisu. Tvaṃ abhavissase, tumhe abhavissavhe. Ahaṃ abhavissaṃ, mayaṃ abhavissāmhase iti vā. Ayaṃ kālātipattivibhattivāsena kriyāpadamālāniddeṣo.

Vohārabhedakusalena subuddhinā yo,  
Kaccāyanena kathito jinasāsanatthaṃ;  
Tyādikkamo tadanugaṃ kiriyāpadānaṃ,  
Katvā kamo bhavatidhātuvasena vutto.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe

Bhavatino kriyāpadamālāvibhāgo nāma

Dutiyo paricchedo.

### 3. Pakiṇṇakavinicchaya

Ito paraṃ pavakkhāmi, pakiṇṇakavinicchayaṃ;  
Sappayogesu atthesu, viññūnaṃ pāṭavattaya.

Tattha atthuddhāro, atthasaddacintā, atthātisayayogo, samānāsamānavasenavacanasāṅgaho, āgamalakkhaṇavasena vibhattivacanasāṅgaho, kālavasena vibhattivacanasāṅgaho, kālasāṅgaho, pakaraṇasaṃsandana, vattamānādīnaṃ vacanattavibhāvanā cāti navadhā vinicchayo veditabbo.

Atthuddhāre tāva samānasutikapadānamatthuddhāraṇaṃ karissāma. Etthākyātapadasaṅgānaṃ **bhotisadda bhavesaddā**namattho uddharitabbo. Tathā hete nāmikapadasaṅgānaṃ aparehi **bhotisadda bhavesaddehi** samānasutikāpi asamānatthā ceva honti asamānavibhattikā ca. Sāsanasmīhi keci saddā aññamaññaṃ samānasutikā samānāpi asamānatthā asamānapavattinimittā asamānalingā asamānavibhattikā asamānavacanakā asamānantā asamānakālikā asamānapadajātikā ca bhavanti.

Tesamasamānatthatte “sabbañhi taṃ jīrati dehanissitaṃ. Appassutāyaṃ puriso, balibaddova jīrati. Santo tasito. Pahu santo na bharati. Santo ācikkhate muni. Santo sappurisā loke. Santo saṃvijjamaṇā lokasmi”nti evamādayo payogā. Ettha **jīratisaddadvayaṃ** yathāsambhavaṃ navabhāvāpagamavaḍḍhanavācakaṃ. **Santosaddapañcakaṃ** yathāsambhavaṃ parissamappattasamānopasantopalabbhamānavācakanti daṭṭhabbaṃ.

Asamānapavattinimittatte pana “akataññū mittadubbhī, assaddho akataññūcā”tievamādayo. Ettha ca **akataññūsaddadvayaṃ** katākatājānanajānanapavattinimittaṃ paṭicca sambhūtattā asamānapavattinimittakanti daṭṭhabbaṃ.

Asamānalingatte “sukhī hotu pañcasikha sakko devānamindo. Tvañca bhadde sukhī hohi. Yattha sā upaṭṭhito hoti. Mātā me atthi, sā mayā poseṭabbā”ti evamādayo. Ettha **sukhīsaddadvayaṃ** sāsaddadvayañca pumitthilingavasena asamānalinganti daṭṭhabbaṃ.

Asamānavibhattikatte “āhāre udare yato. Yato pajānāti sahetudhamma”nti evamādayo. Ettha **yatosaddadvayaṃ** paṭhamāpañcamīvibhattisahitattā asamānavibhattikanti daṭṭhabbaṃ.

Asamānavacanakatte ime payogā –

“Yāya mātu bhato poso, imaṃ lokaṃ avekkhati;  
Tampi pāṇadadiṃ santiṃ, hanti kuddho puthujjano”ti

Ādīsu **hantisaddo** ekavacano.

“Ime nūna araññasmiṃ, migasaṅghāni luddakā;  
Vākuraṃhi parikkhippa, sobbhaṃ pāṭetvā tāvade;  
Vikkosamaṇā tībbaṃhi, hanti nesaṃ varam varam”nti.

Ādīsu pana bahuvacano. “Sīlavā vattasampanno. Etha tumhe āyasmanto sīlavā hotha. Santo danto niyato brahmacārī. Santo have sabbhi pavedayanti. Mahārājā yasassī so. Cattāro mahārājā”ti evamādīsu **sīlavāsaddā**dayo ekavacanabahuvacanakā.

Asamānantatte pana yattha samānasutikānaṃ asamānavibhattikattaṃ vā asamānavacanaṃ vā upalabbhati. Teyeva payogā. Taṃ yathā? “Sataṃ sampajānaṃ, sataṃ dhammo, santo danto, santo sappurisā” iccevaṃ mādayo.

Asamānakālatte “nanu te suttaṃ brāhmaṇa bhaññaṃāne, devā na issanti purisaparakkamaṃ. Te janā pāramissanti, maccudheyyaṃ suduttara”nti evamādayo. Ettha **issantis**addadvayaṃ vattamānābhavissantīkālavasena asamānakālanti daṭṭhabbaṃ. Vattamānābhavissantīvibhattivasena pana asamānavibhattikanti.

Asamānapadajātikatte “sayāṃ samāhito nāgo, sayāṃ abhiññāya kamuddiseyyaṃ. Pathe dhāvantiyā pati, ekaṃsaṃ ajinaṃ katvā, pādesu sirasā pati. Giriṃ caṇḍoraṇaṃ patī”ti evamādayo. Ettha **sayāṃ**saddadvayaṃ nāmanipātavasena **patīs**addattayaṃ nāmākhyātopasaggavasena asamānapadajātikanti daṭṭhabbaṃ.

Iminā nayena sabbattha vitthāretabbaṃ. Evaṃ sāsanaṃ keci saddā aññamaññaṃ samānasutikā samānāpi asamānatthā asamānapavattinimittā asamānalingā asamānavibhattikā asamānavacanaṃ asamānantā asamānakālikā asamānapadajātikā ca bhavanti. Etādisesu saddeṣu yo kriyāpadattaṃ pakāseti, na so nāmikapadattaṃ. Yo ca nāmikapadattaṃ pakāseti, na so kriyāpadattaṃ. Evaṃ santepi sutisāmaññato ekattena gahetvā atthuddhāro karaṇīyoti yathāvuttakriyāpadānaṃ nāmapadehi samānasutikānaṃ **bhotis**sadda **bhave** saddānamatthuddhāraṃ vadāma.

Kathaṃ? **Bhotis**saddo kattuyoge kriyāpadaṃ, kriyāyoge nāmikapadaṃ, tasmā so dvīsu atthesu vattati kriyāpadatthe nāmikapadatthe ca. Tattha kriyāpadatthe vattamānavasena, nāmikapadatthe panālapanasena. Kriyāpadatthe tāva “eko bhoti”, nāmikapadatthe “mā bhoti paridevesi”. Atridaṃ vuccati –

Bhāve nāmapadatthe ca, ālapanavisesite;  
Imesu dvīsu atthesu, **bhotis**saddo pavattati.

**Bhaves**saddo pana “bhavāmi”timassa vattamānavibhattiyuttassa saddassatthehi vattati. “Bhavāmi”timassa pañcamīvibhattiyuttassa saddassa āṇatyāsīsanatthesupi vattati. “Bhaveyyāmi”timassa sattamīvibhattisāhitassa saddassa anumati-parikappatthesupi vattati. Tatrīdaṃ paṭhamatthassa sādhaṃ āhaccavacanaṃ –

“Devānaṃ adhiko homi, bhavāmi manujādhipo;  
Rūpalakkhaṇasampanno, paññāya asamo bhave”ti.

Ayaṃ pana sabbesaṃ tesamatthānaṃ sādhiṃ amhākaṃ gāthāraṇā –

“Sukhī bhavati eso ca, ahañcāpi sukhī bhave;  
Sukhī bhavatu eso ca, ahañcāpi sukhī bhave.

Imāya buddhapūjāya, bhavantu sukhitā pajā;  
Bhave’hañca sukhapatto, sāmacco saha ñātibhi.

Sukhī bhaveyya eso ca, ahañcāpi sukhī bhave;  
Sukhī bhaveyya ce eso, ahañcāpi sukhī bhave”ti.

Icevaṃ –

Vattamānāya pañcamaṃ, sattamañca vibhattiyaṃ;  
Etesu tīsu ṭhānesu, **bhaves**saddo pavattati.

Ekadhā vattamānāyaṃ, pañcamīsattamīsu ca;  
Dvedhā dvedhātīmassattham, pañcadhā paridīpaye.

Dvedhā vā vattamānāya-mādipurisavācako;  
Attho “bhavē”ti etassa, “bhavati”tipiyujjati.

Idāni pana etassa, vuttassatthassa sādhamam;  
Ettha pālīpadesam tu, āharissam suṇātha me.

Ko’yam majjhesamuddasmiṃ, apassam tīramāyue;  
Kam tvam atthavasam ṇatvā, evam vāyamase bhusam.

Nisamma vattam lokassa, vāyāmassa ca devate;  
Tasmā majjhesamuddasmiṃ, apassam tīramāyue.

Assam purimagāthāyaṃ, “āyue”tipadassa hi;  
“Āyūhati”ti atthoti, viññātabbo vibhāvinā.

Vibhattiyā vipallāsa-vasenāyaṃ samīrito;  
Vattamāne sattamīti, tissekāravasena vā.

Pacchimāya ca gāthāyaṃ, “āyue”tipadassa tu;  
“Āyūhāmī”ti atthoti, saddatthaññū vibhāvaye.

Tathā “bhavē”tietassa, vattamānāvibhattiyam;  
“Bhavati”ti, “bhavāmī”ti, cattham dvedhā vibhāvaye.

Evamvidhesu aññesu, pāṭhesupi ayam nayo;  
Netabbo nayadakkhena, nayasāgarasāsane.

Evamayam **bhaves**saddo pañcasu chasu vā kriyāpadatthesu pavattati. Tathā  
sattamīvibhatyantānāmikapadassa vuddhisamsārakammabhavūpapattibhavasāṅkhātesu atthesupi.  
Tathā hi “abhavē nandati tassa, bhavē tassa na nandati”tiādīsu vuddhimhi. “Bhavē  
vicarantō”tiādīsu samsāre. “Bhavē kho sati jāti hoti, jātipaccayā jarāmaraṇa”ntiādīsu kammabhavē.  
“Evam bhavēvijjāmāne”tiādīsu upapattibhaveti daṭṭhabbam. Iminā nayena **bhū**dhātuto  
nipphannānam aññatopi aññesam kriyāpadānam yathāsambhavamatto uddharitabbo.

Ākhyātattamhime atthā, na lātabbā kudācanam;  
Atthuddhāravasenete, uddhaṭā nāmato yato.

Idamettha saṅkhepato atthuddhāranayanidassanam.

Atthasaddacintāyam pana evamupalakkhetabbam – “bhavante, parābhavante,  
parābhavē”iccādayo **gacchati gaccham gacchato**saddādayo viya visesasaddā, na  
yācanopatāpanatthādivācako **nāthatis**saddo viya, na ca rājadevatādivācako **devas**saddo viya  
sāmaññasaddā. Ye cettha visesasaddā, te sabbakālam visesasaddāva. Ye ca sāmaññasaddā, tepi  
sabbakālam sāmaññasaddāva.

Tatra **gacchati**tiādīnam visesasaddatā evam daṭṭhabbā – **gacchati**ti ekaṃ nāmapadam,  
ekamākhyātam. Tathā **gacchanti** ekaṃ nāmapadam, ekamākhyātam. **Gacchatoti** eko kitanto, aparo  
rūlhisaddo. Satipi visesasaddatte sadisattā sutisāmaññato tabbisayam buddhim nuppādeti  
vināva’tthappakaraṇasaddantarābhisambandhena. Tathā hi saddantarābhisambandhena “gacchati  
patiṭṭhita”nti vutte sattamyantam nāmapadanti viññāyati. “Gacchati tisso”ti vutte panākhyātanti.  
Tathā “sa gaccham na nivattati”ti vutte paṭhamantam nāmapadanti viññāyati. “Gaccham

puttanivedako’’ti vutte ākhyātanti viññāyati. “Gacchato hayato patito’’ti vutte kitantoti viññāyati. “Gacchato paṇṇapupphāni patanti’’ti vutte rukkhavācako rūḥhīsaddoti. Iti visesasaddānaṃ ākhyātanāmānaṃ nāmākhyātehi samānasutikānaṃ atthābhisambandhādīsu yo koci atthavisesañāpako sambandho avassamicchitabbo. Evaṃ “gacchatī’’tiādīnaṃ ākhyātanāmattādivasena paccekaṃ thitānaṃ ekekatthavācākānaṃ visesasaddatā daṭṭhabbā.

“Nāthati devo’’tiādīnaṃ pana ākhyātanāmānaṃ nāmākhyātehi asamānasutikānaṃ anekatthavācākānaṃ sāmāññasaddatā eva daṭṭhabbā. Atthasambandhādīsu hi vinā yena kenaci sambandhena “nāthati’’ti vutte “yācati’’ti vā “upatāpetī’’ti vā “issariyaṃ karotī’’ti vā “āsīsati’’ti vā attho paṭibhāti, tathā “devo’’ti vutte “megho’’ti vā “ākāso’’ti vā “rājā’’ti vā “devatā’’ti vā “visuddhidevo’’ti vā attho paṭibhāti. Yadā pana saddantarābhisambandhena “nāthati suppaṭipatti’’nti vutte tadā “nāthati’’ti kriyāpadassa “yācati’’ti attho viññāyati, “nāthati sabbakīlese’’ti vutte “upatāpetī’’ti attho viññāyati. “Nāthati sakacitte’’ti vutte “issariyaṃ karotī’’ti attho viññāyati. “Nāthati lokassa hita’’nti vutte “āsīsati’’ti attho viññāyati. Tathā “devo gajjati’’ti vutte “devo’’ti nāmapadassa “megho’’ti attho viññāyati. “Viddho vigatavalāhako devo’’ti vutte “ākāso’’ti attho viññāyati. “Pivatu devo pānīya’’nti vutte “rājā’’ti attho viññāyati. “Devo devakāyā cavati āyusāṅkhayā’’ti vutte “devatā’’ti attho viññāyati. “Devātidevo satapuññalakkhaṇo’’ti vutte “visuddhidevo’’ti attho viññāyati. Iminā nayena aññepi sāmāññasaddā ñātābbā.

Sabbametamā ñatvā yathā attho saddena, saddo catthena na virujjhati, tathāttasaddā cintanīyā. Tatridaṃ upalakkhaṇamattamā cintākāranidassanaṃ – “atthakusalā bhavante’’ti vā “kiccāni bhavante’’ti vā vutte “bhavante’’ti idaṃ “bhavanti’’timinā samānatthamākhyātapadanti evamattho ca saddo ca cintanīyo. “Bhavante passāmi’’ti vā “icchāmi’’ti vā vutte upayogattavaṃ nāmapadanti evamattho ca saddo ca cintanīyo. “Bhavante jane pasamsati’’ti vā “kāmetī’’ti vā vutte paccattopayogattavantāni dve nāmapadānīti evamattho ca saddo ca cintanīyo. “Corā parābhavante’’ti vutte “parābhavante’’ti idaṃ “parābhavanti’’timinā samānatthamākhyātikapadanti evamattho ca saddo ca cintanīyo. “Parābhavante janā icchanti amittāna’’nti vutte “parābhavante’’ti imāni upayogapaccattattavantāni dve nāmapadānīti evamattho ca saddo ca cintanīyo. “Eso parābhavante’’ti vutte “parābhavante’’ti idaṃ “parābhavanti’’timinā samānatthamākhyātikapadanti evamattho ca saddo ca cintanīyo. “Ete parābhavante loke, paṇḍito samavekkhiyā’’ti vutte “parābhavante’’ti idaṃ upayogattavaṃ bahuvacanaṃ nāmapadanti evamattho ca saddo ca cintanīyo. “Parābhavante satī’’ti vutte bhāvalakkhaṇabhūmatthekavacanaṃ nāmapadanti evamattho ca saddo ca cintanīyo. “Tumhe me pasādā sambhavante’’ti vutte “sambhavante’’ti idaṃ “sambhavanti’’timinā samānatthamākhyātikapadanti evamattho ca saddo ca cintanīyo. “Ehi tvaṃ sambhavante’’ti vutte “sambhavante’’ti idaṃ sambhavāya nāma itthiyā vācakaṃ itthilingaṃ sālapanānaṃ nāmikapadanti evamattho ca saddo ca cintanīyo. “Ehi tvaṃ sambhavante’’ti vutte sambhavanāmakassa purisassa vācakaṃ pullingaṃ bhūmmavacanaṃ evamattho ca saddo ca cintanīyo.

“Varuṇo brahmadevo ca, ahesuṃ aggasāvaka;  
Sambhavo nāmupaṭṭhāko, revatassa mahesino’’ti –

Hi pāḷi. “Dhammā pātubhavante’’ti vutte “pātubhavante’’ti idaṃ “pātubhavanti’’timinā samānatthamā sanipātamākhyātapadanti evamattho ca saddo ca cintanīyo. “Pātu bhavante jane’’ti vutte “te jane bhavaṃ rakkhatū’’ti atthavācākāni ākhyātakittasabbanāmikapadānīti evamattho ca saddo ca cintanīyo. “Pātubhavase tvaṃ guṇehī’’ti vutte “pātubhavase’’ti idaṃ “pātubhavanti’’timinā samānatthamākhyātapadanti evamattho ca saddo ca cintanīyo. “Pātubhavase guṇe yo tva’’nti vutte “pātubhavāhi attano guṇahetu tva’’nti atthavācākānīnipātayuttākhyātanāmāpadānīti evamattho ca saddo ca cintanīyo. “Ahamattano guṇehi pātubhave’’ti vutte “pātubhave’’ti idaṃ “pātubhavāmi’’timinā samānatthamā sanipātamākhyātapadanti evamattho ca saddo ca cintanīyo. “Maṃ pātu bhavante idaṃ puññakamma’’nti vutte “maṃ rakkhatu samsāre idaṃ puññakamma’’nti atthavācākāni ākhyātanāmāpadānīti evamattho ca saddo ca cintanīyo. Iminā nayena sabbattha yathārahamatthasaddā cintanīyā. Tattha samānasutikānaṃ kesañci saddānaṃ “na tesamā koṭṭhe openti. Na tesamā antarā gacche. Satta vo licchavī aparīhānīye dhamme desessāmi, ime te deva sattavo, tvañca uttamasattavo’’tiādīsu samānasutikānaṃ viya uccāraṇaviseso icchanīyo. Uccāraṇaviseso hi satī padāni paribyattāni, padesu paribyattesu attho paribyatto hoti,

atthapariggāhakānaṃ atthādhigamo akiccho hoti, suparisuddhādāsatale paṭibimbadassanaṃ viya, so ca gahitapubbasaṅketassa atthasambandhādīsu aññatarasmiṃ ñāteyeva hoti, na itarathā. Vuttañhetam poraṇehi –

“Visayattamanāpannā, saddā nevatthabodhakā;  
Na padamattato atthe, te aññātā pakāsakā”ti.

Yadidamettha vuttamamhehi “uccāraṇaviseso icchanīyo”ti. Atrāyamuccāraṇavisesadīpanī gāthā sahatthappakāsanāyadānagāthāya.

“Na te saṃ koṭṭhe openti”, iti pāṭhe sumedhaso;  
Padaṃ “na te”ti chinditvā, “saṃ koṭṭhe”ti paṭheyya ve.

“Saṃ na openti koṭṭhe te, bhikkhū”ti atthamīraye;  
Evamimesu aññesu, pāṭhesupi ayaṃ nayo.

Atha yaṃ panidampi vuttam “kesaṅcī”ti, tam kimattham? “Gacchati paṭiṭṭhitam, gacchati tisso, bhavante passāmi, atthakusalā bhavante, vadantam ekapokkharā, vadantam paṭivadatī”tiādīsu samānasutikānamuccāraṇaviseso na labbhatīti dassanattam. Tasmā idamettha sallakkhetabbaṃ – yattha samānasutikānamuccāraṇaviseso labbhati atthaviseso ca padānaṃ vibhāgavasena vā avibhāgavasena vā, tattha payoge samānasutikamekaccaṃ padaṃ vicchinditvā uccāretabbaṃ. Seyyathidaṃ? “Hetu hetusampayuttakānaṃ dhammānaṃ taṃsamuttāhānaṃ rūpānaṃ hetupaccayena paccayo. So tena saddhiṃ bhāsati, sotena vuyhati. Bhavante jane pasamsati, bhavante passāmi”ti evamādayo payogā. Ettha “hetū”ti īsakaṃ vicchinditvā “hetusampayuttāna”nti uccāretabbaṃ. Tathā “so”ti vicchinditvā “tena saddhi”nti uccāretabbaṃ. “Bhava”nti vicchinditvā “te jane”ti uccāretabbaṃ.

Sesaṃ pana samānasutikaṃ vicchinditvā na uccāretabbaṃ. Avicchindanīyasmiñhi ṭhāne vicchinditvā paṭhitassa attho duṭṭho hoti. Evaṃ padavibhāgāvibhāgavasena samānasutikānamatthuccāraṇaviseso veditabbo. Ettha hi “so tenā”tiādīsu dvipadatthaggaṇaṃ vibhāgo, ekapadatthaggaṇamavibhāgoti adhippeto. Ettha ca viṣuṃ vavatthitānaṃ asamānasutikānaṃ ekato katvā samānasutikabhāvaparikkappanaṃ atthantaraviññāpanatthañceva uccāraṇavisesadassanattañca. Na hi etāni “sappo sappo”tiādīsu viya ekasmiṃyevatthe samānasutikāni. Evaṃ santepi ekajjhakaraṇena laddham samānasutilesaṃ gahetvā atthantaraviññāpanattham uccāraṇavisesadassanattañca “samānasutikāni”ti vuttāni. Esa nayo aññatrāpi īdisesu ṭhānesu. Idamettha sallakkhetabbaṃ –

Yattha samānasutikānaṃ atthārasākāresu yena kenaci ākārena atthaviseso labbhati, vicchinditvā pana uccāraṇe saddavilāso na hoti, attho vā duṭṭho hoti, na tādisesu payogesu samānasutikāni padāni vicchinditvā uccāretabbāni. Tatra katamena cākārena atthavisesalābho bhavati? Padānaṃ vibhāgavasena vā avibhāgavasena vā akkharasannidhānavasena vā padasannidhānavasena vā padakkharasannidhānavasena vā vicchāvasena vā kammappavacanīyavasena vā bhayakodhādīsu uppannesu kathitāmedītavacanasena vā guṇavācakasaddassa dviruttavasena vā kriyāpadassa dviruttavasena vā saṃhitāpadacchedavasena vā agāravatthaparidīpanavasena vā nirantaratthaparidīpanavasena vā nanirantaratthaparidīpanavasena vā “punappuna”miccatthaparidīpanavasena vā upamāne **iva** saddavasena vā **itis**saddam paṭicca saddapatthavācakatthaparidīpanavasena vā tathāpavattacittaparidīpanavasena vāti imesuṭṭhārasākāresu, vitthārato pana chabbīsāya ākāresu tato vādhikesu yena kenaci ākārena atthavisesalābho bhavati.

Ettha padānaṃ tāva vibhāgavasena vā avibhāgavasena vā samānasutikānamatthavisesalābhe “sā naṃ saṅgati pāleti, abhikkamo sānaṃ paññāyati. Mā no deva avadhi, māno mayham na vijjati”ti evamādayo payogā.

Akkharasannidhānavasena pana atthavisesalābhe “santehi mahito hito. Saṅgā saṅgāmajim



muttaṃ, tamaḥaṃ brūmi brāhmaṇaṃ. Dāṭhī dāṭhīsu pakkhandi, maññaṃāno yathā pure. Sabbābhībhūva sirasāsirasā namāmi. Bhūmito uṭṭhitā yāva, brahmalokā vidhāvati. Acci accimato loke, ḍayhamānamhi tejasā”ti evamādayo payogā.

Padasannidhānavasena atthavisesalābhe “āpo āpogataṃ. Rājarājamahāmattādayo, sukho’lokassa lokassa, kārako ñāṇacakkhudo, nirāpade pade ninno, anantañāṇaṃ karuṇālayaṃ layaṃ, malassa buddhaṃ susamāhitaṃ hitaṃ. Namāmi dhammaṃ bhavaṣaṃvaram varam, guṇākarañceva niraṅgaṇaṃ gaṇa”nti evamādayo payogā.

Padakkharasannidhānavasena atthavisesalābhe “pamāṇarahitaṃ hitaṃ, siddhattho sabbasiddhattho, tilokamahito hito. Upagantvāna sambuddho, idaṃ vacanamabravī”ti evamādayo payogā. Tatrimā akkharasannidhānādīsu adhippāyaviññāpaniyo gāthā –

**Mahito**iti saddamhā, **makāro** ce vivecito;  
Saddo niratthako ettha, “akkhara”nti vade budho.

Ñeyyā akkharayogena,  
“Santehi mahito hito”;  
Iccādīsu sarūpānaṃ,  
Hoti atthavisesatā.

Upasaggā nipātā ca, yañcaññaṃ atthajotakaṃ;  
Ekakkharampi viññūhi, taṃ “pada”nti samīritaṃ.

Padānaṃ sannidhānañca, padakkharānameva ca;  
Samāse labbhamānattaṃ, sandhāya lapitaṃ mayā.

Vicchāvasena atthavisesalābhe “gāme gāme sataṃ kumbhā, gāmo gāmo ramaṇīyo”ti evamādayo payogā. Ettha hi vicchāvasena sabbepi gāmā pariggahitā.

Nānādhikaraṇānaṃ tu, vattumekakkhaṇamhi yā;  
Icchato byāpituṃ icchā, sā **vicchā**ti pakittitā.

Kammappavacanīyavasena atthavisesalābhe “rukkhaṃ rukkhaṃ pati vijjotate cando, rukkhaṃ rukkhaṃ pari vijjotate cando”ti payogā, rukkhaṇaṃ upari upari vijjotateti attho.

Bhayakodhādīsu uppannesu kathitāmedītavacanavasena pana atthavisesalābhe ime payogā – bhaye tāva “coro coro, sappo sappo”iccādayo. Kodhe “vasala vasala, caṇḍāla caṇḍāla, vijjha vijjha, pahara pahara”iccādayo. Pasaṃsāyaṃ “sādhu sādhu sārīputta, abhikkantaṃ bhante abhikkantaṃ bhante”iccādayo. Turite “abhikkama vāseṭṭha abhikkama vāseṭṭha, gaccha gaccha, lunāhi lunāhi”iccādayo. Kotūhale “āgaccha āgaccha”iccādayo. Accharīye “aho buddho aho buddho”iccādayo. Hāse “aho sukhaṃ aho sukhaṃ, aho manāpaṃ aho manāpaṃ”iccādayo. Soke “kahaṃ ekaputtaka kahaṃ ekaputtaka”iccādayo. Pasāde “bhavissanti vajjī bhavissanti vajjī”iccādayo. Evaṃ bhayakodhādīsu uppannesu kathitāmedītavacanavasena atthavisesalābho bhavati. Ettha pana atthantarābhāvepi dalhīkammavasena padānamatthajotakabhāvoyeva atthavisesalābho.

Bhaye kodhe pasaṃsāyaṃ,  
Turite kotūhala’cchare;  
Hāse soke pasāde ca,  
Kare āmedītaṃ budho.

Casaddo avuttasamuccayattho, tena garahāasammānādīnaṃ saṅgaho daṭṭhabbo. “Pāpo pāpo”tiādīsu hi garahāyaṃ. “Abhirūpaka abhirūpakā”tiādīsu asammāne. “Kvāyaṃ abalabalo

viyā’’tiādīsu atisayatthe āmeḍitaṃ daṭṭhabbaṃ. Guṇavācakassa dviruttavasena atthavisesalābhe “kaṇho kaṇho ca ghorō cā’’ti evamādayo. “Kaṇho kaṇho’’ti hi atīva kaṇhoti attho. Kriyāpadassa dviruttavasena atthavisesalābhe “dhame dhame nātidhame’’ti evamādayo. Tattha **dhame dhameti** dhameyya no na dhameyya. **Nātidhameti** pamāṇātikantaṃ pana na dhameyya. Saṃhitāpadacchedavasena atthavisesalābhe “narānarā, surāsūrā, katākatakusalākusalavisayaṃ vipṭṭisārākārena pavattaṃ anusocanaṃ kukkucca’’nti evamādayo. Ettha pana viññūnaṃ paramakosallajananatthaṃ silokaṃ racayāma –

Hitāhitā hitaṃ hitaṃ, ānubhāvena te jina;  
Pavarāpavarāhacca, bhavāmā’ nāmayā mayanti.

Agāravatthaparidīpanavasena atthavisesalābhe “tuvamtuvaṃ pesuññakalahaviggahavivādā’’ti evamādayo. Nirantarattaparidīpanavasena atthavisesalābhe “divase divase paribhuñjati’’ti evamādayo. Nanirantarattaparidīpanavasena atthavisesalābhe “khaṇe khaṇe pīti uppajjati’’ti evamādayo. “Punappuna’’miccatthaparidīpanavasena atthavisesalābhe “muḥuṃ muḥuṃ bhāyayate kumāre’’ti evamādayo. Upamāne **ivasaddavasena** atthavisesalābhe “rājā rakkhatu dhammena, attanova pajaṃ paja’’nti evamādayo. **Itisaddaṃ** paṭicca saddapadatthavācakattaparidīpanavasena atthavisesalābhe “buddho buddhoti kathayanto, somanassaṃ pavedayi’’nti evamādayo. Tathāpavattacittaparidīpanavasena atthavisesalābhe “buddho buddhoti cintento, maggaṃ sodhemahaṃ tadā’’ti evamādayo. Evaṃ īdisesu payogesu samānasutikapadaṃ vicchinditvā na uccāretabbaṃ. Vicchinditvā hi uccāraṇe sati saddavilāso na bhavati, katthaci pana “katākatakusalākusalavisaya’’nti evamādīsu vicchinditvā uccāritassa attho duṭṭho hoti, tasmā vicchinditvā na uccāretabbaṃ, ekābaddhaṃyeva katvā uccāretabbaṃ. Iti samānasutikesu vinicchayo chabbīsāya ākārehi adhikehi ca maṇḍetvā dassito.

Yasmā pana samānasutikesu vinicchaye dassite asamānasutikesupi vinicchayo dassetabbo hoti, tasmā tampi dassessāma – yattha niggahītamaḥ parākāralopopi pāṭho paññāyati, saṃyogabyañjanassa viṣaṃyogattampi. Tesu payogesu niggahītapaḍaṇaṃ anantarapadena saddhiṃ ekābaddhaṃyeva katvā uccāretabbaṃ. Katamāni tāni? “Sace bhutto bhavēyyāhaṃ-sā’jīvo garahito mama. Pupphaṃ’ sā uppajji. Khayamattaṃ na nibbānaṃ’ sa gambhīrādivācato’’ti evamādayo. Ettha hi “sace bhutto bhavēyyāha’’ntiādīnā vicchedamakattvā anantare dvīsu gāthāpadesu antarībhūtānaṃ dvinnāṃ samānasutikapadānaṃ ekato uccāraṇamiva anantarapadehi saddhiṃ ekābaddhuccāraṇavasena “sace bhutto bhavēyyāhaṃ-sā’jīvo garahito mamā’’tiādīnā uccāretabbaṃ. Evarūpoyeva hi uccāraṇaviseso sakalehipi porāṇehi viññūhi anumato uccārito ca “assa ājīvo garahito mama, assā uppajji, assa gambhīrādivācato’’tievamādiatthappaṭipādanassānurūpattā.

Yattha pana yādise uccāraṇe kariyamāne attho pariyyatto hoti, tesu payogesu kvaci **casadda panasaddādiyogaṭṭhāne** īsakaṃ vicchinditvā padamuccāretabbaṃ. Seyyathidaṃ? “Vāḷā ca lapasakkharā. Accantasantā pana yā, ayaṃ nibbānasampadā, “idaṃ dukkha’’nti vācaṃ bhāsato “idaṃ dukkha’’nti ñāṇaṃ pavattatīti? Āmantā. Iti ca **danti** ca **duti** ca **khanti** ca ñāṇaṃ pavattatīti? Na hevaṃ vattabbe’’ti evamādayo payogā.

Etesu hi paṭhamapayoge “vāḷā cā’’ti īsakaṃ vicchinditvā “lapasakkharā’’ti uccāretabbaṃ. Tattha **lapasakkharāti** sakkharasadisamadhuravacanā. **Jātakatṭhakathāyaṃ** pana “niratthakavacanehi sakkharā viya madhurā’’ti vuttaṃ, tasmātra bahubbīhitappurisavasena dvidhā samāso daṭṭhabbo “lapā sakkharā viya yāsaṃ tā lapasakkharā, lapehi vā sakkharā viyāti lapasakkharā’’ti.

Dutiyapayoge “accantasantā pana’’iti īsakaṃ vicchinditvā “yā’’ti uccāretabbaṃ. Yā pana ayaṃ nibbānasampadā accantasantāti hi attho.

Tatīyapayoge **iti** ca **danti** ca **duti** ca **khanti** cāti etesu catūsu ṭhānesu ikāraṇca **damkāraṇca dukāraṇca khamkāraṇca** īsakaṃ vicchinditvā tadanantaraṃ **ti ca** saddā uccāretabbā.

Ettha hi avicchinditvā uccāraṇe sati aññathā gahetabbattā attho duṭṭho bhavati. Kathaṃ? Īdisesu

ṭhānesu avicchinditvā uccāraṇe sati **itis**saddo evanti atthavācako nipāto siyā, sandhivasena pana ikāratthavācako rūḷhīsaddo na siyā. **Dantis**saddo damanattho siyā, **dam**kāravācako na siyā. **Dutis**saddo niratthako siyā, **duk**kāravācako na siyā. **Khantis**saddo khamanattho siyā, **kham**kāravācako na siyā. Tasmā ikāra **dam**kāra **duk**kāra **kham**kārāni isakaṃ vicchinditabbāni.

Ettha hi iiti **dam**iti **du**iti **kham**itītiadinā saṃhitāpadacchedo veditabbo, parabhūtaṃ ca ikāraṃ lopo. Na panettha idaṃ vattabbaṃ “sarūpasarānaṃ visaye parabhūtaṃ sarūpasarassa lopo na hoti, pubbasarasseva lopo hoti tatrāyanti ettha viyā”ti “akilāsuno vaṇṇapathe khaṇantā, udaṅgaṇe tattha papaṃ avindu”nti pāḷiyaṃ sarūpaparasarassa lopadassanato. Tathā hi aṭṭhakathācariyehi “pavaddhaṃ āpaṃ papa”nti attho saṃvaṇṇito. Tasmā “iti cā”ti etthāpi iiti cāti chedaṃ katvā dvīsu ikāresu parassa ikāraṃ lopo kātabbo, na pubbassa.

Pubbasmīhi ikāravācaka ikāre natṭhe sati nipātabhūtena **itis**saddena ikārasaṅkhāto attho na viññāyeyya, nipātabhūtaṃ pana **itis**saddassa ikāre natṭhepi so attho viññāyateva “devadattoti me suta”nti ettha devadattapadattho viya. Tasmā **itis**saddassa parabhūtaṃ ikārasseva lopo kātabbo, na pubbassa ikāravācakassa ikāraṃ. Kaccāyane pana yebhuyyappavattiṃ sandhāya asarūpasarato parasseva asarūpasarassa lopo vutto, na sarūpasarato parassa sarūpasarassa. Mahāpadesasuttehi vā sarūpassa parasarassa lopo vuttoti daṭṭhabbaṃ.

“Antarā ca rājagahaṃ antarā ca nālanda”ntiādīsu pana **cas**saddādiyogaṭṭhānepi sati vicchinditvā padaṃ na uccāretabbaṃ. Yattha ca āgamakkharādīni dissanti, tesu payogesū pubbapadāni vicchinditvā na uccāretabbāni, āgamakkharavantehi parapadehi saddhīmyeva uccāretabbāni. Seyyathidaṃ? “Nakkhattarājāriva tārakānaṃ. Bhagavā etadavoca”iccevaṃmādayo payogā. Yattha yesaṃ viṣuṃ viṣuṃ sambandho dissati, attho ca yujjati, tattha tāni atthānurūpaṃ vicchinditvā uccāretabbāni. Seyyathidaṃ? “Nahāne ussukkaṃ akāsi, ussukkampi akāsi yāguyā khādanīye bhattasmiṃ” iccevaṃmādayo payogā. Ettha hi “nahāne ussukkaṃ akāsi”ti vicchinditvā “ussukkampi akāsi yāguyā khādanīye bhattasmi”nti uccāretabbaṃ. Evañhi sati na kevalaṃ so bhikkhu nahāneyeva ussukkaṃ akāsi, atha kho yāguyāpi khādanīyepi bhattasmiṃ ussukkaṃ akāsi atthappakāsane samattho bhavati, aṭṭhānappayutto samuccayatthavācako **apis**saddo.

Yattha pana yesamitarena vā itarena vā ekekapadena ubhayapadehi vā sambandho dissati sahevattayuttīyā, tattha tāni yathārahaṃ vicchinditvā uccāretabbāni. Seyyathidaṃ? “So dhammaṃ desetiādīkalyāṇaṃ majjhekalyāṇaṃ pariyoṣānakalyāṇaṃ sātthaṃ sabyañjanaṃ kevalaparipuṇṇaṃ parisuddhaṃ brahmacariyaṃ pakāseti. Paṭiccasamuppādaṃ vo bhikkhave desessāmi, taṃ suṇātha sādhukaṃ manasikarotha. Ajjhataṃ sampasādanaṃ cetaso ekodibhāva”nti evamādayo payogā. Tatrimā adhippāyaviññāpikā gāthā –

**Dhammas**saddena vā **brahma-cariya**saddena vā padaṃ;  
Yojetvā īraye viññū, “sātthaṃ sabyañjana”ntidaṃ.

“Sādhuka”nti padaṃ viññū, “suṇāthā”ti padena vā;  
Tathā “manasikarotha”, iti vuttapadena vā;  
īraye yojayitvāna, ubhayehi padehi vā.

Ekamekena sambandho, sambandho ubhayehi vā;  
Dissatīti vijāneyya, saddhimevatthayuttīyā.

Nattanomatiyā eso, attho ettha mayā ruto;  
Pubbācariyasīhānaṃ, nayaṃ nissāya me ruto.

Evamvidhesu aññesu, pāṭhesupi ayaṃ nayo;  
Netabbo nayadakkhena, sāsanaṭṭhagavesinā.

Atthānurūpato saddaṃ, atthaṃ saddānurūpato;

Cintayitvāna medhāvī, vohare na yathā tathāti.

Ayamettha atthasaddacintā.

Atthātisayayoge evaṃ upalakkhetabbaṃ – **bhūdhātuatthātisayayogato** vaḍḍhane diṭṭhā “ekamantaṃ nisinno kho mahānāmo licchavī udānaṃ udānesi ‘bhavissanti vajjī bhavissanti vajjī’ ti” itī vā “ahameva dūsiyā bhūnahatā, rañño mahāpatāpassā” ti vā “vedā na tāṇāya bhavantidassa, mittadduno bhūnahuno narassā” ti vā “bhūnahaccaṃ kataṃ mayā” ti vā evaṃ vaḍḍhane diṭṭhā.

Vacanasāṅgahe evaṃ upalakkhetabbaṃ – vattamānāya vibhattiyā parassapadaṃ majjhimapurisabahuvacanaṃ pañcamiyā parassapadena majjhimapurisabahuvacanaena sadisaṃ. Tumhe bhavatha.

Vattamānapañcamīnaṃ parassapade uttamapurisacatukke ekavacanaṃ ekavacanaena, bahuvacanampi bahuvacanaena sadisaṃ. Ahaṃ bhavāmi, mayaṃ bhavāma.

Vattamānāya attanopadaṃ majjhimapurisekavacanaṃ hiyyattanajjatanīnaṃ attanopadehi dvīhi majjhimapurisekavacanehi sadisaṃ katthaci vaṇṇasamudāyavasena kiñci visesaṃ vajjetvā, esa nayo uttaratrāpi yojetabbo. Tvaṃ bhavase, idaṃ vattamānāya rūpaṃ. Tvaṃ abhavase, idaṃ hiyyattanajjatanīnaṃ rūpaṃ.

Vattamānāya attanopadaṃ uttamapurisekavacanaṃ pañcamiyā attanopadenuttamapurisekavacanaena ca parokkhāya parassapadena majjhimapurisekavacanaena cāti dvīhi vacanehi sadisaṃ. Ahaṃ bhavē, idaṃ vattamānapañcamīnaṃ rūpaṃ. Tvaṃ babhūve, idaṃ parokkhāya rūpaṃ.

Vattamānāya attanopadaṃ uttamapurisabahuvacanaṃ parokkhajjatanīnaṃ attanopadehi dvīhi uttamapurisabahuvacanehi sadisaṃ. Mayaṃ bhavāmhē, idaṃ vattamānāya rūpaṃ. Mayaṃ babhūvimhē, idaṃ parokkhāya rūpaṃ. Mayaṃ abhavimhē, idamajjatanīyā rūpaṃ.

Pañcamiyā attanopadaṃ majjhimapurisabahuvacanaṃ parokkhāya attanopadena majjhimapurisabahuvacanaena sadisaṃ. Tumhe bhavavho, idaṃ pañcamiyā rūpaṃ. Tumhe babhūvivho, idaṃ parokkhāya rūpaṃ.

Parokkhāya parassapadaṃ paṭhamapurisabahuvacanaṃ hiyyattaniyā parassapadena paṭhamapurisabahuvacanaena ca ajjatanīyā attanopadena paṭhamapurisabahuvacanaena cāti dvīhi vacanehi sadisaṃ. Te babhūvu, idaṃ parokkhāya rūpaṃ. Te abhavu, idaṃ hiyyattanajjatanīnaṃ rūpaṃ.

Parokkhāya parassapadaṃ majjhimapurisabahuvacanaṃ attanopadena paṭhamapurisekavacanaena ca hiyyattaniyā parassapadena majjhimapurisabahuvacanaena ca attanopadena paṭhamapurisekavacanaena ca ajjatanīyā parassapadena majjhimapurisabahuvacanaena cāti catūhi vacanehi sadisaṃ. Tumhe babhūvittha, so babhūvittha, imāni parokkhāya rūpāni. Tumhe abhavattha, so abhavattha, imāni hiyyattaniyā rūpāni. Tumhe abhavittha, idamajjatanīyā rūpaṃ.

Parokkhāya parassapadaṃ uttamapurisekavacanaṃ hiyyattaniyā parassapadenuttamapurisekavacanaena ca ajjatanīyā attanopadenuttamapurisekavacanaena cāti dvīhi vacanehi sadisaṃ. Ahaṃ babhūvaṃ, idaṃ parokkhāya rūpaṃ. Ahaṃ abhavaṃ, idaṃ hiyyattanajjatanīnaṃ rūpaṃ.

Parokkhāya parassapadaṃ uttamapurisabahuvacanaṃ hiyyattaniyā parassapadenuttamapurisabahuvacanaena sadisaṃ. Mayaṃ babhūvimha, idaṃ parokkhāya rūpaṃ. Mayaṃ abhavamha, idaṃ hiyyattaniyā rūpaṃ.

Parokkhāya attanopadauttamapurisekavacanam hiyyattaniyā  
 attanopadenuttamapurisekavacanena ca ajjataniyā parassapadenuttamapurisekavacanena cāti dvīhi  
 vacanehi sadisaṃ. Ahaṃ babhūvim, idaṃ parokkhāya rūpaṃ. Ahaṃ abhaviṃ, idaṃ  
 hiyyattanajjatanīnaṃ rūpaṃ.

Hiyyattaniyā parassapadam paṭhamapurisekavacanam ajjataniyā attanopadena  
 paṭhamapurisekavacanena sadisaṃ. So abhavā.

Hiyyattaniyā parassapadam majjhimapurisekavacanam ajjataniyā parassapadena  
 majjhimapurisekavacanena sadisaṃ. Tvaṃ abhavo.

Bhavissantiyā parassapadam majjhimapurisabahuvacanam kālātipattiyā parassapadena  
 majjhimapurisabahuvacanena attanopadena paṭhamapurisekavacanena cāti dvīhi vacanehi sadisaṃ.  
 Tumhe bhavissatha, idaṃ bhavissantiyā rūpaṃ. Tumhe abhavissatha, so abhavissatha, imāni  
 kālātipattiyā rūpāni.

Bhavissantiyā attanopadam majjhimapurisekavacanam kālātipattiyā attanopadena  
 majjhimapurisekavacanena sadisaṃ. Tvaṃ bhavissase, idaṃ bhavissantiyā rūpaṃ. Tvaṃ  
 abhavissase, idaṃ kālātipattiyā rūpaṃ.

Bhavissantiyā attanopadam majjhimapurisabahuvacanam kālātipattiyā attanopadena  
 majjhimapurisabahuvacanena sadisaṃ. Tumhe bhavissavhe, idaṃ bhavissantiyā rūpaṃ. Tumhe  
 abhavissavhe, idaṃ kālātipattiyā rūpaṃ.

Bhavissantiyā attanopadam uttamapurisekavacanam kālātipattiyā  
 parassapadenuttamapurisekavacanena sadisaṃ. Ahaṃ bhavissaṃ, idaṃ bhavissantiyā rūpaṃ. Ahaṃ  
 abhavissaṃ, idaṃ kālātipattiyā rūpaṃ. Sesāni sabbāsamaṭṭhannaṃ vibhattīnaṃ vacanāni  
 aññamaññaṃ visadisānīti daṭṭhabbaṃ. Bhavanti catra –

Vattamānāpañcamīsu, **th**advayaṃ samudīritaṃ;  
 “Tumhe bhavatha” iccitra, udāharaṇakaṃ dvidhā.

**Mid**vayaṃ **mad**vayañceva, tāsū vuttaṃ dvidhā dvidhā;  
 “Bhavāmī”ti “bhavāmā”ti, cettha rūpāni niddise.

Vattamānakahiyyatta-najjatanīvibhattisu;  
**Set**tayaṃ “bhavase tva”nti, vattamānāvibhattito;  
 “Abhavase”ti hiyyatta-najjatanīvibhattito.

Vattamānāpañcamikā-parokkhāsu vibhattisu;  
**Ett**ayaṃ lapitaṃ tattha, ādo dvinnaṃ vasena tu.

Jaññā “ahaṃ bhava”ti “tvaṃ, babhūve”ti parokkhato;  
 Vattamānāparokkhajja-tanīsu tīsu sadditaṃ.

**Mh**ettayaṃ kamato rūpaṃ, **may**aṃsaddavisesiyaṃ;  
 “Sambhavāmhe babhūvimhe, abhavimhe”ti niddise.

Pañcamikāparokkhāsu, **vh**odvayaṃ rūpamettha hi;  
 “Bhavavho babhūvivho”ti, **tum**hesaddavisesiyaṃ.

Parokkhamhi vā hiyyatta-najjatanīvibhattisu;  
**Utt**ayaṃ “te babhūvū”ti, rūpaṃ jaññā parokkhato;

Hiyyattanajjatanito, jaññā “te abhavū”iti.

Parokkhamhi vā hiyyatta-najjatanīvibhattisu;  
Sadditaṃ **tathasamyoga-** pañcakaṃ iti niddise.

**Babhūvitthad**vayaṃ tattha, rūpaṃ jaññā parokkhajaṃ;  
Bavhattekattato vuttaṃ, majjhimaṃ paṭhamavhayaṃ.

**Abhavatthad**vayaṃ ñeyyaṃ, hiyyattanīvibhattijaṃ;  
Bavhattekattato vuttaṃ, majjhimo paṭhamo ca so;  
“Abhavitthā”tidaṃ rūpaṃ, ajjatanīvibhattijaṃ.

Tañca kho bahukattamhi, **tumhesaddena** yojaye;  
Parokkhāvahayahiyyatta-najjatanīsu kittitaṃ.

**Aṃtayaṃ** tattha ādiyaṃ, “babhūvaṃ”rūpamīritaṃ;  
Duvinnaṃ **abhavaṃ**rūpaṃ, **ahaṃ**saddena yojaye.

Parokkhakāhiyyattanīvasena **mhadukaṃ** “mayaṃ;  
Babhūvimha abhavimha”, iti rūpadvayaṃ kamā.

Parokkhāvahayahiyyatta-najjatanīvibhattisu;  
Iṃtayaṃ tu tahiṃ rūpaṃ, “babhūvi”nti parokkhajaṃ;  
“Abhavi”ntītarāsaṃ tu, **ahaṃ**saddayutākhilaṃ.

Hiyyattanajjatanīsu, **ādvayaṃ** matamettha hi;  
“Abhavā” iti ekatte, rūpaṃ paṭhamaporisaṃ.

Hiyyattanajjatanīsu, **odvayaṃ** vuttamettha tu;  
“Abhavo”iti ekatte, rūpaṃ majjhimaporisaṃ.

Bhavissantiyakālāti-pattīsu dvīsu bhāsitaṃ;  
Bavhatte bahuekatte, sasamyogaṃ **ssathattayaṃ**.

“Tumhe bhavissathi”cetaṃ, bhavissantiyato mataṃ;  
“Abhavissatha tumhe”ti, “abhavissatha so”ti ca;  
Kālātipattito vuttaṃ, etañhi vacanadvayaṃ.

Bhavissantiyakālāti-pattīsu samudīritaṃ;  
Majjhimapurisaṭṭhāne, sasamyogaṃ **ssaseyugaṃ**.

“Bhavissase tva”miccetaṃ, “tvaṃ abhavissase”ti ca;  
Imāni tu payogaṇi, tattha viññū pakāsaya.

**Ssavhed**vayaṃ sena yutaṃ, **ssaṃ**dvayañca catukkakaṃ;  
Idampi kathitaṃ dvīsu, yathārutavibhattisu.

“Bhavissavhe”ti bavhatte, bhavissantikamajjhimo;  
Bavhatte “abhavissavhe”, kālātipattimajjhimo.

“Bhavissaṃ” iti ekatte, bhavissantikamuttamo;  
“Abhavissa”nti ekatte, kālātipattikuttamo.

Iti vuttāni vuttehi, vacanehi samānataṃ;

Yante'kaccehi taṃ sabbam, ekatālīsadhā ṭhitam.

Sesāni pañcapaññāsa, asamānāni sabbathā;  
Etaṃ nayaṃ gahetvāna, vade sabbattha sambhavāti.

Ayamettha samānāsamānavasena vacanasāṅgaho.

Āgamalakkhaṇavasena vibhattivacanasāṅgahe evaṃ upalakkhetabbaṃ –

Bhavissantīparokkhajja-tanīkālātipattisu;  
Niccaṃ kvaci kvacā'niccaṃ, ikārāgamaṇaṃ bhava.

Ikārāgamaṇaṃ tañhi, parokkhāyaṃ vibhattiyaṃ;  
Bavhatte majjhimaṭṭhāne, bavhatte cuttame siyā;  
Parassapadaṃ sandhāya, idaṃ vacanamīritaṃ.

Uttamekavaco cāpi, netassa attanopade;  
Hotīti avagantabbaṃ, bhavissantimhi sabbaso.

Hiyyattanajjatanika-kālātipattīsu pana;  
Akārāgamaṇaṃ hoti, sabbaso iti lakkhaye.

Ajjatanimhi bavhatte, majjhime uttame tathā;  
Bavhattamhi akārena, ikārāgamaṇaṃ bhava.

Ikārāgamaṇaṃ niccaṃ, kālātipattiyaṃ bhava;  
Akārāgamaṇaṃ tattha, anekantikamīritaṃ.

Akārāgamaṇaṃyeva, hiyyattanyaṃ pakāsati;  
Parokkhāyaṃ bhavissantya-ñcikāroyeva dissati.

Akārāgamaṇaṃñceva, ikārāgamaṇampi ca;  
Ajjatanikakālāti-pattīsu pana dissati.

Tīsu sesavibhattīsu, nā'kārattayamīritaṃ;  
Vattamānāya pañcamaṃ, sattamiyanti sabbaso.

Ikāreṇeva sahitā, dve bhavanti vibhattiyo;  
Satta dvādasa hontettha, vacanānīti lakkhaye.

Akāreṇeva sahitā, ekāyeva vibhatti tu;  
Dvādasa vacanānettha, bhavantīti ca lakkhaye.

**Akārīkārasahitā**, duveyeva vibhattiyo;  
Cattāri dvādasañceva, vacanāni bhavantidha.

Ākārattayamuttā tu, tissoyeva vibhattiyo;  
Vacanānettha chatṭiṃsa, hontīti paridīpaye.

Parokkhājjatanīsu, pañcaṭṭha ca yathākkamaṃ;  
Ikārato vimuttāni, vacanāni bhavantiti.

Evamettha vibhattīnaṃ, channavutividdhāna ca;  
Sāṅgaho vacanānanti, viññātabbo vibhāvīnāti.

Ayamettha āgamalakkhaṇavasena vibhattivacanasāṅgaho.

Kālavasena pana vibhattivacanasāṅgahe duvidho saṅgaho kālattayavasena saṅgaho, kālachakkavasena saṅgaho cāti. Tattha vattamānāpañcamīsattamīvibhattiyo paccuppannakālikā, vattamānāpañcamīsattamīvibhatyantāni padāni paccuppannavacanāni. Parokkhāhiyyattanajjatanīvibhattiyo atītakālikā, parokkhāhiyyattanajjatanīvibhatyantāni padāni atītavacanāni. Bhavissantīvibhatti anāgatakālikā, bhavissantīvibhatyantāni padāni anāgatavacanāni. Kālātipattivibhatti pana katthaci atītakālikā katthaci anāgatakālikā, tasmā tadantāni padāni atītavacanānipi anāgatavacanānipi honti. Ayaṃ kālattayavasena vibhattivacanasāṅgaho.

Ayaṃ pana kālachakkavasena vibhattivacanasāṅgaho – parokkhāhiyyattanajjatanīvibhattiyo atītakālikā, parokkhāhiyyattanajjatanīvibhatyantāni padāni atītavacanāni. Bhavissantīvibhatti anāgatakālikā, bhavissantīvibhatyantāni padāni anāgatavacanāni. Vattamānāvibhatti paccuppannakālikā, vattamānāvibhatyantāni padāni paccuppannavacanāni. Pañcamīvibhatti āṇattikālikā, pañcamīvibhatyantāni padāni āṇattivacanāni. Sattamīvibhatti parikappakālikā, sattamīvibhatyantāni padāni parikappavacanāni. Ettha pana “āṇattivacanāni” ti ca “parikappavacanāni” ti ca idaṃ tathāsīsamattaṃ āsiṭṭhānumatyādīsū pañcamyādīnaṃ dissanato. Kālātipattivibhatti kālātipattikālikā, kālātipattivibhatyantāni padāni kālātipattivacanāni. Evaṃ kālachakkavasena vibhattivacanasāṅgaho veditabbo.

Kālasāṅgahe tividho kālasāṅgaho kālattayasāṅgaho kālacatukkasāṅgaho kālachakkasāṅgaho cāti.

Paccuppanne vattamānā, pañcamī sattamī cimā;  
Hontātīte parokkhādī, saha kālātipattiyā.

Anāgate bhavissantī, kālātipattikāpi vā;  
Evaṃ kālattayaṃ ñeyyaṃ, ākhyātaṃ tappakāsakaṃ.

Nanu kaccāyane ganthe, kālo vutto catubbidho;  
Paccuppannenukkāle, atītenāgate iti.

Saccaṃ vutto nuttakālo, paccuppannoti icchito;  
Samīpe vuttakāloti, atthasambhavato pana.

Tathā hi “yaṃ tikāla” nti, vuttamācariyehipi;  
Na kālato vinimuttaṃ, ākhyātaṃ kiñci dissati.

Nanu cāvuttakāleti, attho tatra tu yujjati;  
Tathā hi chabbidho kālo, **niruttimhi** pakāsito.

Atītānāgato paccu-ppanno āṇattimeva ca;  
Parikappo ca kālassa, atipattīti chabbidho.

Duve vibhattiyo tattha, āṇattiparikappikā;  
Kālamānāmasitvāpi, niruttaññūhi bhāsītā.

“Gacchatu gaccheyyi” ccādi-vacane kathite na hi;  
Kriyā nipphajjati niṭṭhaṃ, nāgatā nātipannikā.

Kālātipattikā saddā, atītenāgatepi ca;  
Bhavantīti yathāvuttā, **niruttimhi** vidūhi ve.

Pañcamīsattamīvhitā, āṇattiparikappikā;



Paccuppanne bhavantīti, na tathā tattha bhāsītā.

Tasmā kaccāyane ganthe, “nuttakāle”ti yaṃ padaṃ;  
Attho “avuttakāle”ti, tassa ñāyatimevidaṃ.

Saccamevaṃ tu santepi, āṇattiparikappikā;  
Paccuppannepi daṭṭhabbā, paṇḍitena nayaññunā.

Kasmāti ce āṇāpanaṃ, parikappo ca saccato;  
Paccuppanne yato atthā, nipphannā dissare ime.

“Anuttakāle”ti padaṃ, etassatthassa jotakaṃ;  
“Samīpe vuttakāle”ti, atthadīpanatotha vā.

Atthānaṃ gamanādīnaṃ, nipphatti na tu dissati;  
“Gacchatu gaccheyyi”ccādi, vuttakāle yato tato;  
Avuttakāle niddiṭṭhā, taddīpakavibhattiyo.

Kālo vā vuttakāloti, iccevaṃ gahito idha;  
**Dakkhiṇāsuddhipā**ṭhamhi, katāva tatiyā ayaṃ;  
Kāladīpanatā tāsāṃ, iti yujjati nāññathā.

Atthadvayaṃ pakāsetuṃ, ganthe **kaccāyanavhaye**;  
Thero kaccāyano “nutta-kāle”ti padamabravi.

Evaṃ tidhā catudhāpi, vutto kālāna saṅgaho;  
Chadhā idāni kālānaṃ, saṅgaho nāma niyyate.

Vibhattiyo parokkhā ca, hiyyattanīvibhattiyo;  
Atha ajjatanī cāti, tisso’ tīte pakāsītā.

Anāgate bhavissantī, bhavatīti pakittitā;  
Paccuppanne vattamānā, tikāle pañcadhā katā.

Pañcamīsattamīvhitā, āṇattiparikappikā;  
Saṅgayhamānā tā yanti, paccuppannamhi saṅgahaṃ.

Yasmā pañcamibhūtāya, vattamānāya ṭhānato;  
Samānā pañcamī hoti, tasmā sā pañcamī matā.

Sattamī pana kiñcāpi, samānā tāhi sattamā;  
Hoti yasmā tato vuttā, sattamīveva no matī.

Kālātipattiyādīhi, yajjevaṃ vattamānikā;  
Chaṭṭhī bhaveyya kālāti-pattikātītavācīkā.

Pañcamī tāya chaṭṭhassa, tulyattā ṭhānato nanu;  
Tāhi sattavibhattīhi, sattamī aṭṭhamī siyā.

Iti ce koci bhāseyya, “tannā”ti paṭisedhaye;  
Atītenāgate cāpi, kālātipattisambhavā.

Tathā hi bhāsītā **cūla-niruttimhi** visuṃ ayaṃ;  
Kālātipatyatītamhā-nāgate cāti dīpaye.

Kriyātipannetīti, kasmā kaccāyane rutam;  
Athāpi ce vadeyyatra, “pāyenā”ti pakāsaye.

Yebhuyyena hi lokasmiṃ, atītamhi pavattati;  
Kālātipattisamyutto, vohāro iti lakkhaye.

Atridaṃ kālātipattiyā atītavacanaṃ – “sacāyaṃ bhikkhave rājā pitaraṃ dhammikaṃ dhammarājānaṃ jīvitaṃ na voropessatha, imasmiṃyevassa āsane virajaṃ vītamalaṃ dhammacakkhu uppajjissathā”ti. “Passānanda imaṃ mahādhanaseṭṭhiputtaṃ imasmiṃyeva nagare dveasīkoṭidhanaṃ khepetvā bhariyaṃ ādāya bhikkhāya carantaṃ. Sace hi ayaṃ paṭhamavaye bhoge akhepetvā kammante payojayissā, imasmiṃyeva nagare aggasetṭhi abhavissā. Sace pana nikkhamitvā pabbajissā, arahattaṃ pāpuṇissā, bhariyāpissa anāgāmiphale patiṭṭhahissā. Sace majjhimavaye bhoge akhepetvā kammante payojayissā, dutiyasetṭhi abhavissā. Nikkhamitvā pabbajanto anāgāmī abhavissā, bhariyāpissa sakadāgāmiphale patiṭṭhahissā. Sace pacchimavaye bhoge akhepetvā kammante payojayissā, tatiyasetṭhi abhavissā. Nikkhamitvā pabbajanto sakadāgāmī abhavissā, bhariyāpissa sotāpattiphale patiṭṭhahissā” iti vā, “sace satthā agāraṃ ajjhāvasissā, cakkavattirājā abhavissā. Rāhulasāmaṇero pariṇāyakarataṃ, therī itthirataṃ, sakalacakkavāḷarajjaṃ etesaññeva abhavissā” iti vā evaṃ kālātipattiyā atītavacanaṃ bhavati.

Kathaṃ kālātipattiyā anāgatavacanaṃ bhavati? “Cirampi bhakkho abhavissā, sace na vivadāmasse. Asīsakaṃ anaṅgutṭhaṃ, siṅgālo harati rohitaṃ”itivā, “sace ānanda nālabhissā mātugāmo tathāgatappavedite dhammavinaye agārasmā anagāriyaṃ pabbajjaṃ, ciraṭṭhitikaṃ ānanda brahmacariyaṃ abhavissā”ti iti vā, “ayaṃ aṅgulimālassa mātā ‘aṅgulimālaṃ ānessāmī’ti gacchati, sace samāgamissati, aṅgulimālo ‘aṅgulisahassaṃ pūressāmī’ti mātaraṃ māressati. Sacāhaṃ na gamissāmī, mahājāniko abhavissā” iti vā evaṃ kālātipattiyā anāgatavacanaṃ bhavati. Kaccāyane pana yebhuyyena atītappavattiṃ sandhāya kālātipattivibhattiyā atītakālikatā vuttāti daṭṭhabbaṃ.

Kaccāyanepi vā esā, kālātipattikā pana;  
Anāgatepi hotīti, ayamatthopi dissati.

Appaccakkhe parokkhāya-tīte iti hi lakkhaṇe;  
Santepyatītaggaṇe, anapekkhiya taṃ idaṃ.

Anāgate bhavissantī, iti suttassanantaraṃ;  
Kālātipattivacanaṃ, anāgatānukaḍḍhanaṃ;  
Tasmā aniyataṃ kālaṃ, kālātipattikaṃ vinā.

Atītānāgatapaccu-ppannikāhi vibhattihi;  
Sattamī sattamīyeva, bhavate na tu aṭṭhamī.

Pañcamīsattamīnaṃ tu, paccuppannavibhattiyaṃ;  
Saṅgaṇhanatthametāsaṃ, majjhe chaṭṭhī na vuccati.

Tathā pañca upādāya, bhavitabbañca chaṭṭhiyā;  
Pañcamiyā tu sā esā, “chaṭṭhī”ti na samīritā.

Chaṭṭhībhāvamhi santepi, “pañcamī”ti vaco pana;  
Pañcamiyā vibhattiyā, paccuppannavibhattiyaṃ.

Saṅgaṇhanatthaṃ vuttanti, viññātabbā vibhāvinā;  
Pañcamī tu upādāya, sattamiyā vibhattiyā.

Chaṭṭhiyā ca bhavitabbaṃ, na sā “chaṭṭhī”ti īritā;  
Chaṭṭhiṃ pana upādāya, “sattamī”tveva īritā.

Majjhe chaṭṭhiṃ adassetvā, evaṃ tu kathanampi ca;  
Sattamiyā vibhattiyā, paccuppannavibhattiyaṃ;  
Saṅgaṇhanatthaṃ vuttanti, adhippāyaṃ vibhāvaye.

Sabhāvo hesa vatthūnaṃ, gambhīratthesu attano;  
Yena kenacākārena, adhippāyassa ñāpanaṃ.

Yajjevaṃ paṭhamamṭīte-nāgate ca vibhattiyo;  
Vatvā tato paccuppanne, kathetabbā vibhattiyo.

**Kaccāyana**vhave ganthe, kasmā evaṃ na bhāsītā;  
Paccuppannavibhatyova, kasmā ādimhi bhāsītā?

Yasmā vadanti vohāra-pathe etāva pāyato;  
Tasmā bahuppayogattaṃ, hotetāsaṃ vibhattinaṃ.

Ādobahuppayogova, kathetabboti ñāyato;  
Paccuppannamhi sambhūtā, vibhatyovādito matā.

Atītānāgataṃ vatvā, paccuppanne tato paraṃ;  
Yasmā vuttamhi lokasmiṃ, hoti vācāsiliṭṭhatā.

Tasmā siliṭṭhakathane, atītādimapekkhiya;  
Pañcamī sattamī cetā, vattamānāyanantaraṃ;  
Saṅgaṇhanatthamakkhātā, paccuppannavibhattisu.

Ettha hi yathā “mātāpitāro”ti vutte siliṭṭhakathanaṃ hoti, tasmimyeva vacane vipariyayaṃ katvā samāsavasena “pitāmātāro”ti vutte siliṭṭhakathanaṃ na hoti, tasmā tādisī saddaracanā apūjanīyā, “pitā matā ca me dajju”nti pāṭho pana byāsavasena yathicchitappayogattā pūjanīyo, evameva “atītānāgatapaccuppanna”nti vutte siliṭṭhakathanaṃ hoti, “atītāpaccuppannānāgata”nti evamādinā vutte siliṭṭhakathanaṃ na hoti, tasmā tādisī saddaracanā apūjanīyā siyā. “Atītārammaṇā paccu-ppannānāgatagocārā”ti vacanaṃ pana gāthābandhasukhatthaṃ yathicchitappayogattā pūjanīyameva. Ayamettha pāḷi veditabbā –

“Yaṃkiñci rūpaṃ atītānāgatapaccuppanna”nti ca,

“Ekāyanaṃ jātikhayantadassī,  
Maggāṃ pajānāti hitānukampī;  
Etena maggena atamsu pubbe,  
Tarissanti ye ca taranti ogha”nti ca,

“Ye cabbhatītā sambuddhā, ye ca buddhā anāgatā;  
Ye cetarahi sambuddhā, bahūnaṃ sokañāsakā.

Sabbe saddhammagaruno, vihaṃsu viharanti ca;  
Athopi viharissanti, esā buddhāna dhammatā”ti ca

Evamanekesu saddappayogesu. Idha yathicchitappayogavasena atītānāgatapaccuppannakālikāsu aṭṭhasu vibhattīsu tisso paccuppannakālikā vibhattiyo ādimhi kathitā, tañca kathanāṃ tāsāññeva vohārapathe yebhuyyena pavattito bahuppayogatāñāpanatthaṃ. Tāsu pana dvinnaṃ vibhattīnaṃ “pañcamīsattamī”tisaññā siliṭṭhakathanicchāyaṃ kamena vattabbā, atītānāgatakālikā vibhattiyo appekkhitvā katā. Icevaṃ

Yathicchitappayogena, paccuppannavibhattiyo;

Tidhā katvāna ādimhi, kaccānena udīritā.

Ādimhi kathanam tañca, tāsam pāyena vuttito;  
Bahuppayogabhāvassa, nāpanatthanti niddise.

Atītādimapekkhitvā, siliṭṭhakathane dhuvam;  
“Pañcamī sattami”cceva, dvinnam nāmam katanti ca;  
Kālātipattiṃ vajjetvā, idam vacanamīritam.

Yadi evam ayam doso, āpajjati na saṃsayo;  
Iti ce koci bhāseyya, atthe akusalonaro.

Tekālikākhyātapade, kālātipattiyā pana;  
Asaṅgahova hotīti, “tannā”ti paṭisedhaye.

Tekālikākhyātapade, na no kālātipattiyā;  
Iṭṭho asaṅgaho tattha, saṅgahoyeva icchito.

Pañcamīsattamīsaññā, kālātipattikam pana;  
Vibhattimanapekkhitvā, katā icceva no mati.

Nānāyayam gahetvāna,  
Paccetabbam tu sārato;  
Yāya eso ruto attho,  
Tasmā esā na dubbalā.

Attho labbhati pāsaṃso,  
Yattha yattha yathā yathā;  
Tathā tathā gahetabbo,  
Tattha tattha vibhāvinā.

Vuttañhetam **abhidhammaṭīkāyam** “yattha yattha yathā yathā attho labbhati, tattha tattha tathā tathā gahetabbo”ti.

Pañcamīsattamīsaññā, rūḷhīsaññāti kecana;  
Na panevam gahetabbam, ajānitvā vadanti te.

Nesā purisasaññādi, **jhala** saññādayo viya;  
Rūḷhiyā bhāsītā saññā, bhūtenatthena bhāsītā.

Upanidhāya paññatti, esā saññā yato tato;  
Anvatthasaññā ṭhapitā, porāṇehīti lakkhaye.

Icevam kālachakkam tu, saṅkhepena tidhā matam;  
Etamatthañhi sandhāya, “yam tikāla”nti bhāsitam.

Ayamettha kālachakkasaṅgaho.

Evam tidhā catudhā vā, chadhā vāpi sumedhaso;  
Kālabhedam vibhāveyya, kālaññūhi vibhāvitaṃ.

Atītānāgatam kālam, visum kālātipattikam;  
Gahetvā pañcadhā hoti, evañcāpi vibhāvaye.

Ettha nayova ‘‘ajjhata-bahiddhā vā’’ti pāliyaṃ;  
Atītānāgatakālī, vibhatti samudīritā.

Icevaṃ sabbathāpi kālasaṅgaho samatto.

Idāni viññūnaṃ atthaggaḥaṇe kosallajananatthaṃ pakaraṇantaravasenaṃ imasmiṃ pakaraṇe vattamānānantaraṃ vuttānaṃ āṇattiparikappakālikānaṃ ‘‘pañcamīsattamī’’tisankhātānaṃ dvinnāṃ vibhattīnaṃ paṭipāṭiṭṭhapane pakaraṇasaṃsandanaṃ kathayāma – **kātantappakaraṇasmiñhi** sakkatabhāsānurūpena dasadhā ākhyātavibhattiyo ṭhapitā, **kaccāyanappakaraṇe** pana māgadhabhāsānurūpena aṭṭhadhā ṭhapitā, **niruttiyañca** pana māgadhabhāsānurūpena atītānāgatapaccuppannāṇattiparikappakālatipattivasena chadhā ṭhapitā. Tesu hi kātante vattamānā, sattamī, pañcamī, hiyyattanī, ajjatanī, parokkhā, svātānī, āsī, bhavissantī, kriyātipatti cāti dasadhā vibhattā. Kaccāyane pana vattamānā, pañcamī, sattamī, parokkhā, hiyyattanī, ajjatanī, bhavissantī, kālatipatti cāti aṭṭhadhā vibhattā. Iti etesu dvīsu kātantakaccāyanesu vibhattiyo visadisāya paṭipāṭiyā ṭhapitā. Kiñcāpettha visadisā paṭipāṭi, tathāpetā niruttiyaṃ vuttātītādikālavibhāgavasena ekato saṃsandanti samenti kiñci visesaṃ ṭhapetvā.

Kathaṃ? Kātante tāva hiyyattanī ajjatanī parokkhā cāti imā tisso ekantena atītākālikā, svātānī āsī bhavissanti cāti imā tisso ekantena anāgatakālikā, vattamānā ekāyeva paccuppannakālikā, sattamī pana pañcamī ca paccuppannānāgatakālavasena dvikālikā ‘‘ajja puññaṃ kareyya, svepi kareyya. Ajja gacchatu, sve vā gacchatū’’ti payogārahattā. Kriyātipatti aniyatakālikā ‘‘so ce hiyyo yānaṃ alabhissā, agacchissā. So ce ajja anattaṅgate sūriye yānaṃ alabhissā, agacchissā. So ce sve yānaṃ alabhissā, agacchissā’’ti payogārahattā. Evaṃ asaṅkarato vavathapetabbaṃ.

Evaṃ vavathapetvā ayamamhehi vuccamāno nayo sādhukaṃ sallakkhetabbo. Kathaṃ? Hiyyattanajjatanīparokkhāsvātanyāsībhavissantivasena ekantātītānāgatakālikā vibhattiyo cha, vattamānavasena ekantapaccuppannakālikā vibhatti ekāyeva, sā paṭipāṭiyā gaṇiyamānā sattamaṃ ṭhānaṃ bhajati. Evaṃ etasmiṃ vattamānāsaṅkhāte sattamaṭṭhāne pakkhipitūṃ niruttinayena ‘‘parikappakālikā’’ti saṅkhaṃ gataṃ satthanayena ‘‘paccuppannānāgatakālikā’’tivattabbaṃ ekaṃ vibhattiṃ sattamībhūtāya vattamānāya samānaṭṭhānattā sattamīsaññaṃ katvā ṭhapesi. Tato punadeva svātanyāsībhavissantivasena ekantānāgatakālikā tisso vibhattiyo gaṇetvā taṃ paccuppannānāgatakālikāṃ ‘‘sattamī’’ti laddhasaññaṃ vibhattiṃ anāgatakālikabhāvena tāhi tīhi saddhiṃ samānaṭṭhānattā catutthaṃ katvā niruttinayena ‘‘āṇattikālikā’’ti saṅkhaṃ gataṃ satthanayena ‘‘paccuppannānāgatakālikā’’ti vattabbaṃ ekaṃ vibhattiṃ pañcannaṃ saṅkhyānaṃ pūraṇena pañcamīsaññaṃ katvā ṭhapesi.

Kriyātipattiyā pana aniyatakālikattā taṃ vajjetvā ayaṃ vinicchayo kato, so ca kho niruttinayaṃyeva nissāya. Ayaṃ tāva kātante vattamānānantaraṃ vuttānaṃ sattamīpañcamīnaṃ anvatthasaññaṃ icchantānaṃ amhākaṃ ruci, eṣā saddhammavidūhi garūhi appaṭikkositā anumatā sampācchitā ‘‘evamevaṃ āvuso, evamevaṃ āvuso’’ti. Veyākaraṇehipi appaṭikkositā anumatā sampācchitā ‘‘evamevaṃ bhante, evamevaṃ bhante’’ti. Evaṃ sabbehi tehi pubbācariyehi abbhānumoditā appaṭikkositā.

Kaccāyanappakaraṇe pana buddhavacanānurūpena aṭṭhadhā vibhattīnaṃ vuttattā vattamānāvibhatti pañcamaṭṭhāne ṭhitā. Kathaṃ? Parokkhāhiyyattanajjatanībhavissantivasena ekantātītānāgatakālikā catasso vibhattiyo, vattamānavasena ekantapaccuppannakālikā vibhatti ekāyeva, sā paṭipāṭiyā gaṇiyamānā pañcamaṃ ṭhānaṃ bhajati. Evaṃ etasmiṃ vattamānāsaṅkhāte pañcamaṭṭhāne pakkhipitūṃ niruttinayena ‘‘āṇattikālikā’’ti saṅkhaṃ gataṃ ‘‘anuttakālikā’’ti vuttamā vibhattiṃ pañcamībhūtāya vattamānāya samānaṭṭhānattā pañcamīsaññaṃ katvā ṭhapesi. Tato paraṃ taṃ pañcamaṃ chaṭṭhiṭṭhāne ṭhapetvā parokkhā hiyyattanī ajjatanī bhavissantī vattamānā pañcamīti evaṃ gaṇanāvasena cha vibhattiyo upādāya niruttinayena ‘‘parikappakālikā’’ti saṅkhaṃ gataṃ ‘‘anuttakālikā’’ti vuttamā vibhattiṃ sattannaṃ saṅkhyānaṃ pūraṇena sattamīsaññaṃ katvā ṭhapesi.

Kālatipattiyā pana atītānāgatakālikattā taṃ vajjetvā ayaṃ vinicchayo kato, so ca kho niruttinayaṃyeva nissāya. Ayaṃ kaccāyane vattamānānantaraṃ vuttānaṃ pañcamīsattamīnaṃ

anvatthasaññaṃ icchantānaṃ amhākaṃ ruci, esā ca saddhammavidūhi garūhi appaṭikkositā anumatā sampañicchitā “evamevaṃ āvuso, evamevaṃ āvuso”ti. Veyyākaraṇehipi appaṭikkositā anumatā sampañicchitā “evamevaṃ bhante, evamevaṃ bhante”ti. Evaṃ sabbehipi tehi pubbācariyehi abbhanumoditā appaṭikkositā.

Yasmā hi kātantakaccāyanāni aññamaññaṃ visadisavibhattikkamānipi antarena kiñci visesaṃ niruttiyaṃ vuttātītādikālavibhāgavasenekajjhaṃ saṃsandanti samenti, tasmā niruttinayaññeva sārato gahetvā pañcamīsattamīvibhattīnaṃ anvatthasaññāparikappane amhākaṃ ruci pubbācariyehi abbhanumoditā appaṭikkositā, tasmā eva yo koci imaṃ vādaṃ madditvā aññaṃ vādaṃ patiṭṭhāpetuṃ sakkhissatīti netam thānaṃ vijjati. Ayañhi nayo atīva sukhumo duddaso ca paramānuriva, dukkhogaḷho ca mahāgahanamiva, atigambhīro ca mahāsamuddo viya, tasmā imissaṃ saddanītiyaṃ saddhāsampannehi kulaputtehi sāsānopakārattham yogo suṭṭhu karaṇīyo. Tathā hi idha katayogehi nāmākhyātādīsu catūsu padesu uppannavādā paravādino jītāva honti.

Muninā munināgena, duṭṭhā pabbajitā jītā;  
Yathā yathā asaddhamma-pūraṇā pūraṇādayo.

Tathā tathāgatādāyā-nugāyaṃ saddanītiyaṃ;  
Katayogehipi jītā, savanti paravādinoti.

Ayaṃ pañcamīsattamīnaṃ paṭipāṭiṭṭhapane pakaraṇasaṃsandanā.

Atha vattamānādīnaṃ vacanattham kathayāma – tattha **vattamānāti** kenaṭṭhena vattamānā? Vattamānakālavacanaṭṭhena. Paccuppanabhāvena hi vattatīti vattamāno, paccuppanakriyāsāṅkhāto kālo. Tabbācakavasena vattamāno kālo etissā atthīti ayaṃ **ti antiā**divibhatti vattamānā. Tathā hi “gacchati devadatto”ti ettha devadattassa paccuppanaṃ gamanakriyaṃ vibhattibhūto **tisaddoyeva** vadati, tasmā tabbācakavasena vattamāno kālo etissā atthīti vattamānāti vuccati. **Pañcamīti** kenaṭṭhena pañcamī? Pañcamaṃ vattamānaṭṭhānaṃ gamanaṭṭhena, pañcannañca saṅkhyānaṃ pūraṇaṭṭhena. Tathā hi niyogā atītānāgatapaccuppanakālikānaṃ parokkhāhiyyattanajjatanībhavissantīvattamānāsāṅkhātānaṃ pañcannaṃ vibhattīnamantare pañcamībhūṭāya vattamānāya sayampi paccuppanakālikabhāvena samānaṭṭhānattā pañcamaṃ vattamānaṭṭhānaṃ gacchatīti pañcamī. Yathā nadantī gacchatīti nadī. Tathā niyogā atītānāgatakālikā parokkhāhiyyattanajjatanībhavissantīsāṅkhātā catasso vibhattiyo upādāya sayampi vattamānāvibhatti viya pañcannaṃ saṅkhyānaṃ pūraṇīti pañcamī. **Sattamīti** kenaṭṭhena sattamī? Sattannaṃ saṅkhyānaṃ pūraṇaṭṭhena. Tathā hi atītānāgatapaccuppanakālikā parokkhāhiyyattanajjatanībhavissantīvattamānāpañcamīsāṅkhātā cha vibhattiyo upādāya sayampi paccuppanakālikā hutvā sattannaṃ saṅkhyānaṃ pūraṇīti sattamī.

**Parokkhāti** kenaṭṭhena parokkhā? Parokkhe bhavāti atthena. Tathā hi cakkhāndriyāsāṅkhātassa akkhassa paro tirobhāvo parokkhaṃ, tabbācakabhāvena parokkhe bhavāti parokkhā. **Hiyyattanīti** kenaṭṭhena hiyyattanī? Hiyyo pabhuti atīte kāle bhavā tabbācakabhāvenāti atthena. **Ajjatanīti** kenaṭṭhena ajjatanī? Ajja pabhuti atīte kāle bhavā tabbācakabhāvenāti atthena. **Bhavissantīti** kenaṭṭhena bhavissantī? “Evaṃ anāgate bhavissantī”ti attham pakāsentī eti gacchatīti atthena. **Kālātipattīti** kenaṭṭhena kālātipattī? Kālāssātipatanavacanaṭṭhena. Tathā hi kālassa atipatanam accayo atikkamitvā pavatti kālātipattī, labhitabbassa atthassa nipphattirahitam kriyātikkamaṇaṃ. **Kāloti** cetha kriyā adhippetā. Karaṇam kāro, kāro eva kālo **rakārassa lakāraṃ** katvā uccāraṇavasena. Ayaṃ pana vibhatti tabbācakattā kālātipattīti. Ayaṃ pana vattamānādīnaṃ vacanatthavibhāvanā.

Vippakiṇṇavividhanaye, saṃkiṇṇalakkhanaḍharavarasāsane;  
Sumatimativaḍḍhanattham, kathito pakiṇṇakavinicchayo.

Iti navānge sātṭhakathe piṭakattaye byappathagatīsu viññūnaṃ

Kosallatthāya kate saddanītipakaraṇe

Pakiṇṇakavinicchayo nāma

Tatiyo paricchedo.

## 4. Bhūdhātumayanāmikarūpavibhāga

“Bhū sattāya”nti dhātussa, rūpamākhyātasāññitaṃ;  
Tyādyantaṃ lapitaṃ nāna-ppakārehi anākulam.

Syādyantaṃ, dāni tasseva, rūpaṃ nāmikasavhayaṃ;  
Bhāsissaṃ bhāsitatthesu, paṭubhāvāya sotunaṃ.

Yadatthe’ttani nāmeti, para’matthesu vā sayam;  
Namatīti tadāhaṃsu, **nāmaṃ** iti vibhāvino.

**Nāmaṃ nāmikamiccatra**, ekamevetthato bhava;  
Tadevaṃ nāmikaṃ ñe yyaṃ, salingaṃ savibhattikaṃ.

Satvābhidhānaṃ līnganti, itthipumanapuṃsakaṃ;  
Vibhattītidha satteva, tattha caṭṭha pavuccare.

Paṭhamā dutiyā tatiyā, catutthī pañcamī tathā;  
Chaṭṭhī ca sattamī cāti, honti satta vibhattiyo.

Līngatthe paṭhamā sāyaṃ, bhinnā dvedhā **siyo** iti;  
Kammatthe dutiyā sāpi, bhinnā **aṃ yo** iti dvidhā.

Karaṇe tatiyā sāpi, bhinnā **nā hi** iti dvidhā;  
Sampadāne catutthī sā, bhinnā dvedhā **sa naṃ** iti.

Apādāne pañcamī sā, bhinnā dvedhā **smā hi** iti;  
Chaṭṭhī sāmimhi sā cāpi, bhinnā dvedhā **sa naṃ** iti.

Okāse sattamī sāpi, bhinnā dvedhā **smiṃsu** iti;  
Āmantanaṭṭhamī sāyaṃ, **siyoyevāti** cuddasa.

Vacanadvayasamyuttā, ekekā tā vibhattiyo;  
Satvamitiha viññeyyo, attho so dabbasaññito.

Yo karotisa **kattātu**, taṃ **kammaṃ** yaṃ karoti vā;  
Kubbate yena vā tantu, **karaṇaṃ** iti saññitaṃ.

Deti rocati vā yassa, **sampadānanti** taṃ mataṃ;  
Yatopeti bhayaṃ vā taṃ, **apādānanti** kittitaṃ.

Yassāyatto samūhovā, taṃ ve **sāmīti** desitaṃ;  
Yasmim karoti kiriyaṃ, **tadokāsanti** sadditaṃ.

Yadālapati taṃ vatthu, **āmantanamudīritaṃ**;  
Saddenābhimukhikāro, vijjamānassa vā pana.

Vinā ālapanatthaṃ līngatthādīsū paṭhamādivibhattuppatti upalakkhaṇavasena vuttāti  
daṭṭhabbaṃ.

Idamettha niruttillakkhaṇaṃ daṭṭhabbaṃ – paccattavacane paṭhamā vibhatti bhavati, upayogavacane dutiyā vibhatti bhavati, karaṇavacane tatiyā vibhatti bhavati, sampadānavacane catutthī vibhatti bhavati, nissakkavacane pañcamī vibhatti bhavati, sāmivacane chaṭṭhī vibhatti bhavati, bhummavacane sattamī vibhatti bhavati, āmantanavacane aṭṭhamī vibhatti bhavati. Tatrūddānaṃ –

Paccattamupayogañca, karaṇaṃ sampadāniyaṃ;  
Nissakkaṃ sāmivacanaṃ, bhummamālapanaṭṭhamaṃ.

Tatra **paccattavacanaṃ** nāma tividhalingavavatthānagātānaṃ itthipumanapūmsakānaṃ paccattasabhāvaniddesattho. **Upayogavacanaṃ** nāma yo yaṃ karoti, tena tadupayuttaparidīpanattho. **Karaṇavacanaṃ** nāma tājāpakatanibbattakaparidīpanattho. **Sampadānavacanaṃ** nāma tappadānaparidīpanattho. **Nissakkavacanaṃ** nāma tannissaṭatadapagamaparidīpanattho. **Sāmivacanaṃ** nāma tadissaraparidīpanattho. **Bhummavacanaṃ** nāma tappatiṭṭhāparidīpanattho. **Āmantanavacanaṃ** nāma tadāmantanaparidīpanattho. Evaṃ ñatvā payogāni asammuyhantena yojetabbāni.

Bhūto, bhāvako, bhavo, abhavo, bhāvo, abhāvo, sabhāvo, sabbhāvo, sambhavo, pabhavo, pabhāvo, anubhavo, ānubhāvo, parābhavo, vibhavo, pātubhāvo, āvibhāvo, tirobhāvo, vinābhāvo, sotthibhāvo, atthibhāvo, natthibhāvoti okārantapullīṅgaṃ.

Abhibhavitā, paribhavitā, anubhavitā, samanubhavitā, bhāvitā, paccanubhavitāi  
ākārantapullīṅgaṃ.

Bhavaṃ, parābhavaṃ, paribhavaṃ, abhibhavaṃ, anubhavaṃ, samanubhavaṃ, paccanubhavaṃ, pabhavaṃ, appabhavanti nigghāntapullīṅgaṃ.

Dhanabhūti, siribhūti, sotthibhūti, suvatthibhūtīti ikārantapullīṅgaṃ.

Bhāvī, vibhāvī, sambhāvī, paribhāvīti ikārantapullīṅgaṃ.

Sayambhū, pabhū, abhibhū, vibhū, adhibhū, patibhū, gotrabhū, vatrabhū, parābhibhū, rūpābhibhū, saddābhibhū, gandhābhibhū, rasābhibhū, phoṭṭhabbābhibhū, dhammābhibhū, sabbābhibhūti ūkārantapullīṅgaṃ.

Imānettha chabbidhāni pullīṅgāni **bhū**dhātumayāni uddiṭṭhāni.

Ukāraṇaṃ pullīṅgaṃtu **bhū**dhātumayamappasiddhaṃ, aññadhātumayaṃ panukārantapullīṅgaṃ pasiddhaṃ “bhikkhu, hetu”iti. Tena saddhiṃ sattavidhāni pullīṅgāni honti, sabbānetāni sabhāvatoyeva pullīṅgāniṭi daṭṭhabbāni. Ettha sattoti atthavācako **bhū**tasaddoyeva niyogā pullīṅgāntipi daṭṭhabbo.

Ye pana “yo dhammo bhūto, yā dhammajāti bhūtā, yaṃ dhammajātaṃ bhūta”nti evaṃ līṅgattaye yojanārahattā aniyatalīṅgā aññepi **bhū**taparā**bhū**tasambhūtasaddādayo sandissanti pāvacanavare, tepi nānopasagganipātapadehi yojanavasena saddaracānāyaṃ sukhumatthaggaṇaṇe ca viññūnaṃ kosallajānanatthaṃ niyatapullīṅgesu pakkipitvā dassessāma.

Seyyathidaṃ? Bhūto, parābhūto, sambhūto, vibhūto, pātubhūto, āvibhūto, tirobhūto, vinābhūto, bhabbo, paribhūto, abhibhūto, adhibhūto, addhabhūto, anubhūto, samanubhūto, paccanubhūto, bhāvito, sambhāvito, vibhāvito, paribhāvito, anuparibhūto, paribhavitabbo, paribhotabbo, paribhavanīyo, abhibhavitabbo, abhibhotabbo, abhibhavanīyo, adhibhavitabbo, adhibhotabbo, adhibhavanīyo, anubhavitabbo, anubhotabbo, anubhavanīyo, samanubhavitabbo, samanubhotabbo, samanubhavanīyo, paccanubhavitabbo, paccanubhotabbo, paccanubhavanīyo, bhāvetabbo, bhāvanīyo, sambhāvetabbo, sambhāvanīyo, vibhāvetabbo, vibhāvanīyo, paribhāvetabbo,



paribhāvanīyo, bhavamāno, vibhavamāno, paribhavamāno, abhibhavamāno, anubhavamāno, samanubhavamāno, paccanubhavamāno, anubhonto, samanubhonto, paccanubhonto, sambhonto, abhisambhonto, bhāvento, sambhāvento, vibhāvento, paribhāvento, paribhaviyamāno, paribhuyyamāno, abhibhaviyamāno, abhibhūyamāno, anubhaviyamāno, anubhuyyamāno, samanubhaviyamāno, samanubhuyyamāno, paccanubhaviyamāno, paccanubhuyyamānoti imāni niyatapullīngesu pakkhittalingāni. Evamokārantādivasena chabbidhāni pullīngāni **bhūdhātumayāni** pakāsītāni. Ayaṃ tāva pullīngavasena udāharaṇuddeso.

Bhāvikā, bhāvanā, vibhāvanā, sambhāvanā, paribhāvanāti **ākārantaitthilingaṃ**.

Bhūmi, bhūti, vibhūti. **Ikārantaitthilingaṃ**.

Bhūrī, bhūtī, bhotī, vibhāvinī, parivibhāvinī, sambhāvinī, pātubhavantī, pātubhontī, paribhavantī, paribhontī, abhibhavantī, abhibhontī, adhibhavantī, adhibhontī, anubhavantī, anubhontī, samanubhavantī, samanubhontī, paccanubhavantī, paccanubhontī, abhisambhavantī, abhisambhontīti **ikārantaitthilingaṃ**.

Bhū, abhū. **Ūkārantaitthilingaṃ**.

Imānettha catubbidhāni itthilingāni **bhūdhātumayāni** uddiṭṭhāni.

**Ukārantitthilingaṃ bhūdhātumayamappasiddhaṃ**, aññadhātumayaṃ pana **ukārantitthilingaṃ** pasiddhaṃ “dhātu, dhenu”’iti. Tena saddhiṃ pañcavidhāni itthilingāni honti, okārantassa vā **gosaddassa** itthilingabhāve tena saddhiṃ chabbidhānīpi honti, sabbānetāni sabhāvatoyevitthilingānīti daṭṭhabbāni. Etthāpi aniyatalīngā **bhūtaparābhūtasambhūtasaddādayo** itthilingavasena yujjante.

Kathaṃ? Bhūtā, parābhūtā, sambhūtāti sabbāṃ vitthārato gahetabbāṃ “anubhonto samanubhonto”’tiādīni nava padāni vajjetvā. Tāni hi **ikārantavasena** yojitāni. Imāni niyatalingesu pakkhittalingāni. Evaṃ **ākārantādivasena** catubbidhāni itthilingāni **bhūdhātumayāni** pakāsītāni. Ayaṃ itthilingavasena udāharaṇuddeso.

Bhūtaṃ, mahābhūtaṃ, bhavittaṃ, bhūnaṃ, bhavanaṃ, parābhavanaṃ, sambhavanaṃ, vibhavanaṃ, pātubhavanaṃ, āvibhavanaṃ, tirobhavanaṃ, vinābhavanaṃ, sotthibhavanaṃ, paribhavanaṃ, abhibhavanaṃ, adhibhavanaṃ, anubhavanaṃ, samanubhavanaṃ, paccanubhavananti niggahītantaṇapūṃsakalingaṃ.

Atthavibhāvi, dhammavibhāvi. **Ikārantanapūṃsakalingaṃ**.

Gotrabhu, cittasahabhu, nacittasahabhu. **Ukārantanapūṃsakalingaṃ**.

Sabbānetāni sabhāvatoyeva napūṃsakalingānīti daṭṭhabbāni. Ettha sattabhūtarūpavācako **bhūtasaddoyeva** niyogā napūṃsakalingotipi daṭṭhabbāṃ. Etthāpi aniyatalīngā **bhūta parābhūta sambhūtasaddādayo** napūṃsakalingavasena yujjante.

Kathaṃ? Bhūtaṃ, parābhūtaṃ, sambhūtaṃ, vibhūtaṃ. **Peyyālo**. Samanubhavamānaṃ, paccanubhavamānaṃ, anubhontaṃ, anubhavantāṃ, samanubhontaṃ, samanubhavantāṃ, paccanubhontaṃ, paccanubhavantāṃ, sambhontaṃ, sambhavantāṃ, abhisambhontaṃ, abhisambhavantāṃ, pātubhontaṃ, pātubhavantāṃ, paribhontaṃ, paribhavantāṃ, abhibhontaṃ, abhibhavantāṃ, adhibhontaṃ, adhibhavantāṃ, bhāventaṃ, sambhāventaṃ, vibhāventaṃ, paribhāventaṃ, paribhāviyamānaṃ, paribhuyyamānaṃ, **peyyālo**. Paccanubhaviyamānaṃ, paccanubhuyyamānanti imāni niyatanapūṃsakalingesu pakkhittalingāni. Evaṃ niggahītantādivasena tivīdhāni napūṃsakalingāni **bhūdhātumayāni** pakāsītāni. Ayaṃ napūṃsakalingavasena udāharaṇuddeso, evaṃ pullīngādivasena līngattayaṃ **bhūdhātumayamuddiṭṭhaṃ**.

Ettha me appasiddhāti, ye ye saddā pakāsītā;  
Te te pālippadesesu, maggitabbā vibhāvinā.

O, ā, bindu, i, ī, u, ū-antime sattadhā ṭhitā;  
Ñe yyā pulliṅgabhedāti, niruttaññūhi bhāsītā.

Ā ivaṇṇo civaṇṇo ca, pañca antā sarūpato;  
Itthibhedāti viññeyyā, okārentena chāpi vā.

Bindu, i, u-ime antā, tayo ñeyyā vibhāvinā;  
Napuṃsakappabhedāti, niruttaññūhi bhāsītā.

Antā satteva pulliṅge, itthiyaṃ pañca vā cha vā;  
Napuṃsake tayo evaṃ, dasa pañcahi chabbidhā.

Yasmā panettha “bhūto”tiādayo saddā  
nibbacanābhidheyyakathanatthasādhakavacanapariyāyavacanatthuddhāravasena vuccamānā pākaṭā  
honti suviññeyyā ca, tasmā imesaṃ nibbacanādīni yathāsambhavaṃ vakkhāma viññūnaṃ  
tuṭṭhijananatthañceva sotārānamatthesu paṭutarabuddhipaṭilābhāya ca. Tatra **bhūtoti**  
khandhapātubhāvena bhavatīti bhūto, idaṃ tāva nibbacanaṃ. “Bhūto”ti sabbasaṅgāhakavasena  
satto vuccati, idamabhidheyyakathanaṃ. “Yo ca kālaghaso bhūto. Sabbeva nikkhipissanti, bhūtā  
loke samussaya”nti ca idametassa atthassa sādhakavacananaṃ. Atha vā **bhūtoti** evaṃnāmako  
amanussajātiyo sattaviseso, idamabhidheyyakathanaṃ. “Bhūtavijjā, bhūtavejjo, bhūtaviggahito”ti  
ca idametassa atthassa sādhakavacananaṃ. Yañca pana “satto macco pajā”tiādikaṃ tattha tattha  
āgataṃ vacanaṃ, idaṃ sattoti atthavācakassa **bhūtasaddassa** pariyāyavacananaṃ. Yañca  
**niddesapāliyaṃ** “maccoti satto naro mānavo poso puggalo jīvo jagu jantu hindagu manujo”ti  
āgataṃ, idampi pariyāyavacanameva. Tāni sabbāni piṇḍetvā vuccante –

Satto macco jano bhūto, pāṇo hindagu puggalo;  
Jantu jīvo jagu yakkho, pāṇi dehī tathāgato.

Sattavo mātiyo loko, manujo mānavo naro;  
Poso sarīrīti pume, bhūtamīti napuṃsake.

Pajāti itthiyaṃ vutto, liṅgato, na ca atthato;  
Evaṃ tiliṅgikā honti, saddā sattābhidhānakā.

Yo so jaṅghāya ulati, so satto jaṅghalo idha;  
Pāṇadehābhidhānehi, sattanāmaṃ papañcītaṃ.

Imasmim pakaraṇe “pariyāyavacana”nti ca “abhidhāna”nti ca “saṅkhā”tiādīni ca ekatthāni  
adhippetāni, atthuddhāravasena pana **bhūtasaddo**  
pañcakkhandhāmanussadhātusassatavijjamānakhīṇāsavasattarukkhādīsu dissati, tappayogo upari  
atthattikavibhāge āvibhavissati. **Bhāvakoti** bhāvetīti bhāvako, idaṃ nibbacanaṃ. Yo bhāvanaṃ  
karoti, so bhāvako. Idamabhidheyyakathanaṃ. “Bhāvako nipako dhīro”ti idametassa atthassa  
sādhakavacananaṃ. “Bhāvako bhāvanāpasuto bhāvanāpayutto bhāvanāsampanno”ti idaṃ  
pariyāyavacananaṃ. Imāni “bhūto bhāvako”ti dve padāni suddhakattuhetukattuvasena vuttānīti. Ito  
paraṃ nayānusārena suviññeyyattā “idaṃ nibbacana”nti ca ādīni avatvā katthaci  
atthasādhakavacananaṃ pariyāyavacananaṃ atthuddhārañca yathārahaṃ dassessāma. Tesu hi sabbattha  
dassitesu ganthavitthāro siyā, tasmā yesamattho uttāno, tesampi padānamabhidheyyaṃ na  
kathessāma, nibbacanamattameva nesaṃ kathessāma. Yesam pana gambhīro attho,  
tesamabhidheyyaṃ kathessāma.

Bhavanaṃ **bhavo**, bhavo vuccati vuddhi. **Bhū**saddassa atthātisayayogato vaḍḍhanepi

dissamānattā bhavanaṃ vaḍḍhananti katvā. “Bhavo ca rañño abhavo ca rañño”ti idaṃ vuddhiatthassa sādhaḥkaṃ vacanaṃ. Atha vā bhavoti vuccati sassataṃ. “Sassato attā ca loko cā”ti hi sassatavasena pavattā diṭṭhi sassatadiṭṭhi, tasmā bhavadiṭṭhi”ti idametassatthassa sādhaḥkaṃ vacanaṃ. Tathā bhavoti bhavadiṭṭhi, bhavati sassataṃ tiṭṭhatīti pavattanato sassatadiṭṭhi bhavadiṭṭhi nāma. Bhavadiṭṭhi hi uttarapadalopena bhavoti vuccati. “Bhavena bhavassa vipkamokkhamāhamsū”ti idametassatthassa sādhaḥkaṃ vacanaṃ. Etthāyaṃ pāḷivacanatto – ekacce samaṇā vā brāhmaṇā vā bhavadiṭṭhiyā vā kāmabhavādinā vā sabbabhavato vimuttiṃ saṃsāraṃvisuddhiṃ kathayimāsūti. Atha vā bhavanti vaḍḍhanti sattā etenāti bhavoti atthena sampattipuññāni bhavoti ca vuccanti. “Itibhavābhavataṇca vītivatto”ti idametassatthassa sādhaḥkaṃ vacanaṃ. Ettha panāyaṃ pāḷivacanatto – **bhavoti** sampatti, **abhavoti** vipatti. Tathā bhavoti vuddhi, abhavoti hāni. Bhavoti sassataṃ, abhavoti ucchedo. Bhavoti puññaṃ, abhavoti pāpaṃ, taṃ sabbaṃ vītivattoti.

Sahokāsā khandhāpi bhavo. “Kāmabhavo rūpabhavo” iccevamādi etassatthassa sādhaḥkaṃ vacanaṃ. Ettha pana khandhā “yo paññāyati, so sarūpaṃ labhati”ti katvā “bhavati avijjātaṇhādisamudayā nirantaraṃ samudeti”ti atthena vā “bhavā”ti vuccanti. Okāso pana “bhavanti jāyanti ettha sattā nāmarūpadhammā cā”ti atthena “bhavo”ti. Apica kammabhavopi bhavo, upapattibhavopi bhavo. “Upādānapaccayā bhavo duvidhena atthi kammabhavo, atthi upapattibhavo”ti idametassatthassa sādhaḥkaṃ vacanaṃ. Tatha kammameva bhavo kammabhavo. Tathā upapatti eva bhavo upapattibhavo. Etthūpapatti bhavatīti bhavo, kammaṃ pana yathā sukhakāraṇattā “sukho buddhānamuppādo”ti vutto. Evaṃ bhavakāraṇattā phalavohārena bhavoti daṭṭhabbaṃ. Atha vā bhāvanalakkhaṇattā bhāvetīti bhavo. Kiṃ bhāveti? Upapattiṃ. Iti upapattiṃ bhāvetīti bhavoti vuccati. Bhāvetītimassa ca nibbatetīti hetukattuvasenatto. Atha vā “bhavapaccayā jāti”ti vacanato bhavati etenāti bhavoti kammabhavo vuccati.

“Khandhānaṇca paṭipāṭi, dhātuāyatanāna ca;  
Abocchinnaṃ vattamānā, saṃsāroti pavuccati”ti

Vuttalakkhaṇo saṃsāropi bhavo. “Bhave dukkhaṃ bhavadukkhaṃ, bhave saṃsaranto”ti imānetassatthassa sādhaḥkāni vacanāni. Tatra kenaṭṭhena saṃsāro bhavoti kathīyati? Bhavati ettha sattasammuti khandhādipaṭipāṭisaṅkhāte dhammapuñjasminti atthena. Idaṃ **bhavasaddassa** bhāvakattukaraṇādhikaraṇasādhanavasenatthakathanam.

Ettha **bhavasaddassa** atthuddhāraṃ vadāma –

Vuddhisampattipuññāni, khandhā sokāsasaññitā;  
Saṃsāro sassataṇcetam, **bhavasaddena** sadditam.

Bhavataṇhā bhavadiṭṭhi, upapattibhavo tathā;  
Kammabhavo ca sabbantaṃ, **bhavasaddena** sadditam.

Bhavataṇhābhavadiṭṭhi-dvayaṃ katthaci pāḷiyaṃ;  
Uttarapadalopena, **bhavasaddena** sadditam.

**Abhavoti** na bhavo abhavo.

Vipatti hāni ucchedo, pāpaṇceva catubbidhā;  
Ime **abhavasaddena**, atthā vuccanti sāsane.

**Bhāvoti** ajjhāsayo, yo “adhippāyo”tipi vuccati. “Thīnaṃbhāvo durājāno. Nāmacco rājabhariyāsu, bhāvaṃ kubbetha paṇḍito. Hadayaṅgatabhāvaṃ pakāseti”ti evamādi etassatthassa sādhaḥkaṃ vacanaṃ. Apica vatthudhammopi bhāvo. “Bhāvasaṅketasiddhīna”nti idametassatthassa sādhaḥkaṃ vacanaṃ, cittampi bhāvo. “Accāhitaṃ kammaṃ karosi luddaṃ, bhāve ca te kusalaṃ natthi kiñci”ti idametassatthassa sādhaḥkaṃ vacanaṃ. Kriyāpibhāvo. “Bhāvalakkhaṇaṃ bhāvasattamī”ti ca idametassatthassa sādhaḥkaṃ vacanaṃ. Apica bhāvoti sattavevacananti bhaṇanti,

dhātu vā etaṃ adhvacaṇaṃ. Tattha ajjhāsayo ca vatthudhammo ca cittaṅca satto cāti ime bhavatīti bhāvo. Tathā pana bhāvetīti bhāvo, kriyā tu bhavananti bhāvo. Sā ca bhavanagamanapacanādivasenānekavidhā. Apica bhāvarūpampi bhāvo, yaṃ itthibhāvo pumbhāvo itthindriyanti ca vuccati. Tatrāyaṃ vacanatto – “itthī”ti vā “puriso”ti vā bhavati etena cittaṃ abhidhānañcāti bhāvo.

Nattanomatiyā etaṃ, nibbacanamudāhaṭaṃ;  
Pubbācariyasīhānaṃ, mataṃ nissāya māhaṭaṃ.

Vuttañhettaṃ porāṇehi “itthiyā bhāvo itthibhāvo, itthīti vā bhavati etena cittaṃ abhidhānañcāti itthibhāvo”ti, tasmā pumbhāvoti etthāpi pumassa bhāvo pumbhāvo, pumāti vā bhavati etena cittaṃ abhidhānañcāti pumbhāvoti nibbacanaṃ samadhigantabbā. Idaṃ **bhāvasaddassa** kattubhāvakarāṇasādhanavasenaṭṭhakathanaṃ.

**Abhāvoti** na bhāvoti abhāvo, ko so? Suññatā natthitā. **Sabhāvoti** attano bhāvo sabhāvo, attano pakati iccevattho. Atha vā sabhāvoti dhammānaṃ sati atthasambhave yo koci sarūpaṃ labhati, tassa bhāvo lakkhaṇamiti saññito namanaruppanakakkhaḷaphusañādiākāro iccevattho. “Sāmaññaṃ vā sabhāvo vā, dhammānaṃ lakkhaṇaṃ mata”nti idametassatthassa sādhaṇaṃ vacanaṃ. Apica sabhāvoti salakkhaṇo paramatthadhammo. Kenatthēna? Saha bhāvenāti atthēna. **Sabbhāvoti** satama bhāvo sabbhāvo, sappurisadhammo iccevattho. Atha vā attano bhāvo sabbhāvo. “Gāhāpayanti sabbhāva”nti idametassatthassa sādhaṇaṃ vacanaṃ. Saṃvijjamāno vā bhāvo sabbhāvo. “Evaṃ gahaṇasabbhāvo”ti idametassatthassa sādhaṇaṃ vacanaṃ. Idaṃ **sabhāva sabbhāvasaddānaṃ** bhāvasādhanavasenaṭṭhakathanaṃ.

**Sambhavoti** sambhavanaṃ sambhavo, sambhavanakriyā, yutti vā. Yutti hi sambhavoti vuccati “sambhavo gahaṇassa kāraṇa”ntiādīsu. Atha vā sambhavati etasmāti sambhavo. Yato hi yaṃ kiñci sambhavati, so sambhavo. **Pabhāvoti** pabhavanaṃ pabhavo, acchinnatā, pabhavati etasmāti vā pabhavo. Yato hi yaṃ kiñci pabhavati, so pabhavo. Ime pana **sambhavapabhavasaddā** katthaci samānatthā katthaci bhinnatthāti veditabbā. Kathaṃ? **Sambhavasaddo** hi bhavanakriyampi vadati yuttimpī paññattimpī sambhavarūpampi paccayatthampi, **pabhavasaddo** pana bhavanakriyampi vadati nadippabhavampi paccayatthampi, tasmā paccayatthamaṃ vajjetvā bhinnatthāti gahetabbā, paccayatthēna pana samānatthāti gahetabbā. Vuttañhettaṃ “paccayo hetu nidānaṃ kāraṇaṃ sambhavo pabhavotiādi atthato ekaṃ, byañjanato nāna”nti.

“Mūlaṃ hetu nidānañca, sambhavo pabhavo tathā;  
Samuṭṭhānāhārāmmaṇaṃ, paccayo samudayena ca”ti

Ayampi gāthā etassatthassa sādhiḱā. Idaṃ **sambhavapabhavasaddānaṃ** bhāvāpādānasādhanavasenaṭṭhakathanaṃ.

Evamettha bhāvakattukammakaraṇāpādānādhikaraṇavasena cha sādhanāni pakāsītāni. Tāni sampadānasādhanena sattavidhāni bhavanti, taṃ pana uttari āvibhavissati “dhanamassa bhavatūti dhanabhūtī”tiādīnā. Icevaṃ kitakavasena sabbathāpi sattavidhāni sādhanāni honti, yāni “kāraḱāni”tipi vuccati, ito aññaṃ sādhanamaṃ natthi. Idha payogesvatthesu ca viññūnaṃ pāṭavatthamaṃ sādhananāmaṃ pakāsītaṃ. Tathā hi dunnikkhittasādhanehi padehi yojitā saddappayogā dubbodhatthā honti, sunikkhittasādhanehi pana padehi yojitā subodhatthā honti, tasmā payogāsādhanamūlakā, attho ca payogamūlako. Payogānurūpañhi aviparītaṃ katvā atthamaṃ kathanasīlā “yācitova bahulaṃ cīvaraṃ paribhuñjati, appamaṃ ayācito”ti evamādīsu sādhanavasena gahetabbesu atthesu, aññesu catthesu paṭutarabuddhino paṇḱitāyeva ekantena bhagavato pariyattisāsanadharā nāma hontīti veditabbā. Ito paraṃ nayānusārena suviññeyyattā “idaṃ nāma sādhanā”nti na vakkhāma, kevalamidha dassītesu payogesu viññūnaṃ bahumānuppādanatthañceva vividhavicittapāḷigatike vividhatthasāre jinavaravacane sotūnaṃ buddhivijambhanatthañca atthasādhaḱavacanāniyeva yathārahaṃ suttagēyyaveyyākaraṇagāthādīsu tato tato āharitvā dassessāma.

**Pabhāvoti** pakārato bhavatīti pabhāvo, soyamānubhāvoyeva. “Pabhāvaṃ te na passāmi, yena tvam mithilaṃ vaje”ti idametassatthassa sādhaṃ vacanaṃ. **Anubhavoti** anubhavanaṃ anubhavo, kiṃ taṃ? Paribhuñjanaṃ. **Ānubhāvoti** tejjussāhamantapabhūsattiyo. “Tejasaṅkhato ussāhamantapabhūsattisaṅkhāto vā mahanto ānubhāvo etassāti mahānubhāvo”ti idametassatthassa sādhaṃ vacanaṃ.

Tejo ussāhamantā ca, pabhūsattīti pañcime;  
Ānubhāvāti vuccanti, pabhāvāti ca te vade.

Tejādivācakattamhi, **ānubhāv**apadassa tu;  
Atthanibbacaṃ dhīro, yathāsambhavamuddise.

Atha vā **ānubhāvoti** anubhavitabbaphalaṃ. “Anubhavitabbassa phalassa mahantatāya mahānubhāvo”ti idametassatthassa sādhaṃ vacanaṃ. **Parābhavoti** parābhavanaṃ parābhavo, atha vā parābhavatīti parābhavo. “Suvijāno parābhavo”ti idametassatthassa sādhaṃ vacanaṃ. Apica “dhammadessī parābhavo”ti pāṭhānurūpato parābhavissatīti parābhavoti anāgatakālavasenapi nibbacaṃ daṭṭhabbaṃ. Atha vā parābhavanti etenāti parābhavo. Kiṃ taṃ? Dhammadessitādi. “Paṭhamo so parābhavo”ti idametassatthassa sādhaṃ vacanaṃ. **Vibhavoti** nibbānaṃ. Tañhi bhavato vigatattā bhavato vigatoti vibhavo, bhavassa ca taṃhetu vigatattā vigato bhavo etasmāti vibhavo. Vibhavanti ucchijjanti vinassanti ito ariyadhanavilomakā kilesamahācorātipi vibhavo. **Vibhavasaddassa** nibbānābhidhānante “evaṃ bhava vijjamāne, vibhavo icchitabbako”ti idamettha sādhaṃ vacanaṃ. Imāni pana nibbānassa pariyāyavacanāni –

Nibbānaṃ vibhavo mokkha, nirodho amataṃ samaṃ;  
Saṅkhārūpasamo dukkha-nirodho accuta’kkhayo.

Vivaṭṭa’makataṃ atthaṃ, santipada’masaṅkhatam;  
Pāraṃ taṇhākkhaya dukkha-kkhaya saññojanakkhaya.

Yogakkhemo virāgo ca,  
Lokanto ca bhavakkhaya;  
Apavaggo visaṅkhāro,  
Sabbhi suddhi visuddhi ca.

Vimutyā’pacayo mutti, nibbuti upadhikkhaya;  
Santi asaṅkhatā dhātu, disā ca sabbatopabhaṃ.

Vināpetāni nāmāni, visesakapadaṃ idha;  
Nibbānavācakānīti, sallakkheyya sumedhaso.

“Tānaṃ leṇa”ntiādīni-pekkhikāni bhavanti hi;  
Visesakapadānanti, etthetāni pakāsaye.

Tānaṃ leṇa’marūpañca, santaṃ sacca’manālayam;  
Suddhasaṃ saraṇaṇca, parāyaṇa’manītikaṃ.

Anāsavaṃ dhuvaṃ niccaṃ, viññāṇa’manidassanaṃ;  
Abyāpajjaṃ sivaṃ khemaṃ, nipuṇaṃ apalokikaṃ.

Ananta’makkharaṃ dīpo, accantaṃ kevalaṃ padaṃ;  
Paṇītaṃ accutañcāti, bahudhāpi vibhāvaye.

**Gotrabhūti** padassatthaṃ, vadantehi garūhi tu;  
Gottaṃ vuccati nibbāna-miti gottanti bhāsitaṃ.

**Vibhavoti** vā vināsasampattidhanucchedadiṭṭhiyopi vuccanti. Tattha vināso vibhavanam ucchijjanam nassananti atthena vibhavo. “Vibhavo sabbadhammānam, ittheke sato sattassa ucchedam vināsam vibhavam paññapenti” ti ca idametassatthassa sādhamam vacanam. Sampatti pana visesato bhavati vibhavo. “Rañño sirivibhavam daṭṭhukāmā” ti idametassatthassa sādhamam vacanam. Dhanam pana bhavanti vaḍḍhanti vuddhim virūlhim vepullam āpajjanti sattā etenāti vibhavo. “Asītikoti vibhavassa brāhmaṇassa putto hutvā nibbati” ti idametassatthassa sādhamam vacanam. Idam pana pariyāyavacanam –

Dhanam sam vibhavo dabbam, sāpateyyam pariggaho;  
Oḍḍam bhaṇḍam sakam attho, iccete dhanavācakā.

Ucchedadiṭṭhi pana vibhavati ucchijjati “attā ca loko ca puna cutito uddham na jāyati” ti gahaṇato vibhavoti. “Vibhavataṇhā” ti idametassatthassa sādhamam vacanam. Vibhavataṇhāti hi ucchedadiṭṭhisahagatāya taṇhāya nāmam. Ettha atthuddhāro vuccati –

Dhananibbānasampatti-vināsucchedadiṭṭhiyo;  
Vuttā **vibhavasaddena**, iti viññū vibhāvaye.

**Pātubhāvoti** pātubhavanam pātubhāvo. **Āvibhāvoti** āvibhavanam āvibhāvo, ubhinna metesam pākāṭatā iccevattho. **Tirobhāvoti** tirobhavanam tirobhāvo, paṭicchannabhāvo. **Vinābhāvoti** vinābhavanam vinābhāvo, viyogo. **Sotthibhāvoti** sotthibhavanam sotthibhāvo, suvatthibhāvo sukhasa atthitā, atthato pana nibbhayatā nirupaddavatā eva. **Atthibhāvoti** atthitā vijjamānatā avivittatā. **Natthibhāvoti** natthitā avijjamānatā vivittatā rittatā tucchatā suññatā. **Okārantapullīnganiddeso.**

Abhibhavatīti **abhibhavitā**, param abhibhavanto yo koci. Evaṃ **paribhavitā**, anubhavatīti **anubhavitā**, sukham vā dukkham vā adukkhamasukham vā anubhavanto yo koci. Evaṃ **samanubhavitā**. **Paccanubhavitā**, ettha pana yathā “amatassa dātā. Anuppannassa maggassa uppādetā” tiādīsu “dātā” ti padānam kattuvācakānam “amatassā” tiādīhi padehi kammavācākehi chaṭṭhiyantehi saddhim yojanā dissati, tathā imesampi padānam “paccāmittassa abhibhavitā” tiādīnā yojanā kātabbā. Evaṃ aññesampi evarūpānam padānam. **Ākārantapullīnganiddeso.**

Bhavatīti **bhavam**. Bhavissatīti vā bhavam, vaḍḍhamāno puggalo. “Suvijāno bhavam hoti, suvijāno parābhavo. Dhammakāmo bhavam hoti, dhammadessī parābhavo” ti idametassatthassa sādhamam vacanam. Atha vā yena saddhim katheti, so “bhava” nti vattabbo, “bhavam kaccāyano. Bhavam ānando. Maññe bhavam patthayati, rañño bhariyam patibbata” ntiādīsu. Ettha pana dhātuatthe ādaro na kātabbo, sammutiatttheyevādaro kātabbo “saṅketavacanam saccam, lokasammutikāraṇa” nti vacanato. Vohāravīsayasmiñhi lokasammuti eva padhānā avilaṅghanīyā. Parābhavatīti **parābhavam**. Evaṃ **paribhavam**. **Abhibhavam**. **Anubhavam**. Pabhavati pahoti sakkotīti **pabhavam**, pahonto yo koci. **Na** pabhavam appabhavam, “appabhava” nti ca idam jātake diṭṭham –

“Chinnabbhamiva vātena, ruṇṇo rukkhāsupāgamim;  
Soham appabhavam tattha, sākham hatthehi aggahi” nti

Tattha sādhamavacanamidam. Niggahītāntapullīnganiddeso.

**Dhanabhūtīti** dhanamassa bhavatūti dhanabhūti. **Siribhūtīti** sobhāya ceva paññāpuññānañca adhivacanam. Sā assa bhavatūti siribhūti. Evaṃ **sotthibhūti**, **suvatthibhūti**. **Ikārantapullīnganiddeso.**

**Bhāvīti** bhavanasīlo bhāvī, bhavanadhammo bhāvī, bhavane sādhamkāri bhāvī. Evaṃ **vibhāvī**. **Sambhāvī**. **Paribhāvīti**. Tatra **vibhāvīti** atthavibhāvane samattho paṇḍito vuccati. Ettha vidvā, vijjāgato, ñāṇītiādī pariyāyavacanam daṭṭhabbam. Bhavanti catra –

Vidvā vijjāgato ñāṇī, vibhāvī paṇḍito sudhī;  
Budho visārado viññū, dosaṇṇū viddasu vidū.

Vipassī paṭibhāṇī ca, medhāvī nipako kavi;  
Kusalo viduro dhīmā, gatimā mutimā cayaṃ.

Cakkhumā kaṇṇavā dabbo, dhīro bhūri vicakkhaṇo;  
Sappaṇṇo buddhimā paṇṇo, evaṃnāmā vibhāvinoti.

Īkārantapullīnganiddeso.

**Sayambhūti** sayameva bhavatīti sayambhū. Ko so? Antarena paropadesaṃ sāmāmyeva sabbam ñeyyadhammaṃ paṭivijjhivā sabbaññutaṃ patto sakyamuni bhagavā. Vuttañhetam bhagavatā –

“Na me ācariyo atthi, sadiso me na vijjati;  
Sadevakasmiṃ lokasmiṃ, natthi me paṭipuggalo.

Ahañhi arahā loke, aham satthā anuttaro;  
Ekomhi sammāsambuddho, sītībhūtosmi nibbuto”ti.

Atthato pana pāramitāparibhāvito sayambhūññāṇena saha vāsanāya vigatavidhastaniravasesakilesa mahākaruṇāsabbaññutaññāṇādiaparimeyyaguṇagaṇadhāro khandhasantāno sayambhū. So evambhūto khandhasantāno loke aggapuggaloti vuccati. Vuttañhetam bhagavatā “ekapuggalo bhikkhave loke uppajjamāno uppajjati acchariyamanusso, katamo ekapuggalo? Tathāgato bhikkhave araham sammāsambuddho”ti. So ekapuggalo etarahi “sabbaññū, sugato”tiādīhi yathābhuccaguṇadhigatanāmehi ca pasiddho, “gotamo ādiccabandhū”ti gottato ca pasiddho, sakyaputto sakko sakyamuni sakyasīho sakyapuṅgavoti kulato ca pasiddho, suddhodanimāyādevīsutoti mātāpitito ca pasiddho, siddhatthoti gahitanāmena ca pasiddho. Bhavanti catra –

Yo ekapuggalo āsi, buddho so vadatam varo;  
Gottato gotamo nāma, tathevādiccabandhu ca.

Sakyakule pasūtattā, sakyaputtoti vissuto;  
Sakko iti ca avhito, tathā sakyamunīti ca.

Sabbattha seṭṭhabhāvena, sakyē ca seṭṭhabhāvato;  
Sakyasīhoti so sakyapuṅgavoti ca sammato.

Suddhodanīti pitito, nabhe candova vissuto;  
Mātītopi ca saññāto, māyādevīsuto iti.

Sabbaññū sugato buddho, dhammarājā tathāgato;  
Samantabhaddo bhagavā, jino dasabalo muni.

Satthā vināyako nātho,  
Munindo lokanāyako;  
Narāsabho lokajino,  
Sambuddho dvīpaduttamo.

Devadevo lokagaru, dhammassāmī mahāmuni;  
Samantacakkhu purisa-dammasārathī māraji.

Dhammissaro ca advejjha-vacano satthavāhako;

Visuddhidevo devāti-devo ca samaṇissaro.

Bhūripañño'nadhivaro, narasīho ca cakkhumā;  
Munimuni naravaro, chaḷabhiñño jane suto.

Aṅgīraso yatirājā, lokabandhu'matandado;  
Vattā pavattā saddhamma-cakkavattī yatissaro.

Lokadīpo sirīghano, samaṇindo naruttamo;  
Lokattayavidū loka-pajjoto purisuttamo.

Saccadaso satapuñña-lakkhaṇo saccasavhayo;  
Ravibandhā'samasamo, pañcanetta'ggapuggalo.

Sabbābhibhū sabbavidū, saccaṇāmo ca pāragū;  
Purisātisayo sabba-dassāvī narasārathi.

Sammāsambuddho iti so, ñāto sattuttamoti ca;  
Tādī vibhajjavādīti, mahākāruṇikoti ca.

Cakkhubhūto dhammabhūto, ñāṇabhūtoti vaṇṇito;  
Brahmabhūtoti purisā-jañño iti ca thomito.

Lokajetṭho sayambhū ca, mahesi mārabhañjano;  
Amoghavacano dhamma-kāyo mārābhibhū iti.

Asaṅkhyeyyāni nāmāni, saṅuṇena mahesino;  
Nāmaṃ guṇehi nissitaṃ, ko kavindo kathessati.

Tatra sabbaññu iccādi-nāmaṃ sādharmaṇaṃ bhava;  
Sabbesānampi buddhānaṃ, gotamo itiādi na.

Buddho paccekabuddho ca, "sayambhū"iti sāsane;  
Keci "brahmā sayambhū"ti, sāsanaṇvacaraṃ na taṃ.

"Buddho tathāgato satthā, bhagavā"ti padāni tu;  
Ṭhānenekasahassamhi, sañcaranti abhiṇhaso.

Tatra cādīpadaṃ anta-padañceva imāni tu;  
Ekatopi carantīti, vibhāveyya visārado.

Visesakapadānaṃ tu, apekkhakapadāni ca;  
Anapekkhapadānīti, padāni duvidhā siyuṃ.

Tathā hi satthavāho naravaro chaḷabhiññoti evaṃpakārāni abhidhānapadāni  
visesakapadāpekkhakāni. Kathaṃ?

"Evaṃ vijitasāṅgāmaṃ, satthavāhaṃ anuttaraṃ;  
Sāvakā payirupāsanti, tevijjā maccuhāyino.

Yaṃ loko pūjayate,  
Salokapālo sadā namassati ca;  
Tasseta sāsanaṇvaram,  
Vidūhi ñeyyaṃ naravarassā"ti,



“Chaḷabhiñṇassa sāsana”nti ca evaṃ visesakapadāpekkhakāni bhavanti. Buddho jino bhagavāti evaṃpakārāni pana no visesakāpekkhānīti daṭṭhabbaṃ.

Keci panettha evaṃ vadeyyuṃ “munindo samaṇindo samaṇissaro yatissaro ādiccabandhu ravibandhūti evaṃpakārānaṃ idha vuttānaṃ abhidhānānaṃ visesatthābhāvato punaruttidoso atthi”ti. Tanna, abhidhānānaṃ abhisāṅkharāṇīyānabhisāṅkharāṇīyavasena abhisāṅkhatābhidhānāni anabhisāṅkhatābhidhānānīti dvedhā dissanato. Tathā hi katthaci keci “sakyasīho”ti abhidhānaṃ paṭicca “sakyakesarī sakyamigādhipo”tiādīnā nānavividhamabhidhānamabhisāṅkharonti, pāvacanepi hi “dviduggamavarahanutta”malatthā”ti pāṭho dissati. Tathā keci “dhammarājā”ti abhidhānaṃ paṭicca “dhammadisampatī”tiādīni abhisāṅkharonti. “Sabbaññū”ti abhidhānaṃ paṭicca “sabbadassāvī sabbadassi”tiādīni abhisāṅkharonti, “sahassakkho”ti abhidhānaṃ paṭicca “dasasatalocano”tiādīni abhisāṅkharonti. “Ādiccabandhū”ti abhidhānaṃ paṭicca “aravindasahāyabandhū”tiādīni abhisāṅkharonti. “Ambuja”nti abhidhānaṃ paṭicca “nīrajaṃ kuṅja”ntiādīni abhisāṅkharonti. Pāvacanepi hi yaṃ padumaṃ, taṃ jalajaṃ nāmāti mantvā paṭisambhidāppattehi ariyehi desanāvīlāsavasena vutto “padumuttaranāmino”ti vattabbaṭṭhāne “jalajuttaranāmino”ti pāṭho dissati. Evaṃ abhisāṅkhatābhidhānāni dissanti.

“Buddho bhagavā”ti abhidhānāni pana anabhisāṅkhatābhidhānāni. Vuttañhetam dhammasenāpatinā āyasmatā **sāriputtena** “buddhoti netam nāmaṃ mātarā kataṃ, na pitarā kataṃ, na bhagīniyā kataṃ, na ñātisālohitehi kataṃ, na devatāhi kataṃ, vimokkhantikametaṃ buddhānaṃ bhagavantānaṃ bodhiyā mūle saha sabbaññūtaññāppaṭilābhā sacchikā paññatti yadidaṃ buddho”ti, tathā “bhagavāti netam nāmaṃ mātarā kataṃ...pe... sacchikā paññatti yadidaṃ bhagavā”ti. Evaṃ “buddho bhagavā”ti abhidhānāni anabhisāṅkhatābhidhānāni. Na hi tāni abhidhānāni ceva “satthā sugato jino”tiādīni ca aññaṃ kiñci abhidhānaṃ paṭicca abhisāṅkhatāni, nāpi aññāni abhidhānāni etāni paṭicca abhisāṅkhatāni dissanti. Tathā hi “buddho”ti abhidhānaṃ paṭicca “bujjhītā bodhetā bodhako”tiādīni nāmābhidhānāni na abhisāṅkharonti. Tathā “bhagavā satthā sugato”tiādīni nāmābhidhānāni paṭicca “sampannabhago anusāsako sundaravacano”tiādīni nāmābhidhānāni nābhisāṅkharonti. Evaṃ imaṃ vibhāgaṃ dassetuṃ “munindo samaṇindo samaṇissaro yatissaro ādiccabandhu ravibandhū”tiādīnā nayena punarutti amhehi katāti daṭṭhabbā. Evamaññatrāpi nayo netabbo. Atridaṃ vuccati –

“Abhisāṅkhatanāmañca, nāmañcānabhisāṅkhatam;  
Dviduggamavaro buddho, iti nāmaṃ dvidhā bhava”ti.

**Pabhūti** paraṃ pasayha bhavatīti pabhū, issaro. “Arañṇassa pabhū ayaṃ luddako”ti idametassatthassa sādhaṃ vacanaṃ. **Abhibhūti** abhibhavatīti abhibhū, asaññasatto. Kiṃ so abhibhavi? Cattāro khandhe arūpino. Iti cattāro khandhe arūpino abhibhavīti abhibhū. So ca kho niccetanattā abhibhavanakriyāyāsati pubbevā”saññuppattito jhānalābhikāle attanā adhigatapañcamajjhānaṃ saññāvīrāgavasena bhāvetvā cattāro arūpakkhandhe asaññibhave appavattikaraṇena abhibhavītumārābhi, tadabhibhavanakiccaṃ idāni siddhanti abhibhavīti abhibhūti vuccati. Apica niccetanabhāvena abhibhavanabyāpāre asatipi pubbe sacetanakāle sabyāpārattā sacetanassa viya niccetanassāpi sato tassa upacārena sabyāpārattāvacanaṃ yujjateva. Dissati hi loke sāsane ca sacetanassa viya acetanassāpi upacārena sabyāpārattāvacanaṃ. Taṃ yathā? Kūlaṃ patitukāmaṃ, evaṃ loke. Sāsane pana –

“Rodante dārake disvā, ubbiggā vipulā dumā;  
Sayamevonamitvāna, upagacchanti dārake”ti ca

“Aṅgārino dāni dumā bhadante, phalesino chadanaṃ vipphāyā”ti ca “phalaṃ toseti kassaka”nti ca ādi. **Abhibhū**saddassa asaññasattābhidhānatte “abhibhuṃ abhibhuto maññatī”ti idamettha sādhaṃ vacanaṃ. Atha vā abhibhavatīti abhibhū, paresamabhibhavītā yo koci. Visesato pana tathāgato yeva abhibhū. Vuttañhetam bhagavatā “tathāgato bhikkhave abhibhū anabhibhūto aññadatthudaso vasavattī”ti. Keci pana “abhibhū nāma sahasso brahmā”ti vadanti.

**Vibhūti** visesabhūtoti vibhū, “bhavasotaṃ sace buddho, tiṇṇo lokantagū vibhū”ti

idametassatthassa sādhaḥkaṃ vacanaṃ. **Vibhūti** hettha rūpakāyadhammakāyasampattiyaṃ visesabhūtoti attho. Āha ca –

“Dissamānopi tāvassa, rūpakāyo acintiyō;  
Asādhāraṇāñāṇaṭṭhe, dhammakāye kathāva kā”ti.

**Adhibhūti** adhibhavaṭṭi adhibhū, issaro.

“Tadā maṃ tapatejena, santatto tidivādhībhū;  
Dhārento brāhmaṇaṃ vaṇṇaṃ, bhikkhāya maṃ upāgamī”ti –

Idametassatthassa sādhaḥkaṃ vacanaṃ. **Patibhūti** patibhūtoti patibhū, “goṇassa patibhū”ti idametassatthassa sādhaḥkaṃ vacanaṃ. **Gotrabhūti** gottasaṅkhātaṃ amatamahānibbānaṃ āramaṇaṃ katvā bhūtoti gotrabhū, sotāpattimaggassa anantarapaccayena sikhāpattabalavavipassanācittena samannāgato puggalo. Vuttañhetam bhagavatā “katamo ca puggalo gotrabhū? Yesam dhammānaṃ samanantarā ariyadhammassa avakkanti hoti, tehi dhammehi samannāgato puggalo gotrabhū”ti, idamevettha atthasādhaḥkaṃ vacanaṃ. Apica samaṇoti gottamattamanubhavamāno kāsāvakaṇṭhasamaṇopi gotrabhū. So hi “samaṇo”ti gottamattam anubhavati vindati, na samaṇadhamme attani avijjamaṇattāti “gotrabhū”ti vuccati, “bhavissanti kho panānanda anāgatamaddhānaṃ gotrabhuno kāsāvakaṇṭhā dussilā pāpadhammā”ti idametassatthassa sādhaḥkaṃ vacanaṃ. **Vatrabhūti** sakkō. So hi mātāpitibharaṇādīhi sattahi vattehi sakkattam labhitvā aññe deve vattena abhibhavaṭṭi vatrabhū. **Āgamaṭṭhakathāyaṃ** pana **bhūdhātumhi** labbhamānaṃ pattiatthampi gahetvā “vattena aññe abhibhavitvā devissariyaṃ pattoti vatrabhū”ti vuttaṃ, “vatranāmaḥkaṃ vā asuraṃ abhibhavaṭṭi vatrabhū”ti ca, “vatrabhū jayataṃpitā”ti idametassatthassa sādhaḥkaṃ vacanaṃ. Ettha hi **vatrabhūti** vatranāmaḥkassa asurassa abhibhavitā. **Jayataṃ pitāti** jayantānaṃ pitā. “Sakkō indo purindado” iccādi pariyāyavacanaṃ. Idaṃ tu dhātādhiḥkāre pakāsesāma. **Parābhībhūti** paramabhibhavaṭṭi parābhībhū. Evaṃ **rūpābhībhūti**ādīsopi. **Sabbābhībhūti** sabbamabhibhavitabbaṃ abhibhavaṭṭi sabbābhībhū. Sabbābhībhūti ca idaṃ nāmaṃ tathāgatasseva yujjati. Vuttañhetam bhagavatā –

“Sabbābhībhū sabbavidūhamasmi,  
Sabbesu dhammesu anūpalitto;  
Sabbāñjaho taṇhakkhaye vimutto,  
Sayam abhiññāya kamuddiseyya”nti.

Ūkārantapullīṅganiddeso. Niyatapullīṅganiddesoṃ.

Idāni aniyatalīṅgānaṃ niyatalīṅgesu pakkhittānaṃ **bhūtaparābhūta sambhūtasaddādīnaṃ** niddeso vuccati. Tatra **bhūtoti** attano paccayehi abhavīti bhūto, bhūtoti jāto sañjāto nibbatto abhinibbatto pātubhūto, bhūtoti vā laddhasarūpo yo koci saviññāṇako vā aviññāṇako vā. Atha vā tathākārena bhavaṭṭi bhūto, bhūtoti sacco tatho avitatho aviparīto yo koci, ettha yo **bhūtasaddo** saccattho, tassa “bhūtaṭṭho”ti idamettha sādhaḥkaṃ vacanaṃ. **Parābhūtoti** parābhavīti parābhūto. Suṭṭhu bhūtoti **sambhūto**. Viseseṇa bhūtoti **vibhūto**. Vissuto bhūtoti vā vibhūto, “vibhūtarammaṇa”nti idametassatthassa sādhaḥkaṃ vacanaṃ. Vibhaviṭi vā **vibhūto**, vinaṭṭhoti attho, “rūpe vibhūte na phusanti phassā”ti idametassatthassa sādhaḥkaṃ vacanaṃ. Pākaṭo bhūtoti **pātubhūto**. Āvi bhavaṭṭi **āvibhūto**. Evaṃ **tirobhūto**. **Vinābhūto**. Bhavitumanucchavikoti **bhabbo**. Paribhaviyate soti **paribhūto**. Yena kenaci yo pīḷito hīḷito vā, so paribhūto. Gamyamānattho yathākāmacārī. Abhibhaviyate soti **abhibhūto**. Adhibhaviyate soti **adhibhūto**. Evaṃ **addhabhūto**. Ettha **adhisaddena** samānattho **addhasaddo**, “cakkhu bhikkhave addhabhūtaṃ, rūpā addhabhūta, cakkhuvīññāṇaṃ addhabhūta”nti idametassatthassa sādhaḥkaṃ vacanaṃ, tathā “idha bhikkhave bhikkhu na heva anaddhabhūtaṃ attānaṃ na addhabhāveti”ti padampi. Tattha **anaddhabhūtanti** dukkhena anadhibhūtaṃ. Dukkheṇa anadhibhūto nāma manussatthabhāvo vuccati, taṃ na addhabhāveti nābhībhavaṭṭi suttapadattho.

Anubhaviyate soti **anubhūto**. Evaṃ **samanubhūto**. **Paccanubhūto**. **Bhāvito**. Ettha bhāvitoti iminā samānādhikaraṇaṃ “satisambojjhaṅgo kho kassapa mayā sammadakkhāto bhāvito”tiādīsu guṇīvācakaṃ padhānapadaṃ sāsane daṭṭhabbaṃ. Titthiyasamaye pana bhāvitoti kāmagaṇo vuccati. Vuttañhettaṃ **pāḷiyaṃ** “na bhāvitamāsīsati”ti. Tatra bhāvitā nāma pañca kāmagaṇā, te na āsīsati na sevātīti suttapadattho. Sambhāviyate soti **sambhāvito**. Evaṃ **vibhāvito**. **Paribhāvito**. **Anuparibhūto**. **Manamparibhūto**ti manam paribhaviyittha soti manamparibhūto. Ettha **manamparibhūto**ti īsakaṃ appattaparibhavanaṃ vuccati. **Mananti** hi nipātapadaṃ. “Atipaṇḍitena puttena, manamhi upakūlito, devadattena attano abuddhabhāvena ceva khantimettādīnañca abhāvena kumārakassapatthero ca therī ca manam nāsito, manam vuḷho ahoṣī”tiādīsu cassa payogo veditabbo. Atra **manam**saddassa kiñci yuttiṃ vadāma.

**Manam**saddo dvidhā bhinno, nāmaṃ nepātikañciti;  
Santam tassa manam hoti, manamhi upakūlitoti.

**Paribhavitabboti** aññena paribhavitum sakuṇeyyoti paribhavitabbo. Evaṃ **paribhottabbo** **paribhavanīyo**. **Tabbapaccayaṭṭhāne** hi **sakuṇeyyapadaya**janā dissati “aladdham ārammaṇaṃ laddhabbaṃ labhanīyaṃ laddhum vā sakuṇeyya”nti. Atha vā paribhavanamarahatīti paribhavitabbo. Evaṃ **paribhottabbo** **paribhavanīyo**. Tathā hi **tabbapaccayaṭṭhāne** **arahatipadaya**janā dissati “parisakuṇeyyaṃ lābhamarahatīti laddhabba”nti. Ettha pana **paribhottabboti** padassa atthibhāve “khattiyō kho mahārāja daharoti na uññātabbo na paribhottabbo”ti pāḷi nidassanaṃ. **Abhiadhipubbā** **bhūdhātuyo** samānatthā. Sesāni dukāni nayānusārena ñeyyāni. **Bhamānoti** bhavatīti bhamāno, majjhe **vakāralo**pa daṭṭhabbo. Atridaṃ vattabbaṃ –

“Kiṃ so bhamāno saccako”, iccatra pāḷiyaṃ pana;  
Rūpaṃ **bhavatidhātussa**, valopeneva dissati.

Atrāyaṃ pāḷi “kiṃ so bhamāno saccako nigaṇṭhaputto, yo bhagavato vādaṃ āropessatī”ti. **Vibhavamānoti** vibhavatīti vibhavamāno. Evaṃ **paribhavamānoti**ādīsu. Tattha “abhisambhonto”timassa karonto nipphādentō iccevattho. “Sabbāni abhisambhonto, sa rājavasatiṃ vase”ti idametassatthassa sādhaṃ vacanaṃ. Yasmā panimāni “bhavamāno”tiādīni vipakatapaccattavacanāni, tasmā saramāno rodati, gacchanto gaṇhāti, “gacchanto so bhāradvājo, addasa accutaṃ isi”ntiādīni viya paripuṇṇuttarakriyāpadāni katvā rājā bhavamāno sampattimanubhavatītiādīnā yojetabbāni. “Saramāno gacchanto”tiādīni hi “yāto gato patto”tiādīhi sadisāni na honti, uttarakriyāpadāpekkhakāni honti **tvāpaccaya**ntapadāni viyāti.

**Paribhaviyamānoti** paribhaviyate soti paribhaviyamāno. Evaṃ **paribhuyyamānoti**ādīsūpi. Imānīpi vipakatapaccattavacanāni, tasmā “rājapurisehi nīyamāno coro evaṃ cintesī”tiādīni viya paripuṇṇuttarakriyāpadāni katvā aññehi paribhaviyamāno tāṇaṃ gavesati. Bhogo puggalenānubhaviyamāno parikkhayaṃ gacchatītiādīnā yojetabbāni. Evaṃ sabbatra īdisesu vipakatavacanesu yojetabbāni. Ayaṃ aniyataliṅgānaṃ niyataliṅgesu pakkhittānaṃ **bhūta** **parābhūta** **sambhūta**saddānaṃ niddeso. Icevaṃ pulliṅgānaṃ **bhūdhātumayānaṃ** yathārahaṃ nibbacanādivasena niddeso vibhāvito.

Idāni itthilinganiddeso vuccati – tatra **bhāvīkā**ti bhāvetīti bhāvīkā. Yā bhāvanaṃ karoti, sā bhāvīkā. **Bhāvanā**ti vaḍḍhanā brūhanā phātikaraṇaṃ āsevanā bahulīkāro. **Vibhāvanā**ti pakāsanaṃ sandassanā. Atha vā **vibhāvanā**ti abhāvanā antaradhāpanā. **Sambhāvanā**ti ukkaṃsanā thomanā. **Paribhāvanā**ti vāsanaṃ, samantato vā vaḍḍhanā. Ākārantitthilinganiddeso.

**Bhūmī**ti sattāyamānā bhavatīti bhūmī, atha vā bhavanti jāyanti vaḍḍhanti cettha thāvarā ca jaṅgamā cāti bhūmī. Bhūmī vuccati pathavī. “Paṭhamāya bhūmiyā pattiya”tiādīsu pana lokuttaramaggo bhūmīti vuccati. Yā panandhabālamahājanena viññātā pathavī, tassimāni abhidhānāni –

“Pathavī medanī bhūmi, bhūrī bhū puthuvī mahī;  
Chamā vasumatī ubbī, avanī ku vasundharā;  
Jagatī khiti vasudhā, dharaṇī go dharā”’iti.

Atra **bhū ku gosaddā** pathavīpadatthe vattantīti kutra diṭṭhapubbāti ce?

Vidvā bhūpāla kumuda-gorakkhādīpadesu ve;  
**Bhū ku goīti** pathavī, vuccatīti vibhāvaye.

**Bhūtīti** bhavanam bhūti. **Vibhūtīti** vināso, visesato bhavanam vā, atha vā visesato bhavanti sattā etāyāti vibhūti, sampattiyeva, “rañño vibhūti. Pihanīyā vibhūtiyo”’ti ca idametassatthassa sādhamam vacanam. **Ikārantitthiliṅganiddeso.**

**Bhūrīti** pathavī. Sā hi bhavanti etthāti bhūrīti vuccati, bhavati vā paññāyati vaḍḍhati cāti bhūrī, atha vā bhūtābhūtā tannissitā sattā ramanti etthāti bhūrī. Pathavīnissitā hi sattā pathaviyaṃyeva ramanti, tasmā sā imināpi atthena bhūrīti vuccati. **Bhūrīsaddassa** pathavīvacane “bhūrīpañño”’ti atthasādhamam vacanam. Apica bhūrī viyāti bhūrī, paññā, bhūrīti pathavīsamāya vitthatāya paññāya nāmam, “yogā ve jāyati bhūrī, ayogā bhūrīsankhayo”’ti ettha aṭṭhakathāvacanam imassatthassa sādhamam. Atha vā bhūte atthe ramatīti bhūrī, paññāyetaṃ nāmam, “bhūrī medhā pariṇāyikā”’ti ettha aṭṭhakathāvacanam imassatthassa sādhamam. Atha vā paññāyeva rāgādayo dhamme abhibhavatīti bhūrī, rāgādiarayo abhibhavatītipi bhūrī. Tathā hi **paṭisambhidāmagge** āyasmatā sārīputtena vuttam “rāgam abhibhūyatīti bhūrī, paññā. Dosaṃ mohaṃ...pe... rāgo ari, taṃ ariṃ maddatīti bhūrī, paññā. Doso. Moho...pe... sabbe bhavagāmino kammā ari, taṃ ariṃ maddatīti bhūrī, paññā”. Ettha pana “gotrabhū”’ti padamiva “aribhū”’ti vattabbepi **bhūsaddam** pubbanipātam katvā sandhivasena bhūrīti padamuccāritanti daṭṭhabbam. Apica īdisesu nāmikapadesu vināpi upasaggena abhibhavanādiatthā labbhantiyeva, nākhyātikapadesūti daṭṭhabbam. Idam pana paññāya pariyaavacanam –

Paññā pajānanā cintā, vicayo upalakkhaṇā;  
Pavicayo ca paṇḍiccam, dhammavicayameva ca.

Sallakkhaṇā ca kosallam, bhūrī paccupalakkhaṇā;  
Nepuññañceva vebhabyā, medhā cupaparikkhakā.

Sampajaññaṇca pariṇā-yikā ceva vipassanā;  
Paññindriyam paññābalaṃ, amoho sammādiṭṭhi ca;  
Patodo **cābhidhammā**, imāni gahitāni me.

Ñāṇam paññāṇamummaṅgo, sattho soto ca diṭṭhi ca;  
Mantā bodho buddhi buddham, paṭibhānaṇca bodhīti.

Dhammo vijjā gati monam, nepakkaṃ go matī muti;  
Vīmaṃsā yoni dhonā ca, paṇḍā paṇḍiccamampi ca;  
Vedo paṇḍitīyañceva, cikicchā miriyāpi ca.

“Soto bodhī”’ti yaṃ vuttam, ñāṇanāmadvayaṃ idam;  
Buddhapaccekasambuddha-sāvakanampi rūhati.

“Abhisambodhi sambodhi”’, iti nāmadvayaṃ pana;  
Paccekabuddhasabbaññu-buddhānaṃyeva rūhati.

Abhisambodhisankhātā, **paramopapadā** pana;  
Ñāṇapaṇṇatti sabbaññu-sambuddhasseva rūhati.

Sammāsambodhisāṅkhātā, **anuttarapadādikā**;  
Buddhā vā ñāṇapaṇṇatti, sabbaññusseva rūhati.

“Sabbaññutā”ti yaṃ vuttaṃ, ñāṇaṃ sabbaññunova taṃ;  
Yujjate avasesā tu, ñāṇapaññatti sabbagā.

Ñāṇabhāvamhi santepi, dhammacakkhādikaṃ pana;  
PayoJanantarābhāvā, nātra sandassitaṃ mayāti.

**Bhūti** bhūtassa bhariyā. Yathā hi petassa bhariyā “petī”ti vuccati, evameva bhūtassa bhariyā “bhūti”ti vuccati. **Bhoti** yāya saddhiṃ kathentena sā itthī “bhotī” iti vattabbā, tasmā iminā padena itthī vohariyatīti ca daṭṭhabbaṃ. Yathā hi purisena saddhiṃ kathentena puriso “bhavaṃ” iti vohariyati, evameva itthiyā saddhiṃ kathentena itthī “bhotī”iti vohariyati. “Kuto nu bhavaṃ bhāradvājo, ime ānesi dārake”ti, “ahaṃ bhotiṃ upaṭṭhissaṃ, mā bhotī kupitā ahū”ti cettha nidassanaṃ. Atha vā idhekacco satto itthilingavasena laddhanāmo, so “bhotī”iti vattabbo, tasmā iminā padena itthīpi itthilingena laddhanāmā anitthīpi vohariyatīti ca daṭṭhabbā. Tathā hi devaputtopi “devatā”ti itthilingavasena voharitabbattā **devatāsaddamapekkhitvā** “bhotī”iti voharito, pageva devadhītā. Tathā hi “bhotī carahi jānāti, taṃ me akkhāhi pucchitā”ti ettha pana **devatāsaddamapekkhitvā** “bhotī”iti itthi lingavohāro kato. Atrāyaṃ suttapadattho “yadi so kuhako dhanatthiko tāpaso na jānāti, bhotī devatā pana jānāti ki”nti. Apica –

“Atthakāmosi me yakkha, hitakāmāsi devate;  
Karomi te taṃ vacanaṃ, tvaṃsi ācariyo mamā”ti –

Maṭṭhakuṇḍalīvatthusmiṃ pulliṅgayakkhasaddamapekkhitvā “atthakāmo”ti pulliṅgavasena itthilingaṅca **devatāsaddamapekkhitvā** “hitakāmā”ti itthilingavasena purisabhūto maṭṭhakuṇḍalī voharito. Aññatrāpi **devatāsaddamapekkhitvā** devaputto itthilingavasena voharito –

“Na tvaṃ bāle vijānāsi, yathā arahataṃ vaco”ti;  
“Atthakāmāsi me amma, hitakāmāsi devate”ti.

Ettha pana “ehi bāle khamāpehi, kusarājaṃ mahabbala”nti ettha ca itthīyeva itthilingavasena voharitā, tasmā katthaci itthipurisapadatthasāṅkhātāṃ atthaṃ anapekkhitvā liṅgamattamevāpekkhitvā bhotī devatā, bhotī silā, bhotī jambū, bhotiṃ devatantiādīhi saddhiṃ paccattavacanādīni yojetabbāni. Katthaci pana liṅgaṅca atthaṅca apekkhitvā “bhotī itthī, bhotiṃ deva”ntiādīna yojetabbāni. **Vibhāvinī**ti vibhāvetīti vibhāvinī. Evaṃ **paribhāvinī**tiādīsopi. **Īkārantitthilinganiddeso.**

**Bhūti** sattāyamānā bhavatīti bhū. Atha vā bhavanti jāyanti vaḍḍhanti cettha sattasāṅkhārāti bhū. Bhū vuccati pathavī. **Abhūti** vaḍḍhivirahitā kathā, na bhūtapubbāti vā abhū, abhūtapubbā kathā. Na bhūtāti vā abhū, abhūtā kathā. “Abhuṃ me kathaṃ nu bhaṇasi, pāpakaṃ vata bhāsasī”ti idametesamatthānaṃ sādhaṃ vacanaṃ. **Īkārantitthilinganiddeso.** Niyatitthilinganiddeso yaṃ.

Aniyataliṅgānaṃ pana niyatitthilingesu pakkhittānaṃ **bhūtaparābhūtasambhūtasaddādīnaṃ** niddeso nayānusārena suviññeyyova. Icevaṃ itthilingānaṃ **bhūdhātumayānaṃ** yathārahaṃ nibbacaṇādivasena niddeso vibhāvito.

Idāni napuṃsakalinganiddeso vuccati – tatra **bhūtanti** catubbidhaṃ pathavīdhātuādikaṃ mahābhūtarūpaṃ. Tañhi aññesaṃ nissayabhāvena bhavatīti bhūtaṃ, bhavati vā tasmim̐ tadadhīnavuttitāya upādārūpanti bhūtaṃ. Atha vā bhūtanti satto bhūtanāmako vā. Bhūtanti hi napuṃsakavasena sakalo satto evaṃnāmako ca yakkhādiko vuccati. “Kālo ghasati bhūtāni, sabbāneva sahattānā. Yānīdha bhūtāni samāgatāni, ujjhāpetvāna bhūtāni, tamhā ṭhānā apakkamī”ti evamādīsū napuṃsakappayogo vedītabbo. Gātābandhasukhatthaṃ liṅgavipallāsoti ce? Tanna, “yakkhādīni mahābhūtāni yaṃ gaṇhanti, neva tesāṃ tassa anto, na bahi ṭhānaṃ upalabbhatī”ti

cunṇiyapadaracanāyampi **bhūtas**saddassa napuṃsakaliṅgattadassanatoti avagantabbam. **Mahābhūta**nti vuttappakāraṃ catubbidham mahābhūtarūpaṃ. Tassa mahantapātubhāvādīhi kāraṇehi mahābhūtata veditabbā. Kathaṃ? Mahantaṃ bhūtanti mahābhūtaṃ, māyākārasaṅkhātena mahābhūtena samantipi mahābhūtaṃ, yakkhādīhi mahābhūtehi samantipi mahābhūtaṃ, mahantehi ghāsacchādanādīpaccayehi bhūtaṃ pavattantipi mahābhūtaṃ, mahāvikārabhūtantipi mahābhūtaṃ. Evaṃ mahantapātubhāvādīhi kāraṇehi mahābhūtata veditabbā. Atridaṃ suṭṭhupalakkhitabbam –

Punnapuṃsakaliṅgo ca, **bhūtas**saddo pavattati;  
Paṇṇattiyaṃ guṇe ceva, guṇeyevitthiliṅgako.

**Bhūta sambhūtas**addādi-naye paṇṇattivācaka;  
Yojetabbā tiliṅge te, iti ñe yyaṃ visesato.

“Bhūto tiṭṭhati, bhūtāni, tiṭṭhanti, samaṇo ayaṃ;  
Idāni bhūto, cittāni, bhūtāni vimalāni tu.

Vañjhā bhūtā vadhū esā”, iccudāharaṇānime;  
Vuttāni suṭṭhu lakkheyya, sāsanaṭṭhagavesako.

**Bhavittanti** vaḍḍhitaṭṭhānaṃ. Tañhi bhavanti vaḍḍhanti etthāti bhavittanti vuccati, “janittaṃ me bhavittaṃ me, iti paṅke avassayi”nti idametassatthassa sādhaṃ vacanaṃ.

“Bhavittaṃ” iti “bhāvitta”-nti ca pāṭho dvidhā mayā;  
Rassattadīghabhāvena, diṭṭho bhaggavajātake.

**Bhūnanti** bhavanaṃ bhūnaṃ vaddhi. “Ahameva dūsiyā bhūnahatā, rañño mahāpatāpassā”ti, “bhūnahaccaṃ kataṃ mayā”ti ca idametassatthassa sādhaṃ vacanaṃ.

**Bhavananti** bhavanakriyā. Atha vā bhavanti vaḍḍhanti ettha sattā puttadhītāhi nānāsampattīhi cāti bhavanaṃ vuccati geho, “pettikaṃ bhavanaṃ mamā”ti idametassatthassa sādhaṃ vacanaṃ. “Geho gharaṇca āvāso, bhavanaṇca nicketana”nti idaṃ pariyāyavacanaṃ. **Parābhavananti** avaddhimāpajjanaṃ. **Sambhavananti** suṭṭhu bhavanaṃ. **Vibhavananti** ucchedo vināso vā. **Pātubhavananti** pākaṭatā sarūpalābho iccevattho. **Āvibhavananti** paccakkhabhāvo. **Tirobhavananti** paṭicchannabhāvo. **Vinābhavananti** vinābhāvo. **Sotthibhavananti** suvatthitā. **Paribhavananti** pīḷanā hīḷanā vā. **Abhibhavananti** vidhamanaṃ. **Adhibhavananti** ajjhottharaṇaṃ. **Anubhavananti** paribhuñjanaṃ. **Samanubhavananti** suṭṭhu paribhuñjanaṃ. **Paccanubhavananti** adhipatibhāvenapi suṭṭhu paribhuñjanaṃ. Niggahītantaṃ napuṃsakaliṅganiddeso.

**Atthavibhāvīti** atthassa vibhāvanasīlaṃ cittaṃ vā ñāṇaṃ vā kulaṃ vā atthavibhāvi. Evaṃ **dhammavibhāvi**. Ikāraṇantaṃ napuṃsakaliṅganiddeso.

**Gotrabhūti** paññattārammaṇaṃ mahaggatārammaṇaṃ vā gotrabhucittaṃ. Tañhi kāmāvacaragottamabhibhavati, mahaggatagottaṇca bhāveti nibbattetīti “gotrabhū”ti vuccati. Apica gotrabhūti nibbānārammaṇaṃ maggavīthiyaṃ pavattaṃ gotrabhuññaṃ vā saṅkhārārammaṇaṃ vā phalasaṃpattivīthiyaṃ pavattaṃ gotrabhuññaṃ. Tesu hi paṭhamaṃ puthujjanagottamabhibhavati, ariyagottaṇca bhāveti, gottābhīdhānaṃ ca nibbānato ārammaṇakaraṇavasena bhavati “gotrabhū”ti vuccati, dutiyaṃ pana saṅkhārārammaṇampi samānaṃ āsevanapaccayabhāvena sasampayuttāni phalacittāni gottābhīdhāne nibbānamhi bhāvetīti “gotrabhū”ti vuccati. Idaṃ pāḷivavattānaṃ –

“Gotrabhu”iti rassatta-vasena kathitaṃ padaṃ;  
Napuṃsakanti viññeyyaṃ, ñāṇacittādīpekkhakaṃ.

“Gotrabhū”iti dīghatta-vasena kathitaṃ pana;  
Pulliṅgamiti viññeyyaṃ, puggalādīkapekkhakaṃ.

Dīghabhāvena vuttaṃ tu, napuṃsakanti no vade;  
Binduvantī' tare bheda, tayo iti hi bhāsītā.

Īkārantā ca ūdantā, rassattaṃ yanti sāsane;  
Napuṃsakattaṃ patvāna, sahabhu sīghayāyiti.

Cittena saha bhavatīti **cittasahabhu**, cittena saha na bhavatīti **nacittasahabhu**, rūpaṃ.  
Ukārantanapuṃsakaliṅganiddeso. Niyatanapuṃsakaliṅganiddeso.

Aniyataliṅgānaṃ niyatanapuṃsakaliṅgesu pakkhittānaṃ **bhūtaparābhūtasaddādīnaṃ** niddeso  
nayānusārena suviññeyyova. Icevaṃ napuṃsakaliṅgānaṃ **bhūdhātumayānaṃ** yathārahaṃ  
nibbanādivasena niddeso vibhāvito. Icevaṃ sabbathāpi liṅgattayaniddeso samatto.

Ullīganena vividhena nayena vuttaṃ,  
**Bhūdhātusaddamayaliṅgatiṅkaṃ** yadetaṃ;  
Āliṅgiyaṃ piyatarāñca suttaṃ sulīgaṃ,  
Poso kare manasi liṅgaviduttamicchaṃ.

Iti navāṅge sātthakathe piṭakattaye byappathagatīsu viññūnaṃ

Kosallatthāya kate saddanītipparaṇe

**Bhūdhātumayānaṃ** tividhaliṅgikānaṃ nāmikarūpānaṃ vibhāgo

Catuttho paricchedo.

## 5. Okārantapulliṅganāmikapadamālā

**Bhū** dhātuto pavattānaṃ, nāmikānamito paraṃ;  
Nāmamālaṃ pakāsissaṃ, nāmamālantarampi ca.

Vippakiṇṇakathā ettha, evaṃ vutte na hessati;  
Pabhedo nāmamālānaṃ, paripuṇṇova hehiti.

Pubbācariyasīhānaṃ, tasmā idha mataṃ suttaṃ;  
Purecamaṃ karitvāna, vakkhāmi savinicchayaṃ.

Puriso, purisā. Purisaṃ, purise. Purisena, purisehi, purisebhi. Purisassa, purisānaṃ. Purisā,  
purisasmā, purisamhā, purisehi, purisebhi. Purisassa, purisānaṃ. Purise, purisasmim, purisamhi,  
purisesu. Bho purisa, bhavanto purisā.

Ayamāyasmātā mahākaccānena pabhinnapaṭisambhidena katasmā **niruttipiṭakato** uddharito  
**purisaiccetassa** pakatirūpassa nāmikapadamālānayo. Tatra purisavacanaekavacanaputhuvacanesu  
paccattavacanādīni bhavanti. Taṃ yathā? Puriso tiṭṭhati, purisā tiṭṭhanti. Tatra **purisoti** purisavacane  
ekavacane paccattavacanaṃ bhavati, **purisāti** purisavacane puthuvacane paccattavacanaṃ bhavati.

Purisaṃ passati, purise passati. Tatra **purisanti** purisavacane ekavacane upayogavacanaṃ  
bhavati, **puriseti** purisavacane puthuvacane upayogavacanaṃ bhavati.

Purisena kataṃ, purisehi kataṃ, purisebhi kataṃ. Tatra **purisenāti** purisavacane ekavacane  
karaṇavacanaṃ bhavati, **purisehi**, **purisebhīti** purisavacane puthuvacane karaṇavacanaṃ bhavati.

Purisassa dīyate, purisānaṃ dīyate. Tatra **purisassāti** purisavacane ekavacane

sampadānavacanaṃ bhavati, **purisānanti** purisavacane puthuvacane sampadānavacanaṃ bhavati.

Purisā nissaṭaṃ, purisasmā nissaṭaṃ, purisamhā nissaṭaṃ, purisehi nissaṭaṃ, purisebhi nissaṭaṃ. Tatra **purisāti** purisavacane ekavacane nissakkavacanaṃ bhavati. **Purisasmāti**...pe... **purisamhāti** purisavacane ekavacane nissakkavacanaṃ bhavati, **purisehi**, **purisebhīti** purisavacane puthuvacane nissakkavacanaṃ bhavati.

Purisassa pariggaho, purisānaṃ pariggaho. Tatra **purisassāti** purisavacane ekavacane sāmivacanaṃ bhavati, **purisānanti** purisavacane puthuvacane sāmivacanaṃ bhavati.

Purise patiṭṭhitaṃ, purisasmim̐ patiṭṭhitaṃ, purisamhi patiṭṭhitaṃ, purisesu patiṭṭhitaṃ. Tatra **puriseti** purisavacane ekavacane bhumavacanaṃ bhavati, **purisasminti**...pe... **purisamhīti**...pe... **purisesūti** purisavacane puthuvacane bhumavacanaṃ bhavati.

Bho purisa tiṭṭha, bhavanto purisā tiṭṭhatha. Tatra **bho purisaiti** purisavacane ekavacane ālapanāṃ bhavati, **bhavanto purisāiti** purisavacane puthuvacane ālapanāṃ bhavatīti iminā nayena sabbattha nayo vitthāretabbo.

Yamakamahātherena katāya pana **cūlaniruttiyaṃ** “bho purisa”iti rassavasena ālapanekavacanaṃ vatvā “bho purisā”iti dīghavasena ālapanabahuvacanaṃ vuttaṃ. Kiñcāpi tādiso nayo niruttiṭṭhake natthi, tathāpi bahūnamālapanavisaye “bho yakkhā”itiādīnaṃ ālapanabahuvacanaṃ **jātakatṭhakathā**dīsu dissanato pasatthatarova hoti viññūnaṃ pamāṇaṇca, tasmā iminā yamakamahātheramatena “puriso purisā purisa”ntiādīni vatvā āmantane “bho purisa, bho purisā, bhavanto purisā”ti nāmikapadamālā yojetabbā.

Tattha **purisoti** paṭhamāya ekavacanaṃ. **Purisāti** bahuvacanaṃ. **Purisanti** dutiyāya ekavacanaṃ. **Puriseti** bahuvacanaṃ. **Purisenāti** tatiyāya ekavacanaṃ. **Purisehi**, **purisebhīti** dve bahuvacanaṇi. **Purisassāti** catutthiyā ekavacanaṃ. **Purisānanti** bahuvacanaṃ. **Purisā**, **purisasmā**, **purisamhāti** tīṇi pañcamiyā ekavacanaṇi. **Purisehi**, **purisebhīti** dve bahuvacanaṇi. **Purisassāti** chaṭṭhiyā ekavacanaṃ. **Purisānanti** bahuvacanaṃ. **Purise**, **purisasmim̐**, **purisamhīti** tīṇi sattamiyā ekavacanaṇi. **Purisesūti** bahuvacanaṃ. **Bho purisāti** aṭṭhamiyā ekavacanaṃ. **Bho purisā**, **bhavanto purisāti** dve bahuvacanaṇi.

Kiñcāpetesu “purisā”ti idaṃ paṭhamāpañcamīaṭṭhamīnaṃ, “purise”ti idaṃ dutiyāsattamīnaṃ, “purisehi, purisebhi”ti tatiyāpañcamīnaṃ, “purisāna”nti catutthīchaṭṭhīnaṃ ekasadisam̐, tathāpi atthavasena asaṅkarabhāvo veditabbo. Kathaṃ? “Puriso tiṭṭhati, purisā tiṭṭhanti. Purisaṃ passati, purise passati”tiādīnā.

Tattha ca **bhoti** āmantanatthe nipāto. So na kevalaṃ ekavacanaṃyeva hoti, atha kho bahuvacanaṃpi hotīti “bho purisā”iti bahuvacanaṃpappayogopi gahito. “Bhavanto”tidaṃ pana bahuvacanaṃyeva hotīti “purisā”ti puna vuttanti daṭṭhabbaṃ. Iti yamakamahātherena “bho purisa”iti rassavasena ālapanekavacanaṃ vatvā “bho purisā”iti dīghavasena ālapanabahuvacanaṃ vuttaṃ. Tathā hi pāliyaṃ aṭṭhakathāsu ca nipātabhūto **bhosaddo** ekavacanaṃbahuvacanaṃavasena dvidhā bhijjati. Atrimāni nidassanapadāni – “api nu kho sapariggahānaṃ tevijjānaṃ brāhmaṇānaṃ apariggahena brahmunā saddhim̐ saṃsandati sameṭīti, no hidaṃ bho gotama. Acchariyaṃ bho ānanda, abbhutaṃ bho ānanda, ehi bho samaṇa, bho pabbajita”iccā dipālito aṭṭhakathāto ca **bhosaddassa** ekavacanaṃpappayoge pavattinidassanaṃ, “tena hi bho mamapi suṇātha. Yathā mayameva arahāma taṃ bhavantaṃ gotamaṃ dassanāya upasaṅkamitum̐, nāhaṃ bho samaṇassa gotamassa subhāsitaṃ subhāsitato nābbhanumodāmi, passatha bho imaṃ kulaputtaṃ. Bho yakkhā ahaṃ imaṃ tumhākaṃ bhājetvā dadeyyaṃ. Aparisuddho panamhi, bho dhuttā tumhākaṃ kriyā mayhaṃ na ruccati. So te purise āha bho tumhe maṃ mārentā rañño dassetvāva mārethā”ti iccādi pana pālito aṭṭhakathāto ca **bhosaddassa** bahuvacanaṃpappayoge pavattinidassanaṃ. **Kaccāyan**appakaraṇe pana “bho purisa, bho purisā”ti padadvayaṃ ālapanekavacanaṃavasena vuttaṃ. Taṃ yathā āgamehi na virujjhati, tathā gahetabbā.



Keci pana adūraṭṭhassālapane “bho purisa”iti rassavasena ālapanekavacanam icchanti, dūraṭṭhassālapane pana “bho purisā”iti dīghavasena ālapanekavacanam icchanti. Adūraṭṭhānam dūraṭṭhānañca purisānam itthīnañca ālapane na kiñci vadanti. Tathā adūraṭṭhāya dūraṭṭhāya ca itthiyā ālapane te pucchitabbā “adūraṭṭhānam dūraṭṭhānañca purisānamālapane katham vattabba”nti. Addhā te evam puṭṭhā uttari kiñci vattum na sakkhissanti. Evampi te ce vadeyyum “bhavanto purisāti imināva adūraṭṭhānam dūraṭṭhānañca purisānamālapanam bhavatī”ti. Tadā te vattabba “yadi bhavanto purisā”ti iminā advejjhena vacanena adūraṭṭhānam dūraṭṭhānañca purisānamālapanam bhavati, evam sante “bho purisa”iti rassapadenapi dūraṭṭhassa ca purisassālapanam vattabbam, evam avatvā kimattham adūraṭṭhassālapane “bho purisa”iti rassavasena ālapanekavacanam icchatha, kimatthañca dūraṭṭhassālapane “bho purisā”iti dīghavasena ālapanekavacanam icchatha.

Nanu “taggha bhagavā bojjaṅgā, taggha sugata bojjaṅgā”tiādīsu ālapanapadabhūtam “bhagavā”iti dīghapadam samīpe ṭhitakālepi dūre ṭhitakālepi buddhassālapanapadam bhavitumarahateva, tathā ālapanapadabhūtam “sugata”iti rassapadampi. Yasmā panetesu “bhagavā”ti ālapanapadassa na katthacipi rassattam dissati, “sugatā”ti ālapanapadassa ca na katthacipi dīghattam dissati, tasmā dīgharassamattābhedam acintetvā “purisa”iti rassavasena vuttapadam pakatissaravasena samīpe ṭhitassa purisassa āmantanakāle adūraṭṭhassālapanapadam bhavati, āyatassaravasena dūre ṭhitapurisassa āmantanakāle dūraṭṭhassālapanapadam bhavatīti gahetabbam. Tathā “bhavanto purisā, bho yakkhā, bho dhuttā”tiādīni dīghavasena vuttāni ālapanabahuvacanapadānīpi pakatissaravasena samīpe ṭhitapurisānam āmantanakāle adūraṭṭhānamālapanapadāni bhavanti, āyatassaravasena dūre ṭhitapurisādīnam āmantanakāle dūraṭṭhānamālapanapadāni bhavanti gahetabbāni. Tathā hi brāhmaṇā katthaci katthaci rassatṭhānēpi dīghatṭhānēpi āyatena sarena majjhimāyatena sarena accāyatena ca sarena vedam paṭhanti likhitumasakkuṇeyyena gītassarena viya. Iti sabbakkhāresupi āyatena sarenuccāraṇam labbhateva likhitumasakkuṇeyyam, tasmā asampathamanotarivā “bho purisa”iti vacanena dūraṭṭhassa ca adūraṭṭhassa ca purisassālapanam bhavati, “bho purisā, bhavanto purisā”ti imehi vacanehipi dūraṭṭhānañca adūraṭṭhānañca purisānamālapanam bhavatīti daṭṭhabbam. Iti dūraṭṭhassa adūraṭṭhānañca āyatena sarena āmantanameva pamāṇam, na dīgharassamattāviseso, tasmā “bho sattha, bho rāja, bho gaccha, bho muni, bho daṇḍi, bho bhikkhu, bho sayambhu, bhoti kaññe, bhoti patti, bhoti itthi, bhoti yāgu, bhoti vadhu, bho kula, bho aṭṭhi, bho cakkhu”iccevamādīhi padehi adūraṭṭhassālapanañca dūraṭṭhassālapanañca bhavati. “Bhavanto satthā, satthāro, bhotiyo kaññā, kaññāyo”ti evamādīhipi padehi adūraṭṭhānañcālapanam bhavatīti daṭṭhabbam.

Idam panettha sannitṭhānam –

Tassa tam vacanam sutvā, rañño puttam adassayum;  
Putto ca pitaram disvā, dūratovajjhabhāsatha.

Āgacchu dovārikā khaggabandhā,  
Kāsāviyā hantu mamam janinda;  
Akkhāhi me pucchito etamattham,  
Aparādho ko nvidha mamajja atthi.

Evam saddhammarājena, vohārakusalena ve;  
Sudesite somanassa-jātake sabbadassinā.

Dūraṭṭhānēpi rassattam, “janinda”iti dissati;  
Na katthacipi dīghattam, itī nīti mayā matā.

Idampettha vattabbam “kuto nu bho idamāyātam ‘dūraṭṭhassālapanam adūraṭṭhassālapanam’iti”? Saddasatthato. Saddasattham nāma na sabbaso buddhavacanassopakāraṇam, ekadesena pana hoti.

Imasmiṃ pakaraṇe “bahuvacana”nti vā “puthuvacana”nti vā “anekavacana”nti vā atthato ekaṃ, byañjanameva nānam, tasmā sabbattha “bahuvacana”nti vā “puthuvacana”nti vā

“anekavacana”nti vā vohāro kātabbo, puthuvacanaṃ anekavacananti ca idaṃ sāsane niruttaññūnaṃ vohāro, itaraṃ saddasatthavidūnaṃ.

Kasmā pana imasmiṃ pakaraṇe dvivacanaṃ na vuttanti? Yasmā buddhavacane dvivacanaṃ nāma natthi, tasmā na vuttanti. Nanu buddhavacane vacanattayaṃ atthi, tathā hi “āyasmā”ti idaṃ ekavacanaṃ, “āyasmantā”ti idaṃ dvivacanaṃ, “āyasmanto”ti idaṃ bahuvacanaṃ? Tanna, yadi “āyasmantā”ti idaṃ vacanaṃ dvivacanaṃ bhavēyya, “puriso purisā”tiādīsu kataraṃ dvivacanaṃ vadeyyātha, tasmā buddhavacane dvivacanaṃ nāma natthi. Teneva hi **si yo aṃ yo nā hīti**adinā ekavacanabahuvacanāneva dassitānīti.

Nanu ca bho “suṇantu me āyasmantā, ajja uposatho pannaraso. Yadāyasmantānaṃ pattakallaṃ, mayaṃ aññaṃaññaṃ pārisuddhiuposathaṃ kareyyāma”ti **pāliyaṃ** dve sandhāya “āyasmantā”ti vuttaṃ, “uddiṭṭhā kho āyasmanto cattāro pārājikā dhammā”tiādīsu pana pālisu bahavo sandhāya “āyasmanto”ti vuttaṃ, na ca sakkā vattum “yathā tathā vutta”nti, parivāsādiārocane pi atthakathācariyehi viññātasugatādhippāyehi “dvinnaṃ ārocentena ‘āyasmantā dhārentū’ti, tiṇṇaṃ ārocentena ‘āyasmanto dhārentū’ti vattabba”nti vuttattāti? Saccam vuttaṃ, taṃ pana vinayavohāravasena vuttanti. Nanu vinayo buddhavacanaṃ, kasmā “buddhavacane dvivacanaṃ nāma natthi”ti vadathāti? Saccam vinayo buddhavacanaṃ, tathāpi vinayakammavasena vuttattā upalakkhaṇamattaṃ, na sabbasādhāraṇabahuvacanapariyāpannaṃ. Yadi hi “āyasmantā”ti idaṃ dvivacanaṃ siyā, tappayogānīpi kriyāpadāni dvivacanāneva siyūṃ, tathārūpānīpi kriyāpadāni na santi. Na hi akkharasamayakovidō jhānalābhīpi dibbacakkhunā vassasatampi vassasahassampi samavekkhanto buddhavacane ekampi kriyāpadaṃ dvivacanaṃ passeyya, evaṃ kriyāpadesu dvivacanassābhāvā nāmikapadesu dvivacanaṃ natthi. Nāmikapadesu tadabhāvāpi kriyāpadesu tadabhāvo veditabbo. Sakkaṭabhāsāyaṃ dvīsupi dvivacanāni santi, māgadhabhāsāyaṃ pana natthi.

Apica “puthuvacana”nti niruttivohāropi “buddhavacane dvivacanaṃ natthi”ti etamatthaṃ dīpeti. Tañhi sakkaṭabhāsāyaṃ vuttā dvivacanato bahuvacanato ca visuṃbhūtaṃ vacanaṃ, tattha vā vuttehi atthehi visuṃbhūtassa atthassa vacanaṃ “puthuvacana”nti vuccati. Kathamidam sakkaṭabhāsāyaṃ vuttā dvivacanato bahuvacanato ca visuṃbhūtaṃ vacananti ce? Yasmā sakkaṭabhāsāyaṃ “puthuvacana”nti vohāro natthi, tasmā idaṃ tehi sakkaṭabhāsāyaṃ vuttehi dvivacanabahuvacanehi visuṃbhūtaatthassa vacananti vuccati. Kathañca pana sakkaṭabhāsāyaṃ vuttehi visuṃbhūtassa atthassa vacananti puthuvacanaṃ ce? Yasmā sakkaṭabhāsāyaṃ dve upādāya dvivacanaṃ vuttaṃ, na ticatupañcādi ke bahavo upādāya, bahavo pana upādāya bahuvacanaṃ vuttaṃ, na dve upādāya, ayaṃ sakkaṭabhāsāya viśeso. Māgadhabhāsāyaṃ pana dvīticatupañcādi ke bahavo upādāya puthuvacanaṃ vuttaṃ, tasmā sakkaṭabhāsāyaṃ vuttehi atthehi visuṃbhūtassa atthassa vacananti puthuvacanaṃ vuccati. Ayaṃ māgadhabhāsāya viśeso. Tasmātra puthubhūtassa, puthuno vā atthassa vacanaṃ “puthuvacana”nti attho samadhigantabbo.

Idāni “puriso, purisā, purisa”nti niruttipiṭakato uddharitanayaṃ nissāya pakatirūpabhūtassa **bhūtas**saddassa nāmikapadamālā vuccate –

Bhūto, bhūtā. Bhūtaṃ, bhūte. Bhūtena, bhūtehi, bhūtebhi. Bhūtassa, bhūtānaṃ. Bhūtā, bhūtasmā, bhūtāmhā, bhūtehi, bhūtebhi. Bhūtassa, bhūtānaṃ. Bhūte, bhūtasmim, bhūtāmhī, bhūtesu. Bho bhūta, bhavanto bhūtā.

Atha vā “bho bhūtā”iti bahuvacanaṃ viññeyyaṃ. Yathā panettha **bhūta**iccetassa pakatirūpassa nāmikapadamālā purisanayena yojitā, evaṃ bhāvakādīnañca aññesañca taṃsadisānaṃ nāmikapadamālā **purisa**nayena yojetabbā. Etthaññāni taṃsadisāni nāma “buddho”tiādīnaṃ padānaṃ **buddha**iccādīni pakatirūpāni.

Buddho dhammo saṅgho maggo,  
Khandho kāyo kāmo kappo;  
Māso pakkho yakkho bhakkho,  
Nāgo meggo bhogo yāgo.

Rāgo doso moho māno,  
Makkho thambho kodho lobho;  
Hāso vero dāho tejo,  
Chando kāso sāso rogo.

Asso sasso isso sisso,  
Sīho byaggho rukkho selo;  
Indo sakko devo gāmo,  
Cando sūro oggho dīpo.

Passo yañño cāgo vādo,  
Hattho patto soso gedho;  
Somo yodho gaccho accho,  
Geho māḷo aṭṭo sālo.

Naro nago migo saso,  
Suṇo bako ajo dijo;  
Hayo gajo kharo saro,  
Dumo talo paṭo dhajo.

Urago paṭago vihago bhujago,  
Kharabho sarabho pasado gavajo;  
Mahiso vasabho asuro garuḷo,  
Taruṇo varuṇo baliso paligho.

Sālo dhavo ca khadiro,  
Godhumo saṭṭhiko yavo;  
Kaḷāyo ca kulattho ca,  
Tilo muggo ca taṇḍulo.

Khattiyo brāhmaṇo vesso,  
Suddo dhutto ca pukkuso;  
Caṇḍālo patiko paṭṭho,  
Manusso rathiko ratho.

Pabbajito gahaṭṭho ca,  
Goṇo oṭṭho ca gadrabho;  
Mātugāmo ca orodho,  
Iccādīni vibhāvaye.

Kecettha vadeyyuṃ ‘‘nanu bho ‘orodhā ca kumārā cā’ ti pāṭhassa dassanato **orodhasaddo** itthiliṅgo’ ti? Tanna, tattha hi ‘‘orodhā’ ti idaṃ okārantapullīṅgameva, **nā**’ kārantiṭṭhiliṅgaṃ, tumhe pana ‘‘ākārantitthiliṅga’ nti maññamānā evaṃ vadatha, na panidaṃ ākārantitthiliṅgaṃ, atha kho ‘‘mātugāmā’ tipadaṃ viya bahuvacanavasena vuttamākārantapadanti. Nanu ca bho **sammohavinodaniyādīsu orodhasaddassa** itthiliṅgatā pākaṭā, kathanti ce? ‘‘Rukkhe adhivatthā devatā therassa kuddhā paṭhamameva manāṃ palobhetvā ‘ito te sattadivasamatthake upaṭṭhāko rājā marissatī’ ti supine ārocesi. Thero taṃ kathaṃ sutvā rājorodhānaṃ ācikkhi. Tā ekappahāreneva mahāviraṃ viraviṃsū’ ti. Ettha hi ‘‘rājorodhāna’ nti vatvā ‘‘tā’ ti vuttattāva **orodhasaddassa** itthiliṅgatā pākaṭā? Tanna, atthassa duggahaṇato. Duggahito hi ettha tumhehi attho, ettha pana **orodhasaddena** itthipadatthassa kathanato itthipadatthāṃ sandhāya ‘‘tā’ ti vuttattā ‘‘tā itthiyo’ ti ayamevattho. Tumhe pana amātāpitarasaṃvaddhattā ācariyakule ca anivuṭṭhattā etaṃ sukhumatthamañāntā yaṃ vā taṃ vā mukhārūḷhaṃ vadatha.

Bhuñjanatthāṃ kathanatthāṃ, mukhaṃ hotīti no vade;  
Yaṃ vā taṃ vā mukhārūḷhaṃ, vacanaṃ paṇḍito narotī.

Na mayambho yaṃ vā taṃ vā mukhārūḷhaṃ vadāma, aṭṭhakathācariyānaññeva vacanaṃ gahetvā vadāma, aṭṭhakathāyeva amhākaṃ paṭisaraṇaṃ, na mayam tumhākaṃ saddahāmāti. Amhākaṃ saddahatha vā mā vā, mā tumhe “aṭṭhakathācariyānaññeva vacanaṃ gahetvā vadāmā”ti aṭṭhakathācariye abbhācikkhatha. Na hi aṭṭhakathācariyehi “**orodhasaddo** itthilingo”ti vuttaṭṭhānamatthi, tasmāpi aṭṭhakathācariye abbhācikkhatha, na yuttaṃ buddhādīnaṃ garūnamabbhācikkhanaṃ mahato anattassa lābhāya saṃvattanato. Vuttañhetam bhagavatā “attanā duggahitena amhe ceva abbhācikkhati, bahuñca apuññaṃ pasavati, tato attānañca khaṇatī”ti.

Evaṃ abbhācikkhanassa ayuttataṃ sāvajjatañca dassetvā punapi te idaṃ vattabbā – **jātakatṭhakathāyampi** tumhehi āhaṭaudāharaṇasadiṣaṃ udāharaṇamatthi, taṃ suṇātha. Kosiyajātakatṭhakathāyañhi “sattā jetavane viharanto ekaṃ sāvattiyam mātugāmaṃ ārabha kthesi. Sā kirekassa saddhassa pasannassa upāsakabrāhmaṇassa brāhmaṇī dussilā pāpadhammā”ti pāṭho dissati. Ettha hi “mātugāmaṃ ārabha kthesi”ti vatvā “sā”ti vuttatā tumhākaṃ matena **mātugāmasaddo** itthilingoyeva siyā, na pulliṅgo, kimidaṃ aṭṭhakathāvacanampi na passatha, tadeva pana aṭṭhakathāvacanaṃ passatha, kiṃ sā eva aṭṭhakathā tumhākaṃ paṭisaraṇaṃ, na tadaññāti.

Yadi tāsaddaṃ apekkhitvā **orodhasadda** itthilingattamicchatha, etthāpi sāsaddamapekkhitvā **mātugāmasadda** itthilingattamicchathāti. Evaṃ vuttā te niruttarā appaṭibhānā maṅkubhūtā pattakkhandhā adhomukhā pajjhāyeyyūṃ. Etthāpi **mātugāmasadda** itthipadatthassa kathanato itthipadattham sandhāya “sā”ti vuttatā “sā itthi”ti ayamevattho. Katthaci hi padhānavācakena pulliṅgena napuṃsakaliṅgena vā samānādhikaraṇassa guṇasaddassa abhidheyyaliṅgānuvattitāpulliṅgavasena vā napuṃsakaliṅgavasena vā niddisitabbattepi liṅgamanapekkhitvā itthipadatthamevāpekkhitvā itthilinganiddeso dissati. Taṃ yathā? “Idha visākhē mātugāmo susaṃvihitakammantā hoti saṅgahitaparijanā bhattumanāpaṃ carati, sambhataṃ anurakkhatī”ti ca, “ko nu kho bhante hetu ko paccayo, yena midhekacco mātugāmo dubbaṇṇā ca hoti durūpā supāpikā dassanāya, daliddā ca hoti appassakā appabhogā appesakkhā ca. Idha mallike ekacco mātugāmo kodhanā hoti upāyāsabahulā, appampi vuttā samānā abhisajjati kuppati byāpajjati patitthiyati kopañca dosañca appaccayañca pātukarotī”ti ca, “taṃ kho pana bhikkhave itthiratanam rañño cakkavattissa pubbuṭṭhāyini pacchānipātinī kiṃkārappaṭissāvinī”ti ca ime payogā.

Katthaci pana padhānavācakena napuṃsakaliṅgena samānādhikaraṇassa guṇasaddassa abhidheyyaliṅgānuvattitā napuṃsakaliṅgavasena niddisitabbattepi liṅgamanapekkhitvā purisapadatthamevāpekkhitvā pulliṅganiddeso dissati. Taṃ yathā? “Pañca paccekabuddhasatāni imasmiṃ isigilismiṃ pabbate ciranivāsino ahesuṃ. Taṃ kho pana rañño cakkavattissa pariṇāyakaratanam ñātānam pavesetā aññātānam nivāretā”ti. Katthaci padhānavācakena liṅgattayena samānādhikaraṇassa guṇasaddassa abhidheyyaliṅgānurūpaṃ niddeso dissati. Taṃ yathā? Sā itthi “sīlavatī kalyāṇadhammā. Aṭṭhahi kho nakulamāte dhammehi samannāgato mātugāmo kāyassa bheda parammaraṇā manāpakāyikānaṃ devānaṃ saḥabyataṃ upapajjati. Saddho purisapuggalo, saddham kulam, cittaṃ dantaṃ sukhāvaha”nti.

**Seyyaiti** saddo pana yebhuyyena okārantabhāve ṭhatvā liṅgattayānukūlo bhavati ekākārenea tiṭṭhanato. Kathaṃ? Seyyo amitto matiyā upeto. Esāva pūjanā seyyo, ekāhaṃ jīvitam seyyo.

“Dhammena ca alābho yo,  
Yo ca lābho adhammiko;  
Alābho dhammiko seyyo,  
Yañce lābho adhammiko.

Yaso ca appabuddhīnaṃ, viññūnaṃ ayaso ca yo;  
Ayasova seyyo viññūnaṃ, na yaso appabuddhinaṃ.

Dummedhehi pasaṃsā ca, viññūhi garahā ca yā;  
Garahāva seyyo viññūhi, yañce bālappasaṃsanā.

Sukhañca kāmamayikaṃ, dukkhañca pavivekikaṃ;

Pavivekaṃ dukkhaṃ seyyo, yañce kāmamayaṃ sukhaṃ.

Jīvaṭṭaṃ adhammena, dhammena maraṇaṃ yaṃ;  
Maraṇaṃ dhammikaṃ seyyo, yañce jīve adhammika’’nti.

Evamayaṃ **seyya** iti saddo okārantabhāve ṭhatvā liṅgattayānukūlo bhavati. Kathaci pana ākārantabhāve ṭhatvā itthiliṅgānukūlo dissati ‘‘itthī hi ekacciyā, seyyā posa janādhipā’’ti. Niggahītaṃ pana hutvā napuṃsakaliṅgānukūlo apasiddho. Evaṃpakāre payoge kiṃ tumhe na passathāti. Evaṃ vuttā ca te niruttarāva bhavissanti.

Sacepi te ettha evaṃ vadeyyuṃ ‘‘tattha tattha suttappadese aṭṭhakathādīsū ca ‘mātugāmo’ ti vā ‘mātugāmenā’ ti vā okārantapullīṅgabhāvena **mātugāmas**addassa dassanato pullīṅgabhūtaṃ **mātugāmas**addaṃ anapekkhitvā itthipadattameva apekkhitvā ‘‘sā itthī’’ ti **itthī**saddena **sā**saddassa sambandhaggahaṇaṃ mayāṃ sampaṭicchāma, ‘orodho’ ti vā ‘orodhenā’ ti vā okārantapullīṅgabhāvena ṭhitassa **orodhas**addassa adassanato pana tumhehi vuttaṃ purimatthaṃ na sampaṭicchāmā’’ti. Tadā tesāṃ imāni **vinayapāliyaṃ** āgatapadāni dassetabbāni ‘‘tena kho pana samayena rājā udeno uyyāne paricāresi saddhiṃ orodhena, atha kho rañño udenassa orodho rājānaṃ udenaṃ etadavocā’’ti. Evaṃ imāni suttapadāni dassetvā **suttanipātaṭṭhakathāyaṃ** ‘‘rāmo nāma rājā kuṭṭharogī orodhehi ca nātakehi ca jigucchamāno’’ti vacanaṃ dassetvā ‘‘gacchatha tumhe garukulamupagantvā bhagavato saddhammassa ciratṭhitatthaṃ sādhukaṃ padabyañjanāni uggaṇhathā’’ti uyyojetabbā.

Idāni **mātugāmas**addādīsū kiñci vinicchayaṃ vadāma – **mātugāmas**addo ca **orodhas**addo ca **dāras**addo cāti ime itthipadattavācakāpi samānā ekantena pullīṅgā bhavanti. Tesu **dāras**addassa ekasmiṃ atthe vattamānassāpi bahuvacanakattameva saddasatthavidū icchanti, na ekavacanakattaṃ. Mayaṃ pana **dāras**addassa ekasmiṃ atthe ekavacanakattaṃ, yebhuyyena pana bahuvacanakattaṃ anujānāma, bavhatthe vattabameva natthi. Pāliyañhi **dāras**addo yebhuyyena bahuvacanako bhavati, ekavacanako appo. Tatrime payogā –

‘‘Dāsā ca dāsyo anujīvino ca,  
Puttā ca dārā ca mayaṃca sabbe;  
Dhammañcarāmapparalokahetu,  
Tasmā hi amhaṃ daharā na miyyare’’ti ca,

‘‘Yo ñātīnaṃ sakhīnaṃ vā, dāresu paṭidissati;  
Sahasā sampiyāyena, taṃ jaññāvasalo itī’’ti ca,

‘‘Sehi dārehi’ santuṭṭho, vesiyāsu padissati;  
Dissati parādāresu, taṃ parābhavato mukha’’nti ca,

‘‘Puttesu dāresu ca yā apekkhā’’ti ca byāse, samāse pana ‘‘puttadārā disā pacchā, puttadārehi mattano’’ti ca evamādayo bahuvacanappayogā bahavo bhavanti.

Ekavacanappayogā pana appā. Seyyathidaṃ? ‘‘Garūnaṃ dāre, dhammaṃ care yopi samuñjakaṃ care, dāraṃca posāṃ dadamappakasmī’’nti ca,

‘‘Ye gahaṭṭhā puññakarā, sīlavanto upāsakā;  
Dhammena dāraṃ posenti, te namassāmi mātālī’’ti ca,

‘‘Paradāraṃ na gaccheyyaṃ, sadārapasuto siya’’nti ca,

‘‘Yo icche puriso hotuṃ, jātiṃ jātiṃ punappunaṃ;  
Paradāraṃ vivajjeyya, dhotapādova kaddama’’nti ca

Evamādayo ekavacanappayogā appā.

Samāhāralakkhaṇavasena panesa **dārasaddo** napuṃsakaliṅgekavacanopi katthaci bhavati. “Ādāya puttadāraṃ. Puttadārassa saṅgaho”iti evaṃ idha vuttappakārena liṅgañca atthañca sallakkhetvā “puriso purisā”ti pavattaṃ purisasaddanayaṃ nissāya sabbesaṃ “bhūto bhāvako bhavo”tiādīnaṃ **bhūdhātumayānaṃ aññesañcokārantapadānaṃ nāmikapadamālāsu** saddhāsampannehi kulaputtehi saddhammaṭṭhitiyā kosallamuppādetabbaṃ.

Kiṃ pana sabbāni okārantapadāni **purisanaye** sabbappakārena ekasadisāneva hutvā pavittāhāni? Na pavittāhāni. Kānici hi okārantapadāni **purisanaye** sabbathā pavittāhāni ca honti, ekadesena pavittāhāni ca, kānici okārantapadāni **purisanaye** ekadesena pavittāhāni ca honti, ekadesena na pavittāhāni ca, kānici okārantapadāni **purisanaye** sabbathā appavittāhāneva. Tatra katamāni kānici okārantapadāni **purisanaye** sabbathā pavittāhāni ca honti, ekadesena pavittāhāni ca? “Saro vayo ceto”tiādīni. **Sarōiti** hi ayaṃsaddo usasaddasaravanaakārādisaravācako ce, **purisanaye** sabbathā pavittāho. Rahadavācako ce, **manogaṇapakkhikattā purisanaye** ekadesena pavittāho. **Vayoiti** saddo parihānivācako ce, **purisanaye** sabbathā pavittāho. Ayukoṭṭhāsavācako ce, **manogaṇapakkhikattā purisanaye** ekadesena pavittāho. **Ceto** iti saddo yadi paṇṇattivācako, **purisanaye** sabbathā pavittāho. Yadi pana cittavācako, **manogaṇapakkhikattā purisanaye** ekadesena pavittāho. **Manogaṇo** ca nāma –

Mano vaco vayo tejo,  
Tapo ceto tamo yaso;  
Ayo payo siro chando,  
Saro uro raho aho –

Ime soḷasa.

Idāni yathāvuttassa pākāṭikaraṇatthaṃ **manasaddādīnaṃ nāmikapadamālāṃ** kathayāma –

Mano, manā. Manaṃ, mano, mane. Manasā, manena, manehi, manebhi. Manaso, manassa, manānaṃ. Manā, manasmā, manamhā, manehi, manebhi. Manaso, manassa, manānaṃ. Manasi, mane, manasmiṃ, manamhi, manesu. Bho mana, bhavanto manā.

Atha vā “bho manā”iti bahuvacanampi ñeyyaṃ. Evaṃ vaco, vacā. Vacam, vaco, vace. Vacasātiādīnā nāmikapadamālā yojetabbā. **Ahasaddassa** pana bhummekavacanaṭṭhāne ahasi, ahe, ahasmiṃ, ahamhi, ahu, ahanīti yojetabbā.

Idāni rūpantaravisesadassanattaṃ napuṃsakaliṅgassa **manasaddassapi** nāmikapadamālāṃ vadāma, aṭṭhāne ayaṃ kathitāti na codetabbaṃ.

Manaṃ, manāni, manā. Manaṃ, manāni, mane. Manena, manehi, manebhi. Manassa, manaso, manānaṃ. Manā, manasmā, manamhā, manehi, manebhi. Manassa, manaso, manānaṃ. Mane, manasmiṃ, manamhi, manesu. Bho mana, bhavanto manā. Atha vā “bho manāni, bho manā”evampi bahuvacanaṃ veditabbaṃ. Evamuttarātrāpi nayo.

Ettha ca pulliṅgassa **manasaddassa** paccattakaraṇasampadānasāmibhummavacanāni mano manasā manaso manasīti rūpāni ṭhapetvā yāni sesāni, napuṃsakaliṅgassa ca **manasaddassa** paccattavacanāni “manam manāni”ti rūpāni ca, aṭṭhamyopayogavacanānaṃ “manam manāni”ti rūpadvayañca ṭhapetvā yāni sesāni, tāni sabbāni kamato samasamāni.

Keci okāraṇto **manoiti** saddo napuṃsakaliṅgoti vadanti, te vattabbā – yadi so napuṃsakaliṅgo siyā, tassadisehi **vaco vayo**tiādīsaddehipi napuṃsakaliṅgeheva bhavitabbaṃ, na “te napuṃsakaliṅgā”ti garū vadanti, “pulliṅgā”icceva vadanti. Yasmā ca **pāliyaṃ** “kāyo anicco; mano anicco”ti ca “kāyo dukkho, mano dukkho”ti ca “nicco vā anicco vāti anicco bhante”ti ca evamādayo pulliṅgappayogā bahavo diṭṭhā. Tena ñāyati **manosaddo** ekantena pulliṅgoti. Yadi pana

napuṃsakaliṅgosiyā, “anicco dukkho”ti evamādīni taṃsamānādhikaraṇāni anekapadasatānīpi napuṃsakaliṅgāneva siyuṃ. Na hi tāni napuṃsakaliṅgāni, atha kho abhidheyyaliṅgānuvattakāni vāccaliṅgāni. Evaṃ **manos**saddassa pulliṅgatā paccetabbāti, sace **manos**saddo napuṃsakaliṅgo na hoti, kathañ “manānī”ti napuṃsakarūpaṃ dīssatīti? Saccañ “manānī”ti napuṃsakaliṅgameva, tathāpi **manogaṇe** pamukhabhāvena gahitassokārantassa **manas**saddassa rūpaṃ na hoti. Atha kiñcarahīti ce? **Cittas**addena samānaliṅgassa samānasutittepī **manogaṇe** apariyāpannassa niggaḥītantasseva **manas**saddassa rūpaṃ. **Manas**saddo hi punnapuṃsakavasena dvidhā bhijjati “mano manañ”iti yathā “ajjavojjava”nti. “Mano ce nappadussati. Santañ tassa manañ hoti”ti hi pāḷi. Yadi ca so **manos**saddo napuṃsakaliṅgo na hoti.

“Garu cetiyapabbatavattaniyā,  
Pamadā pamadā pamadā vimadam;  
Samaṇañ sunisamma akā hasitaṃ,  
Patitaṃ asubhesu munissa mano”ti

**Ettha** **manos**saddena samānādhikaraṇo “patita”nti saddo napuṃsakaliṅgabhāvena kasmā sannihito. Yasmā ca samānādhikaraṇapadam napuṃsakaliṅgabhāvena sannihitaṃ, tasmā saddantarāsannidhānavasena **manos**saddo napuṃsakaliṅgoti ñāyatīti? Tanna, samānādhikaraṇapadassa sabbattha liṅgavisesājotanato. Yadi hi samānādhikaraṇapadam sabbattha liṅgavisesaṃ joteyya, “cattāro indriyānī”ti etthāpi “cattāro”ti padaṃ **indriyas**saddassa pulliṅgattaṃ kareyya, na ca kātuṃ sakkoti. **Indriyas**saddo hi ekantena napuṃsakaliṅgo. Yadi tumhe “patita”nti samānādhikaraṇapadam nissāya **manos**saddassa napuṃsakaliṅgattamicchatha, “cattāro indriyānī”ti etthāpi “cattāro”ti samānādhikaraṇapadam nissāya **indriyas**saddassa pulliṅgattaṃ icchathāti. Na mayañ bho **indriyas**saddassa pulliṅgattaṃ icchāma, atha kho napuṃsakaliṅgattaṃyeva icchāma, “cattāro”ti padaṃ liṅgavipallāsavasena ṭhitattā “cattāri”ti gaṇhāma, tasmā “cattāri indriyānī”ti atthaṃ dhāremāti. Yadi evañ “patitaṃ asubhesu munissa mano”ti etthāpi “patita”nti padaṃ liṅgavipallāsavasena ṭhitanti mantvā “patito”ti atthaṃ dhārethāti. Na dhārema ettha liṅgavipallāsassa anicchitabbato. Yadi hi **manos**saddo pulliṅgo siyā, taṃsamānādhikaraṇapadam “patito”ti vattabbaṃ siyā. Kimācariyo evañ vattuṃ na jāni, jānamāno eva so “patito”ti nāvoca, “patita”nti panāvoca, tena ñāyati “**manos**saddo napuṃsakaliṅgo”ti. Mā tumhe evañ vadetha, samānādhikaraṇapadam nāma katthaci padhānaliṅgamanuvattati, katthaci nānuvattati, tasmā na taṃ liṅgavisesajotane ekantato pamāṇañ. “Mātugāmo, orodho, āvuso visākha, ehi visākhe, cittāni aṭṭhīnī”ti evamādirūpavisesoyeva pamāṇañ. Yadi samānādhikaraṇapadeyeva liṅgaviseso adhigantabbo siyā, “cattāro ca mahābhūtā”tiādisu liṅgavavattānaṃ na siyā. Yasmā evamādisupi ṭhānesu liṅgavavattānaṃ hotiyeva. Kathañ? “Cattāro”ti pulliṅgaṃ “mahābhūtā”ti napuṃsakanti, tasmā “patitaṃ asubhesu munissa mano”ti etthāpi “patita”nti napuṃsakaliṅgaṃ “mano”ti pulliṅganti vavattānaṃ bhavatīti. Idaṃ sutvā te tuṅhī bhavissanti. Tato tesañ tuṅhībhūtānaṃ idaṃ vattabbaṃ – yasmā **manogaṇe** pavattānaṃ padānaṃ samānādhikaraṇapadāni katthaci napuṃsakavasena yojetabbāni, tasmā **manogaṇe** pamukhassa **manos**saddassapi samānādhikaraṇapadāni katthaci napuṃsakavasena yojitāni. Tathā hi pubbācariyā “saddhammatejavihataṃ vilayaṃ khaṇena, veneyyasattahadāyesu tamo’payāti. Dukkhaṃ vaco etasminti dubbaco. Avanaṭaṃ siro yassa soyaṃ avamaṃsiro, appakaṃ rāgādi rajo yesañ paññāmaye akkhiṃhi te apparajakkhā”tiādinā saddaracanaṃ kubbimsu, na pana tehi **vaco siro rajos**saddānaṃ napuṃsakaliṅgattaṃ vibhāvetuṃ īdisī saddaracanaṃ katā, atha kho **siromanos**saddānaṃ **manogaṇe** pavattānaṃ pulliṅgasaddānaṃ katthacipi īdisānīpi liṅgavipallāsavasena ṭhitāni samānādhikaraṇapadāni hontīti paresañ jānāpanādhippāyavatiyā anukampāya viracitā. Etthāpi tumhākaṃ matena **manos**saddassa napuṃsakaliṅgatte sati **vaco siro** iccādayopi napuṃsakaliṅgattamāpajjanti napuṃsakaliṅgavasena samānādhikaraṇapadānaṃ niddiṭṭhattā. Kim panetesampi napuṃsakaliṅgattaṃ icchathāti. Addhā te idampi sutvā nibbeṭhetumasakkontā tuṅhī bhavissanti. Kiñcāpi te aññaṃ gahetabbakāraṇañ apassantā evañ vadeyyuṃ “yadi bho **mano** saddo napuṃsakaliṅgona hoti, kasmā veyyākaraṇā **manos**saddo napuṃsakaliṅgo’ti vadantī”ti? Te vattabbā – yadi tumhe veyyākaraṇamatañ gahetvā **manos**saddassa napuṃsakaliṅgattaṃ rocetha, nanu bhagavāyeva loke asadisō mahāveyyākaraṇo mahāpuriso visārado parappavādamaddano. Bhagavantañhi padakā veyyākaraṇā ambatṭhamāṇavapokkharasātisoṇadaṇḍādayo ca brāhmaṇā saccakanigaṇṭhādayo ca paribbājakā vādena na sampāpuṇṇimsu, aññadatthu bhagavāyeva

mattavāraṇaṇamajjhe kesarasīho viya asambhīto nesaṃ nesaṃ vādaṃ maddesi, mahante ca ne atthe patiṭṭhāpesi, evaṃvidhena bhagavatā vohārakusalena yasmā “kāyo anicco”ti ca “kāyo dukkho, mano anicco, mano dukkho”ti ca evamādinā vuttā **manos**saddassa pulliṅgabhāvasūcanikā bahū pāliyo dissanti, tasmā **manos**saddo pulliṅgoyevāti sārato paccetabboti. Evaṃ vuttā te niruttarā appaṭibhānā maṅkubhūtā pattakkhandhā adhomukhā pajjhāyissanti.

Idāni **saras**saddādīnaṃ nāmikapadamālā visesato vuccate –

Saro, sarā. Saraṃ, sare. Sarena, sarehi, sarebhi. Sarassa, sarānaṃ. Sarā, sarasmā, saramhā, sarehi, sarebhi. Sarassa, sarānaṃ. Sare, sarasmim, saramhi, saresu. Bho sara, bhavanto sarā.

Ayaṃ **purisan**aye sabbathā pavīṭṭhassa **usus**saddasaravanaakārādisaravācakassa **saras**saddassa nāmikapadamālā.

Ayaṃ pana **purisan**aye ekadesena pavīṭṭhassa **manogaṇa**pakkhikassa rahadavācakassa **saras**saddassa nāmikapadamālā –

Saro, sarā. Saraṃ, saro, sare. Sarasā, sarena, sarehi, sarebhi. Saraso, sarassa, sarānaṃ. Sarā, sarasmā, saramhā, sarehi, sarebhi. Saraso, sarassa, sarānaṃ. Sarasi, sare, sarasmim, saramhi, saresu. Bho sara, bhavanto sarā, bho sarā iti vā.

Vayo, vayā. Vayaṃ, vaye. Vayena, vayehi, vayebhīti **purisan**ayena ñe yyo. Ayaṃ **purisan**aye sabbathā pavīṭṭhassa parihānivācakassa **vayas**saddassa nāmikapadamālā.

Ayaṃ pana **purisan**aye ekadesena pavīṭṭhassa **manogaṇa**pakkhikassa āyukoṭṭhāsavācakassa **vayas**saddassa nāmikapadamālā – vayo, vayā. Vayaṃ, vayo, vaye. Vayasā, vayena, vayehi, vayebhīti **manan**ayena ñeyyo. Tassa ceto paṭissosi, araññe luddagocarō. Cetā haniṃsu vedabbaṃ.

Ceto, cetā. Cetaṃ, cete. Cetena, cetehi, cetebhīti **purisan**ayena ñeyyo. Ayaṃ **purisan**aye sabbathā pavīṭṭhassa paṇṇattivācakassa **cetas**saddassa nāmikapadamālā.

Ayaṃ pana **purisan**aye ekadesena pavīṭṭhassa cittavācakassa **cetas**saddassa nāmikapadamālā – ceto, cetā. Cetaṃ, ceto, cete. Cetasā, cetena, cetehi, cetebhīti **manan**ayena ñeyyo. Yaso kulaputto, yasaṃ kulaputtaṃ, yasena kulaputtanāti ekavacanavasena **purisan**ayena yojetabbā, ekavacanaputhuvacanavasena vā. Evaṃ kānici okārantapadāni **purisan**aye sabbathā pavīṭṭhāni ca honti, ekadesena pavīṭṭhāni cāti iminā nayena sabbapadāni paññācakkhunā upaparikkhitvā viseso veditabbo. Avisesaññuno hi evamādivibhāgaṃ ajānantā yaṃ vā taṃ vā byañjanaṃ ropentā yathādhīpettaṃ atthaṃ virādhenti, tasmā yo ettha amhehi pakāsito vibhāgo, so saddhāsampannehi kulaputtehi sakkaccamuggahetabbo. Katamāni kānici okārantapadāni **purisan**aye ekadesena pavīṭṭhāni ca ekadesena na pavīṭṭhāni ca? **Mano vaco tejos**saddādayo ceva **ayyas**saddo ca, tatra **manas**saddādīnaṃ nāmikapadamālā heṭṭhā vibhāvītā.

**Ayyas**saddassa pana nāmikapadamālāyaṃ “ayyo, ayyā. Ayyaṃ, ayye”ti **purisan**ayena vatvā ālapanaṭṭhāne “bho ayya, bho ayyo”ti dve ekavacanāni, “bhavanto ayyā, bhavanto ayyo”ti dve bahuvacanāni ca vattabbāni. Ettha **ayyo** iti saddo paccattavacanabhāve ekavacanāṃ, ālapanavacanabhāve ekavacanañceva bahuvacanañca. Tatrime payogā “ayyo kira sāgato ambatitthikena nāgena saṅgāmesi, pivatu bhante ayyo sāgato kāpotikaṃ pasanna”nti evamādīni **ayyo**saddassa paccattekavacanappayogāni, “atha kho sā itthi taṃ purisaṃ etadavoca ‘nāyyo so bhikkhu maṃ nippātesī, apica ahameva tena bhikkhunā gacchāmi, akārako so bhikkhu, gaccha khamāpehī’ti” evamādīni **ayyo**saddassa ālapanekavacanappayogāni, “etha’yyo rājavasatiṃ, nisīditvā suṇātha me. Etha mayaṃ ayyo samaṇesu sakyaputtiyesu pabbajissāmā”ti evamādīni **ayyo**saddassa ālapanabahuvacanappayogāni. Bhavati catra –

**Ayyo** iti ayaṃ saddo, paccattekavaco bhavē;



Ālapanē bahuvaco, bhavē ekavacopi ca –

Evam kānici okārantapadāni **purisanaye** ekadesena pavittāni ca honti ekadesena na pavittāni ca.

Katamāni kānici okārantapadāni **purisanaye** sabbathā appavittāni? Gosaddoyeva. Gosaddassa hi ayam nāmikapadamālā –

Go, gāvo, gavo. Gāvum, gāvaṃ, gavaṃ, gāvo, gavo. Gāvena, gavena, gohi, gobhi. Gāvassa, gavassa, gavaṃ, gunnaṃ, gonaṃ. Gāvā, gāvasmā, gāvamhā, gavā, gavasmā, gavamhā, gohi, gobhi. Gāvassa, gavassa, gavaṃ, gunnaṃ, gonaṃ. Gāve, gāvasmim, gāvamhi, gave, gavasmim, gavamhi, gāvesu, gavesu, gosu. Bho go, bhavanto gāvo, gavo. Ayam **purisanaye** sabbathā appavittāni **gosaddassa** nāmikapadamālā.

Nanu ca bho **gosaddo** attanā sambhūtagoṇasaddamālāvasena **purisanaye** ekadesena pavittāni ceva ekadesena na pavittāni cāti? Saccaṃ. **Goṇasaddo** **gosaddavasena** sambhūtopi “vatticchānupubbikā saddapaṭipattī”ti vacanato **gosaddato** visum amhehi gahetvā **purisanaye** pakkhitto. Tassa hi visum gahaṇe yutti dissati syādīsu ekākāreṇeva tiṭṭhanato, tasmā **gosaddato** sambhūtampi **goṇasaddam** anapekkhitvā suddham **gosaddameva** gahetvā **purisanaye** sabbathā **gosaddassa** pavittāni vuttā.

Nanu ca bho paccattavacanabhūto **goiti** saddo **purisoti** saddena sadisattā **purisanaye** ekadesena pavittāni? Tanna, **gosaddo** hi niccamokāranto, na **purisasaddādayo** viya paṭhamam akārantabhāve ṭhatvā pacchā paṭiladdhokārantaṭṭho. Teneva hi paccattavacanattānēpi ālapanavacanattānēpi **goiceva** tiṭṭhati. Yadi paccattavacanattam paṭicca **gosaddassa** **purisanaye** ekadesena pavittāni icchitabbā, “kānici okārantapadāni”ti evam vuttā okārantakathā kamattham dīpeyya, nipphalāva sā kathā siyā, tasmā amhehi yathāvutto nayoyeva āyasmantehi manasi kātabbo. Evam **gosaddassa** **purisanaye** sabbathā pavittāni datṭhabbā.

Kecettha evam puccheyyum “**gosaddassa** tāva ‘go, gāvo, gavo. Gāvum, gāvaṃ, gavaṃ’ iccādinā nayena **purisanaye** sabbathā pavittāni amhehi nātā, **jaraggava puṅgavādisaddā** pana kutra naye pavittāni”ti? Tesam evam byākātabbam “**jaraggava puṅgavādisaddā** sabbathāpi **purisanaye** pavittāni”ti. Tathā hi tesam **gosaddato** ayam viseso, jaranto ca so go cāti jaraggavo. Ettha **nakāralopo takārassa** ca **gakārattam** bhavati samāsapadattā, samāse ca **simhi** pare **gosaddassokārassa** **avādeso** labbhati, tasmā pāliyam “visāṇena jaraggavo”ti ekavacanarūpam dissati. Tathā hi aññattha anupapadattā **gavoiti** bahuvacanapadamāyeva dissati. Idha pana sopapadattā samāsapadabhāvamāgamma “jaraggavo”ti ekavacanapadamāyeva dissati. Tathā hi jaraggavoti ettha jarantā ca te gavo cāti evam bahuvacanavasena nibbanīyatā na labbhati lokasaṅketavasena ekasmim atthe nirūḥattāti. “Jaraggavo, jaraggavā. Jaraggavaṃ, jaraggave. Jaraggavenā”ti **purisanayena** nāmikapadamālā yojetabbā. Esa nayo **puṅgavo sakyapuṅgavoti**ādīsupi.

Tatra **puṅgavoti** gunnaṃ yūthapati nisabhasaṅkhāto usabho. Yo pāliyam “muhuttajātova yathā gavaṃpati, samehi pādehi phusī vasundhara”nti ca “gavañce taramānaṃ, ujum gacchati puṅgavo”ti ca āgato. Idisesu pana ṭhānesu keci “pumā ca so go cāti puṅgavo”ti vacanattam bhaṇanti. Mayaṃ pana padhāne nirūḥo ayam saddoti vacanattam na bhaṇāma. Na hi **puṅkokiloti**ādīdisaddānaṃ kokilādīnaṃ pumbhāvappakāsanamate samatthā viya imassa pumbhāvappakāsanamate samatthā sambhavati, atha kho padhānabhāvappakāsanā ca samatthā sambhavati. Tena “sakyapuṅgavo”tiādīsu nisabhasaṅkhāto puṅgavo viyāti puṅgavo, sakyānaṃ, sakyesu vā puṅgavo sakyapuṅgavotiādīnaṃ samāsapadatto gahetabbo. Atha vā uttarapadatte ṭhitānaṃ **sihabyagghanāgādisaddānaṃ** seṭṭhavācakattā “sakyapuṅgavo”tiādīnaṃ “sakyasetṭho”tiādīnaṃ attho gahetabbo. Iti sabbathāpi **purisanaye** pavattanato **jaraggava puṅgavādisaddānaṃ** **gosaddassa** padamālato visadisapadamālatā vavattapetabbā. **Gosaddassa** pana **purisanaye** sabbathā pavittāni ca vavattapetabbā.

Āpasadde ācariyānaṃ liṅgavacanavasena matibhedo vijjati, tasmā taṃmatena tassa **purisanaye**

sabbathā appaviṭṭhatā bhavati. “Āṅguttarāpesū”ti **pāḷiyā aṭṭhakathāyaṃ** “mahiyā pana nadiyā uttarena āpo”ti vuttaṃ, **ṭikāyaṃ** pana taṃ ulliṅgitvā “mahiyā nadiyā āpo tassa janapadassa uttarena honti, tāsāṃ avidūratā so janapado uttarāpo”ti vuttaṃ. Evaṃ **āpasaddassa** ekantena itthiliṅgatā bahuvacanaṭṭhā ca ācariyehi icchitā, tesāṃ mate **āpo**iti itthiliṅge paṭṭhamābahuvacanaṭṭhā honte dutiyātiyāpañcamīsattamīnaṃ bahuvacanaṭṭhāni kīdisāni siyūṃ. Tathā hi “purise, purisehi purisebhi purisesū”ti rūpavato pulliṅgassa viya **okārantitthiliṅgassa** ekāraehi kārādiyuttāni rūpāni katthacipi na dissanti. Ato tesāṃ mate padamālānayo atīva dukkaro.

**Āpasaddassa** garavo, saddasatthanayaṃ pati;  
Bahuvacanaṭṭhāni-ṅgabhāvaṇca abravuṃ.

**Iccāpasaddassa** itthiliṅgabahuvacanaṭṭhā veyyākaraṇānaṃ matāṃ nissāya anumatāti veditabbā. **Aṭṭhasālīniyaṃ** pana **āpo** iti saddassa napuṃsakaliṅgekavacanaṭṭhā vutto payogo diṭṭho “omattaṃ pana āpo adhimattapathavīgatikaṃ jāta”nti. **Jātakapāḷiyaṃ** tu tassekavacanaṭṭhā diṭṭhā. Tathā hi “suciṃ sugandhaṃ salilaṃ, āpo tatthābhisandati”ti. Imasmiṃ padese **āpo** iti saddo ekavacanaṭṭhāne ṭhito diṭṭho. Kecettha vadeyyuṃ “āpoti saṅkhaṃ gataṃ salilaṃ suci sugandhaṃ hutvā tattha abhisandatiṭi **salilaṃ**saddavasena ekavacanaṭṭhāyo kato, na nāmasaddavasena. Āpasaddo hi ekantenitthiliṅgo ceva bahuvacanaṭṭhā ca. Tathā hi “āpo tatthābhisandati”ti bahuvacanaṭṭhāya tappayogo vattabbopi chandānurakkhaṇatthaṃ vacanaṭṭhāya niddiṭṭho”ti. Tanna, “āpo tatthābhisandati”ti vattuṃ sakkuṇeyyattā “tāni aṅga padissare”ti bahuvacanaṭṭhāya viya. Yasmā evaṃ na vuttaṃ, yasmā ca pana pāḷiyaṃ “āpo labbhati, tejo labbhati, vāyo labbhati”ti ekavacanaṭṭhāyo dissati, tasmā “āpo”ti saddassa ekavacanaṭṭhā paccakkhato diṭṭhāti.

Athāpi ce vadeyyuṃ – nanu pāḷiyaṃeva tassa bahuvacanaṭṭhā paccakkhato diṭṭhā “āpo ca devā pathavī ca, tejo vāyo tadāgamu”nti? Tampi na. Ettha hi “devā”ti saddaṃ apekkhitvā “āgamu”nti bahuvacanaṭṭhāyo kato, na “āpo”ti saddaṃ. Yadi “āpo”ti saddaṃ sandhāya bahuvacanaṭṭhāyo kato siyā, “pathavī”ti “tejo”ti “vāyo”ti ca saddampi sandhāya bahuvacanaṭṭhāyo kato siyā. Evaṃ sante **pathavī tejo vāyosaddāpi** bahuvacanaṭṭhāyaṃ, na pana āpajjanti. Na hete bahuvacanaṭṭhā, atha kho ekavacanaṭṭhā eva. Rūḷhivasena te pavattā pakatiāpādīsu atthesu appavattanato. Tathā hi āpokasiṅgādiṅgu parikkamaṃ katvā nibbattā devā āramaṇavasena “āpo”tiādināmaṃ labhanti. Evaṃ vuttāpi te evaṃ vadeyyuṃ “nanu ca bho ‘āṅguttarāpesū’ti bahuvacanaṭṭhāyo dissati”ti? Te vattabbā – asampathamavatiṅṅā tumhe, na hi tumhe saddappavattiṃ jānātha, “āṅguttarāpesū”ti bahuvacanaṭṭhāyo pana “kurūsu aṅgesu aṅgānaṃ magadhāna”ntiādināni bahuvacanaṭṭhāni viya rūḷhivasena ekassāpi janapadassa vuttaṃ, na āpasāṅkhātaṃ atthaṃ sandhāya. “Āṅguttarāpesū”ti ettha hi āpasāṅkhāto attho upasajjanībhūto, pulliṅgabahuvacanaṭṭhāyo vutto janapadasāṅkhāto attho eva padhāno “āgatasamaṇo saṅghārāmo”ti ettha samaṇasāṅkhātaṃ atthaṃ upasajjanakaṃ katvā pavattassa **āgatasamaṇasaddassa** saṅghārāmasāṅkhāto attho viya, tasmā āpasāṅkhātaṃ atthaṃ gahetvā yo āṅguttarāpo nāma janapado, tasmīṃ āṅguttarāpesu janapadeti attho veditabbo. Tathā hi “āṅguttarāpesu viharati āpaṇaṃ nāma aṅgānaṃ nigamo”ti pāḷi dissati. Tattha uttarena mahāmahiya nadiyā āpo yesaṃ te uttarāpā, aṅgā ca te uttarāpā cāti āṅguttarāpā, tesu āṅguttarāpesu. Evaṃ ekasmiṃ janapadeyeva bahuvacanaṭṭhāyo na āpasāṅkhāte atthe, tena **aṭṭhakathāyaṃ** vuttaṃ “tasmīṃ āṅguttarāpesu janapade”ti. Evaṃ vuttā te niruttarā bhavissanti.

Tathāpi ye evaṃ vadanti “**āpasaddo** itthiliṅgo ceva bahuvacanaṭṭhā”ti. Te pucchitabbā “kiṃ paṭicca tumhe āyasmanto **āpasaddo** itthiliṅgo ceva bahuvacanaṭṭhā ca”ti vadathā”ti? Te evaṃ puṭṭhā evaṃ vadeyyuṃ – “āṅgāyeva so janapado, mahiyā pana nadiyā uttarena āpo, tāsāṃ avidūratā uttarāpoti vuccati”ti ca “mahiyā pana nadiyā āpo tassa janapadassa uttarena honti, tāsāṃ avidūratā so janapado uttarāpoti vuccati”ti ca evaṃ pubbācariyehi abhisāṅkhato saddaracanaṭṭhāyo dissati, tasmā itthiliṅgo ceva bahuvacanaṭṭhāyo ca”ti vadāmāti. Saccāṃ dissati, so pana saddasatthe veyyākaraṇānaṃ matāṃ gahetvā abhisāṅkhato, saddasatthaṇca nāma na sabbathā buddhavadanassopakāraṃ, ekadesena pana hoti, tasmā kaccāyanappakaraṇe icchitānicchitasaṅgahavivajjanaṃ kātuṃ “jinavacanaṭṭhāni, ṅgāṇca nippajjate”ti lakkhaṇāni vuttāni.

Yadi ca **āpasaddo** itthilingabahuvacanako, katham **āpoti** padaṃ sijjhatīti? **Āpasaddato** paṭhamāyovacanam katvā **tassokārādesaṇca** katvā **āpoti** padaṃ sijjhati “gāvo”ti padamivāti. Visamamidaṃ nidassanaṃ, “gāvo”ti padañhi **niccokāranta** **gosaddena** sambhūtaṃ. Tathā hi **yomhi** pare **gosaddantassāvādesaṃ** katvā tato **yonomkārādesaṃ** katvā “gāvo”ti nipphajjati, **āpasadde** pana dve ādesā na santi. Buddhavacanañhi patvā **āpasaddo** **akāranta**tāpakatiko jāto, na aññathāpakatikoti.

Evam vuttāpi te “idameva saccam, nāñña”nti cetasi sannidhāya ādhānaggāhiduppaṭṭhānissaggibhāve, “na vacanapaccanikasātena suvijānaṃ subhāsita”nti evam vuttapaccanikasātabhāve ca ṭhatvā evam vadeyyuṃ “yatheva **gāvōsaddo**, tatheva **āposaddo** kiṃ itthilingo na bhavissati bahuvacanako cā”ti? Tato tesam imāni suttapadāni dassetabbāni. Seyyathidaṃ? “Āpaṃ āpato sañjānāti, āpaṃ āpato saññatvā āpaṃ maññati, āpasmiṃ maññati, āpaṃ meti maññati, āpaṃ abhinandatī”ti evam suttapadāni dassetvā “āpanti idaṃ kataravacana”nti pucchitabbā. Addhā te **āpasaddassa** bahuvacanantabhāvameva icchamānā vakkhanti “dutiyaḥbahuvacana”nti. Te vattabbā “nanu **yovacanam** na suyyatī”ti? Te vadeyyuṃ “**yovacanam** kataamādesattā na suyyatī”ti. Yaṃ yaṃ bhonto icchanti, taṃ taṃ mukhārūḷhaṃ vadanti.

“Āpato”ti idaṃ pana kiṃ bhonto vadantīti? “Āpato”ti idampi “bahuvacanakam **topaccayanta**”nti vadāma **topaccayassa** ekatthe ca bavhatthe ca pavattanato. Iti tumhe bahuvacanakattamyeva icchamānā “**āposaddo** ca **yovacananto**”ti bhaṇatha, “āpato”ti idampi “bahuvacanakam **topaccayanta**”nti bhaṇatha, “āpasmiṃ maññati”ti ettha pana “āpasmi”ntidaṃ kataravacanantaṃ katarādesena sambhūtanti? Addhā te evam puṭṭhā niruttarā bhavissanti. Tathā yesaṃ evaṃ hoti “**āpasaddo** itthilingo ceva bahuvacanako cā”ti, te pucchitabbā “yaṃ ācariyehi veyyākaraṇamatam gahetvā ‘yā āpo’ti ca ‘tāsa’nti ca vuttam, tattha ‘kiṃ tāsa’nti vacane ‘āpāna’nti padaṃ ānetvā attho vattabbo, udāhu āpassā”ti? “Āpāna’nti padamānetvā attho vattabbo”ti ce, evaṇca sati “yā āpā”ti vattabbaṃ “yā kaññā tiṭṭhanti”ti padamiva. Atha “āpā”ti padaṃ nāma natthi, “āpo”ti padaṃyeva bahuvacanakanti ce, evaṃ sati “tāsa”nti etthāpi “āpassā”ti padaṃ ānetvā attho veditabbo. Kasmāti ce? Yasmā “āpo”ti paccattekavacanassa tumhākaṃ matena bahuvacanatte sati “āpassā”ti padampi bahuvacananti katvā **tāsamsaddena** yojetvā vuttam yuttitoti. Evam sati “āpāna”nti padassa abhāveneva bhavitabbaṃ. Yathā pana “puriso, purisā. Purisaṃ, purise”ti ca, “go, gāvo, gavo. Gāvu”nti ca ekavacanabahuvacanāni bhavanti, evam “āpo, āpā. Āpaṃ, āpe”ti ekavacanabahuvacanehi bhavitabbaṃ. Evaṇca sati “**āpasaddo** bahuvacanakoyeva hotī”ti na vattabbaṃ.

Ye evaṃ vadanti, tesam vacanam sadosam duppariharaṇīyam **mūlapariyāyasutte** “āpaṃ maññati āpasmi”nti ekavacanapālīnam dassanato, **visuddhimaggā**dīsu ca “vissandanabhāvena taṃ taṃ ṭhānaṃ āpoti appotīti āpo”tiādīkassa ekavacanavasena vuttanibbacaṇassa dassanato. Yathā pana **pāḷiyam** itthilingepi pariyaṇanno **gosaddo** “tā gāvo tato tato daṇḍena ākoṭeyyā”ti ca “annadā baladā cetā”ti ca ādinā bavhatthadīpakehi itthilingabhūtehi sabbanāmikapadehi ca asabbanāmikapadehi ca samānādhikaraṇabhāvena vutto dissati, na tathā pāḷiyam bavhatthadīpakehi itthilingabhūtehi sabbanāmikapadehi vā asabbanāmikapadehi vā samānādhikaraṇabhāvena vutto **āpasaddo** dissati. Yadi hi **āpasaddo** itthilingo siyā, **kaññasaddato** **āpaccayo** viya **āpasaddato** **āpaccayo** vā siyā, **nadasaddato** viya ca **īpaccayo** vā siyā, ubhayampi natthi, ubhayābhāvato itthilinge vuttam sabbampi vidhānaṃ tattha na labbhati, tena ñāyati “**āpasaddo** anitthilingo”ti. Nanu ca bho **gosaddatopi** **āpaccayo** natthi, tadabhāvato itthilinge vuttavidhānaṃ na labbhati, evaṃ sante kasmā soyeva itthilingo hoti, na panāyam **āpasaddoti**?

Ettha vuccate – **gosaddo** na niyogā itthilingo, atha kho pullīngova. Itthilingabhāve pana tamhā **āpaccaye** ahontepi **īpaccayo** vikappena hoti, aññampi itthilinge vuttavidhānaṃ labbhati. So hi **niccāmokāranta**tāpakatiyaṃ ṭhatvā “go, gāvi”tiādīnā attano itthilingarūpānaṃ nibbattikāraṇabhūto, tena so itthilingo bhavati. **Āpasadde** pana **īpaccayādi** na labbhati. Tena so itthilingoti na vattabbo. Yathā vā **gosaddassa** avisadākāravohāratam paṭicca itthilingabhāvo upapajjati, na tathā **āpasaddassa**. **Āpasaddassa** hi anākularūpakkamattā avisadākāravohāratā na dissati, yāya eso itthilingo siyā. Evam vuttā te niruttarā bhavissanti.

Tathā yesaṃ evaṃ hoti “**āpasaddo** sabbadā itthiliṅgo ceva bahuvacanako cā”ti, te vattabbā – yathā itthiliṅgabhūtassa **kaññāsaddassa** paṭhamam **kaññā**iti rassavasena ṭhapitassa **āpaccayo** param **smiṃ**vacanam sarūpato na tiṭṭhati, **yambhāvena** ca **yābhāvena** ca tiṭṭhati “kaññāyam, kaññāyā”ti, na tathā “itthiliṅga”nti tumhehi gahitassa **āposaddassa** paṭhamam **āpaiti** rassavasena ṭhapitassa param **smiṃ**vacanam **yambhāvena** ca **yābhāvena** ca tiṭṭhati, atha kho sarūpatoyeva tiṭṭhati “āpasmiṃ maññati”ti. Yadi pana **āpasaddo** itthiliṅgo siyā, **smiṃ**vacanam sarūpato na tiṭṭheyya. Yasmā ca **smiṃ**vacanam sarūpato tiṭṭhati, tasmā **āpasaddo** na itthiliṅgo. Na hi caturāsītīdhammakhandhasahassasaṅgahesu anekakoṭṭisatasahassesu pālippadesesu ekasmimpi pālippadese paṭhamam **akārantabhāvena** ṭhapetabbānam itthiliṅgasaddānam parato ṭhitam **smiṃ**vacanam sarūpato tiṭṭhatīti. Evaṃ vuttā te niruttarā bhavissanti.

Keci panettha evaṃ vadeyyum “**āpasaddo** napuṃsakaliṅgo, tathā hi **aṭṭhasāliniyam** ‘omattam pana āpo adhimattapathavīgatikaṃ jāta’nti napuṃsakaliṅgabhāvena taṃsamānādhikaraṇapadāni niddiṭṭhānī”ti? Tanna, **manogaṇe** pavattehi **tama vaca sirasaddādīhi** viya **āpasaddenapi** samānādhikaraṇapadānam katthaci napuṃsakaliṅgabhāvena niddisitabbatā. Pubbācariyānañhi saddaracanāsu “saddhammatejavihatam vilayam khaṇena, veneyyasattahadāyesu tamo payāti”ti ettha “tamo”tipadena samānādhikaraṇam “vihata”nti napuṃsakaliṅgam dissati, tathā “dukkham vaco etasmiṃ vipaccanīkasāte puggaleti dubbaco”ti ettha “vaco”ti padena samānādhikaraṇam “dukkha”nti napuṃsakaliṅgam, “avanatam siro yassa so avanatasiro”ti ettha “siro”ti padena samānādhikaraṇam “avanata”nti napuṃsakaliṅgam, “appam rāgādirajo yesam paññāmaye akkhamhi te apparajakkhā”ti ettha “rajo”ti padena samānādhikaraṇam “appa”nti napuṃsakaliṅgam dissati. Na te ācariyā tehi samānādhikaraṇapadehi **tamavacasirasaddādīnam** napuṃsakaliṅgattaviññāpanattham tathāvidham saddaracanam kubbiṃsu, atha kho “sobhanam mano tassāti sumano”ti ettha viya **manogaṇe** pavattapullīṅgānam payoge napuṃsakaliṅgabhāvenapi samānādhikaraṇapadāni katthaci hontīti dassanattham kubbiṃsu. Yathā ca “vihata”ntiādikā saddaracanā **tamavacasirasaddādīnam** napuṃsakaliṅgattaviññāpanattham na katā, tathā “omatta”nti ca “adhimattapathavīgatikaṃ jāta”nti ca saddaracanāpi **āpasaddassa** napuṃsakaliṅgattaviññāpanattham na katā. Yasmā pana **manogaṇe** pavattehi **manasaddādīhi** ekadesena samānāgatikattā **āpasaddenapi** napuṃsakaliṅgassa samānādhikaraṇatā yujjati, tasmā **aṭṭhasāliniyam** “omattam pana āpo adhimattapathavīgatikaṃ jāta”nti napuṃsakaliṅgassa **āpasaddena** samānādhikaraṇatā katā. Tathāpi **āpasaddo** **manasaddādīhi** ekadesena samānāgatiko samāsapadatte **majjhokārassa** “āpokasiṇam, āpogata”ntiādiṭṭhāyogassa dassanato, tasmā “omatta”ntiādivacanam **āpasaddassa** napuṃsakaliṅgattaviññāpanattham vuttanti na gahetabbam, liṅgavipariyayavasena pana katthaci evampi saddagati hotīti ṇāpanattham vuttanti gahetabbam. “Omatta”ti ca “adhimattapathavīgatiko jāto”ti ca liṅgam parivattetabbam. Yadi hi **āpasaddo** napuṃsakaliṅgo siyā, sanikārāni’ssa paccattopayogarūpāni buddhavacanādīsu vijjeyyum, na tādisāni santi. Kiñci bhiyyo – okārantam nāma napuṃsakaliṅgam katthacipi natthi, niggahītantaikāranta **ukārantavasena** hi tividhāniyeva napuṃsakaliṅgāni. Tena **āpasaddassa** napuṃsakaliṅgatā nupapajjati. Evaṃ vuttā te niruttarā bhavissanti. **Iccokārantavasena** gahitassa **āpasaddassa** itthiliṅgatā ca napuṃsakaliṅgatā ca ekantato natthi, niggahītantavasena pana gahitassa katthaci napuṃsakaliṅgatā siyā “bhante nāgasena samuddo samuddoti vuccati, kena kāraṇena āpam udakam samuddoti vuccati”ti payogadassanato. Ettha paneke vadeyyum “yadi bho okārantavasena gahitassa **āpasaddassa** itthinapuṃsakaliṅgavasena dviliṅgatā natthi, **okāranto āpasaddo** kataraliṅgo”ti? Pulliṅgoti mayam vadāmāti.

Yadi ca bho **āpasaddo** pulliṅgo. Yathā **āpasaddassa** pulliṅgatā paññāyeyya, nijjhānakkhamatā ca bhaveyya, tathā suttaṃ āharathāti. “Āharissāmisuttaṃ, na no suttāharāṇe bhāro atthi”ti evañca pana vatvā tesam imāni suttapadāni dassetabbāni. Seyyathidaṃ? “Āpo upalabbhatīti? Āmantā. Āpassa kattā kāretā upalabbhatīti? Na hevaṃ vattabbe. Atīto āpo atthīti? Āmantā. Tena āpena āpakaraṇīyam karotīti? Na hevaṃ vattabbe. Āpam maññati āpasmiṃ maññati”ti imāni suttapadāni.

Ettha ca “upalabbhatī”tiādinā **āpasaddassa** ekavacanatā siddhā, tāya siddhāya bahuvacanatāpi siddhāyeva. Ekavacanatāyeva hi saddasatthe paṭṭisiddhā, na bahuvacanatā, tena “āpenā”ti iminā pana **āpasaddassa** itthiliṅgabhāvavigamo siddho itthiliṅge **enādesābhāvato**. “Āpassa, āpasmi”nti imināpi itthiliṅgabhāvavigamoyeva itthiliṅge sarūpato **nā smā smiṃ** vacanānamabhāvā. “Atīto”ti

iminā itthilinganapuṃsakalingabhāvavigamo okārantanapuṃsakalingassa abhāvato, okārantassa guṇanāmabhūtassa itthilingassa ca abhāvato.

Apica buddhavacanādīsu “cittāni, rūpānī”tiādīni viya sanikārānaṃ rūpānaṃ adassanato okārantabhāvena gahitassa napuṃsakalingabhāvavigamo atīva pākaṭo. Aparampettha vattabbaṃ – “atīto āpo atthīti? Āmantā”ti ettha “atīto”ti iminā āpasaddassa visadākāravohāratāsūcakena okārantapadena tassa avisadākāravohāratāya ca ubhayamuttākāravohāratāya ca abhāvo siddho. Tassa ca avisadākāravohāratāya abhāve siddhe itthilingabhāvo dūrataro. Ubhayamuttākāravohāratāya ca abhāve siddhe napuṃsakalingabhāvopi dūrataroyeva. Iti na katthacipi okārantabhāvena gahito āpasaddo itthilingo vā napuṃsakalingo vā bhavati. **Milindapañhe** pana niggaḥītantavasena āgato napuṃsakalingoti veditabbo, na cettha vattabbaṃ “atīto”ti “tenā”ti ca imāni liṅgavipallāsavasena vuttānīti vāccalingāmanuvattāpakassa abhidheyyalingabhūtassa āpasaddassa “kaññāya cittānī”tiādīnaṃ viya itthinapuṃsakalingarūpānaṃ abhāvato. Apica vohārakusalā tathāgatā tathāgatasāvaka ca, tehiyeva uttamapurisehi vohārakusalehi “atīto āpo”tiādīnā vuttattāpi “atīto”ti “tenā”ti ca imāni liṅgavipallāsavasena vuttānīti na cintetabbāni, tasmā taṃsamānādhikaraṇo okārantabhāvena gahito āpasaddo ekavacananto pulliṅgo ceva yathāpayogaṃ ekavacanabahuvacanako cāti veditabbo “āpo, āpā. Āpaṃ, āpe”tiādīnā yojetabbattā. Evaṃ vuttāni suttapadāni savinicchayāni sutvā addhā te āpasaddassa itthilingabahuvacanatāvādīno niruttarā bhavissanti.

Ettha koci vadeyya – pāḷiyāṃ pulliṅganayo ekavacananayo ca kiṃ aṭṭhakathāṭīkācariyehi na diṭṭho, ye āpasaddassa itthilingabahuvacanattaṃ vaṇṇesunti? No na diṭṭho, diṭṭhoyeva so nayo tehi. Yasmā pana te na kevalaṃ sātṭhakathe teṭṭhake buddhavacaneyeva visāradā, atha kho sakalepi saddasatthe visāradā, tasmā saddasatthe attano paṇḍiccaṃ pakāsetuṃ, “saddasatthe ca īdiso nayo vutto”ti viññāpetuñca saddasatthanayaṃ gahetvā āpasaddassa itthilingabahuvacanakattaṃ vaṇṇesunti natthi tesāṃ doso. Tathā hi **mūlapariyāyasuttantaṭṭhakathāyaṃ** tehiyeva vuttaṃ āpasaddassa pulliṅgekavacanakattasūcanakaṃ “lakkhaṇasasambhārāmmaṇasammuttivasena catubbidho āpo, tesū”tiādī, tasmā natthi tesāṃ doso. Pūjārahā hi te āyasmanto, namoyeva tesāṃ karoma, na tesāṃ vacanaṃ codanābhājanaṃ. Ye pana ujuvipaccanīkavādā dalhameva āpasaddassa itthilingabahuvacanattaṃ mamāyanti, tesāṃyeva vacanaṃ codanābhājanaṃ. Yasmā pana mayaṃ pāḷinayānusārena antadvayavato āpasaddassa pulliṅgattaṃ napuṃsakalingattañca vidadhāma, tasmā yo koci idaṃ vādaṃ madditvā aññaṃ vādaṃ patiṭṭhāpetuṃ sakkhissatīti netāṃ ṭhānaṃ vijjati, idañca pana ṭhānaṃ mahāgahanaṃ duppaṭivijjhanaṭṭhena, paramasukhumañca kataññaṇasambhārehi paramasukhumaññehi paṇḍitehi vedanīyattā. Sabbamidañhi vacanaṃ tesu tesu ṭhānesu atthabyañjanapariggahaṇe sotūnaṃ paramakosallajananatthañceva sāsane ādaraṃ akatvā saddasatthamaterna kālaṃ vītināmentānaṃ sāthalikānaṃ pamādavihāranisedhanatthañca sāsanaśātimahantabhāvādīpanatthañca vuttaṃ, na attukkamaṇaparavambhanatthanti imissaṃ nītiyaṃ saddhāsampannehi kulaputtehi yogo karaṇīyo bhagavato sāsanaṃ ciraṭṭhitatthaṃ.

Yasmā pana pāḷito aṭṭhakathā balavatī nāma natthi, tasmā pāḷinayānurūpeneva āpasaddassa nāmikapadamālaṃ yojesāma sotūnamasammohatthaṃ, kimettha saddasatthanayo karissati. Atrāyaṃ **udānapāḷi** “kiṃ kayirā udapānena, āpā ce sabbadā siyu”nti.

Āpo, āpā. Āpaṃ, āpe. Āpena, āpehi, āpebhi. Āpassa, āpānaṃ. Āpā, āpasma, āpamhā, āpehi, āpebhi. Āpassa, āpānaṃ. Āpe, āpasmim, āpamhi, āpesu. Bho āpa, bhavanto āpā.

Sabbanāmādīhipi yojesāma – yo āpo, ye āpā. Yaṃ āpaṃ, ye āpe. Yena āpena, sesaṃ neyyaṃ, so āpo, te āpā. Atīto āpo, atītā āpā. Sesaṃ neyyaṃ. Icevaṃ –

Purisenā samā **āpa**-saddādī sabbathā matā;  
Na sabbathāva **gosaddo**, purisenā samo mato.

**Manādī** ekadesena, purisenā samā matā;  
**Sarādī** ekadesena, sabbathā vā samā matā.

Ye panettha saddā “**manogaṇo**”ti vuttā, kathaṃ tesam **manogaṇabhāvo** sallakkhetabboti?  
Vuccate tesam manogaṇabhāvasallakkhaṇakāraṇaṃ –

**Manogaṇo manogaṇā-**  
Dikā **ceṅvā**’**manogaṇo**;  
Iti saddā tidhā ñeyyā,  
Manogaṇavibhāvane.

Ye te **nā sa smiṃ**visaye,  
**Sā so syantā** bhavanti ca;  
Samāsataddhitantatte,  
**Majjhokārā** ca honti hi.

**Sokārantapayogā** ca, kriyāyogamhi dissare;  
Evaṃvidhā ca te saddā, ñeyyā “**manogaṇo**”’iti.

Atra tassatthassa sādhakāni payogāni sāsanaṭo ca lokato ca yathārahaṃāharitvā dassessāma –  
manasā ce pasannena, bhāsati vā karoti vā. Na mayhaṃ manaso piyo. Sādhukaṃ manasi karotha.  
Manopubbaṅgamā dhammā. Manoramam, manodhātu, manomayena kāyena, iddhiyā upasaṅkami.  
Yo ve “dassa”nti vatvāna, adāne kurute mano. Vacasā paricitā. Vacaso vacasi.

Vacorasmīhi bodhesi, veneyyakumudañcidaṃ;  
Rāgo sārāgarahito, visuddho buddhacandimā.

Kassapassa vaco sutvā, alāto etadabravi;  
Esa bhiyyo pasidāmi, sutvāna munino vaco.

Sakhā ca mitto ca mamāsi sīvika, susikkhito sādhu karohi me vaco. Ekūnatimso vayasā  
subhadda. Vayasa, vayasi, vayovuddho, vayoguṇā anupubbaṃ jahanti. Jalantamiva tejasā. Tejaso,  
tejasi, tejodhātukusalo. Tejokasiṇaṃ. Tapasā uttamo, tapaso, tapasi, tapodhano, tapojigucchā. Kasmā  
bhavaṃ vijanamaññanissito, tapo idha krubbasi brahmapattiyā. Cetasā aññāsi, evaṃ cetaso  
parivittakko udapādi, etamatthaṃ cetasi sannidhāya, cetoparivittakamaññāya. Cetopariyaññaṃ, ceto  
paricchindati, so parasattānaṃ parapuggalānaṃ cetasā ceto paricca jānāti. Tamasā, tamaso, tamasi,  
tamonudo, tamoharo. Navāhametaṃ yasasā dadāmi. Yasaso, yasasi, yaso bhogasamappito.  
Yasoladdhākho panasmākaṃ bhogā. Yasodharā devī, yaso laddhā na majjeyya. Ayasāva malaṃ  
samuṭṭhitaṃ. Ayaso, ayasi, ayopākārapariyantaṃ, ayasā paṭikujjitaṃ. Seyyo ayogulo bhutto,  
ayopatto, ayomayaṃ, ayo kantatīti ayokanto. Ghatena vā bhuñjassu payasā vā, sādhu khalu payaso  
pānaṃ yaññadattena, payasi ojā, payodharā, payonidhi. Sahassanetto sirasā paṭiggahi. Siraso, sirasi  
añjaliṃ katvā, vanditabbaṃ isiddhajaṃ. Siroruhā, siro chindati. Yo kāme parivajjeti, sappasseva  
padāsiro. Siro te vajjhayitvāna. Sarasā, saraso, tīṇi uppalaṅgātāni, tasmim sarasi brāhmaṇa. Saroruhā.  
Yaṃ etā upasevanti, chandasāvā dhanenavā. Sāvittī chandaso mukhaṃ. Chandasi, chandoviciti,  
chandobhaṅgo, urasā panudahissāmi, uraso, urasi jāyati, urasilomo, uromajjhe vijjhi. Rahasā, rahaso,  
rahasi, rahogato nisiditvā, evaṃ cintesahaṃ tadā. Ahasā, ahasi. Jāyanti tattha pārōhā,  
ahorattānamaccayeti imāni payogāni. Ettha ca “manena, manassa, mane, manasmim,  
manamhi”’tiādīni ca “manāyatanam tamaparāyano ayapatto chandahāni”’tiādīni ca “na manam  
aññāsi. Yasaṃ laddhāna dummedho. “Siraṃ chindati”’tiādīni ca rūpāni manogaṇabhāvappakāsakāni  
na hontīti na dassitāni, na alabbhamānavasena, tasmātra imā ādīto paṭṭhāya manogaṇabhāvavibhāvinī  
gāthāyo bhavanti –

“Manasā manaso manasi”’  
Itiādivasā ṭhitā;  
**Sā so syantā** saddarūpā,  
Vuttā “**manogaṇo**”’iti.

Manodhātu vacorasmi,

Vayovuddho tapoguno;  
Tejodhātu tamonāso,  
Yasobhogasamappito.

Cetoparivitakko ca, ayopatto payodharā;  
Siroruhā saroruhāṃ, uromajjhe rahogato.

Chandobhaṅgo ahorattaṃ, manomaya' mayomayaṃ;  
Evaṃvidho viseso yo, lakkhaṇantaṃ manogaṇe.

“Vaco sutvā, siro chindi, ayo kantati” iccapi;  
Upayogassa saṃsiddhi, lakkhaṇantaṃ manogaṇe.

Manogaṇe vuttanayo, itthiliṅge na labbhati;  
Punnapuṃsakaliṅgesu, labbhateva yathārahaṃ.

Icevaṃ sabbathāpi –

**Sā so syantāni rūpāni, sandissanti manogaṇe;**  
**Majjhokārantarūpā ca, sokārantūpayogā.**

Idaṃ **manogaṇalakkhaṇaṃ**. Evaṃ **manogaṇalakkhaṇaṃ anākulaṃ niggumbaṃ nijjaṭaṃ samuddiṭṭhaṃ**.

Atha **manogaṇādilakkhaṇaṃ kathayāma** –

Ye te **nā sasmim**visaye,  
**Sā so syantā** yathārahaṃ;  
Samāsataddhitantatte,  
**Majjhokāro** na honti tu.

**Sokārantūpayogā** ca,  
Kriyāyoge na honti te;  
Saddā evaṃvidhā sabbe;  
Manogaṇādikā matā.

Seyyathidaṃ? “Bilaṃ padaṃ mukha” miccādayo. Tesāṃ rūpāni bhavanti – bilasā, bilaso, bilasi, bilagato, bilaṃ pāvisi. Padasāva agamāsi, tīṇi padavārāni, mākāsi mukhasā pāpaṃ, mukhagataṃ bhojanaṃ chaḍḍāpeti. Saccena danto damasā upeto. Rasavaraṃ rasamayaṃ rasaṃ pivīti. Idaṃ **manogaṇādikalakkhaṇaṃ**.

Aparampi bhavati –

Ye samāsādibhāvamhi, **majjhokārāva** honti tu;  
**Nā sa smim**visaye **sāso-syantā** pana na hontihi.

**Sokārantūpayogā** ca,  
Kriyāyoge na honti te;  
Saddā evaṃvidhā cāpi,  
**Manogaṇādikā** matā.

Seyyathidaṃ? “Āpo vāyo sarado” icevamādayo. Tesāṃ rūpāni bhavanti – āpodhātu, vāyodhātu, āpokasiṇaṃ, vāyokasiṇaṃ, āpomayaṃ, vāyomayaṃ, jīva tvaṃ saradosataṃ, saradakālo. Āpena, āpassa, āpe, āpasmim, āpamhi. Vāyena, vāyassa, vāye, vāyasmim, vāyamhi. Saradena,

saradassa, sarade, saradasmim, saradamhi. Āpaṃ āpato sañjānāti. Vāyaṃ vāyato sañjānāti. Saradaṃ pattheti, saradaṃ ramaṇīyā nadī.

Keci panettha vadeyyuṃ ‘‘nanu sāsane **vāyasaddo** viya **vāyusaddopi manogaṇādīsu** icchitabbo’’ti? Ettha vuccate –

‘‘**Vāyu** vāyo’’ti etesu, pacchimoyeva icchito;  
**Manogaṇādīsu** nādi, ādiggaḥavasēnidha.

‘‘Manodhātu vāyodhātu’’, iccādīni padāni hi;  
**Akāranta**vaseneva, **majjhokārāni** sijjhare.

**Vāyusaddamhi** gahite, ādiggaḥavasēnidha;  
‘‘Vāyodhātū’’ti **omajjhaṃ**, rūpameva na hessati.

Yathā hi **āyusaddassa**, rūpaṃ dissati **sāgamaṃ**;  
‘‘Āyusā ekaputta’’nti, **manasādipadaṃ** viya.

Na tathā **vāyusaddassa**, rūpaṃ dissati **sāgamaṃ**;  
Tasmā **manogaṇādīmhi**, tasso’kāso na vijjati.

Tathā hi ‘‘vāyati iti, vāyo’’ iti garū vaduṃ;  
‘‘Vāyodhātū’’ti etassa, padassatthaṃ tahiṃ tahiṃ.

Yattha pathavī ca āpo ca, tejo vāyo na gādhati;  
Ettha āpādikaṃ sadda-ttikāṃ **manogaṇādike**.

Idampi **manogaṇādikalakkhaṇaṃ**. Ettha **manogaṇādikā** dvidhā bhijjanti **bila padādito āpādito** ca. Evaṃ **manogaṇādikalakkhaṇaṃ** anākulaṃ niggumbaṃ nijjaṭaṃ samuddiṭṭhaṃ.

Atha **amanogaṇalakkhaṇaṃ** kathayāma –

Ye ca **nāvisaye** **sontā**, ye ca **smāvisaye** siyuṃ;  
Saddā evaṃpakārā te, **amanogaṇasaññitā**.

Ke te? **Atthabyañjanakkharasaddā**yo ceva **dīghorasaddā** ca. Etesu hi **atthasaddādīnaṃ** **nāvacaṇaṭṭhāne** ‘‘atthaso byañjanaso akkharaso suttaso upāyaso sabbaso ṭhānaso’’tiādīni **sontāni** rūpāni bhavanti. **Dīghorasaddānaṃ** pana **smāvacaṇaṭṭhāne** ‘‘dīghaso oraso’’ti **sontāni** rūpāni bhavanti. Idaṃ **amanogaṇalakkhaṇaṃ**.

Aparampi bhavati –

Sabbathā vinimuttā ye, **sā so** syantādibhāvato;  
Evaṃvidhāpi te saddā, **amanogaṇasaññitā**.

Ke te? ‘‘Puriso kaññā citta’’miccādayo. Idampi **amanogaṇalakkhaṇaṃ**. Evaṃ **amanogaṇalakkhaṇaṃ** anākulaṃ niggumbaṃ nijjaṭaṃ samuddiṭṭhaṃ.

Evaṃ dassitesu **manogaṇalakkhaṇādīsu** koci vadeyya ‘‘yadidaṃ tumhehi vuttaṃ ‘ye samāsādibhāvamhi, **majjhokārāva** honti tū’tiādīnā **manogaṇādikalakkhaṇaṃ**, tena ‘‘parosataṃ gomayaṃ godhano’’iccādīsu **goparasaddā**dayopi **manogaṇādikabhāvaṃ** āpajjantīti? Nāpajjanti. Kasmāti ce? Yasmā –

Ettha **manogaṇādīnaṃ**, antassottaṃ paṭiccidaṃ;



“**Majjhokārā**”ti vacanaṃ, vuttaṃ na tvāgamādikaṃ.

“Parosataṃ gomaya”nti-ādīsu **amanogaṇo**;  
Pubbabhūtaṃ padaṃ **ossā-gamattā**’niccatāya ca.

Tasmā nāpajjanti. Iti sabbathāpi **amanogaṇalakkhaṇaṃ** nissesato dassitaṃ. Icevaṃ **manogaṇavibhāvanāyaṃ manogaṇo manogaṇādiko amanogaṇo** cāti tidhā bhedo veditabbo.

Tattha **manogaṇe** pariyāpannasaddānaṃ samāsaṃ patvā “abyaggamanaso naro, thiracetasaṃ kulaṃ, saddheyyavacasā upāsikātiādīnā lingattayavasena aññathāpi rūpāni bhavanti. Ettha pana keci evaṃ vadanti “yadā **manasaddo** sakatthe avattitvā ‘abyaggo mano yassa soyaṃ abyaggamanaso, alīno mano yassa soyaṃ alīnamanaso’ti evaṃ aññatthe vattati, tadā **purisanayeneva** nāmikapadamālā labbhati, na **manogaṇanayenā**”ti. Taṃ na gahetabbaṃ ubhinnaṃpi yathārahaṃ labbhanato. Tathā hi **visuddhimagge** puggalāpekkhanavasena “khantisoraccamettādi-guṇabhūsitacetaso. Ajjhesanaṃ gahetvānā”ti ettha **manogaṇanayo** dissati. **Taṭṭikāyampi** “ajjhesito dāṭṭhānāga-ttherena thiracetasā”ti **manogaṇanayo** dissati, tasmā tesam vacanaṃ na gahetabbaṃ. Evaṃ vadantā ca te **abyaggamanasaddādīnaṃ abyaggamanasaiccādīnā sakārantaapakatibhāvena** ṭhapetabbhāvaṃ vibbhantamativasena cintetvā sabbāsu vibhattīsu, dvīsu ca vacanesu **purisanayena** yojetabbataṃ maññanti. Evañca sati “guṇabhūsitacetaso, thiracetasā”ti chaṭṭhīcatutthitīyārūpāni nasyiṃ, aññāniyeva anabhimatāni rūpāni siyuṃ. Yasmā siyuṃ, tasmā evaṃ aggaṭṭhāyaṃ viṣeso gahetabbo.

Yattha hi samāsavasena **manasaddo cetasaddādayo** ca sakatthe avattitvā aññatthe vattanti, tattha **sakārāgamānaṃ padānaṃ nāmikapadamālā purisanayena** ca **manogaṇe mananayena** ca yathārahaṃ labbhati. **Nissakārāgamānaṃ pana purisanayeneva** labbhati. Yattha pana samāsavisaṃyeyeva **manādisaddā** sakatthe vattanti, tattha **nissakārāgamānaṃ nāmikapadamālā purisanayena** ca **manogaṇe mananayena** ca labbhati.

Idāni imassatthassa āvibhāvattaṃ, saddagatīsu ca viññūnaṃ kosalluppādanattaṃ yathāvuttānaṃ padānaṃ padamālā tidhā katvā dassayissāma – “byāsatto mano yassa soyaṃ byāsattamanaso naro”ti evamaccantaṃ puggalāpekkhakassa imassa padassa –

Byāsattamanaso naro, byāsattamanasā narā. Byāsattamanasaṃ naraṃ, byāsattamanase nare. Byāsattamanasā, byāsattamanena narena, byāsattamanehi, byāsattamanebhi narehi. Byāsattamanaso, byāsattamanassa narassa, byāsattamanānaṃ narānaṃ. Byāsattamanā, byāsattamanasmā, byāsattamanamhā narā, byāsattamanehi, byāsattamanebhi narehi. Byāsattamanaso, byāsattamanassa narassa, byāsattamanānaṃ narānaṃ. Byāsattamanasi, byāsattamane, byāsattamanasmim, byāsattamanamhi nare, byāsattamanesu naresu. Bho byāsattamanasa nara, bhavanto byāsattamanasā narāti nāmikapadamālā bhavati.

Evaṃ **sakārāgamassa** labbhamānālabbhamānatā vavatthapetabbā. Ettha hi paṭhamādutiyāvibhattīnaṃ ekavacana bahuvacanaṭṭhāne ca tatiyācatutthīchaṭṭhīsattamīnaṃ ekavacanaṭṭhāne ca yathārahaṃ **sāgamo** bhavati ādesasaravibhattisaraparattā. Ayañca nayo sukhumo sādhukaṃ manasi kātabbo.

Aparo nayo – “byāsatto mano yassa soyaṃ byāsattamano”ti evampi puggalāpekkhakassa imassa padassa “byāsattamano naro, byāsattamanā narā. Byāsattamanaṃ nara”ntiādīnā **purisanayeneva** nāmikapadamālā bhavati. Ettha pana sabbathāpi **sāgamo** natthi. Aparopi nayo – “byāsatto ca so mano cāti byāsattamano”ti evaṃ cittāpekkhakassapi imassa padassa “byāsattamano, byāsattamanā. Byāsattamanaṃ, byāsattamane. Byāsattamanasā, byāsattamanenā”tiādīnā **manogaṇe mananayena** nāmikapadamālā bhavati, ettha pana tatiyācatutthīchaṭṭhīsattamīnaṃ ekavacanaṭṭhāneyeva **sāgamo** bhavati ādesasaraparattā. Yathā ca ettha, evaṃ “alīnamanaso naro”tiādīsipi ayaṃ tividho nayo veditabbo.

Napumsakaliṅge pana vattabbe “byāsattamanasaṃ kulaṃ, byāsattamanāni kulāni. Byāsattamanasaṃ kulaṃ, byāsattamanāni kulāni. Byāsattamanasā kulenā” tiādinā nāmikapadamālā yojetabbā. Ettha pana paṭhamādutiyātiyācatutthīchaṭṭhīsattamīnaṃ ekavacanaṭṭhāneyeva yathārahaṃ sāgamo bhavati ādesasaravibhattisaparattā, ayampi nayo sukhumo sādhuṃkaṃ manasi kātabbo.

Itthiliṅge pana vattabbe “byāsattamanasā itthī” ti evaṃ paṭhamekavacanaṭṭhāneyeva sāgamaṃ vatvā tato “byāsattamanā, byāsattamanāyo itthīyo. Byāsattamanaṃ itthī” nti **kaññā** nayena yojetabbā. “Evaṃ saddheyyavacasaṃ upāsikā, saddheyyavacāyo upāsikāyo. Saddheyyavacaṃ upāsika” ntiādināpi. “Byāsattamanaṃ kulaṃ, byāsattamanā itthī” tiādinā pana **cittakaññā** nayena yojetabbā. Ettha pana sabbathāpi sāgamo natthi.

Sotūnaṃ ñāṇappahedajananatthaṃ aparāpi nāmikapadamālāyo dassayissāma sahanibbacanena – mano eva mānasaṃ, samussāhitamānasaṃ yassa soyaṃ samussāhitamānaso. “Samussāhitamānaso, samussāhitamānasā. Samussāhitamānasaṃ, samussāhitamānase. Samussāhitamānase” ti **purisan** nayena yojetabbā. Sundaṛā medhā assa atthīti sumedhaso. “Sumedhaso, sumedhasā. Sumedhasaṃ, sumedhase. Sumedhasenā” ti **purisan** nayena, evaṃ “bhūrimedhaso” tiādināpi. Tatrime payogā –

“Yaṃ vadanti sumedhoti, bhūripaññaṃ sumedhasaṃ;  
Kiṃ nu tamhā vippavasi, muhuttamaṃ piṅgiya;  
Gotamā bhūripaññaṃ, gotamā bhūrimedhasā.

Nāhaṃ tamhā vippavasāmi, muhuttamaṃ brāhmaṇa;  
Gotamā bhūripaññaṃ, gotamā bhūrimedhasā” ti.

Itthiliṅge vattabbe “samussāhitamānasā sumedhasā” ti rūpāni, napumsake vattabbe “samussāhitamānasaṃ sumedhasa” nti rūpāni, **kaññā citta** nayena etesaṃ padamālā yojetabbā. Okārantapullīṅgaṭṭhāne itthiliṅgādivinichchayo nayappakāsanatthaṃ kato. Viseso hi okārantakathāyeva idhādhippetā. Apica loke nīti nāma nānappakārehi kathitā eva sobhati, ayañca sāsane nīti, tasmā nānappakārehi kathitāti.

Sabbāni nayato evaṃ, okārantapadānime;  
Pullīṅgāni pavuttāni, sāsantatthaṃ mahesino.

Viseso tesu kesañci, pāliyaṃ yo padissati;  
Paccattavacanaṭṭhāne, pakāsessāmi taṃ dhunā.

“Vanappagumbe yatha phussitagge”, itiādinayena hi;  
Kattacodantapullīṅga-rūpāni aññathā siyuṃ.

Paccattavacanicceva, tañca rūpaṃ pakāsaye;  
“Paccatte bhummaniddeso”, iti bhāsanti kecana.

Tatra kānici suttapadāni dassessāma – natthi attakāre, natthi parakāre, natthi purisakāre, pariyantakate saṃsāre, jīve sattame, na hevaṃ vattabbe, bāle ca paṇḍite ca sandhāvitvā saṃsaritvā dukkhassantaṃ karissantīti. Imāni ekavacana bahuvacana vasena dvidhā gahetabbāni. Paccattekavacana bahuvacanañca ekārādeso veditabbo.

Ye pana “vanappagumbeti paccattavacana ssa bhumavacana niddeso” ti vadanti, te vattabbā “yadi vanappagumbeti paccattavacana ssa bhumavacana niddeso, evañca sati ‘thāliyaṃ odanaṃ pacatī’ ti ettha viya ādhārasutisambhavato ‘gimhāna māse paṭhamasmiṃ gimhe’ ti idaṃ kataratthaṃ jotetī’ ti? Te vadeyyuṃ “na mayaṃ bho ‘vanappagumbeti idaṃ bhumavacana’ nti vadāma, atha kho ‘paccattavacana ssa bhumavacana niddeso’ ti vadāmā” ti. Evampi dosoyeva tumhākaṃ, nanu

“saṅghe gotami dehī”ti etthāpi sampadānavacanassa bhummavacananiddesoti vuttepi saṅghassa dānakriyāya ādhārabhāvato “saṅghe”ti vacanaṃ suṇantānaṃ ādhārasuti ca ādhāraparikappo ca hotiyeva. Na hi sakkā evaṃ pavattaṃ cittaṃ nivāretuṃ, tasmā ettha evaṃ pana vīseso gahetabbo “paccattavacanassapi katthaci bhummavacanaṃ viya rūpaṃ hotī”ti. Evañhi gahite na koci virodho. Idisesu hi thānesu niruttippabhedakusalo lokānukampako bhagavā paccattavacanasena niddisitabbe sati evaṃ aniddisitivā lokassa sammohamuppādayanto viya kathaṃ bhummavacananiddesaṃ karissati, tasmā saddasāmaññaññalesamattaṃ gahetvā “bhummavacananiddeso”ti na vattabbaṃ. Yadi saddasāmaññaṃ gahetvā bhummavacananiddesaṃ icchatha, “paccattekavacanassa upayogabahuvacananiddeso”tipi icchitabbaṃ siyā.

Apica tatheva “attakāre”ti paccattavacanassa bhummavacananiddese sati ādhārasutisambhavato “attakārasmiṃ kiñci vatthu natthī”ti anadhippeto attho siyā, na pana “attakāro natthī”ti adhippeto attho. “Upayogabahuvacananiddeso”ti gahaṇepi upayogattassa **natthis**saddena avattabbattā dosoyeva siyā, **atthis**saddādināṃ viya pana **natthis**saddassapi paṭhamāya yogato “attakāre”ti idaṃ paccattavacanamevāti viññāyati. “Bāle ca paṇḍite ca sandhāvitvā saṃsaritvā dukkhassantaṃ karissanti”ti etthāpi paccattavacanassa “bhummavacananiddeso”ti vā “upayogavacananiddeso”ti vā gahaṇe sati “bālā ca paṇḍitā cā”ti ettakampi vattuṃ ajānanadoso siyā, “karissanti”ti padayogato pana “bāle cā”tiādi paccattavacanamevāti viññāyati. Yathā pana niggaḥītagamavasenuccārite “cakkhuṃ udapādī”ti pade paccattavacanassa “cakkhuṃ me dehi yācito”ti ettha upayogavacanena sutivasena samānattepi paccattavacanathoyeva sotāre paṭibhāti “udapādī”tiākhyātena kathitattā, na pana vibhattivipallāsattabhūto upayogavacanatho “udapādī”tiākhyātena avacanīyattā, “cakkhuṃ udapādī”ti hi bhagavatā vuttakāle ko “cakkhuṃ udapādī”ti padaṃ parivattitvā atthamācikkhati, tathā “bāle paṇḍite”tiādīnampi paccattavacanaṃ aparehi “bāle paṇḍite”tiādīhi bhummopayogavacanehi sutivasena samānattepi paccattavacanathoyeva sotāre paṭibhāti, na itaravacanatho yathāpayogaṃ atthassa gahetabbattā. Iti “vanappagumbe, bāle, paṇḍite”tiādīnaṃ suddhapaccattavacanaññañeva sārato paccetabbaṃ, na sutisāmaññañena bhummopayogavacanattaṃ.

Yaṃ pañācariyena **jātakatṭhakathāyaṃ** –

“Tayo giriṃ tiantaraṃ kāmāyāmi,  
Pañcālā kuruyo kekake ca;  
Tatuttariṃ brāhmaṇa kāmāyāmi,  
Tikiccha maṃ brāhmaṇa kāmanīta”nti –

Imassa **kāmanīta**jātakassa saṃvaṇṇanāyaṃ “kekake cāti paccatte upayogavacanaṃ, tena kekakassa raṭṭhaṃ dassetī”ti vuttaṃ. Evaṃ vadanto ca so “purise passati, purise patiṭṭhita”nti, “passāmi loke sadhane manusse”ti ca ādīsu yebhuyyena “purise, loke, sadhane, manusse”tiādīnaṃ upayogabahuvacanabhummekavacanabhāvena āgatattā paccattekavacanabahuvacanabhāvassa pana apākaṭattā yebhuyyappavattiṃ sandhāya “idampi tādisamevā”ti maññaṃ vadaṃ vadaṃ maññaṃ. Ācariyā hi katthaci attano ruciyaṃ viya viya kathenti. Ayaṃ pana amhākaṃ ruci – “kekake”ti idaṃ paccattavacanameva “pañcālā, kuruyo”ti saḥajātapadāni viya, raṭṭhavācakatā pana “kuruyo”ti padamiva bahuvacanasena vuttaṃ. Na hi bhagavā “khattiyo, brāhmaṇo, vesso”tiādīsu viya samānavibhattīhi niddisitabbesu saḥajātapadesu pacchimaṃ upayogavacanasena niddiseyya, yutti ca na dissati “pañcālā”ti, “kuruyo”ti paccattavacanaṃ vatvā “kekake”ti upayogavacanassa vacane, tasmā “kekake”ti idaṃ paccattavacanameva. Tathā hi **sandhivisodhana**vidhāyako ācariyo tādisānaṃ padānaṃ paccattavacanaññañeva vibhāvento sāmāṃ kate pakaraṇe “vanappagumbo vanappagumbe, sukhaṃ dukkhaṃ jīvo, sukhe dukkhe jīve”ti āha, **ṭikāya**mpi ca tesāṃ paccattavacanaññañeva vibhāvento “vanappagumbo, sukhaṃ, dukkhaṃ, jīvo”ti sādhanīyaṃ rūpaṃ patiṭṭhapetvā niggaḥītalopavasena **akārokarāna**ñca ekārādesavasena “vanappagumbe, sukhe, dukkhe, jīve”ti rūpanipphattimāha. Sā pālinayānu kūlā. **Kaccāyanā**cariyenapi pālinayaṃ nissāya “dvipade tulyādihikaraṇe”ti paccattabahuvacanaṃ padaṃ vuttaṃ. Tenāha vuttīyaṃ “dve padāni tulyādihikaraṇāni”ti. “Dvipade tulyādihikaraṇe”ti ca idaṃ “atṭha nāgāvāsasatāni”ti vattabbe “atṭha nāgāvāsasate”ti padamiva vuccatīti daṭṭhabbaṃ.

Keci pana tesam bhummekavacanattam icchanti. Tattha yadi “vanappagumbe”ti paccatte bhummavacanam, “kekake”ti ca paccatte upayogavacanam, “esese eke ekatthe”ti ettha “esese”ti imānipi paccatte bhummavacanāni vā siyūṃ, upayogavacanāni vā. Yathetāni evaṃvidhāni na honti, suddhapaccattavacanāniyeva honti, tathā “vanappagumbe, kekake”tiādīnipi tathāvidhāni na honti, suddhapaccattavacanāniyeva honti. Icevaṃ sabbathāpi “vanappagumbe, bāle, paṇḍite, kekake”ti, “viratte kosiyāyane, aṭṭha nāgāvāsasate, ke purise, esese”ti evamādīnaṃ anekesaṃ purisalīngaitthilīnganapumsakalīngasabbanāmaekavacanaanekavacanaavasena sāsanavare t̥hitānaṃ padānaṃ nipphatti paccattekavacanaputhuvacanānam ekārādesavaseneva bhavatīti avassamidaṃ sampañcchitabbam. Evaṃ “vanappagumbe, bāle, paṇḍite”tiādīnaṃ suddhapaccattavacanaṭā atīva sukhumā dubbhiññeyyā, saddhena kulaputtana ācariye payirupāsivā tadupadesaṃ sakkaccaṃ gahetvā jānitabbā. Buddhavacanasmiñhi saddato ca atthato ca adhippāyato ca akkharacintakānaṃ ñānacakkhusammuyhanaṭṭhānabhūtā pāḷinayā vividhā dissanti.

Tattha saddato tāva idaṃ sammuyhanaṭṭhānaṃ – “virattā kosiyāyanī”ti vattabbe “viratte kosiyāyane”ti itthilīngapaccattavacanam dissati, “ko puriso”ti vattabbe “ke purise”ti sabbanāmikapaccattavacanam dissati, “kinnāmo te upajjhāyo”ti vattabbe “konāmo te upajjhāyo”ti samāsapadaṃ pullīngavisayaṃ dissati. Kiṃ nāmaṃ etassāti konāmoti hi samāso. Tena “konāmā itthī, konāmaṃ kula”nti ayampi nayo gahetabbo. “Kva te balaṃ mahārājā”ti vattabbe “ko te balaṃ mahārājā”ti ettha **kvas**addena īsakaṃ samānasutiko sattamiyanto **kos**addo dissati, **kva kos**addā hi aññamaññamīsakasamānasutikā. Tathā “idha hemantagimhesu, idha hemantagimhisu, na tenatthaṃ abandhi so, na tenatthaṃ abandhisū”ti aññānipi yojetabbāni.

Atthato pana idaṃ sammuyhanaṭṭhānaṃ – “yaṃ na kañcanadvepiñcha, andhena tamasā gata”nti ettha **nakāro** “kata”nti iminā sambandhitabbo. Na katanti kataṃ viyāti attho. Ettha hi **nakāro** upamāne vattati, na paṭisedhe.

“Assaddho akataññū ca,  
Sandhicchedo ca yo naro;  
Hatāvakāso vantāso,  
Sa ve uttamaporiso”ti

Evamādīnipi aññāni yojetabbāni.

Adhippāyato idaṃ sammuyhanaṭṭhānaṃ – “taṇhaṃ asmimānaṃ sassatucchedadiṭṭhiyo dvādasāyatanaṃ nandirāgañca hantvā brāhmaṇo anīgho yāti”ti vattabbepi tathā avatvā tamevatthaṃ gahetvā aññena pariyāyena

“Mātaraṃ pitaraṃ hantvā, rājāno dve ca khattiye;  
Raṭṭhaṃ sānucaraṃ hantvā, anīgho yāti brāhmaṇo”ti

Vuttaṃ.

“Vanam chindatha mā rukkham, vanato jāyate bhayaṃ;  
Chetvā vanañca vanatham, nibbanā hotha bhikkhavo”ti

Evamādīnipi aññāni yojetabbāni. Evaṃ buddhavacane saddato ca atthato ca adhippāyato ca akkharacintakānaṃ ñānacakkhusammuyhanaṭṭhānabhūtā pāḷinayā vividhā dissanti. Yathāha –

“Jānantā api saddasatthamakhilaṃ muyhanti pāṭhakkame,  
Yebhuyyena hi lokanītividhurā pāṭhe nayā vijjare;  
Paṇḍiccampi pahāya bāhiragataṃ ettheva tasmā budho,  
Sikkheyyāmaladhammasāgaratāre nibbānatitthūpage”ti.

Evaṃ pāḷinayānaṃ dubbhiññeyyattā “vanappagumbe, bāle ca, paṇḍite cā”tiādīnaṃ



gāthāracanampi kubbanti, evaṃ santepi te saddasatthe kataparicayavasena saddasatthato nayaṃ gahetvā tathārūpā gāthāpi cuṇṇiyapadānīpi abhisankharonti, “namo buddhāyā”tiādīni vatvā ratanattayaṃ vandanti. Ye pana saddasatthe akataparicayā antamaso bāladārakā, tepi aññesaṃ vacanaṃ sutvā kataparicayavasena “namo buddhāyā”tiādīni vatvā ratanattayaṃ vandanti, “namo buddhassā”ti vadantā pana appakatarā. Katthaci hi padese kumārake akkharasamayaṃ uggaṇhāpentā garū akkharānamādimhi “namo buddhāyā”ti sikkhāpenti, na pana “namo buddhassā”ti, evaṃ santepi pālīnaye porāṇaṭṭhakathānaye ca upaparikkhiyamāne ṭhapetvā gatyatthakammādiṭṭhānacatukkaṃ, pabhedato sattaṭṭhānaṃ vā dānarocanadhāraṇa**namo**yogādibhede yattha katthaci sampadānavisaye catutthekavacanassa **āyā**desasahitāni rūpāni na dissanti, tasmā kehici abhisankhatāni “namo buddhāya, buddhāya dānaṃ denti”ti padāni pālīṃ patvā “namo buddhassa, buddhassa dānaṃ denti”ti aññārūpāni bhavantīti daṭṭhabbaṃ. Ayaṃ pana pālīnayaatṭhakathānayanurūpena **āyā**desassa payogaraṇā – “buddhāya saraṇaṃ gacchati, buddhaṃ saraṇaṃ gacchati”ti vā, “buddhāya nagaraṃ nenti, buddhaṃ nagaraṃ nenti”ti vā, “buddhāya sakkato dhammo, buddhena sakkato dhammo”ti vā, “buddhāya jīvitāṃ pariccajati, buddhassa atthāya jīvitāṃ pariccajati”ti vā, “buddhāya apenti aññatitthiyā, buddhasmā apenti aññatitthiyā”ti vā, “buddhāya dhammatā, buddhassa dhammatā”ti vā, “buddhāya pasanno, buddhe pasanno”ti vā iti pabhedato imaṃ sattaṭṭhānaṃ vivajjetvā aññattha **āyā**deso na dissati. Tathā hi –

Pāṭhe **mahānamakkāra**-saṅkhāte sādhanandane;  
Sampadāne **namoyoge, āyā**deso na dissati.

Ettha mahānamakkārapāṭho nāma “namo tassa bhagavato arahato sammāsambuddhassā”ti pāṭho. Atrāpi **āyā**deso na dissati. **Vammikasuttepi** “namo karohi nāgassā”ti evaṃ **āyā**deso na dissati. **Ambaṭṭhasuttepi** “soṭṭhi bhadante hotu rañño, soṭṭhi janapadassa”. Evaṃ **āyā**deso na dissati.

“Suppabuddha”nti pāṭhassa, atthasaṃvaṇṇanāyapi;  
Sampadāne **namoyoge, āyā**deso na dissati.

Tathā hi

“Suppabuddhaṃ pabujjhanti, sadā gotamasāvaka;  
Yesaṃ divā ca ratto ca, niccaṃ buddhagatā satī”ti

Imissā pālīyā aṭṭhakathāyaṃ “sammādiṭṭhikassa putto guḷaṃ khipamāno buddhānussatiṃ āvajjetvā ‘namo buddhassā’ti vatvā guḷaṃ khipatī”ti **āyā**desavajjito saddaracanāviseso dissati. Sagāthāvaggavaṇṇanāyampi **dhanañjānīsuttaṭṭhakathāyaṃ** “tvam ṭhitāpi nisinnāpi khipitvāpi kāsetvāpi ‘namo buddhassā’ti tassa muṇḍakassa samaṇakassa namakkāraṃ karosī”ti **āyā**desavajjito saddaracanāviseso dissati. Tathā tattha tattha “buddhappamukhassa bhikkhusaṅghassa dānaṃ deti. Tassa purisassa bhattaṃ na rucati. Samaṇassa rocate saccaṃ, buddhassa chattaṃ dhāreti, buddhassa silāghate”tiādīnā **āyā**desavivajjito saddaracanāviseso dissati. Evaṃ dānarocanādīsu bahūsu sampadānavisayesu catutthekavacanassa **āyā**desasahitaṃ rūpaṃ na dissati.

Gatyatthakammādīsu pana catūsū ṭhānesu dissati. Tathā hi “mūlāya paṭikasseyya, appo saggāya gacchati”ti cettha gatyatthakammani dissati. Ettha hi “mūlaṃ paṭikasseyya, appo saggam gacchati”ti ca attho. “Paṭikasseyyā”ti cettha kasa gatiyanti dhātussa **pati**upasaggena visesitattā “ākaddheyyā”ti attho bhavati. “Ayaṃ puriso mama atthakāmo, yo maṃ gahetvāna dakāya netī”ti ettha nayanatthakammani dissati. Ettha hi maṃ udakaṃ neti, attano vasanakasobbhaṃ pāpetīti attho. “Viramathāyasmanto mama vacanāyā”ti ettha vibhattivipariṇāme dissati. Mama vacanato viramathāhi hi nissakkavacanavasena attho. “Mahāgaṇāyā bhattā me”ti etthāpi vibhattivipariṇāme dissati. Mama mahato haṃsagaṇassa bhattāti hi sāmivacanavasena attho. Mama haṃsarājāti cettha adhippāyo. “Asakkatā casma dhanañcayāyā”ti etthāpi vibhattivipariṇāme dissati. Mayaṃ dhanañcayassa rañño asakkatā ca bhavāmāti hi kattutthe sāmivacanaṃ. Tathā hi “dhanañcayassā”ti vā “dhanañcayenā”ti vā vattabbe evaṃ avatvā “dhanañcayāyā”ti sampadānavacanaṃ dānakriyādikassa sampadānavisayassa abhāvato vibhattivipariṇāmeyeva yujjati, tasmā dhanañcayarājena mayaṃ asakkatā ca bhavāmāti attho gahetabbo. Aññampi

vibhattivipariṇāmaṭṭhānaṃ maggitabbaṃ.

“Virāgāya upasamāya nirodhāyā” tiādīni pana anekasahassāni **āyā**desasahitāni saddarūpāni tadatthe pavattanti. Aṭṭhakathācariyāpi hi **dhammavinaya**saddatthaṃ vaṇṇentā “dhammānaṃ vinayāya. Anavajjadhammatthañhesa vinayo, na bhavabhogādiattha”nti tadatthavaseneva **āyā**desasahitaṃ saddarūpaṃ payuñjimsu, evaṃ catutthekavacanassa **āyā**desasahitāni rūpāni gatyatthakammani nayanatthakammani vibhattivipariṇāme tadatthe cāti imesu catūsuyeva ṭhānesu dissanti, na pana dānarocanādibhede yattha katthaci sampadānavisaye. Tathā hi **niruttipiṭake** “athāyāti sampadānavacana”nti **āyā**desasahitaṃ saddarūpaṃ vuttaṃ, **purisa**saddādivasena pana tādisāni rūpāni na vuttāni tādisānaṃ saddarūpānaṃ yattha katthaci appavattanato. **Kaccāyanappakarane**pi hi “āya catutthekavacanassa tū”ti lakkhaṇassa vuttiyaṃ “athāya hitāya sukhāya devamanussāna”nti vuttaṃ. “Purisāyā”ti vā “samaṇāyā”ti vā “brāhmaṇāyā”ti vā na vuttanti.

Ettha siyā – nanu bho tasseva vuttiyaṃ “catutthīti kimatthaṃ purisassa mukhaṃ. Ekavacanassāti kimatthaṃ purisānaṃ dadāti. Vāti kimatthaṃ dātā hoti samaṇassa vā brāhmaṇassa vā”ti vuttattā “purisāya samaṇāya brāhmaṇāyā”tiādīni padarūpāni nayato dassitāni, kevalaṃ pana **mukhas**addayogato bahuvacanabhāvato vikappanato ca “purisāyā”tiādīni na sijjhanti, **mukhas**addayogādivirahite pana ṭhāne avassaṃ sijjhantīti? Ettha vuccate – “catutthīti kimatthaṃ purisassa mukha”nti vadanto “sace **āyā**deso bhavēya, catutthiyā eva bhavati, na chaṭṭhiyā”ti dassento “mukha”nti padaṃ dassesi, na ca tena “**mukhas**addatṭhāne detītiādike sampadānavisayabhūte kriyāpade ṭhite **āyā**deso hoti”ti dasseti. “**Ekavacanassāti kimatthaṃ purisānaṃ dadāti**”ti vadantopi “ekavacanasseva **āyā**deso hoti, na bahuvacanassā”ti dasseti. “**Dadāti**”ti idaṃ padaṃ “purisāna”nti padassa sampadānavacanattaṃ ñāpetuṃ avoca, na ca “detītiādike sampadānavisayabhūte kriyāpade sati catutthekavacanassa **āyā**deso hoti”ti imamattaṃ viññāpeti. “Vāti kimatthaṃ dātā hoti samaṇassa vā brāhmaṇassa vā”ti ca vadantopi “sampadāneyeva vikappena **āyā**deso hoti”ti viññāpeti, na dānādikriyaṃ paṭicca **āyā**desavidhānaṃ ñāpeti.

Yadi pana dānādikriyaṃ paṭicca **āyā**desavidhānaṃ siyā, vuttikārakena lakkhaṇassa vuttiyaṃ mūlodāharaṇeyeva “athāya hitāyā”ti tadatthapayogāni viya “purisāya dīyate”tiādī vattabbaṃ siyā, na ca vuttaṃ. Kasmāti ce? Buddhavacane porāṇatṭhakathāsu ca tādisassa payogassa abhāvā. **Niruttipiṭake** hi pabhinnapaṭisambhido so āyasmā **mahākaccāno** “purisassa dīyate”ti **āyā**desarahitāniyeva rūpāni dasseti, “athāyāti sampadānavacana”nti bhaṇantopi ca thero dānādikriyāpekkhaṃ akatvā catutthekavacanassa **āyā**desasahitaṃ rūpameva niddisi. Tena so payogo tadatthapayogoti viññāyati. Iti imehi kārāṇehi jānitabbaṃ “dānādikriyaṃ paṭicca **āyā**desavidhānaṃ na kata”nti. Yajjevāṃ “athāya hitāyā”tiādīniyeva tadatthapayogāni “āya catutthekavacanassa tū”ti lakkhaṇassa visayā bhavēyyuṃ, nāññānīti? Tanna, aññānīpi visayāyeva tassa. Katamāni? “Mūlāya paṭikasseyya, appo saggāya gacchati, dakāya neti, viramathāyasmanto mamavacanāya, gaṇāya bhattā”tiādīni. “Saggassa gamanena vā”tiādīni pana **vādhikārattā** avisayāvāti.

Nanu ca bho evaṃ sante vuttikārakena mūlodāharaṇesu “athāya hitāya sukhāya devamanussāna”nti vatvā “mūlāya paṭikasseyyā”tiādīnīpi vattabbāni, kimudāharaṇe pana “vāti kimatthaṃ saggassa gamanena vā”ti vattabbanti? Saccāṃ, avacane kārāṇamatthi, taṃ suṇātha – “mūlāya paṭikasseyya, appo saggāya gacchati”ti ettha hi “mūlāya, saggāyā”ti padāni suddhasampadānavacanāni na honti gatyatthakammani vattanato, tasmā mūlodāharaṇesu na vuttāni. Tathā “dakāya neti”ti ettha “dakāyā”ti padaṃ nayanatthakammani vattanato suddhasampadānavacanānaṃ na hotīti na vuttaṃ. “Viramathāyasmanto mama vacanāyā”ti ettha pana “vacanāyā”ti padaṃ nissakkavacanatthe vattanato, “gaṇāya bhattā”ti ettha “gaṇāyā”ti padaṃ sāmivacanatthe vattanato, “asakkatā casma dhanañcayāyā”ti ettha “dhanañcayāyā”ti padaṃ kattavasena sāmīatthe vattanato suddhasampadānavacanānaṃ na hotīti na vuttaṃ. Kimudāharaṇepi “saggassā”ti padaṃ **gamanas**addasannidhānato gatyatthakammani vattanato suddhasampadānavacanānaṃ na hotīti “vāti kimatthaṃ saggassa gamanena vā”ti na vuttaṃ. Evañhettha vuttanayena buddhavacanaṃ porāṇatṭhakathānayañca patvā catutthekavacanassa **āyā**desasahitāni rūpāni gatyatthakammādīsu catūsuyeva ṭhānesu dissanti, na pana dānarocanādibhede

yattha katthaci sampadānavisayeti datṭhabbam.

Nanu ca bho “candanāsāraṃ jeṭṭhikāya adāsi suvaṇṇamālaṃ kaniṭṭhāyā”ti dānappayoge catutthekavacanassa **āyā**desasahitarūpadassanato “rājakaññāya diyate, rājakaññāya ruccati alaṅkāro, rājakaññāya chattaṃ dhāreti, rājakaññāya namo karohi, rājakaññāya sotthi bhavatu, rājakaññāya silāghate”tiādhipi payogehi bhavitabbam, atha kasmā “buddhavacanam porāṇaṭṭhakathānayañca patvā catutthekavacanassa **āyā**desasahitāni rūpāni gatyatthakammādīsu catūsuyeva ṭhānesu dissanti, na pana dānarocanādibhede yattha katthaci sampadānavisaye”ti vadathāti? Uppathamavatiṇṇo bhavaṃ, na hi bhavaṃ amhākaṃ vacanatthaṃ jānāti. Ayañhettha amhākaṃ vacanattho – sabbānīpi itthilingāni ekavacanavasena tatiyācatutthīpañcamīchaṭṭhīsattamīṭhānesu samasamāni honti, appāni asamāni, tasmā tāni ṭhapetvā pulliṅganapumsakalingesu **purisādi citta**disaddānaṃ akārantapakatibhāve ṭhitānaṃ catutthekavacanassa **āyā**desasahitāni rūpāni buddhavacanādīsu dānarocanādibhede yattha katthaci sampadānavisaye na dissanti. Teneva hi “mūlāya, saggāya, dakāya, vacanāya, gaṇāyā”tiādīni gatyatthakammādīsu tīsu “abhiññāya, sambodhāya, nibbānāyā”ti evamādīni pana anekasatāni tilingapadāni tadattheyevāti imesu catūsu ṭhānesu dissanti. “Devi, rocati, dhāreti”tiādīsu pana suddhasampadānavisayesu na dissanti. Bhavanti catra –

Catutthekavacanassa, **āyā**desena saṃyutaṃ;  
Rūpaṃ anitthilingānaṃ, ṭhānesu catusuṭṭhitam.

Gatyatthakammani ceva, nayanatthassa kammani;  
Vibhattiyā vipallāse, tadatthe cāti niddise.

“Mūlāya paṭikasseyya, appo saggāya gacchati”;  
Evaṃ gatyatthakammasmim, diṭṭhamamhehi sāsane.

“Dakāya neti” iccevaṃ, nayanatthassa kammani;  
“Vacanāyā”ti nissakke, viramaṇappayogato.

“Gaṇāya”iti sāmismim, “bhattā”ti saddayogato;  
“Dhanañcayāyā”ti padaṃ, kattutthe sāmīsūcakaṃ.

“Asakkatā”ti saddassa, yogatoti viniddise;  
Añño cāpi vipallāso, maggitabbo vibhāvinā.

“Abhiññāya sambodhāya, nibbānāyā”timāni tu;  
Liṅgattayavaseneva, tadatthasmim viniddise.

Evaṃ pāṭhānulomena, kathito **āya**sambhavo;  
Idantu sukhumam ṭhānaṃ, cintetabbaṃ punappunaṃ.

Okārantavaseneva, nānāyasaṃmaṇḍitā;  
Padamālā mahesissa, sāsanaṭṭhaṃ pakāsītā.

Imamatimadhurañce cittikatvā suṇeyyaṃ,  
Vividhanayavicittaṃ sādhabo saddanītiṃ;  
Jinavaravacanete saddato jātakaṅkhaṃ,  
Kumudamiva’sinā ve suṭṭhu chindeyyumettha.

Iti navāṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparaṇe

Savinicchayo okārantapullīṅgānaṃ pakatirūpassa



Nāmikapadamālāvibhāgo nāma

Pañcama paricchedo.

Akārantokārantatāpakatikaokārantapullīṅgaṃ niṭṭhitaṃ.

## 6. Ākārantapullīṅganāmikapadamālā

Atha pubbācariyamataṃ purecamaṃ katvā ākārantapullīṅgānaṃ pakatirūpesu **abhibhavitu** iccetassa pakatirūpassa nāmikapadamālaṃ vakkhāma – satthā, satthā, satthāro. Satthāraṃ, satthāro. Satthārā, satthārehi, satthārebhi. Satthu, satthussa, satthuno, satthānaṃ, satthārānaṃ. Satthārā, satthārehi, satthārebhi. Satthu, satthussa, satthuno, satthānaṃ, satthārānaṃ. Satthari, satthāresu. Bho sattha, bho satthā, bhavanto satthāro.

Ayaṃ **yamakamahātherena** katāya **cūlaniruttiyā** āgato nayo. Ettha ca **niruttipiṭake ca kaccāyane** ca “satthunā”ti padaṃ anāgatampi gahetabbameva “dhammarājena satthunā”ti dassanato. “Satthārā, satthunā, satthārehi, satthārebhi”ti kamo ca veditabbo. Ettha ca asatipi atthavisesse byañjanavisesavasena, byañjanavisesābhāvepi atthanānatthāvasena saddantarassandassanaṃ niruttikkamoti “satthā”ti padaṃ ekavacanabahuvacanavasena dvikkhattuṃ vuttanti veditabbaṃ. **Niruttipiṭakādīsu** pana “satthā”ti paṭhamābahuvacanaṃ na āgataṃ. Kiñcāpi na āgataṃ, tathāpi “avitakkitaṃ maccumupabbajanti”ti **pāliyaṃ** “avitakkitaṃ”ti paṭhamābahuvacanassa dassanato “satthā”ti padassa paṭhamābahuvacanattaṃ avassamicchitabbaṃ. Tathā **vattā, dhātā, gantā**dīnampi taggatikkatā. Tathā **niruttipiṭake** “satthāre”ti dutiyābahuvacanaṃ ca “satthussa, satthāna”nti catutthīchaṭṭhekavacanabahuvacanāni ca āgatāni, **cūlaniruttiyaṃ** pana na āgatāni. Tattha “mātāpitaro poseṭi. Bhātaro atikkamati”ti dassanato “satthāre”ti dutiyābahuvacanarūpaṃ ayuttaṃ viya dissati. **Kaccāyanādīsu** “bho sattha, bho satthā”iti rassadīghavasena ālapanekavacanadvayaṃ vuttaṃ. **Niruttipiṭake** “bho sattha”iti rassavasena ālapanekavacanamaṃ vatvā “bhavanto satthāro”ti **ārādesavasena** ālapanabahuvacanaṃ vuttaṃ. **Cūlaniruttiyaṃ** “bho sattha”iti rassavasena ālapanekavacanamaṃ vatvā “bho satthā”iti dīghavasena ālapanabahuvacanaṃ lapitaṃ. Sabbametaṃ āgame upaparikkhitvā yathā na virujjhati, tathā gahetabbaṃ.

Idāni **satthussaddassa** yaṃ rūpantaraṃ amhehi diṭṭhaṃ, taṃ dassessāma – tathā hi “imesaṃ mahānāma tiṇṇaṃ satthūnaṃ ekā niṭṭhā udāhu puthu niṭṭhā”ti **pāliyaṃ** “satthūna”nti padaṃ diṭṭhaṃ, tasmā ayampi kamo veditabbo “satthu, satthussa, satthuno, satthānaṃ, satthārānaṃ, satthūna”nti. Abhibhavitā, abhibhavitā, abhibhavitāro. Abhibhavitāraṃ, abhibhavitāro. Abhibhavitārā, abhibhavitunā, abhibhavitārehi, abhibhavitārebhi. Abhibhavitu, abhibhavitussa, abhibhavituno, abhibhavitānaṃ, abhibhavitārānaṃ, abhibhavitūnaṃ. Abhibhavitārā, abhibhavitārehi, abhibhavitārebhi. Abhibhavitu, abhibhavitussa, abhibhavituno, abhibhavitānaṃ, abhibhavitārānaṃ. Abhibhavitari, abhibhavitāresu. Bho abhibhavitā, bho abhibhavitā, bhavanto abhibhavitāro. Yathā panettha **abhibhavitu** iccetassa pakatirūpassa nāmikapadamālā **satthunayena** yojitā, evaṃ **paribhavitu**ādīnaṃ ca aññesaṃ ca taṃsadisānaṃ nāmikapadamālā **satthunayena** yojetabbā. Etthaññāni taṃsadisāni nāma “vattā, dhātā”iccādīnaṃ padānaṃ **vattudhātu** iccādīni pakatirūpāni.

Vattā dhātā gantā netā,  
Dātā kattā cetā tātā;  
Chettā bhettā hantā metā,  
Jetā boddhā ñātā sotā.

Gajjitā vassitā bhattā, mucchitā paṭisedhitā;  
Bhāsītā pucchitā khantā, uṭṭhātakkamitā tatā.

Nattā panattā akkhātā, sahitā paṭisevitā;  
Netā vinetā iccādī, vattare suddhakattari.

Uppādetā viññāpetā, sandassetā pabrūhetā;  
Bodhetādī caññe saddā, ñeyyā hetusmiṃ atthasmiṃ.

Kattā khattā nettā bhattā, pitā bhātātime pana;  
Kiñci bhijjanti **suttasmiṃ**, taṃ pabhedam kathessam.

Satthātiādīsu keci, upayogena sāminā;  
Saheva niccam vattanti, neva vattanti keci tu.

Tatra **kattusaddā**dayo rūpantaravasena **satthusaddato** kiñci bhijjanti. Tathā hi “uṭṭhehi katte taramāno, gantvā vessantaramvadā”ti ettha “katte”ti idaṃ ālapanekavacanarūpaṃ, evaṃhi “bho kattā”ti rūpato rūpantaram nāma. “Tena hi bho khatte yena campeyyakā brāhmaṇagahapatikā tenupasaṅkamā”ti ettha “khatte”ti idaṃcālapanekevacanarūpaṃ. Evampi “bho khattā”ti rūpato rūpantaram nāma. “Nette ujum gate satī”ti ettha “nette”ti idaṃ sattamiyā ekavacanarūpaṃ, etampi “nettarī”ti rūpato rūpantaram. “Ārādhayati rājānaṃ, pūjaṃ labhati bhattusū”ti ettha “bhattūsū”ti idaṃ sattamiyā bahuvacanarūpaṃ. “Bhattāresū”ti rūpato rūpantaram, atra “bhattūsū”ti dassanato, “mātāpitūsū paṇḍitā”ti ettha “pitūsū”ti dassanato ca “vattūsū dhātūsū gantūsū netūsū dātūsū kattūsū”ti evamādinayopi gahetabbo. Ayaṃ nayo **satthusaddepi** icchitabbo viya amhe paṭibhāti.

Pitā, pitā, pitaro. Pitarā, pitunā, petyā, pitarehi, pitarebhi, pitūhi, pitūbhi. Pitu, pitussa, pituno, pitānaṃ, pitarānaṃ, pitūnaṃ. Pitarā, petyā, pitarehi, pitarebhi, pitūhi, pitūbhi. Pitu, pitussa, pituno, pitānaṃ, pitarānaṃ, pitūnaṃ. Pitari, pitaresu, pitūsū. Bho pita, bho pitā, bhavanto pitaro. Ettha pana “petyā, pitūna”nti imaṃ nayadvayaṃ vajjetvā **bhātusaddassa** ca padamālā yojetabbā. Tattha “matyā ca petyā ca kataṃ susādhu, anuññatosi mātāpitūhi, mātāpitūnaṃ accayenā”ti ca dassanato **pitusaddassa** “petyā, pitūhi, pitūbhi. Pitūna”nti rūpabhedo ca, “pitaro” iccādīsu rassattañca **satthusaddato** viseso. Tattha ca “petyā”ti idaṃ “jantuyo, hetuyo, hetuyā, adhipatiyā”ti padāni viya acinteyyaṃ pullingarūpanti daṭṭhabbaṃ.

Codanā sodhanā cātra bhavati – **satthā pitā** iccevamādīni nipphannattamupādāya ākārāntānīti ca, paṭhamam ṭhapetabbam pakatirūpamupādāya ukārāntānīti ca tumhe bhaṇatha, “hetu satthāradassanaṃ. Amātāpitarasamvadḍho. Kattāraniddeso”tiādīsu pana **satthāra** iccādīni katham tumhe bhaṇathāti? Etānipi mayam pakatirūpamupādāya ukārāntānīti bhaṇamāti. Nanu ca bho etāni akārāntānīti? Na, ukārāntāniyeva tāni. Nanu ca bho **yo am nādīni** parabhūtāni vacanāni na dissanti yehi ukārāntasaddānamantassa **ārādeso** siyā, tasmā akārāntānīti? Na, īdise ṭhāne parabhūtānaṃ **yo am nādīnaṃ** vacanānamanokāsattā. Tathā hi samāsavisayo eso. Samāsavisayasmiñhi acinteyyānipi rūpāni dissantīti. Evaṃ santepi bho “gāmato nikkhamatī”ti payogassa viya asamāsavisaye “satthārato satthāram gacchatī”ti **niddesapālī**dassanato “hetu satthāradassana”ntiādīsu **satthāra** iccādīni akārāntānīti cintetabbānīti? Na cintetabbāni “satthārato satthāram gacchatī”ti etthāpi ukārāntattā. Ettha hi asamāsattepi **topaccayaṃ** paṭicca **satthusaddassa** ukāro **ārādesam** labhati. Yāni pana tumhe ukārassa **ārādesanimittāni yo am nādīni** vacanāni icchatha, tāni īdise ṭhāne viññūnaṃ pamāṇam na hontī. Kāni pana hontīti ce? Asamāsavisaye **topaccayo** ca samāsavisaye parapadāni ca parapadābhāve syādivibhattiyo cāti imāneva īdise ṭhāne ekantena pamāṇam hontī. Tathā hi **dhammapadaṭṭhakathāyam** “yāvadeva anathāya, ñattam bālassa jāyatī”ti imissā pāḷiyā atthasamvaṇṇanāyaṃ “ayaṃ nimmātāpitaroti imasmiṃ pahaṭe daṇḍo natthī”ti ettha nimmātāpitaroti imassa samāsavisayattā simhi pare ukāro **ārādesam** labhati, tato **sisso** okārādeso, iccetaṃ padaṃ pakatirūpavasena ukārāntam bhavati. Nipphannattamupādāya “puriso, urago”ti padāni viya okārāntāñca bhavati. Ayaṃ panettha samāsaviggaho “mātā ca pitā ca mātāpitaro, natthi mātāpitaro etassāti nimmātāpitaro”ti. Pakatirūpavasena hi “nimmātāpitu” iti ṭhite **sivacanasmiṃ** pare ukārassa **ārādeso** hoti. Katthaci pana dhammapadaṭṭhakathāpotthake “ayaṃ nimmātāpikito”ti pāṭho dissati, eso pana “ayaṃ nimmātāpitaro”ti padassa ayuttataṃ maññamānehi ṭhapitoti maññāma, na so ayutto aṭṭhakathāpāṭho. So hi umaṅgajātakatṭhakathāyam ekapitaroti **simhi** **ārādesapayogena** sametī. Tathā hi –

“Yathāpi niyako bhātā,  
Saudariyo ekamātuko;

Evam pañcālacando te,  
Dayitabbo rathesabhā''ti

Imissā pāliyā atthaṃ saṃvaññentehi pālinayaññūhi garūhi “niyakoti ajjhattiko ekapitaro ekamātuyā jāto”ti **simhi ārādesapayogaranā** katā. Na kevalañca **simhi ārādesa pulliṅgappayogoyevamhehi** diṭṭho, atha kho itthiliṅgappayogopi sāsane diṭṭho. Tathā hi vinayapiṭake **cūlavagge** “assamañi hoti asakyadhītarā”ti padaṃ dissati. Ayaṃ panettha samāsaviggaho “sakyakule uppannattā sakyassa bhagavato dhītā sakyadhītarā, na sakyadhītarā asakyadhītarā”ti. Idhāpi **simhi** pare **ukārassa ārādeso** kato, itthiliṅgabhāvassa icchittattā **āpaccayo**, tato **silopo** ca daṭṭhabbo. Evam samāsapadatte **satthu pitu kattusaddānaṃ** nāmikapadamālāyaṃ vuttarūpato koci koci rūpaviseso dissati. Aññesampi rūpaviseso nayaññunā maggitabbo suttantesu. Ko hi nāma samattho nissesato buddhavacanasāgare saṃkiñṇāni vicitrāni paṇḍitajanānaṃ hadayavimhāpanakarāni padarūparatanāni samuddharitvā dassetuṃ, tasmā amhehi appamattakāniyeva dassitāni.

Adandhajātiko viññu-jātiko satataṃ idha;  
Yogaṃ karoti ce satthu, pāliyaṃ so na kaṅkhati.

Ye panidha amhehi “sathā, abhibhavitā, vattā, kattā”dayo saddā pakāsītā, tesu keci upayogavacanena saddhiṃ niccaṃ vattanti “pucchitā, okkamitā”iccādayo. Tathā hi “abhijānāsi no tvam mahārāja imaṃ pañhaṃ aññe samaṇabrāhmaṇe pucchitā. Niddaṃ okkamitā”tiādipayogā bahū dissanti. Keci sāmivacanena saddhiṃ niccaṃ vattanti “abhibhavitā, vattā”iccādayo. Tathā hi “paccāmittānaṃ abhibhavitā, tassa bhavanti vattāro. Amatassa dātā. Parissayānaṃ sahitā. Anuppannassa maggassa, uppādetā naruttamo”tiādipayogā bahū dissanti. Keci pana upayogavacanenapi saddhiṃ neva vattanti niyogā paññattiyāṃ pavattanato. Taṃ yathā? “Satthā, pitā, bhātā, nattā”iccādayo. Ettha pana “upayogavacanena saddhiṃ niccaṃ vattanti”tiādivacanāṃ kammabhūtaṃ atthaṃ sandhāya katanti veditabbaṃ.

Evam **ukārantaṭāpakatikānaṃ ākārantaṭāpadānaṃ** pavattiṃ viditvā saddesu atthesu ca kosallamicchantehi puna liṅgaantavasena “sathā, sattho, sattha”nti tikaṃ katvā padānamattho ca pakatirūpassa nāmikapadamālā ca padānaṃ sadisāsadisatā ca vavattapetabbā. Tatra hi “sathā”ti idaṃ paṭhamāṃ **ukārantaṭāpakatiyaṃ** ṭhatvā pacchā **ākārantaṭābhūtaṃ pulliṅgaṃ**, “sattho”ti idaṃ paṭhamāṃ **ākārantaṭāpakatiyaṃ** ṭhatvā pacchā **okārantaṭābhūtaṃ pulliṅgaṃ**, “sattha”ntidaṃ pana paṭhamāṃ **ākārantaṭāpakatiyaṃ** ṭhatvā pacchā **niggahītantaṭābhūtaṃ napuṃsakaliṅgaṃ**. Tatra **satthāti** sadevakaṃ lokaṃ sāsati anusāsati sathā, ko so? Bhagavā. **Satthoti** saha atthenāti sattho, bhaṇḍamūlaṃ gahetvā vāñijjāya desantaraṃ gato janasaṃmūho. **Satthanti** sāsati ācikkhati atthe etenāti satthaṃ, byākaraṇādigantho, atha vā sasati himsati satte etenāti satthaṃ, asiādi. “Sathā, satthā, satthāro. Satthāraṃ, satthāro”ti pure viya padamālā. “Sattho, satthā. Satthaṃ, satthe”ti **purisanayena** padamālā. “Satthaṃ, satthāni, sathā. Satthaṃ, satthāni, satthe”ti napuṃsake vattamāna **cittanayena** padamālā yojetabbā. Evam tidhā bhinnāsu nāmikapadamālāsu padānaṃ sadisāsadisatā vavattapetabbā.

Sathā tiṭṭhati sabbaññū, sathā yanti dhanatthikā;  
Sathā apeti puriso, bhonto satthā dadātha saṃ.

Evam sutisāmaññavasena sadisatā bhavati.

Satthaṃ yaṃ tikhiṇaṃ tena, sattho katvāna kappiyaṃ;  
Phalaṃ satthussa pādāsi, sathā taṃ paribhuñjati.

Evam asutisāmaññavasena asadisatā bhavati, tathā liṅgaantavasena. “Cetā ceto”ti ca “tātā tāto”ti ca dukkaṃ katvā padānamattho ca pakatirūpassa nāmikapadamālā ca padānaṃ sadisāsadisatā ca vavattapetabbā.

Tatra hi “cetā”ti paṭhamāṃ **ukārantaṭāpakatiyaṃ** ṭhatvā pacchā **ākārantaṭābhūtaṃ pulliṅgaṃ**, tathā “tātā”ti padampi. “Ceto”ti idaṃ pana paṭhamāṃ **ākārantaṭāpakatiyaṃ** ṭhatvā pacchā

okārantabhūtaṃ pulliṅgaṃ, tathā “tāto”ti padampi. Tatra **cetā**ti cinoti rāsiṃ karotīti cetā, pākāracinanako puggalo, iṭṭhakavaddhakīti attho. **Cetoti** cittaṃ, evaṃnāmako vā luddo. Ettha ca cittaṃ “cetayati cintetī”ti atthavasena ceto, luddo pana paṇṇattivasena. **Tātāti** tāyatīti tātā. “Aghassa tātā hitassa vidhātā”tissa payogo. “Tāto”ti etthāpi tāyatīti tāto, puttānaṃ pitūsu, pitarānaṃ puttesu, aññesañca aññesu piyapuggalesu vattabbavohāro eso. “So nūna kapaṇo tāto, ciramaṃ rucati assame. Kicchēnādhigatā bhogā, te tāto vidhamamaṃ dhamaṃ. Ehi tātā”tiādīsu cassa payogo veditabbo. “Cetā, cetā, cetāro. Cetāraṃ, cetāro”ti **satthunayena** padamālā. “Ceto, cetā. Cetamaṃ, cete. Cetasā, cetenā”ti **manogaṇanayena** ñeyyā. Ayaṃ cittavācakassa **cetasaddassa** nāmikapadamālā. “Ceto, cetā. Cetamaṃ, cete. Cetenā”ti **purisanayena** ñeyyā. Ayaṃ paṇṇattivācakassa **cetasaddassa** nāmikapadamālā. “Tātā, tātā, tātāro. Tātāra”nti satthunayena ñeyyā. “Tāto, tātā, tātā”nti **purisanayena** ñeyyā. Evamimāsūpi nāmikapadamālāsu padānaṃ sadisāsadisatā vavattapetabbā, tathā liṅgaantavasena “ñātā, ñāto, ñātamaṃ, ñātā”ti catukkaṃ katvā padānamattho ca pakatirūpassa nāmikapadamālā ca padānaṃ sadisāsadisatā ca vavattapetabbā.

Tatra hi “ñātā”ti idaṃ paṭhamamaṃ ukārantatāpakatiyaṃ thatvā pacchā ākārantabhūtaṃ pulliṅgaṃ. “Ñāto ñātā”nti imāni yathākkamaṃ paṭhamamaṃ akārantatāpakatiyaṃ thatvā **pacchokārantaniggahītantabhūtāni** vāccaliṅgesu punnapuṃsakaliṅgāni. Tathā hi “ñāto attho sukhāvaho. Ñātamaṃ kuraṅgassā”ti nesamaṃ payogā dissanti. “Ñātā”ti idaṃ pana paṭhamamaṃ ākārantatāpakatiyaṃ thatvā pacchāpi ākārantabhūtaṃ vāccaliṅgesu itthiliṅgaṃ. Tathā hi “esā itthimayā ñātā”ti payogo. Tatra pulliṅgapakkhe “jānātīti ñātā”ti kattukārakavattamānakālavasena attho gahetabbo. Itthiliṅgāpakkhe “ñāyitthāti ñātā ñāto ñātā”nti kammakārakātītakālavasena attho gahetabbo. Esa nayo aññatthāpi yathāsambhavaṃ daṭṭhabbo. “Ñātā, ñātā, ñātāro. Ñātāra”nti **satthunayena** ñeyyā. “Ñāto, ñātā. Ñātā”nti **purisanayena** ñeyyā. “Ñātamaṃ, ñātāni, ñātā. Ñātamaṃ, ñātāni, ñātē”ti vakkhamānacittanayena ñeyyā. “Ñātā, ñātā, ñātāyo. Ñātamaṃ, ñātā, ñātāyo”ti vakkhamānakaññāyena ñeyyā. Evamimāsūpi nāmikapadamālāsu padānaṃ sadisāsadisatā vavattapetabbā. Aññesūpi thānesu yathārahaṃ iminā nayena sadisāsadisatā upaparikkhitabbā. **Vattā dhātā gantā**dīnampi “vadatīti vattā, dhāretīti dhātā, gacchatīti gantā”tiādīna yathāsambhavaṃ nibbacanāni ñeyyāni.

Yaṃ panettha amhehi pakiṇṇakavacanaṃ kathitaṃ, taṃ “aṭṭhāne idaṃ kathita”nti na vattabbaṃ. Yasmā ayaṃ saddanīti nāma saddānamatthānañca yuttāyuttipakāsanatthaṃ katārambhattā nānappakārena sabbamaṃ māgadhavohāraṃ sankhobhetvā kathitāyeva sobhati, na itarathā, tasmā nānappabhedena vattumicchāya sambhavato “aṭṭhāne idaṃ kathita”nti na vattabbaṃ. Nānāupāyehi viññūnaṃ ñāpanatthaṃ katārambhattā ca pana punaruttidosopettha na cintetabbo, aññadatthu saddhāsampannehi kulaputtehi ayaṃ saddanīti piṭakattayopakārāya sakkaccaṃ pariyāpuṇitabbā.

Iti **abhibhavitā**padasadisāni **vattā, dhātā, gantā**dīni padāni dassitāni. Idāni atamsadisāni dassessāma. Seyyathidaṃ –

Guṇavā gaṇavā ceva, balavā yasavā tathā;  
Dhanavā sutavā vidvā, dhutavā katavāpi ca.

Hitavā bhagavā ceva, dhitavā thāmavā tathā;  
Yatavā cāgavā cātha, himaviccādayo ravā.

Punnapuṃsakaliṅgehi, akārantehi pāyato;  
**Vantusaddo** paro hoti, tadantā guṇavādayo.

Saññāvā rasmivā ceva, massuvā ca yasassivā;  
Iccādidassanāpeso, **ākāriyaṇṇukārato**;  
Itthiliṅgādīsu hoti, katthacīti pakāsaye.

Satimā gatimā attha-dassimā dhitimā tathā;  
Mutimā matimā ceva, jutimā hirimāpi ca.

Thutimā ratimā ceva, yatimā balimā tathā;  
Kasimā sucimā dhīmā, rucimā cakkhumāpi ca.

Bandhumā hetumā'yasmā, ketumā rāhumā tathā;  
Khānumā bhānumā gomā, vijjumā vasumādayo.

Pāpimā puttimā ceva, candimiccādayopi ca;  
Ataṃsadisāsaddāti, viññātabbā vibhāvinā.

**Ivaṇṇukārokārehi, mantusaddo paro bhave;**  
**Ākārantā cikārantā, imantūti vibhāvaye.**

Guṇavā, guṇavā, guṇavanto. Guṇavantam, guṇavante. Guṇavatā, guṇavantena, guṇavantehi, guṇavantebhi. Guṇavato, guṇavantassa, guṇavatam, guṇavantānam. Guṇavatā, guṇavantā, guṇavantsmā, guṇavantamhā, guṇavantehi, guṇavantebhi. Guṇavato, guṇavantassa, guṇavatam, guṇavantānam. Guṇavati, guṇavante, guṇavantsmim, guṇavantamhi, guṇavantesu. Bho guṇavā, bhavanto guṇavā, bhonto guṇavanto.

Ettha pana ‘‘etha tumhe āvuso sīlavāhothā’’ti ca,

‘‘Balavanto dubbalā honti, thāmavantopi hāyare;  
Cakkhumā andhikā honti, mātugāmavasam gatā’’ti ca

**Pāliyam** ‘‘sīlavā, cakkhumā’’ti paṭhamābahuvacanassa dassanato ‘‘guṇavā’’ti paccattālapanaṭṭhāne bahuvacanam vuttam. ‘‘Guṇavā satimā’’tiādīsupi eseva nayo. **Cūlaniruttiyampi** hi ‘‘guṇavā’’ti paccattālapanabahuvacanāni āgatāni, **niruttipiṭake** paccattekavacanabhāveneva āgatam, cūlaniruttiyam pana niruttiṭake ca ‘‘bho guṇava’’iti rassavasena ālapanekavacanam āgatam. Mayam pana ‘‘taggha bhagavā bojjaṅgā. Katham nu bhagavā tuyham sāvako sāsane rato’’tievamādīsū anekasatesu pāṭhesu ‘‘bhagavā’’iti ālapanekavacanassa dīghabhāvadassanato **vantupaccayaṭṭhāne** ‘‘bho guṇavā’’iccādi dīghavasena vacanam yuttataram viya maññāma, **mantupaccayaṭṭhāne** pana **imantupaccayaṭṭhāne** ca ‘‘sabbaverabhayātīta, pāde vandāmi cakkhuma. Evaṃ jānāhi pāpima’’iccādīsū pāṭipadesesu ‘‘cakkhuma’’iccādiālapanekavacanassa rassabhāvadassanato ‘‘bho satima, bho gatima’’iccādi rassavasena vacanam yuttataram viya maññāma, atha vā **mahāparinibbānasuttaṭṭhakathāyam** ‘‘āyasmā tissa’’ itidīghavasena vuttālapanekavacanassa dassanato ‘‘bhagavā, āyasmā’’ itidīghavasena vuttapadamattam ṭhapetvā **vantupaccayaṭṭhānepi mantupaccayanayo** netabbo, **mantupaccayaṭṭhānepi vantupaccayanayo** netabbo. Tathā hi **kaccāyanādīsū** ‘‘bho guṇavam, bho guṇava, bho guṇavā’’iti niggaḥitarassadīghavasena tīṇi ālapanekavacanāni vuttāni, iminā ‘‘bho satimam, bho satima, bho satimā’’ti evamādinayopi dassito. Paṭhamābahuvacanaṭṭhāne pana ‘‘guṇavanto, guṇavantā, guṇavantī’’ti tīṇi padāni vuttāni, imināpi ‘‘satimanto, satimantā, satimantī’’ti evamādinayopi dassito. Tesu ‘‘bho guṇavam bho satimam, guṇavantā, guṇavantī’’ti imāni padāni evaṃgatikāni ca aññāni padāni pāliyam appasiddhāni yathā ‘‘āyasmantā’’ti padaṃ pasiddham, tasmā yaṃ cūlaniruttiyam vuttam, yañca niruttiṭake, yañca kaccāyanādīsū, tam sabbam pāliyā aṭṭhakathāhi ca saddhim yathā na virujjhati, gaṅgodakena yamunodakam viya aññadatthu saṃsandati sameti, tathā gahetabbam.

Apicettha ayampi viseso gahetabbo. Tam yathā? ‘‘Tuyham dhītā mahāvīra, paññavanta jutindharā’’ti **pāliyam** ‘‘paññavanta’’iti ālapanekavacanassa dassanato.

‘‘Sabbā kirevam pariniṭṭhitāni,  
Yasassi nam paññavantam visayha;  
Yaso ca laddhā purimam ulāram,  
Nappajjahe vaṇṇabalam purāṇa’’nti.

Imissā jātakapāliyā **aṭṭhakathāyam** ‘‘paññavanta’’iti ālapanekavacanassa dassanato ca ‘‘bho

guṇavanta, bho guṇavantā, bho satimanta, bho satimantā”tiādīnipi ālapane kavacanāni avassamicchitabbāni. Tathā hi tissaṃ pāḷiyam “yasassi paññavanta” iccālapanavacanam aṭṭhakathācariyā icchanti. **Nanti** hi padapūraṇe nipātamattaṃ. **Paññavantanti** pana chandānurakkhaṇatthaṃ anusārāgamaṃ katvā vuttaṃ. Evaṃ pāvacane **vantupaccayādisahitānaṃ** saddānaṃ “bhagavā, āyasmā, paññavanta, cakkhuma, pāpima” itidassitanayena ālapanappavatti veditabbā. Ettha ca “gaṅgābhāgīrathī nāma, himavantā pabhāvītā”ti ca “kuto āgatattha bhanteti, himavantā mahārājā”ti ca dassanato “guṇavantā”ti pañcamiyā ekavacanam kathitaṃ. Yathā **guṇavantu** saddassa nāmikapadamālā yojitā, evaṃ **dhanavantubalavantādīnaṃ satimantu gatimantādīnaṃ** nāmikapadamālā yojetabbā.

Idāni **vidvādīpadānaṃ guṇavāpadena** samānagatikattampi sotūnaṃ payogesū sammohāpagamatthaṃ ekadesato nibbanādīhi saddhiṃ **vidvantu** iccādīpakatirūpassa nāmikapadamālā vuccate – nānasānkhāto vedo assa atthīti vidvā, paṇḍito. Ettha ca **vidvās** saddassa atthibhāve “iti vidvā samaṃ care”tiādī āhaccapāṭho nidassanaṃ. Atrāyaṃ padamālā – vidvā, vidvā, vidvanto. Vidvantaṃ, vidvante. Vidvatā, vidvantena. Sesam sabbam neyyam. Vedanāvā, vedanāvā, vedanāvanto. Vedanāvantaṃ, vedanāvante. Vedanāvātā, vedanāvantena. Sesam sabbam neyyam. Evaṃ “saññāvācetanāvā saddhāvā paññāvā sabbāvā”iccādīsūpi. Ettha ca “vedanāvantaṃ vā attānaṃ sabbāvantaṃ loka”ntiādīni nidassanapadāni. Tatha **sabbāvantaṃ** sabbasattavantaṃ, sabbasattayuttanti attho. Majjhediḅhañhi idaṃ padaṃ. Yebhuyyena pana “paññāvāpaññavanto”tiādīni majjherassānipi bhavanti. Yasassino parivārabhūtā janā assa atthīti yasassivā, atha vā yasassī ca yasassivā cāti yasassivā. Ekadesasarūpekasesoyam. “Yasassivā”ti padassa pana atthibhāve –

“Khattiyo jātisampanno, abhijāto yasassivā;  
Dhammarājā videhānaṃ, putto uppajjate tavā”ti

Idaṃ nidassanaṃ. “Yasassivā, yasassivā, yasassivanto. Yasassivantaṃ” iccādī netabbaṃ. Atthe dassanasīlam atthadassi, kiṃ taṃ? Nānaṃ. Atthadassi assa atthīti **atthadassimā**, ettha ca –

“Taṃ tatha gatimā dhitimā, mutimā atthadassimā;  
Sānkhātā sabbadhammānaṃ, vidhuro etadabravī”ti

Idametassatthassa sādhaṃ vacanaṃ. “Atthadassimā, atthadassimā, atthadassimanto. Atthadassimantaṃ” iccādī netabbaṃ. Pāpam assa atthīti **pāpimā**, akusalarāsisamannāgato māro. Puttā assa atthīti **puttimā**, bahuputto. “Socati puttehi puttimā”ti ettha hi bahuputto “puttimā”ti vuccati. Cando assa atthīti **candimā**. Candoti cettha candavimānamadhippetam, candavimānavāsī pana devaputto “candimā”ti. Tathā hi “cando uggato, pamāṇato cando āyāma vitthārato ubbedhato ca ekūnapaññāsayojano, parikkhepato tīhi yojanehi ūnadiyaḅḅhasatayojano”tiādīsū candavimānaṃ “cando”ti vuttaṃ. “Tathāgataṃ arahantaṃ, candimā saraṇam gato”tiādīsū pana candadevaputto “candimā”ti. Aparo nayo – cando assa atthīti **candimā**. Candoti cettha candadevaputto adhippeto, tannivāsattānabhūtaṃ pana candavimānaṃ “candimā”ti. Tathā hi “rāhu candaṃ pamuñcassu, cando maṇimayavimāne vasatī”tiādīsū candadevaputto “cando”ti vutto.

“Yo have daharo bhikkhu, yuñjati buddhasāsane;  
Somaṃlokaṃ pabhāseti, abbhā muttova candimā”ti

Ādīsū pana tannivāsattānabhūtaṃ candavimānaṃ “candimā”ti vuttaṃ. Iti “cando”ti ca “candimā”ti ca candadevaputtassapi candavimānassapi nāmanti veditabbam. Tatra “pāpimā puttimā candimā”ti imāni **pāpasaddādito** “tadassatthi” iccetasmiṃ atthe pavattassa **imantupaccayassa** vasena siddhimupāgatānīti gahetabbāni.

Nanu ca bho **mantupaccayavaseneva** sādhetabbānīti? Na, katthacipi akārantato **mantuno** abhāvā. Nanu ca bho evaṃ santepi **pāpa putta candato** paṭhamaṃ ikārāgamaṃ katvā tato **mantupaccayaṃ** katvā sakkā sādhetunti? Sakkā rūpamattasijjhanato, nayo pana sobhano na hoti. Tathā hi **pāpa puttādito** akārantato ikārāgamaṃ katvā **mantupaccaye** vidhiyamāne aññehi

**guṇayasādīhi akārantehi ikārāgamaṃ katvā mantupaccayassa kātabbatāpasaṅgo siyā.** Na hi anekesu pālisatasahassee katthacipi **akārantato guṇa yasādito ikārāgamaṃ saddhiṃ mantupaccayo** dissati, aṭṭhānattā pana **pāpa puttādito akārantato ikārāgamaṃ akatvā imantupaccaye** kateyeva “pāpimā puttīmā” tiādīni sijjhantīti.

Evam santepi bho kasmā **kaccāyanappakarane mantupaccayova vutto, na imantupaccayoti?** Dvayampi vuttameva. Kathaṃ nāyatīti ce? Yasmā tatha “tapādito sī, daṇḍādito ika ī, madhvādito ro, guṇādito vantū” ti imāni cattāri suttāni sannihitodantasaddabhāvena vatvā majjhe “satyādīhi mantū” ti aññathā suttam vatvā tato sannihitodantavasena “saddhādito ṇā” ti suttam vuttam, tasmā tatha “satyādīhimantū” ti visadisam katvā vuttassa suttassa vasena **imantu paccayo** ca vuttoti viññāyati. **Pakati hesācariyānaṃ yena kenaci ākārena attano adhippāyaviññāpanaṃ.** Ettha ca dutiyo attho sarasandhivasena gahetabbo. Tathā hissa “satyādīhi mantū” ti paṭhamo attho, “satyādīhi imantū” ti dutiyo attho. Iti “seto dhāvati” ti payoge viya “satyādīhi mantū” ti sutte bhinnasattisamavetavasena atthadvayapaṭipatti bhavati, tasmā paramasukhumasugambhīratthavatā anena suttana katthaci **sati gati setu goiccādito mantupaccayo icchito.** Katthaci **sati pāpa puttaiccādito imantupaccayo icchitoti daṭṭhabbaṃ.**

Yasmā pana **satisaddo mantuvasena gatidhīsethugo** iccādīhi, **imantuvasena pāpaputtādīhi** ca samānagatikattā tesam pakārabhāvena gahito, tasmā evam suttattho bhavati “satyādīhi mantu satippakārehi saddehi **mantupaccayo hoti imantupaccayo** ca yathārahaṃ ‘tadassatthi’ iccetasmiṃ atthe” ti. Ayaṃ panettha adhippāyo – yathā “satimā” ti ettha satīti **ikārantato mantupaccayo hoti,** tathā “gatimā, dhīmā, setumā, gomā” tiādīsu **ikāranta ikāranta ukārantaniccokārantato mantupaccayo hoti.** Yathā ca “satimā” ti ettha “satī” ti **ikārantato imantupaccayo hoti,** tathā “gatimā, pāpimā, puttīmā” tiādīsu **ikāranta akārantato imantupaccayo hoti.** Evam satippakārehi saddehi yathāsambhavaṃ **mantu imantupaccayā** hontīti.

Yajjevam paccayadvayavidhāyakaṃ “daṇḍādito ika ī” ti suttam viya “satyādito imantu mantū” ti vattabbaṃ, kasmā nāvocāti? Tathā avacane kāraṇamatthi. Yadi hi “daṇḍādito ika ī” ti suttam viya “satyādito imantu mantū” ti suttam vuttam siyā, ekakkhaṇeyeva **imantu mantūnaṃ** vacanena **daṇḍasaddato sambhūtaṃ “daṇḍiko daṇḍi”** ti rūpadvayamiva **satigati**tiādītopi visadisarūpadvayamicchitabbaṃ siyā, tañca natthi, tasmā “satyādito imantu mantū” ti na vuttam. Apica tathā vutte bavhakkharatāya ganthagaruṭā siyā. Yasmā ca suttana nāma appakkharena asandiddhena sāravantena gūlhaninnayena sabbatomukhena anavajjena bhavitabbaṃ. **Kaccāyane** ca yebhuyyena tādīsāni gambhīratthāni suvisadaññāvisayabhūtāni suttāni dissanti “upājhadhikissaravacane, sarā sare lopa” ntiādīni, idampi tesamaññataram, tasmā “satyādito imantu mantū” ti na vuttam. Evam suttopadese akatepi **imantunopi** gahaṇattham bhinnasattisamavetavasena “satyādīhi mantū” ti vuttanti daṭṭhabbaṃ.

Aparo nayo – “tapādito sī” tiādīsu **todantasaddassa** bahuvacanantatā na suṭṭhu pākāṭā **topaccayassa** ekatthabavhatthesu vattanato, “satyādīhi mantū” ti ettha pana **hisaddassa** bahuvacanatthātā atīva pākāṭā, tasmā bahuvacanaggahaṇena **imantu paccayo** hotītipi daṭṭhabbaṃ. Nanu ca bho vināpi **imantupaccayena** pāpamassatthīti pāpī, pāpī eva pāpimāti sakatthe **māpaccaye** kateyeva “pāpimā puttīmā” tiādīni sijjhanti “chaṭṭhamo so parābhavo” ti ettha **mapaccayena** “chaṭṭhamo” ti padaṃ viyāti? Atinayaññū bhavaṃ, atinayaññū nāmāti bhavaṃ vattabbo, na pana bhavaṃ saddagatiṃ jānāti, saddagatiyo ca nāma bahuvīdhā. Tathā hi chaṭṭhoyeva chaṭṭhamo, “suttameva suttanto” tiādīsu **purisanayena** yojetabbā saddagati, “devoyeva devatā” tiādīsu **kaññānayena** yojetabbā saddagati, “diṭṭhi eva diṭṭhigata” ntiādīsu **cittanayena** yojetabbā saddagati. Evamvidhāsu saddagatīsu “pāpī eva pāpimā” tiādīkaṃ kataram saddagatiṃ vadesi? “Satthā rājā brahmā sakhā attā sā pumā” tiādīsu ca kataram saddagatiṃ vadesi? Katarasaddantogadham katarāya ca nāmikapadamālayaṃ yojetabbaṃ maññāsīti? So evam puṭṭho addhā uttari kiñci adisvā tuṅhī bhavissati, tasmā tādiso nayo na gahetabbo. Tādisasmiñhi naye “pāpimatā pāpimato” tiādīni rūpāni na sijjhanti, **imantupaccayanayena** pana sijjhanti, tasmā ayameva nayo pasatthataro āyasmantehi sammā citte ṭhapetabbo. Atridaṃ nidassanaṃ –

“Jayo hi buddhassa sirīmato ayaṃ,

Mārassa ca pāpimato parājayo;  
Ugghosayum bodhimaṇḍe pamoditā,  
Jayam tadā devagaṇā mahesino’’ti ca,

“Sākhāpattaphalūpeto, khandhimāvamahādumo’’ti ca.

Pāpimā, pāpimā, pāpimanto. Pāpimantaṃ. Sesam neyyam, esa nayo “khandhimā, puttimā’’tiādīsupi.

Idāni yathāpāvacaṇaṃ kiñcīdeva **himavantu satimantā**dīnaṃ viśesaṃ brūma. Himavantova pabbato. Satimaṃ bhikkhuṃ. Bandhumaṃ rājānaṃ. Candimaṃ devaputtaṃ. Satimassa bhikkhuno. Bandhumassa rañño. Iddhimassa ca parassa ca ekakkhaṇe cittaṃ uppajjati. Iccādi viśeso vedītabbo. Apicettha “āyasmantā’’ti dvīnaṃ vattabbavacaṇaṃ, “āyasmanto’’ti bahūnaṃ vattabbavacaṇanti ayampi viśeso vedītabbo. Tathā hi “dvīnaṃ ārocetena ‘āyasmantā dhārentū’’ti, tiṇṇaṃ ārocetena ‘āyasmanto dhārentū’’ti vattabba’’nti vuttaṃ. “Tiṇṇa’’nti cettha kathāsīsamattaṃ, tena catunnaṃ pi pañcannaṃ pi atirekasatānaṃ pi dāssitaṃ hoti. Bahavohi upādāya “uddiṭṭhā kho āyasmanto cattāro pārājikā dhammā’’tiādīkā pāḷiyo ṭhapitā. Tattha “āyasmantā’’tidam vinayavohāravasena dveveva sandhāya vuttatā na sabbasādhāraṇaṃ. Vinayavohārañhi vajjetvā aññasmiṃ vohāre na pavattati. “Āyasmanto’’tidam pana sabbattha pavattatīti dvīnaṃ viśeso vedītabbo.

Tatra “himavanto’’ti idam yebhuyyenekavacaṇaṃ bhavati, katthaci bahuvacaṇampi, tenāha **niruttipiṭake** therō “himavā tiṭṭhati, himavanto tiṭṭhanti’’ti. “Himavantova pabbato’’ti ayam ekavacaṇanayo yathārutapāḷivasena ghettabbo. Yathārutapāḷi ca nāma –

“Dūre santo pakāsanti, himavantova pabbato;  
Asantettha na dissanti, rattiṃ khittā yathā sarā.

Aham tena samayena, nāgarājā mahiddhiko;  
Atulo nāma nāmena, puññavanto jutindharo.

Gatimanto satimanto, dhitimanto ca so isi;  
Saddhamadhārako therō, ānando ratanākaro’’

Iccādi. Ettha “puññavanto’’tiādīni anekesu ṭhānesu bahuvacaṇabhāvena punappunaṃ vadantānīpi katthaci ekavacaṇāni honti, ekavacaṇabhāvo ca nesaṃ gāthāvisaye dissati, tasmā tāni yathāpāvacaṇaṃ ghettabbāni.

Evam **himavantusatimantusaddādīnaṃ** viśesaṃ ṇatvā puna liṅgantavasena dviliṅgakapadānamattho ca pakatirūpassa nāmikapadamālā ca padānaṃ sadisāsadisatā ca vavatthapetabbā.

Tatra hi “sirimā’’ti padaṃ sutisāmaññavasena liṅgadvaye vattanato dvidhā bhijjati. “Sirimā puriso’’ti hi atthe ākārantaṃ pulliṅgaṃ, “sirimā nāma devī’’ti atthe ākārantaṃ itthiliṅgaṃ, ubhayampetaṃ ukārantaṭāpakatikā. Atha vā pana pacchimaṃ ākārantaṭāpakatikaṃ, sirī yassa atthi so sirimāti pulliṅgavasena nibbacaṇaṃ, sirī yassa atthi sā sirimāti itthiliṅgavasena nibbacaṇaṃ. Atrimāni kiñcāpi sutivasena nibbacaṇatthavasena ca aññamaññaṃ samānatthāni, tathāpi purisapadatthaitthipadatthavācakkatā bhinnatthānīti vedītabbāni. Esa nayo aññesupi īdisesu ṭhānesu netabbo. Sirimā, sirimā, sirimanto. Sirimantaṃ, sirimante. Sirimatā, sirimantena. **Guṇavantu**saddasseva nāmikapadamālā. Sirimā, sirimā, sirimāyo. Sirimaṃ, sirimā, sirimāyo. Sirimāya. Vakkhamānakaññāyena ñeyyā. Evam dvidhā bhinnānaṃ samānasutikasaddānaṃ nāmikapadamālāsu padānaṃ sadisāsadisatā vavatthapetabbā. Samānanibbacaṇatthassapi hi asamānasutikassa “sirimā’’ti saddassa nāmikapadamālāyaṃ padānaṃ imehi padehi kācīpi samānatā na labbhati. Atridaṃ vuccati –

“Sirimā’’ti padaṃ dvedhā, pumitthīsu pavattito;



Bhijjatīti vibhāveyya, ettha pullīngamicchitaṃ.

Iti **abhibhavitā** padena visadisāni **guṇavāsati**mādīni padāni dassitāni saddhiṃ nāmikapadamālāhi. Idāni aparānīpi tabbisadisāni padāni dassessāma saddhiṃ nāmikapadamālāhi. Seyyathidaṃ?

Rājā brahmā sakhā attā, ātumā sā pumā rahā;  
Daḷhadhammā ca paccakkha-dhammā ca vivaṭacchadā.

Vattahā ca tathā vutta-sirā ceva yuvāpi ca;  
Maghava addha muddhādi, viññātabbā vibhāvinā.

Ettha “sā”ti padameva **ākārantatāpakatikamākārantam**, sesāni pana **ākārantatāpakatikāni** **ākārantāni**.

Rājā, rājā, rājāno. Rājānaṃ, rājāṃ, rājāno. Raññā, rājīnā, rājūhi, rājūbhi. Rañño, rājino, raññaṃ, rājūnaṃ, rājānaṃ. Raññā, rājūhi, rājūbhi. Rañño, rājino, raññaṃ, rājūnaṃ, rājānaṃ. Raññe, rājini, rājūsu. Bho rāja, bhavanto rājāno, bhavanto rājā iti vā, ayamamhākaṃ ruci.

**Niruttipiṭakādīsu** “rājā”ti bahuvacanaṃ na āgataṃ, **cūlaniruttiyaṃ** pana āgataṃ. Kiñcāpi niruttiṭakādīsu na āgataṃ, tathāpi “netādisā sakhā hontī, labbhā me jīvato sakhā”ti pāḷiyaṃ bahuvacane kavacana vasena “sakhā”ti padassa dassanato “rājā”ti bahuvacanaṃ icchitabbameva. Tathā “brahmā, attā”iccādīnīpi bahuvacanaṃ taggatikkattā vinā kenaci rūpavisesena.

Ettha ca “gahapatiko nāma ṭhapetvā rājāṃ rājabhogaṃ brāhmaṇaṃ avaseso gahapatiko nāmā”ti dassanato rājanti vuttaṃ, idaṃ pana niruttiṭake na āgataṃ. “Sabbadattena rājīnā”ti dassanato “rājīnā”ti vuttaṃ. “Ārādhayati rājānaṃ, pūjaṃ labhati bhattusū”ti dassanato catutthīchaṭṭhīvasena “rājāna”nti vuttaṃ. **Kaccāyanarūpasiddhi**ganthesu pana “rājena, rājehi, rājebhi. Rājesū”ti padāni vuttāni. Cūlaniruttiniruttipiṭakesu tāni nāgatāni, anāgatabhāvoyeva tesam yuttataro pāḷiyaṃ adassanato, tasmā etthetāni amhehi na vuttāni. Pāḷinaye hi upaparikkhiyamāne īdisāni padāni samāseyyeva passāma, na panāññātra, atrime payogā – “āvutthaṃ dhammarājēnā”ti ca, “sivirājēna pesito”ti ca, “pajāpatissa devarājassa dhajagga”nti ca, “nikkhamante mahārāje, sivīnaṃ raṭṭhavaḍḍhane”ti ca, evaṃ pāḷinaye upaparikkhiyamāne “rājēnā”tiādīni samāseyyeva passāma, na kevalaṃ pāḷinaye porāṇaṭṭhakathānayepi upaparikkhiyamāne samāseyyeva passāma, na panāññātra, evaṃ santepi suṭṭhu upaparikkhitabbamidaṃ ṭhānaṃ. Ko hi nāma sātṭhakathe teṭṭake buddhavacane sabbaso nayaṃ sallakkhetuṃ samattho aññātra pabhinnapaṭisambhīdehi khīṇāsavehi.

Ettha ca samāsantagatarāja-saddassa nāmikapadamālāyo dvidhā vuccante **okārantākārantavasena**. **Tatrokārantā** “mahārājo yuvarājo sivirājo dhammarājo”iccevamādayo bhavanti. **Ākārantā** pana “mahārājā yuvarājā sivirājā dhammarājā”iccevamādayo. Ettha kiñcāpi pāḷiyaṃ porāṇaṭṭhakathāsu ca “mahārājo”tiādīni na santi, tathāpi “sabbamitto sabbasakho, sabbabhūtānukampako”ti pāḷiyaṃ “sabbasakho”ti dassanato “mahārājo”tiādīnīpi avassamicchitabbāni. Tathā hi samāsesu “dhammarājēna, dhammarājassā”tiādīni dissanti. Etāni okārantarūpāni eva, **nākārantarūpāni**. Mahārājo, mahārājā. Mahārājāṃ, mahārāje. Mahārājēna, mahārājehi, mahārājebhi. Mahārājassa, mahārājānaṃ. Mahārājā, mahārājasmā, mahārājāmhā, mahārājehi, mahārājebhi. Mahārājassa, mahārājānaṃ. Mahārāje, mahārājasmīṃ, mahārājāmhī, mahārājesu. Bho mahārāja, bhavanto mahārājā. **Kaccāyanacūlaniruttin**ayehi pana “bho mahārājā”iti ekavacana bahuvacanaṃ nīpi daṭṭhabbāni. Yathā “mahārājo”ti **okārantapadassa** vasena, evaṃ “sivirājo dhammarājo devarājo”tiādīnāmpi **okārantapadānaṃ** vasena pakatirūpassa nāmikapadamālā yojetabbā.

Ayaṃ **panākārantavasena** nāmikapadamālā –

Mahārājā, mahārājā, mahārājāno. Mahārājānaṃ, mahārājāṃ, mahārājāno. Mahārājānaṃ,

mahārājinā, mahārājūhi, mahārājūbhi. Mahārañño, mahārājino, mahāraññaṃ, mahārājūnaṃ. Mahāraññā, mahārājūhi, mahārājūbhi. Mahārañño, mahārājino, mahāraññaṃ, mahārājūnaṃ. Mahāraññe, mahārājini, mahārājūsu. Bho mahārāja, bhavanto mahārājāno.

Idhāpi pakaraṇadvayanayena “bho mahārājā” iti ekavacanabahuvacanānīpi daṭṭhabbāni. Yathā ca “mahārājā” ti ākārantaḥpadassa vasena, evaṃ “sivirājā, dhammarājā, devarājā” tiādīnāmpi ākārantaḥpadānaṃ vasena pakatirūpassa nāmikapadamālā yojetabbā.

Idha aparāpi atthassa pākāṭikaraṇatthaṃ kriyāpadehi saddhiṃ yojetvā ākārantaokārantānaṃ missakavasena nāmikapadamālā vuccate –

Mahārājā, mahārājō tiṭṭhati, mahārājāno, mahārājā tiṭṭhanti. Mahārājānaṃ, mahārājānaṃ passati, mahārājāno, mahārāje passati. Mahāraññā, mahārājinā, mahārājena kataṃ, mahārājūhi, mahārājūbhi, mahārājeḥi, mahārājebhi kataṃ. Mahārañño, mahārājino, mahārājassa dīyate, mahāraññā, mahārājā, mahārājasmā, mahārājasmā nissaṭaṃ, mahārājūhi, mahārājūbhi, mahārājeḥi, mahārājebhi nissaṭaṃ. Mahārañño, mahārājino, mahārājassa pariggaho, mahāraññaṃ, mahārājūnaṃ, mahārājānaṃ pariggaho. Mahāraññe, mahārājini, mahārāje, mahārājasmim, mahārājasmimhi patiṭṭhitā, mahārājūsu, mahārājesu patiṭṭhitā. Bho mahārāja tvaṃ tiṭṭha, bhonto mahārājāno, mahārājā tumhe tiṭṭhathāti. Evaṃ “yuvarājā, yuvarājō” tiādīsūpi.

Kecettha vadeyyuṃ “kasmā pakaraṇakattunā imasmim ṭhāne mahanto vāyāmo ca mahanto ca parakkamo kato, nanvetesūpi padesu kānici buddhavacane vijjanti, kānici na vijjanti? Viññūhi te evaṃ vattabbā “pakaraṇakattārenettha so ca mahanto vāyāmo so ca mahanto parakkamo sātṭhakathe navaṅge satthusāsane saddesu ca atthesu ca sotārānaṃ suṭṭhu kosalluppādanena sāsanaṃsopakarattaṃ kato, yāni cetāni tena padāni dassitāni, etesu kānici buddhavacane vijjanti, kānici na vijjanti. Ettha yāni buddhavacane vijjanti, tāni vijjamānavasena gahitāni. Yāni na vijjanti, tāni porāṇaṭṭhakathādīsū vijjamānavasena pāḷinayavasena ca gahitāni” ti. Atrāyaṃ saṅkhepato adhippāyavibhāvanā –

“Idaṃ vatvā mahārājā, kaṃso bārāṇasiggaho;  
Dhanuṃ tūṇiṇca nikkhippa, saṃyamaṃ ajjhupāgami” ti

Idaṃ ākārantaḥsā **mahārājas**addassa nidassanaṃ. Yasmā “sabbasakho” ti pāḷi vijjati, tasmā tena nayena “mahārājō” tipi okārantaḥ diṭṭho nāma hoti **purisa**nayena yojetabbo ca. Teneva ca “tamabravi mahārājā. Nikkhamante mahārāje” tiādīni dissanti.

Evaṃ **mahārājas**addassa okārantaḥsā siddhe “mahārājā, mahārājasmā, mahārājasmā” ti pañcamiyā ekavacanaṅca “mahārāje, mahārājasmim, mahārājasmimhi” ti sattamiyā ekavacanaṅca siddhāni eva honti pāḷiyaṃ avijjamānānāmpi nayavasena gahetabbā. “Rājena, rājassā” tiādīni pana nayavasena gahetabbāni na honti. Kasmāti ce? Yasmā “rājā brahmā sakhā attā” iccevaṃmādīni “puriso urago” tiādīni viya aññaṃaññaṃ sabbathā sadisāni na honti. Tathā hi nesaṃ “raññā brahmunā sakhinā attanā attena sānā pumunā” tiādīni visadisānīpi rūpāni bhavanti, tasmā tāni na sakkā nayavasena jānituṃ. Evaṃ dujjānattā pana pāḷiyaṃ porāṇaṭṭhakathāsu ca yathārutapadāneva gahetabbāni. **Mahārājas**addādīnaṃ pana okārantaḥsā siddheyaṃ “**purisa**nayogadhā ime saddā” ti nayaggahaṇaṃ dissati, tasmā amhehi nayavasena “mahārājā, mahārājasmā” tiādīni vuttāni. Yathā hi –

“Etañhi te durājānaṃ, yaṃ sesi matasāyikaṃ;  
Yassa te kaḍḍhamānassa, hatthā daṇḍona mucatī” ti

Ettha “hatthā” ti, “attadaṇḍā bhayaṃ jāta” nti ettha pana “daṇḍā” ti ca okārantaḥsā pañcamiyekavacanaṃsā dassanato “uragā, paṭaṅgā, vihagā” tiādīnīpi okārantaḥsā pañcamiyekavacanaṃsāni gahetabbāni honti. Yathā ca “dāṭṭhīni mātimaññaḥvho, siṅgālo mama pāṇado” ti ettha “maññaḥvho” ti, “suddhā suddhehi saṃvāsaṃ, kappayavho patissatā” ti ettha pana “kappayavho” ti ca kriyāpadassa dassanato “gacchavho, bhujjavho, sayavho” tiādīnīpi gahetabbāni

honti. Gaṇhanti ca tādīsāni padarūpāni sāsane sukusalā kusalā, tasmā amhehipi nayaggāhavasena “mahārājā, mahārājasma” tiādīni vuttāni. Nayaggāhavasena pana gahaṇe asati kathaṃ nāmikapadamālā paripuṇṇā bhavissanti, satiyeva tasmim paripuṇṇā bhavanti.

Tathā hi buddhavacane anekasatasahassāni nāmikapadāni kriyāpadāni ca pāṭiekkam pāṭiekkam ekavacanabahuvacanakāhi sattahi aṭṭhahi vā nāmavibhattīhi channavutiyā ca ākhyātikavacanehi yojitāni na santi, nayavasena pana santiyeva, iti nayavasena “mahārājā, mahārājasma” tiādīni amhehi ṭhapitāni. “Mahārājā tiṭṭhanti, mahārājā tumhe tiṭṭhathā” ti imāni pana “atha kho cattāro mahārājā mahatiyā ca yakkhasenāya mahatiyā ca kumbhaṇḍasenāyā” ti dassanato,

“Cattāro te mahārājā, samantā caturō disā;  
Daddaḥhamānā aṭṭhaṃsu, vane kāpilavatthave” ti

Dassanato ca vuttāni. “Mahārāja” ntiādīnipi pālīnca pālīnayañca disvā eva vuttāni. Asamāse “rājam, rājenā” tiādīni na passāma, tasmā suṭṭhu vicāretabbamidaṃ ṭhānaṃ. Idañhi duddasaṃ vīrajātīnā jānitabbaṭṭhānaṃ. Sace panāyasmanto buddhavacane vā porāṇikāsu vā aṭṭhakathāsu asamāse “rājam, rājenā” tiādīni passeyyātha, tadā sādhuṃ manasi karotha. Ko hi nāma sabbappakārena buddhavacane vohārapabbhedaṃ jānitum samattho aññatra pabhinnapaṭisambhīdehi mahākhīṇāsavehi.

Vuttañhetam bhagavatā –

“Vītataṇho anādāno, niruttipadakovido;  
Akkharānaṃ sannipātaṃ, jaññā pubbāparāni cā” ti.

Brahmā, brahmā, brahmāno. Brahmānaṃ, brahmaṃ, brahmāno. Brahmunā, brahmehi, brahmehi, brahmūhi, brahmūbhi. Brahmānaṃ, brahmūnaṃ, brahmūnaṃ. Brahmunā, brahmehi, brahmehi, brahmūhi, brahmūbhi. Brahmānaṃ, brahmūnaṃ, brahmūnaṃ. Brahmani, brahmesu, bho brahma, bho brahme, bhavanto brahmāno.

**Yamakamahātheraruciya** “bho brahmā” iti bahuvacanaṃ vā. Ettha pana “paṇḍitapurisehi devehi brahmūhi” ti **ṭīkā**vacanassa dassanato, “brahmūnaṃ vacīghoso hoti” ti ca “brahmūnaṃ vimānādīsū chandarāgo kāmāsavo na hoti” ti ca **aṭṭhakathā**vacanassa dassanato, “vihimsasaññī paguṇaṃ na bhāsiṃ, dhammaṃ paṇītaṃ manujesu brahme” ti āhaccabhāsītassa ca dassanato “brahmūhi, brahmūbhi, brahmūnaṃ, brahme” ti padāni vuttāni, etāni cūḷaniruttiniruttipīṭakakaccāyanesu na āgatāni.

Sakhā, sakhā, sakhino, sakhāno, sakhāyo. Sakhaṃ, sakhāraṃ, sakhānaṃ, sakhino, sakhāno, sakhāyo. Sakhinā, sakhārehi, sakhārebhi, sakhehi, sakhebhi. Sakhissa, sakhino, sakhīnaṃ, sakhārānaṃ, sakhānaṃ. Sakhārasma, sakhinā, sakhārehi, sakhārebhi, sakhehi, sakhebhi. Sakhissa, sakhino, sakhīnaṃ, sakhārānaṃ, sakhānaṃ. Sakhe, sakhesu, sakhāresu. Bho sakha, bho sakhā, bho sakhi, bho sakhī, bho sakhe, bhavanto sakhino, sakhāno, sakhāyo.

**Yamakamahātheramatena** “bho sakhā” iti bahuvacanaṃ vā. Pāḷiyaṃ pana **suvanṇakakkaṭajātaka** “hare sakhā kissa nu maṃ jahāsī” ti dīghavasena vutto **sakhāsaddo** ālapanekavacanaṃ, tasmā yamakamahātheranayo na yujjātīti ce? No na yujjati. Yasmā “netādīsā sakhā honti, labbhā me jīvato sakhā” ti **manoajātaka sakhāsaddo** ekavacanampi hoti bahuvacanampi. Tathā hi tattha paṭhamapāde bahuvacanaṃ, dutiyapāde panekavacanaṃ, tasmā yamakamahātherena paccattālanabahuvacanaṭṭhāne **sakhāsaddo** vutto. Ettha ca “sabbamitto sabbasakho, sabbabhūtānukampako” ti pāṭhānulomena samāse labbhamānassa **sakhasaddassa** nāmikapadamālā bhavati “sabbasakho, sabbasakhā, sabbasakhaṃ, sabbasakhe” tiādīnā **purisanayena**. Tatrāyaṃ samāsaviggaho – sabbesaṃ janānaṃ sakhā, sabbe vā janā sakhino etassāti sabbasakho, yathā sabbaverīti.

Attā, attā, attāno. Attānaṃ, attam, attāno. Attanā, attena, attanehi, attanebhi. Attano, attānaṃ.

Attanā, attanehi, attanebhi. Attano, attānaṃ. Attani, attanesu. Bho atta, bhavanto attā, bhonto attāno.

Ettha pana attaṃ niraṅkatvāna piyāni sevati.

“Sace gacchasi pañcālaṃ, khippa’ mattaṃ jahissasi;  
Migaṃ panthānupannaṃva, mahantaṃ bhayamessati” ti

Pāḷīsu “atta” nti dassanato “atta” nti idha vuttaṃ, “attena vā attaniyena vā” ti pāḷidassanato pana “attenā” ti. **Cūlaniruttiyaṃ** pana “attassā” ti catutthīchaṭṭhīnamekavacanaṃ āgataṃ, etaṃ kaccāyane niruttiṭṭhake ca na dissati. Katthaci pana “attesū” ti āgataṃ. Sabbānetāni sātṭhakathaṃ jīnatanti oloketvā gahetabbāni.

“Ātumā, ātumā, ātumāno. Ātumānaṃ, ātumaṃ, ātumāno. Ātumena, ātumehi, ātumebhi” tiādīnā **purisanayena** vatvā “bho ātuma, bhavanto ātumā, ātumāno” ti vattabbaṃ.

Tatra **attasaddassa** samāse “bhāvitatto, bhāvitattā. Bhāvitattaṃ, bhāvitatte. Bhāvitattena, bhāvitattehi, bhāvitattebhi” ti **purisanayena** nāmikapadamālā yojetabbā.

Sā, sā, sāno. Sānaṃ, sāne. Sānā, sānehi, sānebhi. Sāssa, sānaṃ. Sānā, sānehi, sānebhi. Sāssa, sānaṃ. Sāne, sānesu. Bho sā, bhavanto sāno. **Sā** vuccati sunakho.

Ettha ca “na yattha sā upaṭṭhito hoti. Sāva vārenti sūkara” nti nidassanapadāni. Keci pana **sāsaddassa** dutiyātatīyādīsu “saṃ, se. Senā” tiādīni rūpāni vadanti, taṃ na yuttaṃ. Na hi tāni “saṃ, se. Senā” tiādīni rūpāni buddhavacane ceva aṭṭhakathādīsu ca niruttiṭṭhake ca dissanti. Evaṃ pana **niruttiṭṭhake** vuttaṃ “sā tiṭṭhati, sāno tiṭṭhanti. Sānaṃ passati, sāne passati. Sānā kataṃ, sānehi kataṃ, sānebhi kataṃ. Sāssa dīyate, sānaṃ dīyate. Sānā nissaṭaṃ, sānehi nissaṭaṃ, sānebhi nissaṭaṃ. Sāssa pariggaho, sānaṃ pariggaho. Sāne patiṭṭhitaṃ, sānesu patiṭṭhitaṃ. Bho sā, bhavanto sāno” ti, tasmā niruttiṭṭhake vuttanayena nāmikapadamālā gahetabbā.

Atridaṃ vattabbaṃ – yathā “sehi dārehi asantuṭṭho” tiādīsu pulliṅge vattamānassa “sako” iti atthavācākassa sasaddassa “attano ayanti so” ti etasmiṃ atthe “so, sā. Saṃ, se. Sena, sehi, sebhi. Sassa, sānaṃ. Sā, sasmā, samhā, sehi, sebhi. Sassa, sānaṃ. Se, sasmim, samhi, sesū” ti **purisanayena** rūpāni bhavanti, na tathā sunakhavācākassa **sāsaddassa** rūpāni bhavanti. Yathā vā “himsanti attasambhūtā, tacasāraṃva saṃ phalaṃ. Sāni kammāni tappenti, kosalaṃ sena’ santuṭṭhaṃ, jīvaggāhaṃ agāhayī” tiādīsu napuṃsakaliṅge vattamānassa sakamiccathavācākassa **sasaddassa** “saṃ, sāni, sā. Saṃ, sāni, se. Sena, sehi, sebhi. Sassa, sānaṃ. Sā, sasmā, samhā, sehi, sebhi. Sassa, sānaṃ. Se, sasmim, samhi, sesū” ti **cittanayena** rūpāni bhavanti, na tathā sunakhavācākassa **sāsaddassa** rūpāni bhavanti. Evaṃ sante kasmā tehi ācariyehi dutiyātatīyāthāne “saṃ, se. Senā” ti vuttaṃ, kasmā ca pañcamīthāne “sā, sasmā, samhā” ti vuttaṃ, sattamīthāne ca “se, sasmim, samhi” ti ca vuttaṃ? Sabbametaṃ akāraṇaṃ, takkagāhamattena gahitaṃ akāraṇaṃ. Sunakhavācako hi **sāsaddo** ākārantatāpakatiko, na **purisa cittasaddādayo** viya ākārantatāpakatiko. Yāya imassa īdisāni rūpāni siyuṃ, sā ca pakati natthi. Na ceso “rājā, brahmā, sakhā, attā” iccevamādayo viya paṭhamaṃ ākārantabhāve ṭhatvā pacchā paṭiladdha ākārantatā, atha kho niccama ākārantatāpakatiko **gosaddo** viya niccama ākārantatāpakatiko. Niccama ākārantatāpakatikassa ca evarūpāni rūpāni na bhavanti, tasmā **niruttiṭṭhake** pabhinnapaṭisambhidena āyasmata **mahākaccāyanena** na vuttāni. Sacepi maññeyyūṃ “attaṃ, attenā” ti ca dassanato “saṃ, senā” ti imāni pana gahetabbāni” ti. Na gahetabbāni “rājā, brahmā, sakhā, attā, sā, pumā” iccevamādināṃ aññamaññaṃ padamālāvasena visadisattā nayavasena gahetabbākārassa asambhavato. Īdise hi thāne nayaggāhavasena gahaṇaṃ nāma sadosaṃyeva siyā, tasmā nayaggāhavasena na gahetabbāni.

Aparampi atra vattabbaṃ – yathā hi “sāhi nārīhi te yanti” ti vutte “attano nārī” ti, “sā nārī” ti evaṃ atthavato itthiliṅgassa **kaññāsaddena** sadisassa **sāsaddassa** “sā, sā, sāyo. Saṃ, sā, sāyo. Sāya, sāhi, sābhi. Sāya, sānaṃ. Sāya, sāhi, sābhi. Sāya, sānaṃ. Sāya, sāyaṃ, sāsū” ti **kaññānaya**na rūpāni

bhavanti, na tathā imassa sunakhavācakassa **sāsaddassa** rūpāni bhavanti. Evaṃ sante kasmā te ācariyā tatiyābahuvacanaṭṭhāne ca “sāhi, sābhī”ti rūpāni icchanti, kasmā ca sattamībahuvacanaṭṭhāne “sāsū”ti? Idampi akāraṇaṃ **ākārantapullīngattā**. Kasmā ca pana catutthīchaṭṭhekavacanaṭṭhāne pubbakharassa rassavasena “sassa”iti rūpaṃ icchanti? Idampi akāraṇaṃ sunakhavācakassa **sāsaddassa** **ākārantatāpakatikattā**. **Ākārantatāpakatikassa** ca **sāsaddassa** yathā **ākārantatāpakatikassa** **purisasaddassa** “purisassā”ti catutthīchaṭṭhekavacanaṭṭhāne bhavati evarūpassa rūpassa abhāvato. Teneva āyasmā kaccāno **niruttiṭṭake** sunakhavācakassa **sāsaddassa** rūpaṃ dassento catutthīchaṭṭhekavacanaṭṭhāne pubbakharassa dīghavasena “sassa”iti rūpamāha. Kasmā ca pana te ācariyā catutthēkavacanaṭṭhāne “sāya”iti rūpaṃ icchanti? Idampi akāraṇaṃ, ṭhapetvā hi **ākārantitthilīnge** **ghasaññato** **ākārato** paresaṃ **nādīnaṃ** **āyādesaṅca** **ākārantato** punnapuṃsakalīngato parassa catutthēkavacanaṭṭhāne **āyādesaṅca** **ākārantapullīnge** **aghatato** **ākārantato** parassa catutthēkavacanaṭṭhāne **āyādeso** na dissati. **Niruttiṭṭake** ca tādisaṃ rūpaṃ na vuttaṃ, avacanaṃyeva yuttataraṃ buddhavacane aṭṭhakathādīsu ca anāgamanato. Yā panamhehi niruttiṭṭakamā nissāya buddhavacanaṅca sunakhavācakassa **sāsaddassa** nāmikapadamālā vuttā, sāyeva sārato paccetabbā. Etthāpi nānāatthesu vattamānānaṃ līngattayapariyāpannānaṃ **sā so sammiccetesam** tiṇṇaṃ padānaṃ pakatirūpassa nāmikapadamālāsu padānaṃ sadisāsadisatā daṭṭhabbā.

Ettha siyā – yo tumhehi **sāsaddo** “**taṃsaddatthe** ca sunakhe ca sakamiccatthe ca vattati”ti icchito, kathaṃ taṃ “sā”ti vutteyeva “imassa atthassa vācako”ti jānanti? Na jānanti, payogavasena pana jānanti lokiyajānā ceva paṇḍitā ca. Payogavasena hi “sā maddī nāgamāruhi, nātibaddhamva kuṅjara”ntiādīsu **sāsaddassa** taṃsaddatthatā viññāyati, evaṃ **sāsaddo** **taṃsaddatthe** ca vattati. “Na yattha sā upaṭṭhito hoti. Bhagavato sājātimpī sutvā sattā amatarasabhāgino bhavanti”tiādīsu **sāsaddassa** sunakhavācakatā viññāyati.

“Annaṃ tavedaṃ pakataṃ yasassi,  
Taṃ khajjare bhuñjare piyyare ca;  
Jānāsi maṃ tvaṃ paradattūpajīviṃ,  
Uttiṭṭhapiṇḍaṃ labhataṃ sapāko”ti

Ettha pana **sāsaddassa** rassabhāvakarāṇena “sapāko”ti pāli ṭhitāti atthaṃ aggahetvā “sānaṃ sunakhānaṃ idaṃ maṃsanti sa”miti atthaṃ gahetvā “saṃ pacatīti sapāko”ti vuttanti daṭṭhabbaṃ. **Aṭṭhakathāyaṃ** pana “sapākoti sapākacaṇḍālo” icceva vuttaṃ. Tampi etadevatthaṃ dīpeti. Evaṃ **sāsaddo** sunakhe ca vattati. “Sā dārā jantūnaṃ piyā”ti vutte pana “sakā dārā sattānaṃ piyā”ti atthadīpanavasena **sāsaddassa** sakavācakatā paññāyati. Evaṃ **sāsaddo** sakamiccatthe ca vattati. Iti **sāsaddaṃ** payogavasena īdisatthassa vācakoti jānanti. Atridaṃ vuccati –

**Taṃsaddatthe** ca sunakhe,  
Sakasmimpi ca vattati;  
**Sāsaddo** so ca kho ñeyyo,  
Payogānaṃ vasena ve.

Ettha ca pāliyaṃ “na yattha sā upaṭṭhito hoti”ti ekavacanappayogadassanato ca,

“Asantā kira maṃ jammā, tāta tātāti bhāsare;  
Rakkhasā puttarūpena, sāva vārenti sūkara”nti

Bahuvacanappayogadassanato ca, **niruttiṭṭake** “sāno”iccādidassanato ca “sā, sā, sāno. Sānaṃ, sāne. Sānā”tiādīnā sunakhavācakassa **sāsaddassa** nāmikapadamālā kathitā.

Idāni **pumasaddassa** nāmikapadamālā vuccate –

Pumā, pumā, pumāno. Pumānaṃ, pumāne. Pumānā, pumānā, pumāna, pumānehi, pumānebhi. Pūmassa, pūmano, pumānaṃ. Pumānā, pumānā, pumānehi, pumānebhi. Pūmassa, pūmano, pumānaṃ. Pumāne, pumānesu. Bho puma, bhavanto pumā, pumāno. “Bho pumā”iti bahuvacane

nayopi ñeyyo.

Ettha pana –

“Thiyo tassa pajāyanti, na pumā jāyare kule;  
Yo jānaṃ pucchito pañhaṃ, aññathā naṃ viyākare”’ti

Ayaṃ pāḷi **pumasaddassa** bahuvacanabhāvasādhikā, **kaccāyane** “he pumaṃ”’iti sānusāraṃ ālapane kavacaṇaṃ dissati. Tadanekesu pāḷippadesesu ca aṭṭhakathāsu ca sānusārānaṃ ālapanavacaṇānaṃ adassanato idha na vadāmi. Upaparikkhitvā yuttaṃ ce, gahetabbaṃ. “Yasassi naṃ paññavantaṃ visayhā”’ti ettha pana chandānurakkhaṇatthaṃ āgamavasenevānusāro hoti, na sabhāvatoti daṭṭhabbaṃ. Ayaṃ **ākārantavasena** nāmikapadamālā.

“Soḷasitthisahassānaṃ,  
Na vijjati pumo tadā;  
Ahorattānamaccayena,  
Nibbato ahamekako”’ti ca,

“Yathā balākayonimhi, na vijjati pumo sadā;  
Meghesu gajjamaṇesu, gabbhaṃ gaṇhanti tā tadā”’ti ca

Pāḷidassanato pana **okārantavasena** nāmikapadamālā veditabbā.

Pumo, pumā. Pumaṃ, pume. Pumena, pumehi, pumebhi. Pumassa, pumānaṃ. Pumā, pumasmā, pumamhā, pumehi, pumebhi. Pumassa, pumānaṃ. Pume, pumasmim̃, pumamhi, pumesu. Bho puma, bhavanto pumā. “Bho pumā”’iti vā, evaṃ **pumasaddassa** dvidhā nāmikapadamālā bhavati.

Idāni missakanayo vuccate –

Pumā, pumo, pumā, pumāno. Pumānaṃ, pumaṃ, pumāne, pume. Pumānā, pumunā, pumena, pumānehi, pumānebhi, pumehi, pumebhi. Pumassa, pumuno, pumānaṃ. Pumānā, pumunā, pumā, pumasmā, pumamhā, pumānehi, pumānebhi, pumehi, pumebhi. Pumassa, pumuno, pumānaṃ. Pumāne, pume, pumasmim̃, pumamhi, pumānesu, pumesu. Bho puma, bhavanto pumāno, bhavanto pumā. “Bho pumāno, bho pumā”’iti vā.

Idāni **rahasaddassa** nāmikapadamālā vuccate –

**Rahā** vuccati pāpadhammo. Rahā, rahā, rahino. Rahānaṃ, rahāne. Rahinā, rahinehi, rahinebhi. Rahassa, rahānaṃ. Rahā, rahānehi, rahānebhi. Rahassa, rahānaṃ. Rahāne, rahānesu. Bho raha, bhavanto rahino, bhavanto rahā.

Idāni **daḷhadhammasaddassa** nāmikapadamālā vuccate –

Daḷhadhammā, daḷhadhammā, daḷhadhammāno. Daḷhadhammānaṃ, daḷhadhammāne. Daḷhadhamminā, daḷhadhammehi, daḷhadhammebhi. Daḷhadhammassa, daḷhadhammānaṃ. Daḷhadhamminā, daḷhadhammehi, daḷhadhammebhi. Daḷhadhammassa, daḷhadhammānaṃ. Daḷhadhamme daḷhadhammesu. Bho daḷhadhamma, bhavanto daḷhadhammāno, bhavanto daḷhadhammā. “Bho daḷhadhammāno, bho daḷhadhammā”’iti puthuvacanampi ñeyyaṃ, evaṃ **paccakkhadhammasaddassa** nāmikapadamālā yojetabbā.

Ettha ca “seyyathāpi bhikkhave cattāro dhanuggahā daḷhadhammā”’ti idaṃ nidassanaṃ. Imissaṃ pana pāḷiyaṃ “daḷhadhammā”’iti bahuvacana vasena āgatattā **daḷhadhammasaddo** ākārantotipi okārantotipi appasiddho tadantānaṃ bahuvacanabhāve tulyarūpattā. Tathāpi amhehi padamālā ākārantavaseneva yojitā. Idisesu hi ṭhānesu **daḷhadhammasaddo** ākārantotipi okārantotipi

vattum yujjateva aparibyattarūpattā. Aññasmiṃ pana pālīppadese atīva paribyatto hutvā okāraṇta **daḷhadhammas**saddo dvidhā dissati guṇasaddapaṇṇattivācakasaddavasena. Tattha “issatte casmi kusalo, daḷhadhammoti vissuto”ti ettha **daḷhadhammas**saddo okāraṇto guṇasaddo. “Bārāṇasiyaṃ daḷhadhammo nāma rājā rajjaṃ kāresi”ti ettha pana paṇṇattivācakasaddo. Evaṃ okāraṇto **daḷhadhammas**saddo dvidhā diṭṭho. Tassa pana “daḷhadhammo, daḷhadhammā. Daḷhadhammaṃ, daḷhadhamme”ti **purisanayena** nāmikapadamālā ñeyyā, **ākāraṇtokāraṇtānaṃ** vasena missakapadamālā ca. Kathaṃ?

Daḷhadhammā, daḷhadhammo, daḷhadhammāno, daḷhadhammā. Daḷhadhammānaṃ, daḷhadhammaṃ, daḷhadhammāne, daḷhadhamme. Daḷhadhamminā, daḷhadhammena, daḷhadhammehi, daḷhadhammebhi. Daḷhadhammassa, daḷhadhammānaṃ. Daḷhadhamminā, daḷhadhammā, daḷhadhammasmā, daḷhadhammahā, daḷhadhammehi, daḷhadhammebhi. Daḷhadhammassa, daḷhadhammānaṃ. Daḷhadhamme, daḷhadhammasmiṃ, daḷhadhammamhi, daḷhadhammesu. Bho daḷhadhamma, bhavanto daḷhadhammāno, bhavanto daḷhadhammāti. Evaṃ paccakkhadhammā, paccakkhadhammoti missakapadamālā ca yojetabbā.

Idāni **vivaṭacchadas**saddassa nāmikapadamālā vuccate –

Vivaṭacchadā, vivaṭacchadā, vivaṭacchadāno. Vivaṭacchadānaṃ, vivaṭacchadāne. Vivaṭacchadena, vivaṭacchadehi, vivaṭacchadebhi. Vivaṭacchadassa, vivaṭacchadānaṃ. Vivaṭacchadā, vivaṭacchadehi, vivaṭacchadebhi. Vivaṭacchadassa, vivaṭacchadānaṃ. Vivaṭacchade, vivaṭacchadesu. Bho vivaṭacchada, bhavanto vivaṭacchadā, bhavanto vivaṭacchadāno.

Ayaṃ nāmikapadamālā “sace pana agārasmā anagāriyaṃ pabbajati arahaṃ hoti sammāsambuddho loke vivaṭacchadā”ti pālīdassanato **ākāraṇtavasena** kathitā. “Loke vivaṭacchado”tipi pālīdassanato pana okāraṇtavasenaṃ kathetabbā “vivaṭacchado, vivaṭacchadā, vivaṭacchadaṃ, vivaṭacchade”ti. Missakavasenaṃ kathetabbā “vivaṭacchadā, vivaṭacchado, vivaṭacchadāno, vivaṭacchadā. Vivaṭacchadānaṃ, vivaṭacchadaṃ, vivaṭacchadāne, vivaṭacchade”iti.

Idāni **vattahas**saddassa nāmikapadamālā vuccate – **vattahāti** sakko.

Vattahā, vattahāno. Vattahānaṃ, vattahāne. Vattahānā, vattahānehi, vattahānebhi. Vattahino, vattahānaṃ. Vattahānā, vattahānehi, vattahānebhi. Vattahino, vattahānaṃ. Vattahāne, vattahānesu. Bho vattaha, bhavanto vattahāno. Atha vā “bho vattahā, bho vattahāno”iccapi.

Idāni **vuttasiras**saddassa nāmikapadamālā vuccate –

Vuttasirā, vuttasirā, vuttasirāno. Vuttasirānaṃ, vuttasirāne. Vuttasirānā, vuttasirānehi, vuttasirānebhi. Vuttasirassa, vuttasirānaṃ, vuttasirā, vuttasirehi, vuttasirebhi. Vuttasirassa, vuttasirānaṃ. Vuttasire, vuttasiresu. Bho vuttasira, bhānto vuttasirānoti. “Vuttasiro”ti okāraṇtapāṭhopi dissati.

Idāni **yuvās**saddassa nāmikapadamālā vuccate –

Yuvā, yuvā, yuvāno, yuvānā. Yuvānaṃ, yuvaṃ, yuvāne, yuve. Yuvānā, yuvena, yuvānena, yuvānehi, yuvānebhi, yuvehi, yuvebhi. Yuvānassa, yuvassa, yuvānānaṃ, yuvānaṃ. Yuvānā, yuvānasmā, yuvānamhā, yuvānehi, yuvānebhi, yuvehi, yuvebhi. Yuvānassa, yuvassa, yuvānānaṃ, yuvānaṃ. Yuvāne, yuvānasmīṃ, yuvānamhi, yuve, yuvasmiṃ, yuvamhi, yuvānesu, yuvāsu, yuvesu. Bho yuva, yuvā, bhavanto yuvānā.

Imasmīṃ ṭhāne ekadesena **ākāraṇtanayo** ca sabbathā okāraṇtanayo ca ekadesena ca okāraṇtanayoti tayo nayā dissanti.

**Maghavas**saddassapi “maghavā, maghavā, maghavāno, maghavānā”tiādīnā **yuvās**saddasseva

nāmikapadamālāyojanaṃ kubbanti garū. **Niruttipiṭake** pana “maghavā tiṭṭhati, maghavanto tiṭṭhanti. Maghavantaṃ passati, maghavante passati. Maghavatā kataṃ, maghavantehi kataṃ, maghavantebhi kataṃ. Maghavato dīyate, maghavantānaṃ dīyate. Maghavatā nissaṭaṃ, maghavantehi nissaṭaṃ, maghavantebhi nissaṭaṃ. Maghavato pariggaho, maghavantānaṃ pariggaho. Maghavati patiṭṭhitā, maghavantesu patiṭṭhitā. Bho maghavā, bhavanto maghavanto”ti **guṇavā**padanayena vuttaṃ, tathā **cūlaniruttiyampi**. Taṃ pāliyaṃ saṃsandati sameti. Pāliyañhi “sakko mahāli devānamindo pubbe manussabhūto samāno magho nāma māṇavo ahosi, tasmā maghavāti vuccatī”ti vuttaṃ. Etena “maghoti nāmaṃ assa atthīti maghavā”ti atthi atthavācaka**vantu**paccayavasena padasiddhi dassitā hoti, tasmāssa **guṇavantus**addassa viya ca nāmikapadamālā yojetabbā.

Idāni **addhas**addassa nāmikapadamālā vuccate – **addhas**addassa hi yaṃ kāle magge ca vattamānassa “atīto addhā. Dīgho addhā suduggamo”tiādīsu “addhā”ti paṭhamantaṃ rūpaṃ dissati, taṃ “addhā idaṃ mantapadaṃ sududdasa”ntiādīsu ekamsatthe vattamānena “addhā”ti nipātapadena samānaṃ. Nipātānaṃ pana padamālā na rūhati, nāmikānaṃyeva rūhati.

Addhā, addhā, addhāno. Addhānaṃ, addhāne. Addhunā, addhānehi, addhānebhi. Addhuno, addhānaṃ. Addhuna, addhānehi, addhānebhi. Addhuno, addhānaṃ. Addhani, addhāne, addhānesu. Bho addha, bhavanto addhā, addhāno.

Ettha kiñci payogaṃ dassessāma – tayo addhā. Addhānaṃ vītivatto. Iminā dīghena addhunā. Dīghassa addhuno accayena. Pathaddhuno pannaraseva cando. Ahū atītamaddhāne, samaṇo khantidīpano. Addhāne gacchante paññāyissati. Iccādayo ñeyyā. Ayampi panettha nīti veditabbā “addhānantī dutiyekavacanantavasena catutthīchaṭṭhībahuvacanavasena ca vuttaṃ rūpaṃ. “Addhānamaggapaṭippanno hoti”tiādīsu dīghamaggavācakena “addhāna”nti napuṃsakena sadisaṃ sutisāmaññavaseṇāti.

Idāni **muddhas**addassa nāmikapadamālā vuccate –

Muddhā, muddhā, muddhāno. Muddhaṃ, muddhe, muddhāne. Muddhānā, muddhehi, muddhebhi. Muddhassa, muddhānaṃ. Muddhānā, muddhehi, muddhebhi. Muddhassa, muddhānaṃ. Muddhani, muddhānesu. Bho muddha, bhavanto muddhā, muddhāno.

Evamaṃ **abhibhavitā**padena visadisapadāni bhavanti. Iti nānāyehi **abhibhavitā**padena sadisāni **vattādīni** visadisāni **guṇavādīni** **rājasāiccādīni** ca **ākārantapadāni** dassitāni saddhiṃ nāmikapadamālāhi.

Ettha yogaṃ sace poso, kare paṇḍitajātiko;  
Tassa vohārabhedesu, vijambhe ñāṇamuttamaṃ.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparaṇe

Savinicchayo ākārantapullīṅgānaṃ pakatirūpassa

Nāmikapadamālāvibhāgo nāma

Chaṭṭho paricchedo.

Ukāraṇta **avaṇṇantatāpakatikāṃ**

Ākārantapullīṅgaṃ niṭṭhitāṃ.



## 7. Niggahītantapullīnganāmikapadamālā

Atha pubbācariyamataṃ purecaram katvā niggahītantapullīngānaṃ **bhavanta karonta**iccādikassa pakatirūpassa nāmikapadamālāṃ vakkhāma –

Gacchaṃ maham caraṃ tiṭṭhaṃ, dadaṃ bhuñjaṃ suṇaṃ pacamaṃ;  
Jayaṃ jaraṃ cavaṃ mīyaṃ, saraṃ kubbaṃ japaṃ vajaṃ.

Gacchaṃ, gacchanta, gacchantā. Gacchantam, gacchante. Gacchatā, gacchantehi, gacchanteti. Gacchato, gacchantassa, gacchantānaṃ, gacchataṃ. Gacchatā, gacchantehi, gacchantebhi. Gacchato, gacchantassa, gacchantānaṃ, gacchataṃ. Gacchati, gacchantesu. Bho gacchaṃ, bho gacchā, bhavanto gacchanta.

Gacchādīni aññāni ca taṃsadisānaṃ evaṃ ñeyyānīti **yamakamahātheramataṃ**. Kiñcāpettha tatiyekavacanaṭṭhānādīsu “gacchantena, gacchantā, gacchantasmā, gacchantamhā, gacchantasmim, gacchantamhi”ti imāni padāni nāgatāni, tathāpi tattha tattha payogadassanato gahetabbāni.

Tatra yamakamahātherena ālapanavacanaṭṭhāneyeva “gacchanta, mahanta, caranta”tiādīnaṃ bahuvacanattaṃ kathitaṃ, paccattavacanaṭṭhāne ekavacanattaṃ. Kehici pana paccattavacanaṭṭhāne ekavacanabahuvacanattaṃ, ālapanavacanaṭṭhāne bahuvacanattaṃyeva kathitaṃ. “Gacchaṃ, maham, cara”ntiādīnaṃ pana ālapanavacanaṭṭhāne ekavacanattaṃ. Mayaṃ pana buddhavacane anekāsu cāṭṭhakathāsu “gacchanta, mahanta”tiādīnaṃ bahuvacanappayogānaṃ “gacchaṃ, maham”iccādīnaṃ sānusārālanekavacanappayogānaṃ adassanato “gacchanta bhāradvājo. Sa gacchaṃ na nivattati. Mahanta lokasannivāso”tiādīnaṃ pana paccattekavacanappayogānaññeva dassanato tādisāni rūpāni anijjhānakkhamāni viya maññāma. **Niruttipiṭake** paccattālanavacanaṭṭhāne “mahanta, bhavanta, caranta”tiādīnaṃ bahuvacanattameva kathitaṃ, na ekavacanattaṃ. Tathā hi tattha “maham bhavaṃ caraṃ tiṭṭha”nti gāthaṃ vatvā “maham tiṭṭhati, mahanta tiṭṭhanti”ti ca, “bho mahā, bhavanta mahanta”ti ca, “bhavaṃ tiṭṭhati, bhavanta tiṭṭhanti”ti ca ādi vuttaṃ.

Ettha pana “bhavaṃ, bhavanta”ti padāni yatha “honto hontā”ti kriyatthaṃ na vadanti, tattha “bhavaṃ kaccāno. Mā bhavanta evaṃ avacutthā”tiādīsu viya aññasmim atthe patanato ekavacanabahuvacanāni bhavanti, tasmā “santo sappurisā loke”ti ettha “santo”ti padassa viya “arahanta sammāsambuddhā”ti ettha “arahanta”ti padassa viya ca “bhavanta”ti padassa bahuvacanattaṃ nijjhānakkhamam. “Mahanta, caranta, tiṭṭhanta”tiādīnaṃ pana bahuvacanattaṃ na nijjhānakkhamam viya amhe paṭibhāti. Na hi katthacipi “santo, arahanta, bhavanta”ti padavajjitānaṃ “gacchanta, mahanta, caranta”tiādīnaṃ anekapadasatānaṃ bahuvacanantatāpayoge passāma. Tathā hi –

Bavhatte katthaci ṭhāne, “jāna”miccādayo yathā;  
Dissanti nevaṃ bavhatte, “gacchanta” itiādayo.

Bavhatte katthaci ṭhāne, “santo” iccādayopi ca;  
Dissanti nevaṃ bavhatte, “gacchanta” itiādayo.

“Arahanta”ti bavhatte, ekanteneva dissati;  
Nevaṃ dissanti bavhatte, “gacchanta” itiādayo.

Anekasatapāthesu, “viharanta”tiādīsu;  
Ekassapi bahukatte, pavatti na tu dissati.

Bahuvacanayena, “gacchanta”ti padassa hi;  
Gahaṇe sati bahavo, dosā dissanti saccato.

Yathekamhi ghare daḍḍhe, daḍḍhā sāmīpikā gharā;

Tathā bavhattavācicte, “gacchanto”ti padassa tu.

“Viharanto”tiādīnaṃ, bavhattavācītā siyā;  
Rūpanayo aṇiṭṭho ca, gahetabbo anekadhā.

Evam santepe yasmā “**niruttipiṭakaṃ** nāma pabhinnapaṭisambhidena mahākhīṇāsavena **mahākaccāyanena** kata”nti loke pasiddhaṃ, tasmā idaṃ ṭhānaṃ punappunaṃ upaparikkhitabbaṃ. Kiñcāpettha there gāravena evaṃ vuttaṃ, tathāpi pālinayaṃ garuṃ katvā diṭṭhenekavacananayena aḍiṭṭho bahuvacananayo chaḍḍetabbo. Evaṃ sati niggahītantesu nayo sobhano bhavati. Ayaṃ pana amhākaṃ ruci –

“Bhavaṃ karaṃ arahaṃ saṃ, mahaṃ” iti padāni tu;  
Visadisāni sambhonti, aññamaññanti lakkhaye.

“Gacchaṃ caraṃ dadaṃ tiṭṭhaṃ, cintayaṃ bhāvayaṃ vadaṃ;  
Jānaṃ passa”ntiādīni, sadisāni bhavanti hi.

Tatra “jāna”ntiādīni, katthaci parivattare;  
Vibhattiliṅgavacana-vasenāti vibhāvaye.

Tatra tāva **bhavantas**saddassa nāmikapadamālā vuccati – **bhavaṃ**saddo hi “vaḍḍhanto, honto”ti atthepe vadati. Tesam vasena ayaṃ nāmikapadamālā.

Bhavaṃ, bhavanto, bhavantā. Bhavantaṃ, bhavante. Bhavantena, bhavantehi, bhavantebhi. Bhavantassa, bhavantānaṃ. Bhavantā, bhavantasmā, bhavantamhā, bhavantehi, bhavantebhi. Bhavantassa, bhavantānaṃ. Bhavante, bhavantasmim, bhavantamhi, bhavantesu. He bhavanta, he bhavantā.

Tattha “bhavaṃ, bhavanto”tiādīnaṃ “vaḍḍhantohonto”tiādīnā attho daṭṭhabbo. Tathā hi “suvijāno bhavaṃ hoti. Dhammakāmo bhavaṃ hoti. Rājā bhavanto nānāsampattīhi modati. Kuḷīradaho gaṅgāya ekābaddho, gaṅgāya pūraṇakāle gaṅgodakena pūrati, udake mandī bhavante dahato udakaṃ gaṅgāya otarati”ti payogā bhavanti, tasmā ayaṃ nāmikapadamālā sārato paccetabbā. Ettha **bhavaṃ**saddamattaṃ vajjetvā **gacchamānacaramāna**saddādīsū viya **bhavantas**adde “bhavanto, bhavantā”ti **purisan**ayopi labbhati, napuṃsakaliṅge vattabbe “bhavantaṃ, bhavantānī”ti **cittan**ayopi labbhati. Evaṃ vaḍḍhanabhavanatthavācākassa **bhavantas**saddassa nāmikapadamālā veditabbā.

Ayañca viseso “bhavanto”ti padaṃ vaḍḍhanabhavanatthato aññatthe vattamānaṃ bahuvacanameva hoti, yathā “bhavanto āgacchanti”ti. Vaḍḍhanabhavanatthesu vattamānaṃ ekavacanameva. Atrime payogā “anupubbena bhavanto viññutaṃ pāpuṇāti. Samaṇena nāma īdisesu kammesu abyāvaṭena bhavitabbaṃ, evaṃ bhavanto hi samaṇo susamaṇo assā”ti. “Bhavaṃ” iti padaṃ pana ubhayatthāpi ekavacanameva, tasmā idāni “bhavaṃ ānando. Bhavanto āgacchanti, appasaddā bhavanto hontu, mā bhonto saddamakathā”ti evamādi payogadassanavasena vohāravisesse pavattaṃ aññaṃ atthaṃ paṭicca aparāpi nāmikapadamālā vuccate –

Bhavaṃ, bhavanto, bhonto. Bhavantaṃ, bhavante. Bhavatā, bhotā, bhavantena, bhavantehi, bhavantebhi. Bhavato, bhoto, bhavantassa, bhavantānaṃ, bhavataṃ. Bhavatā, bhotā, bhavantehi, bhavantebhi. Bhavato, bhoto, bhavantassa, bhavantānaṃ, bhavataṃ. Bhavati, bhavante, bhavantasmim, bhavantamhi, bhavantesu. Bho, bhavanto, bhonto iti.

Ettha pana “bho”iccādīni tīṇi padāni yasmā vohāravisesapavattāni ālapanapadāni honti, tasmā “āvuso, bhante”ti padāni viya **bhos**saddādiupapadavantaṇi na bhavanti, “bho purisa, bhavanto brāhmaṇā, bhonto samaṇā, bho rāja”iccādīsū hi **puris**saddādayoyeva **bhos**saddādi upapadavanto bhavanti. Idha ca “bhavaṃ ānando”ti ettha **bhavaṃ**saddena samānatthāni “bho, bhavanto,

bhonto’’ti padāni vuttāni, na pana ‘‘dhammakāmo bhavaṃ hotī’’ti ettha **bhavaṃ**saddena samānatthāni. Paṭhamasmiñhi naye vaḍḍhanatthavasena ‘‘bho bhavanta, bhavanto bhavantā, bhonto bhavantā’’ti **bhos**saddādayo ālapanapadānaṃ upapadāni bhavanti, na dutiyasmiṃ naye. Āmeḍitavasena pana ‘‘bho bho, bhavanto bhavanto, bhonto bhonto’’ti padāni bhavanti yathā ‘‘bhante bhante’’ti.

Atridaṃ **bhū**dhātuvasena saṅkhepatō pāḷinidassanaṃ – kasmā bhavaṃ vijjanamaraññanissito. Kathaṃ panāhaṃ bho taṃ bhavantaṃ gotamaṃ jānissāmi. Evaṃ bhoti kho ambaṭṭho māṇavo brāhmaṇassa pokkharasātissa paṭissutvā. Mā bhavanto evaṃ avacuttha. Imaṃ bhonto nisāmetha. Evaṃ bho purisa jānāhi, pāpadhammā asaññatā iccevamādi. Ettha ‘‘bhavaṃ’’iccādīni **bhū**dhātumayāni nāmapadānīti veditabbāni.

Apica tesu ‘‘bho, bhavanto, bhonto’’ti imāni nipātapadānīpi hontīti vavatthapetabbaṃ. ‘‘Bho purisā’’tiādīsu tesam nipātānipātabhāve vivādo na karaṇīyo. **Kaccāyanasmiñhi** ‘‘bho ge tū’’ti vuttaṃ. Aññattha pana ‘‘āmantanatthe nipāto’’tiādī vuttaṃ. Tathā hi **niruttimañjūsāyaṃ** vuttaṃ ‘‘bhotidaṃ āmantanatthe nipāto. So na kevalaṃ ekavacanameva hoti, atha kho bahuvacanampi hotīti ‘bho purisā’ti bahuvacanappayogopi gahito. ‘Bhavanto’ti padaṃ pana bahuvacanameva hotīti ‘purisā’ti puna vutta’’nti. Pāḷiyañhi aṭṭhakathāsu ca nipātabhūto **bhos**saddo ekavacanabahuvacanavasena dvidhā dissati, itare pana bahuvacanavaseneva dissanti. Tesam tu nipātapadatte rūpanipphādanakiccaṃ natthi. Tesu **bhos**saddassa nipātapadattā āhaccabhāsīte nijjīvālapane itthilingavisayo ‘‘ummuja bho puthusile, pariplava bho puthusile’’ti payogopi dissati. Atrimā **bhos**saddassa pavattiparidīpanī gāthāyo –

‘‘Ito bho sugatiṃ gaccha, manussānaṃ sahaḃyataṃ’’;  
Evamādīsu **bhos**saddo, ekavacanako mato.

‘‘Passatha bho imaṃ kula-putta’’miccevamādīsu;  
Bahuvacanako eso, **bhos**saddoti vibhāvaye.

Puggalālapane ceva, dhammassālapanepi ca;  
Nijjīvālapane cāti, **bhos**saddo tīsu dissati.

Tatra dhammālapanamhi, ekavacova labbhati;  
Itaresu siyā deka-vaco bahuvacopi ca.

Nicchitabbaṃ guṇīpadaṃ, dhammassālapane dhavaṃ;  
‘‘Acchariyaṃ vata bho’’ti, idamettha nidassanaṃ.

Ichhitabbaṃ guṇīpadaṃ, puggalālapane pana;  
‘‘Evaṃ bho purisa jānāhi’’, idamettha nidassanaṃ.

Guṇīpadaṃ asantampi, puggalālapanamhi tu;  
Ajjhāharitvā pāvade, atthaṃ ‘‘bho ehi’’ādīsu.

Ghaṭādīnaṃ ālapanam, nijjīvālapanam bhava;  
Jīvaṃva lokiyā loke, ālapanti kadāci tu.

Nijjīvālapanam appaṃ, atthaviññāpane siyā;  
‘‘Ummuja bho puthusile’’, iti pāḷī nidassanaṃ.

Ettha liṅgavipallāsaṃ, keci icchanti paṇḍitā;  
Tesaṃ matena bhotīti, liṅgaṃ vipariṇāmaye.

Atha vā pana **bhos**saddo, nipāto **sopadaṃ** viya;

Tasmā virodhatā nāssa, tiliṅge vacanadvaye.

Evam santepi **bhosaddo**, dviliṅgeyeva pāyato;  
Yasmā diṭṭho tato viññū, dviliṅgeyeva taṃ vade.

Itthilingamhi sampatte, “bho”ti iti payojaye;  
Evamvidhaṃ payogañhi, suppayogaṃ budhābravaṃ.

Yajjevam duppayogaṃva, siyā tumhehi dassitaṃ;  
“Ummujja bho puthusile”, iccāhaccapadanti ce.

Duppayogaṃ na taṃ yasmā, vohārakusalena ve;  
Jinena bhāsīte dhamme, duppayogā na vijjare.

Itthilingassa visaye, **bhotisaddappayojanaṃ**;  
Kavīnaṃ pemaṇīyanti, mayā evamudīritaṃ.

Evam **bhavantasaddassa** nāmikapadamālā pāḷinayānurūpaṃ dvidhā vibhattā  
vaḍḍhanabhavanatthataññatthavasena.

**Karontasaddassa** pana –

Karaṃ, karonto, karontā. Karontaṃ, karonte. Karotā, karontena, karontehi, karontebhi. Karoto, karontassa, karontānaṃ, karotaṃ. Karotā, karontā, karontasmā, karontamhā, karontehi, karontebhi. Karoto, karontassa, karontānaṃ, karotaṃ. Karonte, karontasmim, karontamhi, karontesu. Bho karonta, bhavanto karontāti rūpāni bhavanti.

“Karoto na kariyati pāpa”nti idamettha **karotosaddassa** atthitānidassanaṃ. Itthilinge vattabbe “karontī, karontiyo”tiādīnā yojetabbāni, napuṃsakalinge vattabbe “karontaṃ, karontāni”tiādīnā yojetabbāni.

**Arahantasaddassa** –

Arahaṃ, arahanto. Arahantaṃ, arahante. Arahātā, arahantena, arahantehi, arahantebhi. Arahato, arahantassa, arahantānaṃ, arahataṃ. Arahātā, arahantā, arahantasmā, arahantamhā, arahantehi, arahantebhi. Arahato, arahantassa, arahantānaṃ, arahataṃ. Arahante, arahantasmim, arahantamhi, arahantesu. Bho arahanta, bhavanto arahanto iti rūpāni bhavanti.

Ayaṃ guṇavācakassa **arahantasaddassa** nāmikapadamālā. “Arahā, arahanto, arahantā”iti ca. Etañhi rūpaṃ **samantapāsādikāyaṃ** manussaviggahaṭṭhāne dissati. Uttarimanussadhammapāḷiyam pana “mayañcamhā anarahanto”ti padaṃ dissati. Arahantaṃ, arahante. Arahātā, sesaṃ vitthāretabbaṃ. Ayaṃ paṇṇattivācakassa **arahantasaddassa** nāmikapadamālā.

Tathā hi “araḥaṃ sammāsambuddho. Araḥaṃ sugato loke. Arahanto sammāsambuddhā”tiādīsu **araḥaṃ**saddādayo guṇavācakā. “Arahā ahoṣi. Ahañhi arahā loke. Eko arahā, ekasaṭṭhi arahanto loke ahesuṃ.

Gāme vā yadi vāraññe, ninne vā yadi vā thale;  
Yattha arahanto viharanti, taṃ bhūmirāmaṇeyyaṃ.

Mayañcamhā anarahanto”tiādīsu **arahā**saddādayo paṇṇattivācakāti daṭṭhabbā. Idha itthinapuṃsakalingavasena visuṃ vattabbanayo appasiddho. Yadi evaṃ āsavakkhayaṃ pattā itthī kathaṃ vattabbā, āsavakkhayaṃ pattam cittaṃ kathaṃ vattabbanti? Itthī tāva “yaṃ itthī araḥaṃ assa sammāsambuddho”ti vacanato “araha”nti vattabbā guṇavasena, paṇṇattivasena pana “itthī arahā

ahosī’ ti vattabbā. Cittaṃ pana guṇavaseneva ‘‘arahaṃ citta’’nti vattabbanti.

**Santasaddassa** –

Sam, santo, santo, santā. Sam, santam, sante. Satā, santena, santehi, santebhi, sabbhi. Sato, santassa, santānaṃ, satam, satānaṃ. Satā, santā, santasmā, santamhā, santehi, santebhi, sabbhi. Sato, santassa, santānaṃ, satam, satānaṃ. Sati, sante, santasmim, santamhi, santesu. Bho santa, bhavanto santoti rūpāni bhavanti.

Ettha pana ‘‘addhā hi tāta satanesa dhammo’’ti **jayaddisajātakapāli**dassanato ‘‘satāna’’nti vuttam. Tattha hi **satanesā**ti satānaṃ esāti chedo, rassattaniggahītasaralopavasena ca rūpaniṭṭhānaṃ veditabbaṃ. Tathā hi tadaṭṭhakathāyaṃ ‘‘addhā ekaṃsena esa tāta satānaṃ paṇḍitānaṃ dhammo sabhāvo’’ti attho vutto. Ayaṃ ye loke ‘‘sappurisā’’ti ca ‘‘ariyā’’ti ca ‘‘paṇḍitā’’ti ca vuccanti, tesam vācakassa **santasaddassa** nāmikapadamālā. Tappaṭisedhassa pana asaṃ, asanto, katthaci asantā iccapi. Tathā hi ‘‘asantā kira maṃ jammā, tāta tātāti bhāsare’’ti pāḷi dissati. ‘‘Asaṃ, asantam, asante. Asatā’’tiādīnā yojetabbā. Imasmim atthe ‘‘santo, asanto’’timāni bahuvacanakāniyeva bhavanti, na katthacipi ekavacanakāni. Kasmā? Paṇṇattivācakattā. Aññatra pana ‘‘santo, danto’’tiādīsu ekavacanāniyeva ṭhapetvā vijjamānatthavācakasantosaddam, kasmā? Apaṇṇattivācakattāti daṭṭhabbaṃ.

Idāni paṇṇattivācakānaṃ tesam kānici payogāni kathayāma –

Sameti asatā asaṃ. Yaṃ yañhi rāja bhajati, santam vā yadi vā asaṃ. Na sā sabhā yattha na santi santo. Asanto nirayaṃ yanti, santo saggaparāyaṇā. Asante nopaseveyya, sante seveyya paṇḍito. Sabbhireva samāsetha. Satam dhammo iccevamādīni bhavanti.

Yo panamhehi padamālāyaṃ ‘‘sabbhī’’ti ayaṃ saddo tatiyāpañcamībahuvacanavasena yojito, so ca kho **santaiti** akārantapakativasena, aññattha pana ‘‘sabbhī’’ti ikārantapakativasena yojetabbo. Tathā hi **sabbhī**ti sappuriso nibbānañca, sundarādhivacanam vā etaṃ sabbhīti. Sabbo cāyamatto sātṭhakathāya ‘‘bahumpetaṃ asabbhi jātavedā’’ti imāya pāḷiyā ‘‘santo have sabbhi pavedayantī’’ti imāya ca dīpetabbo.

Ālapane ca paccatte, tatiyāpañcamīsu ca;  
Samāsamhi ca yojeyya, **sabbhisaddam** sumedhaso.

Atrāyaṃ yojanā – bho sabbhi tiṭṭha, sabbhi tiṭṭhati, sabbhi saha gacchati, sabbhi apehi, asabbhirūpo puriso. Yasmā panāyaṃ sāsānānukūlā, tasmā imissā tadanukūlattaṃ dassetuṃ idha sāsānato payoge dassessāma atakkāvacare vicitte sugatapāḷinaye sotūnaṃ visāradamatipaṭilābhatthaṃ. Taṃ yathā? Bahumpetaṃ asabbhi jātaveda, yaṃ taṃ vāladhinā’bhīpūjayāma. Sabbhi kubbetha santhavaṃ. Yaṃ sālavanasmim senako, pāpakammamakari asabbhirūpaṃ. Ābādhoyaṃ asabbhirūpo. Asammodako thaddho asabbhirūpo’’ti. Tattha ālapanavacane diṭṭheyeva paccattavacanam pāḷiyaṃ sarūpato anāgatampi diṭṭhameva hoti. Tathā karaṇavacane diṭṭheyeva nissakkavacanampi diṭṭhameva hoti. Samāse saddarūpe diṭṭheyeva byāse saddarūpaṃ yathāsambhavaṃ diṭṭhameva hoti ṭhapetvā ‘‘hetusatthāradassana’’ntiādīni. Tattha ca nibbānavācako ce, **sabbhisaddo** ithiliṅgo **santivissuddhi nibbutisaddā** viya, so ca **yamakamahātheramate rattinayena** yojetabbo. Sabbesamikārantitthiliṅgānaṃ sādharmaṇo hi so nayo. Sundaratthavācako ce, **aggi ratti aṭṭhinayehi** yojetabbo vāccaliṅgattā. ‘‘Sabbhidhamabhūtaṃ nibbāna’’nti ettha hi sundaradhamabhūtaṃ nibbānanti attho. Evaṃ pāḷinayavasena ālapanādīsu pañcasu ṭhānesu **sabbhisaddassa** pavattiṃ ṇatvā puna aṭṭhakathānaṃ yavasenaṃ tappavatti veditabbā. Kathaṃ? Yasmā sagāthāvaggassa **aṭṭhakathāyaṃ** ‘‘santo ‘sabbhīhi saddhim satam dhammo na jaram upetī’’ti pavedayantī’’ti imasmim padese ‘‘sabbhīhi’’ti **hivacana**vasena saddaracānāviseso aṭṭhakathācariyehi dassito, tasmā **sabbhisaddo** sabbesupi vibhattivacanesu yojetabbo. Atridaṃ vadāma –

Garū ‘‘sabbhīhi saddhi’’nti, atthaṃ bhāsimsu pāḷiyā;

Yato tato **sabbhisaddaṃ**, dhīro sabbattha vojaye.

“Asabbhirūpo” itipi, samāsavisaṃsāraṃ suttaṃ;  
Yasmā tasmā **sabbhisaddaṃ**, viññū sabbadhi vojaye.

“Ovadeyyānusaṃsāraṃ, asabbhā ca nivāraye” ti ettha pana “asabbhā” tipadaṃ vicitravuttīsu taddhitapaccāyāsu **nyapaccāyāvasena** nipphattimupāgatanti vedītabbhaṃ. Kathaṃ? Yebhuyyena asabbhīsu bhavaṃ asabbhaṃ. Kiṃ taṃ? Akusalaṃ, tato asabbhā akusaladhammā nivāraye ca, kusalaḍḍhamme paṭiṭṭhāpeyyāti attho. “Amhe asabbhāhi vācāhi vikkosamānā tibbāhi sattīhi hanissanti” ti ettha tu asabbhīnaṃ etāti asabbhā, na vā sabbhīnaṃ etātipi asabbhāti nibbācanaṃ, **nyapaccāyāvasena** ca padasiddhi vedītabbā. Yā ca panettha amhehi santasaddassa “saṃ, santo. Saṃ, santā, sante” tiādīnā padamālā dassitā, tatha “sameti asatā asa” nti pāliyaṃ “asa” nti pade diṭṭheveva “sa” nti padaṃ pāliyaṃ anāgatampi diṭṭhameva hoti yugaḷabhāvena vijjānānārahattā. Evaṃ diṭṭhena adīṭṭhassa gahaṇaṃ vedītabbhaṃ. Atha vā “asa” nti ettha na saṃ asanti samāsaviggāhāvasenādhiḡgantabbattā “sa” miti padaṃ diṭṭhameva hoti. Evamaññātrāpi nayo. Tatra **santi** sappuriso. **Asanti** asappuriso. Itthilīṅgevattabbe “asatī, asā” ti rūpāni bhavanti. “Asatī, asatī, asatiyo, asā. Asatiṃ, asatī, asatiyo. Asāya, asatiyā, asatīhi, asatībhi. Asatiyā, asatīna” nti vakkhamāna **itthi**naṃ nāmiḡapadamālā vojētabbā.

Ettha pana “asā lokitthiyo nāma, velā tāsāṃ na vijjati. Mā ca vasaṃ asatīnaṃ nigacche” tiādīni dassētabbāni. **Asatī** cetha **asatī**ti ca samānāthā, asantajātikāti hi tesāṃ attho. Yasmā pana **jātakatṭhakathāyaṃ** “asatī asatiyo lāmiḡā, atha vā sātāṃ vuccati sukhaṃ, taṃ tāsū natthi, attani paṭibaddhacittānaṃ asātameva dentītipi asā, dukkhā, dukkhavattubhūtātī attho” ti atthaṃ saṃvaṇṇesūṃ, tasmā sātāṃ natthi etissanti **asatī** atthe “asā” ti padassa yathā ritto assādo etthāti **rittassanti** padassa luttuttarakkharassa “rittassaṃ, rittassāni. Rittassa” nti **cittāna**ya nāmiḡapadamālā vojētabbā, tathā “asā, asā, asāyo. Asaṃ, asā, asāyo. Asāyā” ti **kaññāna**ya vojētabbā.

Ettha ca yo amhehi “santo” itī saddo dassito. So katthaci ekavācānābahuvacānābhāvena **saṃvijjānāna**saddasatthampi vadati, tassa vasena ayaṃ nāmiḡapadamālā –

Santo, santo, santā. Santaṃ, sante. Satā, santena, santehi, santebhi. Sato, santassa, sataṃ, santānaṃ. Satā, santā, santasmā, santamhā, santehi, santebhi. Sato, santassa, sataṃ, santānaṃ. Sati, sante, santasmīṃ, santamhi, santesu. Bho santa, bhavanto santo, bhavanto santā.

Ettha pana “ayaṃ kho bhikkhave aṭṭhāmo bhaddo assājānīyo santo saṃvijjānāno lokasmīṃ. Cattārome bhikkhave puggalā santo saṃvijjānāno lokasmīṃ. Asatā tucchā musā abhūtena abbhācikkhanti. Bhava kho sati jāti hoti” iccevaṃ mā dīni payogāni bhavanti. “Sāṅkhāresu kho sati viññānaṃ hoti” tiādīsu pana **satisaddo** vacānavipallāsavasena ṭhitoti gahetabbo.

Tatra ekavācānābahuvacānavasena dvidhā ṭhitesu **santosaddesu** bahuvacānā**santosaddaṃ** ṭhapētvā sesā **samāna**saddasatthampi vadanti, tasmā “**santoti** samāno, **santāti** samānā” tiādīnā attho kathētabbo. **Samānoti** imassa ca “honto” ti attho “pahu samāno vipulathacintī, kiṃ kāraṇā me na karosi dukkha” ntiādīsu viya. Payogāni pana –

“Yo mātaraṃ pitaraṃ vā, jīṇṇakaṃ gatayobbanāṃ;  
Pahu santo na bhārati, taṃ parābhavato mukhaṃ.

Idheva tiṭṭhamānassa, devabhūtassa me sato;  
Punarāyu ca me laddho, evaṃ jānāhi mārisā” ti

Evamādīni bhavanti.

Apica **santosaddo** yasmā “kilanto” ti ca “upasanto” ti ca “niruddho” ti ca atthaṃ vadati, tasmā

tesaṃ vasena **santas**saddassa “santo, santā. Santaṃ, sante. Santenā”ti **purisanayena** nāmikapadamālā veditabbā. Ettha ca “santo tasito. Dīghaṃ santassa yojanaṃ. Santo danto niyato brahmacārī. Santo niruddho atthaṅgato abbatthaṅgato”tiādīni payogāni. Napuṃsakaliṅge vattabbe “santaṃ, santānī”ti **cittanayena** nāmikapadamālā. Sā ca “saṃvijjamānaṃ samānaṃ kilantaṃ upasantaṃ niruddha”miti atthadīpakāpadavatīti veditabbā. Atha vā “upādāne kho sati bhavo hotī”tiādīsu napuṃsakappayogadassanato **santas**saddassa **saṃvijjamānas**saddatthavācakatte tatiyāpañcamīcatutthīchaṭṭhīsattamīṭhāne “satā, sato, satam, satī”ti padāni adhikāni vattabbāni, sesāni **cittanayena** ñeyyāni. Itthiliṅge pana vattabbe “santā, santā, santāyo. Santaṃ, santā, santāyo. Santāyā”ti **kaññānayena** ca, santī, santi, santiyo. Santim, santī, santiyo. Santiyā”ti **itthinayena** ca nāmikapadamālā yojetabbā. Etāsu paṭhamā “saṃvijjamānā kilantā upasantā niruddhā”ti atthadīpakāpadavatī, ettha payogā suviññeyyāva. Dutiyā pana “saṃvijjamānā samānā”ti atthadīpakāpadavatī. Tathā hi “santī āpatti āvikātabbā”ti ettha saṃvijjamānā “santī”ti vuccati.

“Yāya mātu bhato poso,  
Imaṃ lokaṃ avekkhati;  
Tampi pāṇadadiṃ santim,  
Hanti kuddho puthujjano”ti

Ettha pana samānā “santī”ti vuccati. Aparāpi itthiliṅge vattabbe padamālā veditabbā. **Santis**saddassa hi **saṃvijjamānas**saddatthavācakatte “jātiyā kho sati jarāmarāṇaṃ hotī”tiādīnā itthiliṅgappayogadassanato sattamīṭhāne “sati, satiyā, satiyam, santiyā, santiyam, santīsū”ti rūpāni vattabbāni. Sesāni **itthinayena** ñeyyāni. Ayaṃ tatiyā, ettha ca “asantiyā āpattiyā tuṅhī bhavitabba”nti pāḷi “santiyā”iccādīnaṃ atthibhāve nidassanaṃ. Aparo nayo – **satis**saddassa “samānā”ti imasmiṃ atthe “yā tvaṃ vasasi jiṇṇassa, evaṃ dahariyā satī”ti ca “ye taṃ jiṇṇassa pādaṃsu, evaṃ dahariyam sati”nti ca pāḷidassanato “satī, satī, satiyō. Satim, satī, satiyō. Satiyā”tiādīnipi rūpāni yojetabbāni, saṃyoge **nakāralopavasena** vā.

Idāni “santo, santā”ti padadvayassa payoganicchayaṃ kathayāma payogesu sotūnaṃ asammūlhabhāvāya. Tathā hi “sappurisā”ti vā “paṇḍitā”ti vā bahuvacanasena atthaṃ vattukāmena “santo danto”ti evaṃ vuttaekavacanasadisam “santo”ti bahuvacanaṃ vattabbaṃ. “Saṃvijjamāno”ti ekavacanasena atthaṃ vattukāmena “santo”ti ekavacanaṃ vattabbaṃ. “Saṃvijjamānā”ti bahuvacanasena atthaṃ vattukāmena “santo sappurisā”ti, “santo saṃvijjamānā”ti ca evaṃ vuttabahuvacanasadisam “santo”ti vā “santā”ti vā bahuvacanaṃ vattabbaṃ, “kilanto”ti vā “samāno”ti vā “upasanto”ti vā “niruddho”ti vā ekavacanasena atthaṃ vattukāmena “santo sappurisā”ti evaṃ vuttabahuvacanasadisam “santo”ti ekavacanaṃ vattabbaṃ. Teyevatthe bahuvacanasena vattukāmena pana “santā sūnehi pādehi, ko ne hatthe gahessati”ti ettha viya “santā”ti bahuvacanaṃ vattabbaṃ. Ayaṃ nīti sādhuṃ manasi kātabbā. Idañhi mandabuddhīnaṃ sammohaṭṭhānaṃ. Ayampi panettha saṅgaho veditabbo –

“Tiliṅgatthe ca ekatthe, bavhatthepe ca dissati;  
Sattamyanto **satis**addo, vipallāse bahumhi so”ti.

Idāni **mahantas**saddassa nāmikapadamālā vuccate –

Mahaṃ, mahā, mahanto, mahantā. Mahantaṃ, mahante. Mahatā, mahantena, mahantehi, mahantebhi. Mahato, mahantassa, mahantānaṃ, mahataṃ. Mahatā, mahantā, mahantasmā, mahantamhā, mahantehi, mahantebhi. Mahato, mahantassa, mahantānaṃ, mahataṃ. Mahati, mahante, mahantasmim, mahantamhi, mahantesu. Bho maha, bho mahā, bhavanto mahantoti ayamamhākaṃ ruci.

Ettha “mahanto, mahantā. Mahantaṃ, mahante. Mahantenā”ti **purisanayopi** labbhati, tasmā “bho mahanta, bhavanto mahantā”ti ālapanapadāni yojetabbāni. Napuṃsakaliṅge vattabbe “mahantaṃ, mahantānī”ti **cittanayopi** labbhati. Itthiliṅge vattabbe “mahatī, mahatī, mahatiyo. Mahatim, mahatī, mahatiyo. Mahatiyā, mahatīhi mahatībhi”ti **itthinayopi** labbhati. “Mahatiyā ca yakkhasenāyā”tiādīnettha nidassanapadāni. Aparopi “mahantā, mahantā, mahantāyo. Mahanta”nti

**kaññā**nyopi labbhati, ‘‘mahantā nidhikumbhiyo’’tiādīnettha nidassanapadāni. **Kaccāyane** pana ‘‘mahantī’’iti padaṃ diṭṭhaṃ. Taṃ ‘‘guṇavanti, kulavanti’’iccādīni viya pāḷiyaṃ appasiddhattā vīmaṃsitabbaṃ.

Nanu bho yasmā sāsaneṇi ‘‘gacchantī, carantī’’tiādīni ca ‘‘iddhimantī’’ti ca padaṃ dissati, tasmā ‘‘mahantī, guṇavanti’’tiādīniṇi bhavitabbanti? Na bhavitabbaṃ tathārūpassa nayassa vasena aggahetabbattā, ‘‘mahatī, guṇavatī’’iccādīnayasveva dassanato ca. Tathā hi pāḷiyaṃ aṭṭhakathāsu ca ‘‘seyyathāpi nāma mahatī naṅgalasīsā, itthī siyā rūpavatī, sā ca sīlavatī siyā. Satimatī cakkhumatī. Iddhimatī pattimatī’’ti ca ‘‘mahatiṃ senaṃ disvā mahosadhasenā mandā, ayaṃ ativiya mahatī senā dissatī’’ti ca ādīni payogāni dissanti, na ‘‘mahantī, rūpavanti’’iccādīni.

Keci pana ‘‘**mahā**iti saddo byāse na labbhati, samāseyeva labbhati ‘mahāpuriso’’ti ettha viyā’’ti vadanti, taṃ na gahetabbaṃ. ‘‘Mahā te upāsaka pariccāgo. Mahā vatāyaṃ bhante bhūmicālo. Ghoso ca vipulo mahā. Bārāṇasirajjaṃ nāma mahā. Senā sādissate mahā’’ti payogadassanato. Evaṃ byāsepi labbhatīti veditabbaṃ, tasmā ‘‘mahaṃ, mahā, mahanto, mahantā. Bho mahanta, bhavanto mahantā’’ti pulliṅge, ‘‘mahantaṃ, mahā, mahantāni. Bho mahanta, bhavanto mahantāni’’ti napuṃsakaliṅge, ‘‘mahantā, mahā, mahantā, mahantāyo. Bhoti mahante, bhotiyo mahantā, mahantāyo’’ti itthiliṅge sabbaṃ sampuṇṇaṃ yojetabbaṃ. Samāse pana ‘‘mahāsatto mahāupāsako mahāupāsikā mahabbalo mahāvanaṃ mahaggataṃ mahapphalaṃ mahabbhaya’’ntiādīni rūpāni bhavanti, taddhite ‘‘mahattano mahattaṃ mahantattaṃ mahantatā’’ti rūpāni bhavanti. **Gacchantas**addassa pana ‘‘gacchanto gacchantā’’ti rūpāni vatvā sesāni **mahantas**adde vuttanayena vitthāretvā nāmikapadamālā veditabbā. Tathā ‘‘gacchanto, gacchantā’’ti **purisanayo** ca ‘‘gacchantam, gacchantāni’’ti **cittanayo** ca ‘‘gacchantī, gacchantī, gacchantiyo’’ti **itthinayo** ca gahetabbo. Evaṃ liṅgattayavasena ‘‘caraṃ caranto carantaṃ carantī, dadaṃ dadanto dadantaṃ dadantī’’tiādīnaṃ anekapadasahassānaṃ nāmikapadamālā vitthāretabbā.

Ye panācariyā ‘‘gacchanto’’tiādīnaṃ paccattālanabahuvacanattañca ‘‘gacchaṃ’’iccādīnaṃ ālanekavacanañca icchanti, te samamhehi payogo sāsane na diṭṭho nayavasenāgahetabbattā. Tasmā tāni ettha na vadāma. Ayaṃ pana viseso diṭṭho. Seyyathidaṃ?

‘‘Gacchaṃ vidhama’’miccādi-padāni munisāsane;  
Kattacākyātikā honti, kattacci pana nāmikā.

‘‘Tassāhaṃ santike gacchaṃ,  
So me satthā bhavissati;  
Vidhamaṃ deva te raṭṭhaṃ,  
Putto vessantaro tava.

Adhammaṃ sārathi kayirā, mañce tvaṃ nikkhanaṃ vane’’;  
Iccevamādayo ñeyyā, payogā ettha dhīmatā.

‘‘Gacchissāmi vidhamī’’ti-ādīnā jinasāsane;  
Nānākālapurisānaṃ, vasenatthaṃ vade vidū.

Nāmatte pana ‘‘gacchanto, vidhamanto’’tiādīnā;  
‘‘Gaccha’’miccevamādīna-matthamattavidū vade.

Idāni samagatikattepi ‘‘jānaṃ, passa’’ntiādīnaṃ liṅgavibhattivacananantaravasena yo viseso dissati, taṃ vadāma. Tathā hi ‘‘sā jānaṃyeva āha na jānāmīti, passaṃyeva āha na passāmī’’ti evamādīsu **jānaṃ passaṃ** saddānaṃ ‘‘jānantī passantī’’ti liṅgantaravasena parivattanaṃ bhavatīti daṭṭhabbaṃ. Iminā ‘‘gacchaṃ’’iti saddassapi yathāpayogaṃ ‘‘gacchantī’’ti itthiyā kathanattho labbhati tehi samānagatikattā, na ‘‘gacchanto’’ti saddassa ‘‘gacchantī’’ti itthiyā kathanattho labbhati tehi asamānagatikattāti kāraṇaṃ dassitaṃ hoti. ‘‘Api nu tumhe āyasmanto ekantasukhaṃ lokaṃ jānaṃ passaṃ viharathā’’ti ettha ‘‘jānantā passantā’’ti vacananantaravasena parivattanaṃ bhavatīti daṭṭhabbaṃ. Iminā pana ‘‘gacchaṃ’’iti saddassapi yathāpayogaṃ ‘‘gacchantā’’ti bahuvacanattho



labbhati tehi samānagatikattā, na “gacchante”ti saddassa “gacchantā”ti bahuvacanattho labbhati tehi asamānagatikattāti kāraṇaṃ dassitaṃ hoti. Esa nayo uttaratrāpi. “Bharanti mātāpitāro, pubbe katamanussara”nti ettha **anussaraṃ**saddassa “anussarantā”ti vacanantaravasena parivattanaṃ bhavati. “Saddhammo garukātabbo, saraṃ buddhāna sāsana”nti ettha **saraṃ**saddassa sarantenāti vibhattantaravasena parivattanaṃ bhavati. “Phusaṃ bhūtāni saṅghānaṃ, manasā gaṇhato yathā”ti ettha **phusaṃ**saddassapi “phusantassā”ti vibhattantaravasena parivattanaṃ bhavati. Tathā “yācaṃ adadamappiyo”ti etthāpi **yācaṃ**saddassa “yācantassā”ti vibhattantaravasena parivattanaṃ bhavati. **Yācanti** vā yācitabbaṃ dhaṇaṃ, iminā nayena nānappakārato parivattanaṃ veditabbaṃ. Iti “bhavaṃkara”ntiādīnaṃ visadisapadamālā ca “gacchaṃ, cara”ntiādīnaṃ sadisapadamālā ca “jānaṃ, passa”ntiādīnaṃ liṅgavibhattivacanantaravasena katthaci parivattananti ayaṃ tividhopi ākāro ākhyātikapadatthavibhāvanāya saddhiṃ kathito pāvacaṇavare sotūnaṃ saddesvatthesu ca visāradabuddhipaṭilābhattaṃ. Sabbametañhi sandhāya imā gāthā vuttā –

“Bhavaṃ karaṃ aṛaṃ saṃ, maḥaṃ”iti padāni tu;  
Visadisāni sambhonti, aññaṃaññaṃti lakkhaye.

“Gacchaṃ caraṃ dadaṃ tiṭṭhaṃ, cintayaṃ bhāvayaṃ vadaṃ;  
Jānaṃ passa”ntiādīni, samānāni bhavanti hi.

Tatra “jāna”ntiādīnaṃ, katthaci parivattanaṃ;  
Liṅgavibhattivacana-ntarato pana dissatīti.

Apica ayaṃ sabbesampi niggahītantaṃpulliṅgānaṃ pakati, yadidaṃ dvīsu liṅgesu chasu vibhattīsu terasasu vacanesu aññataraliṅgavibhattivacanaṃ parivattanaṃ. Ayampi panettha nīti veditabbā.

“Gacchaṃ cara”ntiādīni, vipakatavaco siyuṃ;  
“Gacchamāno caramāno”, iccādīni padāni ca.

“Maḥaṃ bhava”nti etāni, vipakatavacopi ca;  
Avipakatavaco ca, siyuṃ atthānurūpato.

“Araḥaṃ sa”nti etāni, vinimuttāni sabbathā;  
Ākāraṃ tividhampetaṃ, kare citte sumedhasoti.

Savinicchayoyaṃ niggahītantaṃpulliṅgānaṃ pakatirūpassa nāmikapadamālāvibhāgo.

Ākāraṇatāpakatikaṃ niggahītantaṃpulliṅgaṃ niṭṭhitaṃ.

Idāni **dhanabhūti**iccetassa pakatirūpassa aññesañca taṃsadisānaṃ nāmikapadamālāvibhāgaṃ vakkhāmi pubbācariyamaṃ purecaraṃ katvā.

Aggi, aggī, aggayo. Aggim, aggī, aggayo. Agginā, aggīhi, aggībhi. Aggissa, aggino, aggīnaṃ. Agginā, aggīhi, aggībhi. Aggissa, aggino, aggīnaṃ. Aggismim, aggimhi, aggīsu. Bho aggi, bho aggī, bhavanto aggayo. **Yamakamahātheramaṃ**.

Ettha kiñcāpi nissakkavacanaṭṭhāne “aggismā, aggimhā”ti imāni nāgatāni, tathāpi tattha tattha taṃsadisappayogadassanato gahetabbāni. “Agginā, aggismā, aggimhā”ti kamo ca veditabbo.

Dhanabhūti, dhanabhūtī, dhanabhūtayo. Dhanabhūtim, dhanabhūtī, dhanabhūtayo. Dhanabhūtīnā, dhanabhūtīhi, dhanabhūtībhi. Dhanabhūtissa, dhanabhūtino, dhanabhūtīnaṃ. Dhanabhūtīnā, dhanabhūtismā, dhanabhūtīmā, dhanabhūtīhi, dhanabhūtībhi. Dhanabhūtissa, dhanabhūtino, dhanabhūtīnaṃ. Dhanabhūtismim, dhanabhūtīmhi, dhanabhūtīsu. Bho dhanabhūtī, bho dhanabhūtī, bhavanto dhanabhūtayo.

Siribhūti sotthibhūti, suvatthibhūti aggini;  
Gini joti dadhi pāṇi, isi sandhi muni maṇi.

Byādhi gaṇṭhi ravi muṭṭhi, kavi giri kapi nidhi;  
Kucchi vatthi vidhi sāli, vīhi rāsi ahi masi.

Sāti kesi kimi bondi, bodhi dīpi pati hari;  
Ari dhani timi kali, sārathyudadhi añjali,

Adhipati narapati, asi ñāti nirūpadhi;  
Samādhi jaladhiccādī, **dhanabhūtisamā** matā.

Atha vā etesu **adhipatis**addassa “adhipatiyā sattā”ti pāḷidassanato “adhipatiyā”ti sattamīrūpampi icchitabbaṃ. Apica “asāre sāramatino”ti pāḷiyam **ikārantasamāsapadato yovacanassa noādesadassanato** kvaci **adhipatiiccādīnaṃ ikārantasamāsapadānaṃ** “adhipatino”tiādīnāpi paccattopayogarūpāni icchitabbāni **ikārantānaṃ daṇḍīsaddādīnaṃ** “daṇḍino”tiādīni paccattopayogasampadānasāmivacānarūpāni viya. **Gahapatijānipatis**addādīnaṃ pana samāsapadānaṃpi evarūpāni paccattopayogarūpāni na icchitabbāni “gahapatayo jānipatayo”tiādīnā nayena yathāpāvacaṇaṃ gahetabbarūpattā. **Isi munis**addānaṃ panālapanaṭṭhāne “ise, muse”ti rūpantarampi gahetabbaṃ “putto uppajjataṃ ise. Paṭiggaṇha mahāmune”ti dassanato.

Ye panettha amhehi **aggini ginis**addā vuttā, tatreke evaṃ vadanti “**agginis**addo paccattekavacānabhāveveva labbhati, na paccattabahuvacānabhāve upayogabhāvādīsu vā”ti. Keci pana “pāḷiyam **agginis**addo nāma natthi, **ginis**addoyeva atthi”ti vadanti. Keci “**ginis**addo nāma natthi, **agginis**addoyevatthi”ti vadanti. Sabbametaṃ na yujjati **aggini ginis**addānamupalabbhanato, sabbāsūpi vibhattīsu dvīsu vacanesu yojetabbatādassanato ca. Tathā hi suttanipāte **kokālikasutte** –

“Na hi vaggu vadanti vadantā,  
Nābhijavanti na tāṇamupenti;  
Aṅgāre santhate senti,  
Agginim sampajjalitaṃ pavisanti”ti

Imasmiṃ padese “aggini”nti upayogavacaṇaṃ dissati. Tenāha aṭṭhakathācariyo “**agginiṃ sampajjalitanti** samantatojālaṃ sabbadisāsu ca sampajjalitamaggi”nti. Tatreva ca suttanipāte **kokālikasutte** –

“Atha lohamayaṃ pana kumbhiṃ,  
Agginisañjalitaṃ pavisanti;  
Paccanti hi tāsū cirarattaṃ,  
Agginisamāsu samuplavāte”ti

Imasmiṃ padese samāsavisayattā **agginisañjalitanti** agginīhi sañjalitanti attho labbhati, tathā **agginisamāsūti** agginīhi sadisāsūti atthopi. Evaṃ samāsavidhānamukhena “agginīhi”ti karaṇavacaṇaṃpi dissati.

**Ginis**addopi ca pāḷiyam dissati. Tathā hi “tameva kaṭṭhaṃ dahati, yasmā so jāyate ginī”ti **cūlabodhicariyāyam ginis**addo diṭṭho. Keci panettha sandhivasena akāralopaṃ saññogādissa ca **gakārassa** lopaṃ vadanti, tampi na yujjati tassā pāḷiyā aṭṭhakathāyaṃ “**yasmāti** yato kaṭṭhā. **Ginīti** aggī”ti evaṃ **ginis**addassa ulliṅgetvā vacanato. Tathā “channā kuṭi āhito ginī”ti imassa **dhaniyasuttassa** aṭṭhakathāyaṃ “**āhitoti** ābhato jālito vā. **Ginīti** aggī”ti vacanato, tatheva ca “mahāgini pajjalito, anāhāropasammaṭi”ti imissā **theragāthāya** saṃvaṇṇanāyaṃ “**ginīti** aggī”ti vacanato. Yadi hi **ginis**addo visuṃ na siyā, aṭṭhakathācariyā “jāyate ginī”tiādīni “jāyate agginī”tiādīnā padacchedavasena atthaṃ vadeyyuṃ. Yasmā evaṃ na vadiṃsu, “**ginīti** aggī”ti pana vadiṃsu, tena ñāyati “**ginis**addopi visuṃ atthi”ti. Ye “**ginis**addo natthi”ti vadanti, tesam vacaṇaṃ

na gahetabbameva sāsane ginisaddassupalabbhanato. **Suttanipātaṭṭhakathā**yañhi “channā kuṭi āhito ginī”ti pāṭhassa saṃvaṇṇanāyameva “tesu thānesu aggini ‘ginī’ti vohariyatī”ti tassa abhidhānantaraṃ vuttaṃ, tasmā mayamettha gāthāracanaṃ karissāma –

Videharaṭṭhamajjhamhi, yaṃ taṃ nāmena vissutaṃ;  
Raṭṭhaṃ pabbataraṭṭhanti, dassaneyyaṃ manoramam.

Dhammaṇḍavhayaṃ tattha, nagaraṃ atthi sobhanaṃ;  
Tamhi thāne manussānaṃ, bhāsā eva giniccayaṃ.

“Gini ginī ginayo”ti-ādinā pavade vidū;  
Padamālaṃ yathā aggi-saddasseva sumedhaso.

Iti **alābu lābu**saddā viya **aggini ginis**addāpi bhagavato pācane dissantīti veditabbā. Yathā pana **agginis**addassa sabbāsu vibhattīsu dvīsu vacanesu yojetabbatā siddhā, tathā **ginis**addassapi siddhāva hoti. Tasmātra –

Aggini, agginī, agginayo. Agginim, agginī, agginayo. Aggininā, agginīhi, agginībhi. Agginissa, agginīnaṃ. Aggininā, agginismā, agginimhā, agginīhi, agginībhi. Agginissa, agginīnaṃ. Agginismim, agginimhi, agginīsu. Bho aggini, bhavanto agginī, bhavanto agginayo.

“Gini, ginī, ginayo. Ginim, ginī, ginayo, gininā”ti sabbaṃ yojetabbaṃ. Iti pālinayānusārena **aggini ginis**addānaṃ nāmikapadamālā yojitā. Atha vā yathā sakkaṭabhāsāyaṃ **satva paddhasvāminī**ti saññogavasena vuttānaṃ saddānaṃ māgadhabhāsaṃ patvā **sattavapadumasuvāminī**ti nissaññogavasena uccāritā pāli dissati “tvañca uttamasattavo”tiādinā, tathā sakkaṭabhāsāyaṃ **agnī**ti saññogavasena vuttassa māgadhabhāsaṃ patvā “aggini”ti saññoganakāravasena uccāritā pāli dissati “agginim sampajjalitaṃ pavisanti”tiādikā. Yathā ca veyyākaraṇehi sakkaṭabhāsābhūto **agnis**addo sabbāsu vibhattīsu tīsu vacanesu yojiyati, tathā māgadhabhāsābhūto **agginis**addopi sabbāsu vibhattīsu dvīsu vacanesu yojetabbova hoti, tasmā so idhamhehi yojiyati, **ginis**addopi **agginis**addena samānatthattā, īsakañca sarūpattā tatheva yojiyatīti daṭṭhabbaṃ.

Ettha siyā – yadi **agginis**addo sabbesu vibhattivacanesu yojetabbo, atha kasmā **kaccāyane** “aggissinī”ti lakkhaṇena **simhi** pare **aggis**addantassa **ini**ādeso dassitoti? Saccam, yathā navakkhattuṃ ṭhapetvā katekasesassa **dasas**addassa **yov**acanamhi **navā**desam katvā **yov**acanassa **uti**ādesam kasmā “navutī”ti rūpe nipphanne puna “navutī”ti pakatiṃ ṭhapetvā tato **nam**vacanaṃ katvā “navutīna”nti rūpaṃ nipphāditaṃ. Itthiliṅge pana **nā**diekavacanāni katvā tesam **yā**ādesam katvā “navutiyā”ti rūpaṃ nipphāditaṃ. Tathā hi “channavutīnaṃ pāsaṇḍānaṃ dhammānaṃ pavaraṃ yadidaṃ sugatavinayaṃ navutiyā haṃsasahashehi parivuto”tiādinī payogāni dissanti. Tathā **simhi** **aggis**addantassa **ini**ādesakaraṇavasena “aggini”ti rūpe nipphannepi puna “aggini”ti pakatiṃ ṭhapetvā tato **yoam**nādayo vibhattiyo katvā “aggini, agginī, agginayo. Agginim, agginī, agginayo. Aggininā”tiādinī kathaṃ na nipphajjissantīti sannitṭhānaṃ kātabbaṃ.

Savinicchayoyaṃ ikārantapullīṅgānaṃ pakatirūpassa nāmikapadamālāvibhāgo.

Ikārantatāpakatikam ikārantapullīṅgaṃ niṭṭhitam.

Idāni **bhāvī** iccetassa pakatirūpassa aññesañca taṃsadisānaṃ nāmikapadamālāvibhāgaṃ vakkhāma pubbācariyamataṃ purecaram katvā.

Daṇḍī, daṇḍī, daṇḍino. Daṇḍim, daṇḍī, daṇḍino. Daṇḍinā, daṇḍīhi, daṇḍībhi. Daṇḍissa, daṇḍino, daṇḍīnaṃ. Daṇḍinā, daṇḍīhi, daṇḍībhi. Daṇḍissa, daṇḍino, daṇḍīnaṃ. Daṇḍismim, daṇḍimhi, daṇḍīsu. Bho daṇḍi, bho daṇḍī, bhavanto daṇḍino. **Yamakamahāthera**matam.

Ettha kiñcāpi “daṇḍina”nti upayogekavacanañca “daṇḍismā, daṇḍimhā”ti nissakkavacanañca “daṇḍini”ti bhummekavacanañca nāgataṃ, tathāpi tattha tattha taṃsadisassa payogassa dassanato gahetabbameva.

“Bhaṇa samma anuññāto, atthaṃ dhammañca kevalaṃ;  
Santi hi daharā pakkhī, paññavanto jutindharā”ti

**Pāliyaṃ** “pakkhī”iti paccattabahuvacanassa dassanato pana “daṇḍī”iti paccattopayogabahuvacanāni vuttānīti daṭṭhabbaṃ.

Bhāvī, bhāvī, bhāvino. Bhāvīṃ, bhāvinaṃ, bhāvī, bhāvino. Bhāvinā, bhāvīhi, bhāvībhi.  
Bhāvissa, bhāvino, bhāvīnaṃ. Bhāvinā, bhāvismā, bhāvīmā, bhāvīhi, bhāvībhi. Bhāvissa, bhāvino,  
bhāvīnaṃ. (Bhāvini) bhāvisimī, bhāvīmhi, bhāvīsu. Bho bhāvī, bho bhāvī, bhavanto bhāvino.

Evam vibhāvī sambhāvī, paribhāvī dhajī gaṇī;  
Sukhī rogī sasī kuṭṭhī, makuṭṭī kusalī balī.

Jaṭī yogī karī yānī, tomarī musalī phalī;  
Dantī mantī sudhī medhī, bhāgī bhogī nakhī sikhī.

Dhammī saṅghī ñāṇī atthī, hatthī cakkhī pakkhī dāṭhī;  
Raṭṭhī chattī māli cammī, cārī cāgī kāmī sāmī.

Mallakārī pāpakārī, sattughātī dīghajīvī;  
Dhammavādī sīhanādī, bhūmisāyī sīghayāyī.

Vajjadassī ca pāṇī ca, yasassiccādayopi ca;  
Etesaṃ koci bhedo tu, ekadesena vuccate.

**Īkāranta**pulliṅgapadesu hi “vajjadassī, pāṇī”icevamādīnaṃ upayogabhummavacanaṭṭhāne “vajjadassināṃ, pāṇine”tiādīnīpi rūpāni bhavanti. Ettha ca –

“Nidhīnaṃva pavattāraṃ, yaṃ passe vajjadassināṃ;  
Evam jarā ca maccu ca, adhvattanti pāṇine.

Samupagacchati sasini gaganatalaṃ.

Upahacca manāṃ majjho, mātaṅgasmim yasassine;  
Ucchinno saha raṭṭhena, majjhāraññaṃ tadā ahu.

Susukhaṃ vata jīvāma, verinesu averino”ti

Evamādayo payogā veditabbā, ayaṃ nayo **daṇḍī**padādīsipi labbhateva samānagatikattā **daṇḍī**padādīnaṃ **vajjadassī**padādīhi. Tasmā upayogaṭṭhāne “daṇḍim, daṇḍinaṃ, daṇḍino, daṇḍine”ti yojetabbāṃ. Bhummaṭṭhāne “daṇḍismim, daṇḍimhi, daṇḍini, daṇḍine, daṇḍīsu, daṇḍīnesū”ti yojetabbāṃ. Esa nayo **gāmaṇī senānī**ccādīni vajjetvā yathārahaṃ **īkāranta**pulliṅgesu netabbo.

Savinicchayoyaṃ **īkāranta**pulliṅgānaṃ pakatirūpassa nāmikapadamālāvibhāgo.

**Īkāranta**ṭāpakatikaṃ **īkāranta**pulliṅgaṃ niṭṭhitaṃ.

Idāni **bhū**dhātumayānaṃ **ukāranta**pulliṅgānaṃ appasiddhattā aññesaṃ **ukāranta**pulliṅgānaṃ vasena pakatirūpassa nāmikapadamālaṃ pūressāma. Katamāni tāni? “Bhikkhu hetu setu ketu rāhu

bhāṇu khāṇu saṅku ucchu veḷu maccu jantu sindhu bandhu ruru neru sattu babbu paṭu bindu garu’’iccādīni.

Bhikkhu, bhikkhū, bhikkhavo. Bhikkhum, bhikkhū, bhikkhavo. Bhikkhunā, bhikkhūhi, bhikkhūbhi. Bhikkhussa, bhikkhuno, bhikkhūnaṃ. Bhikkhunā, bhikkhusmā, bhikkhumhā, bhikkhūhi, bhikkhūbhi. Bhikkhussa, bhikkhuno, bhikkhūnaṃ. Bhikkhusmiṃ, bhikkhumhi, bhikkhūsu. Bho bhikkhu, bhavanto bhikkhū, bhikkhave, bhikkhavo. **Bhikkhu**ādīni aññāni ca taṃsadisāni evaṃ ñeyyāni.

Ayampi panettha vireso ñeyyo – hetu, hetū, hetuyo, hetavo. Hetum, hetū, hetuyo, hetavo. Bho hetu, bhavanto hetū, hetave, hetavo. Sesam **bhikkhusamaṃ**.

Atha vā ‘‘hetuyā’’tiādīnaṃ dassanato ‘‘dhenuyā’’ti itthiliṅgarūpena sadisaṃ ‘‘hetuyā’’ti pulliṅgarūpampi sattamīṭhāne icchitabbaṃ. Kānici hi pulliṅgarūpāni kehici itthiliṅgarūpehi sadisāni bhavanti. Taṃ yathā? ‘‘Uṭṭhehi katte taramāno. Ehi bālekhamāpehi, kusarājaṃ mahabbalaṃ. Bhātarā mātarā adhipatiyā rattiyā hetuyo dhenuyo matyā petyā’’ti evaṃ nayadassanena ‘‘hetuyā tīṇi. Adhipatiyā satta. Uṭṭhehi katte’’tiādīsu liṅgavipallāsacintā na uppādetabbā.

Jantu, jantū, jantuyo, jantuno, jantavo. Jantum, jantū, jantuyo, jantuno, jantavo. Bho jantu, bhavanto jantū, jantave jantavo. Sesam **bhikkhusamaṃ**.

Garu, garū, garavo, garuno. Garum, garū, garavo, garuno. Bho garu, bhavanto garū, garavo, garuno. Sesam **bhikkhusamaṃ**. Ettha pana ‘‘bhattu ca garuno sabbe, paṭipūjeti paṇḍitā’’tipāḷinidassanaṃ. Tatra ‘‘bhikkhave’’ti āmantanapadaṃ cuṇṇiyapadesveva dissati, na gāthāsu. ‘‘Bhikkhavo’’ti paccattapadaṃ gāthāsuyeva dissati, na cuṇṇiyapadesu, apica ‘‘bhikkhave’’ti āmantanapadaṃ sāvakassa bhikkhūnaṃ āmantanapāḷiyaṃ sandhivisayeyeva dissati, na asandhivisaye, buddhassa pana bhikkhūnaṃ āmantanapāḷiyaṃ sandhivisayepi asandhivisayepi dissati. ‘‘Bhikkhavo’’ti āmantanapadaṃ buddhassa bhikkhūnaṃ āmantanapāḷiyaṃ gāthāsu ca dissati, cuṇṇiyapadesu ca sandhivisayeyeva dissati. Sāvakassa pana bhikkhūnaṃ āmantanapāḷiyaṃ na dissatīti ayaṃ dvinnam vireso daṭṭhabbo. Tathā hi ‘‘evaṅca pana bhikkhave imaṃ sikkhāpadaṃ uddiseyyāthā’’tiādīsu ‘‘bhikkhave’’ti padaṃ cuṇṇiyapadesveva diṭṭhaṃ. ‘‘Bhikkhavo tisatā ime, yācanti pañjalīkatā’’tiādīsu ‘‘bhikkhavo’’ti paccattapadaṃ gāthāsuyeva diṭṭhaṃ. ‘‘Āyasmā sārīputto bhikkhū āmantesi āvuso bhikkhave’’ti evamādīsu sāvakassa bhikkhūnaṃ āmantanapāḷīsu sandhivisayeyeva ‘‘bhikkhave’’ti padaṃ diṭṭhaṃ. ‘‘Bhikkhū āmantesi sotukāmattha bhikkhave’’ti ‘‘idha bhikkhave bhikkhū’’tiādīsu pana buddhassa bhikkhūnaṃ āmantanapāḷīsu sandhivisayāvisayesu ‘‘bhikkhave’’ti padaṃ diṭṭhaṃ. ‘‘Araññe rukkhamaḷe vā, suññāgāreva bhikkhavo’’ti ‘‘tatra kho bhagavā bhikkhū āmantesi bhikkhavo’’ti evamādīsu buddhassa bhikkhūnaṃ āmantanapāḷīsu ‘‘bhikkhavo’’ti āmantanapadaṃ gāthāsu ca diṭṭhaṃ, cuṇṇiyapadesu ca sandhivisayeyeva diṭṭhaṃ. Icevaṃ –

Cuṇṇiyeva pade diṭṭhaṃ, ‘‘bhikkhave’’ti padaṃ dvidhā;  
Yato pavattate sandhi-visayāvisayesu taṃ.

‘‘Bhikkhavo’’ti padaṃ diṭṭhaṃ, gāthāyañceva cuṇṇiye;  
Padasmimpi ca sandhissa, visayevāti niddiseti.

Savinicchayoyaṃ ukārantapullīṅgānaṃ pakatirūpassa nāmikapadamālāvibhāgo.

Ukārantatāpakatikaṃ ukārantapullīṅgaṃ niṭṭhitam.

Idāni pana **sayambhū**iccetassa pakatirūpassa taṃsadisānañca nāmikapadamālaṃ kathayāma –

Sayambhū, sayambhū, sayambhuvo. Sayambhum, sayambhū, sayambhuvo. Sayambhunā, sayambhūhi, sayambhūbhi. Sayambhussa, sayambhuno, sayambhūnaṃ. Sayambhunā, sayambhusmā,

sayambhumhā, sayambhūhi, sayambhūbhi. Sayambhussa, sayambhuno, sayambhūnaṃ. Sayambhusmiṃ, sayambhumhi, sayambhūsu. Bho sayambhu, bho sayambhū, bhavanto sayambhū, sayambhuvo. Evaṃ **pabhū abhibhūvibhū** iccādīnipi.

Sabbaññū, sabbaññū, sabbaññuno. Sabbaññuṃ, sabbaññū, sabbaññuno. Bho sabbaññū, bhavanto sabbaññū, sabbaññuno, sesāsu vibhattīsu padāni **bhikkhusadisāni** bhavanti, evaṃ vidū viññū kataññū maggaññū dhammaññū atthaññū kālaññū rattaññū mattaññū vadaññū avadaññū iccādīni.

Tatra “ye ca laddhā manussattaṃ, vadaññū vītamaccharā”ti ettha “vadaññū”ti paccattabahuvacanassa dassanato **sayambhū sabbaññū** iccādīnampi paccattopayogabahuvacanattaṃ gahetabbaṃ. Apica “vidū, viññū”tiādīsu “paracittavidunī”ti itthilingadassanato itthilinge vattabbe “vidunī, vidunī, viduniyo. Viduniṃ, vidunī, viduniyo. Viduniyā”ti **itthinayena** padamālā kātabbā. Tathā “viññū paṭibalā subhāsītadubbhāsitaṃ duṭṭhullāduṭṭhullaṃ ājānitu”nti ettha “viññū”ti itthilingadassanato “kodhanā akataññū ca, piṣuṇā mittabhedikā”ti ettha ca “akataññū”ti itthilingadassanato “viññū, viññū, viññuyo. Viññuṃ, viññū, viññuyo. Viññuyā”ti ca “kataññū, kataññū, kataññuyo. Kataññuṃ, kataññū, kataññuyo, kataññuyāti ca **jambū**ayena padamālā kātabbā. Evaṃ “maggaññū, dhammaññū”iccādīsopi. “Sayambhū”ti pade pana “sayambhu ñāṇaṃ gotrabhu citta”nti dassanato napuṃsakalingatte vattabbe “sayambhu, sayambhū, sayambhūni. Sayambhuṃ, sayambhū, sayambhūnī”ti napuṃsake **āyuna**yopi gahetabbo. Esa nayo sesesupi yathārahaṃ gahetabbo.

Savinicchayoyaṃ **ūkāranta**pulliṅgānaṃ pakatirūpassa nāmikapadamālāvibhāgo.

**Ūkāranta**tāpakatikaṃ **ūkāranta**pulliṅgaṃ niṭṭhitaṃ.

Iti sabbathāpi pulliṅgānaṃ pakatirūpassa

Nāmikapadamālāvibhāgo samatto.

Yasmā panāyaṃ samattopi pāvacañādisu yaṃ yaṃ thānaṃ sotūnaṃ sammuyhanaṭṭhānaṃ dissati, tattha tattha sotūnāmanuggahāya codanāsodhanāvasena saṃsayaṃ samugghāṭetvā puna vattabbo hoti, tasmā kiñci padesamettha kathayāma.

Yaṃ kira bho pālīyaṃ “saññate brahmacārayo, apace brahmacārayo”ti ca rūpaṃ **ikāranta**ssa **aggisaddassa** “aggayo”ti rūpamiva vuttaṃ, taṃ tathā avatvā **ikāranta**ssa **daṇḍisaddassa** “daṇḍino”ti rūpamiva “brahmacārino”iceva vattabbanti? Saccāṃ, tattha “brahmaṃ caratīti brahmacāri yathā munātīti munī”ti evaṃ **ikāranta**vasena icchittā. “Munayo aggayo”ti rūpāni viya “brahmacārayo”ti rūpaṃ bhavati. Aññattha pana “brahmaṃ caraṇasīloti brahmacārī, yathā dukkaṭaṃ kammaṃ karaṇasīloti dukkaṭakammakārī”ti evaṃ tassilatthaṃ gahetvā **ikāranta**vasena gahaṇe “dukkaṭakammakārino”ti rūpamiva “daṇḍo assa atthīti daṇḍī”ti **ikāranta**ssa saddassa “daṇḍino”ti rūpamiva ca “brahmacārino”ti rūpaṃ bhavati. Tathā hi “ime hi nāma dhammacārino samacārino brahmacārino saccavādino sīlavanto kalyāṇadhammā paṭijānissanti”ti pālī dissati. Evaṃ **ikāranta**vasena “brahmacārayo”ti paccattopayogālanabahuvacanarūpaṃ yujjati, puna **ikāranta**vasena “brahmacārino”ti paccattopayogālanabahuvacanarūpampi yujjati, tasmā “brahmacāri, brahmacārī, brahmacārayo”ti **aggina**yena, “brahmacārī, brahmacārī, brahmacārino”ti **daṇḍi**ayena ca padamālā gahetabbā.

Yaṃ pana āyasmā **buddhaghoso** “yathā sobhanti yatino, sīlabhūsanabhūsitā”ti ettha **yatisaddassa** **ikāranta**ssa **aggisaddassa** “aggayo”ti rūpaṃ viya “yatayo”ti rūpaṃ avatvā kasmā **ikāranta**ssa **daṇḍisaddassa** “daṇḍino”ti rūpaṃ viya “yatino”ti rūpaṃ dasseti. Nanvesā pamādalekhā viya dissati. Yathā hi “kukkuṭa maṇayo daṇḍā sivayo deva te kuddhā”ti pālīgatiyā upaparikkhiyamānāya “yatayo”ti rūpeneva bhavitabbaṃ **ikāranta**tattāti? Nāyaṃ pamādalekhā. “Vadanāsīlo vādī”ti ettha viya tassilatthaṃ gahetvā **ikāranta**vasena yojane niddosattā, tasmā

“yatanasīlo yatī”ti evaṃ tassīlattham cetasi sannidhāya ikārantavasena “yatino”ti sampadānasāmīnamekavacanasadisam paccattabahuvacānarūpaṃ bhadantena buddhaghosena dassitanti daṭṭhabbam. Upayogālapānabahuvacānarūpampi tādisameva.

Yattha pana tassīlattham aggahetvā “yo munāti ubho loke, muni tena pavuccatī”ti ettha viya “yatati vīriyaṃ karotīti yatī”ti kattukārakavasena ikārantabhāvo gayhati. Tattha “munayo maṇayo sivayo”ti yokārantarūpāni viya “yatayo”ti yokārantam paccattabahuvacānarūpaṃ upayogālapānabahuvacānarūpaṃ bhavati, evaṃ ikārantapullīngānam tīsu ṭhānesu yokārantāneva rūpāni bhavanti daṭṭhabbam.

Yadi evaṃ ikārantapullīngānam sāramati suddhadiṭṭhisammādiṭṭhimicchādiṭṭhivajirabuddhi saddādī kathanti? Etesam pana ikārantavasena niddiṭṭhānampi samāsapadattā **aggīnaye** aṭṭhatvā yathāsambhavaṃ **daṇḍīnaye** tiṭṭhanato **nokārantāneva** rūpāni. Tathā hi “asāre sāramatino”ti **nokārantapaccattabahuvacānapāḷi** dissati, upayogālapānabahuvacānarūpampi tādisameva daṭṭhabbam. Nanu ca bho **kaccāyanappakaraṇe** “atthe visāradamatayo”ti ettha samāsapadassa ikārantapullīngassa yokārantassa paccattabahuvacānapāṭhassa dassanato **sāramatisaddādīnampi** “visāradamatayo”ti rūpena viya yokārantehi rūpehi bhavitabbanti? Napi bhavitabbam buddhavacane samāsapadānam ikārantapullīngānam “visāradamatayo”ti rūpasadisassa rūpassa adassanatoti.

Nanu ca bho buddhavacane “pañcime gahapatayo ānisaṃsā. Te honti jānipatayo, aññamaññaṃ piyaṃvadā”ti samāsapadānam ikārantapullīngānam “visāradamatayo”ti rūpasadisāni yokārantāni rūpāni dissanti. Evaṃ sante kasmā “buddhavacane samāsapadānam ikārantapullīngānam “visāradamatayo”ti rūpasadisassa yokārantassa rūpassa adassanato”ti vuttanti? Ettha vuccate – visadisattam paṭicca. **Gahapatisaddādīsu** hi yasmā **patisaddo** sabhāveneva pullīngo, na tu samāsato pubbe itthilīngapakatiko hutvā pacchā pullīngabhāvaṃ patto, tasmā īdisesu ṭhānesu “gahapatayo, jānipatayo”ti yokārantāni, “senāpatayo, senāpatino”ti **yo nokārantāni** ca paccattopayogālapānabahuvacānarūpāni bhavanti. Tathā hi “tattakā senāpatino”ti aṭṭhakathāpāṭho dissati. Yasmā pana sāramati suddhadiṭṭhisammādiṭṭhi micchādiṭṭhi vajirabuddhi saddādīsu **matidiṭṭhisaddādayo** samāsato pubbe itthilīngapakatikā hutvā pacchā bahubbhīsamāsavasena pullīngabhāvappattā, tasmā īdisesu ṭhānesu “sāramatino suddhadiṭṭhino sammādiṭṭhino micchādiṭṭhino vajirabuddhino”tiādīni **nokārantāni**eva paccattopayogālapānabahuvacānarūpāni bhavanti, sampadānasāmīnamekavacānehi sadisānti niṭṭhametthāvagantabbam.

**Seṭṭhi sārathicakkavattisāmī**iccetesu kathanti? Ettha pana ayaṃ vireso veditabbo – katthaci pāṭhe “seṭṭhī sārathī cakkavattī sāmī”ti antakkharassa dīghattam dissati, katthaci pana “seṭṭhi sārathī cakkavattī sāmī”iti antakkharassa rassattam dissati. Kiñcāpi rassattametesam dissati, tathāpi tattha tattha paccattavacānādibhāvena “seṭṭhino sārathino”tiādīpayogadassanato rassam katvā etāni uccāriyantīti ñāyati, tasmā evaṃ nibbānanattho gahetabbo – seṭṭham dhanasāram, ṭhānantaram vā assa atthīti **seṭṭhī**. Assadammādayo sārānasīloti **sārathī**. Cakkam pavattanasīloti **cakkavattī**. Sam etassa atthīti **sāmī**ti. Assatthikatassīlatthasaddā hi **nokārantarūpavasena** samānagatikā bhavanti yathā “daṇḍino bhūmisāyino”ti. Aparopi nibbānanattho ikārantavasena assadammādayo saretīti **sārathī**. Tathā hi “purisadamme saretīti purisadammasārathī”ti vuttam. Cakkam vattetīti cakkavattī. Evaṃ kattukārakavasena ikārantattam gahetvā katthaci labbhāmānampi ikārantattam anapekkhitvā buddhavacānanurūpena “sārathino cakkavattino”tiādīni **nokārantarūpāni** gahetvā **daṇḍīnaye**na yojetabbāni “daṇḍīni”tiādīkam vajjitabbam vajjetvā. Evaṃ “seṭṭhino sārathino cakkavattino sāmīno”tiādīni **nokārantāni**eva rūpāni ñeyyāni.

Atra kiñci payogaṃ nidassanamattam kathayāma. “Tāta tayo seṭṭhino amhākam bahūpakārā”ti ca “te katabhattakiccā mahāseṭṭhino mayam gamissāmā”ti vadīmsū”ti ca “sārathino āhamsū”ti ca “dve cakkavattino”ti ca evamādīni. Tattha kiñcāpi katthaci “seṭṭhi sārathī”iccādi rassattapāṭho dissati, tathāpi so sabhāvena rassattabhāvo pāṭho na hoti, dīghassa rassattakaraṇapāṭhoti veditabbo. Padamālā cassa vuttanayena veditabbā.

**Mahesī**ti ettha kathanti? “Mahesī”ti ettha kiñcāpi **mahesīsaddo** ikārantavasena niddisiyati,

tathāpi **isis**saddena samānagatikattā **isis**saddassa **aggis**saddena samānapadamālattā **aggin**ayena padamālā kātabbā. Nanu ca bho ettha tassīlattho dissati “mahante sīlakkhandhādayo dhamme esanasīloti mahesī”ti, tasmā “bhūmisāyī”ti padassa viya **daṇḍī**ṇayeneva padamālā kātabbāti? Na kātabbā tassīlatthassa asambhavato. Imassa hi “mahante sīlakkhandhādayo dhamme esi gavesi esitvā ṭhitoti mahesī”ti atassīlattho eva yujjati. Katakaraṇīyesu buddhādīsū ariyesu pavattanāmattā. **Isis**saddena cāyaṃ saddo īsakam samāno kevalam samāsapariyosāne dīghavasena uccāriyati, rassavasena pana “mahā isi mahesī”ti sandhiviggaho. Yasmā rassattaṃ gahetvā tassa padamālākaraṇam yujjati, tasmā “saṅgāyimsu mahesayo”ti **ikā**rantarūpaṃ dissati. Na hi sātṭhakathe teṭṭake buddhavacane katthaciṇi catutthīchaṭṭhekavacanarūpaṃ viya “mahesino”ti paccattopayogālanabahuvacanarūpaṃ dissati. Tasmā **ikā**rantavasena uccāritassapi sato rassavasena uccāritassa viya “mahesi, mahesī, mahesayo. Mahesiṃ, mahesī, mahesayo. Mahesinā”ti padamālā kātabbā. Apica **mahesī**saddo yattha rājagubbarivācako, tattha itthiliṅgo hoti, tabbasena pana “mahesī, mahesī, mahesiyo. Mahesiṃ, mahesī, mahesiyo. Mahesiyā”ti ca vakkhamānaitṭhīṇayena padamālā kātabbā. **Hatthī**sadde kathanti? **Hatthī**saddassa pana hattho assa atthīti evaṃ **ikā**rantavasena gahaṇe “hatthino”ti rūpaṃ bhavati. Tathā hi “vane hatthino”ti payogo dissati. Tasseva tasmīyevatthe rassam katvā gahaṇe “hatthayo”ti rūpaṃ bhavati. Tathā hi –

“Haṃsā koṇcā mayūrā ca, hatthayo pasadā migā;  
Sabbe sīhassa bhāyanti, natthi kāyasmī tulyatā.

Evameva manussesu, daharo cepi paññavā;  
Sopi tattha mahā hoti, neva bālo sarīravā”ti

Imasmīṃ **keḷisīlajā**take “hatthayo”ti āhaccapadaṃ dissati. Evamassa **daṇḍī**ṇayena ca **aggin**ayena ca dvidhā padamālā, veditabbā. Iminā nayena avuttessu pīṭhānesu pāḷinayānurūpena porāṇaṭṭhakathānurūpena ca padamālā yojetabbā.

Ettāvatā **bhū**dhātumayānaṃ pulliṅgānaṃ nāmikapadamālā saddhiṃ liṅgantarehi saddantarehi atthantarehi ca nānappakāro dassitā.

Imaṃ saddanītiṃ sunītiṃ vicittaṃ,  
Sapaññehi sammā parīpālanīyaṃ;  
Sadā suṭṭhu cinteti vāceti yo so,  
Naro ñāṇavittinnatam yāti seṭṭham.

Iti navaṅge sātṭhakathe piṭakattaye byappathagātīsū viññūnaṃ

Kosallatthāya kate saddanītipakaraṇe

Savinicchayo niggahītantādipulliṅgānaṃ

Pakatirūpassa nāmikapadamālāvibhāgo

Sattamo paricchedo.

Sabbathāpi pulliṅgaṃ samattaṃ.

## 8. Itthiliṅganāmikapadamālā

Atha itthiliṅgesu ākārantassa **bhū**dhātumayassa pakatirūpabhūtassa **bhāvīkā**saddassa nāmikapadamālāyaṃ vattabbāyampi pasiddhassa tāva **kaññā**saddassa nāmikapadamālāyaṃ vakkhāma

Kaññā, kaññā, kaññāyo. Kaññam, kaññā, kaññāyo. Kaññāya, kaññāhi, kaññābhi. Kaññāya,



kaññānaṃ. Kaññāya, kaññāhi, kaññābhi. Kaññāya, kaññānaṃ. Kaññāya, kaññāyaṃ, kaññāsu.  
Bhoti kaññe, bhotiyo kaññā, kaññāyo. Ayamamhākaṃ ruci.

Ettha “kaññā”ti ekavacanabahuvacanavasena vuttaṃ, **niruttipiṭake** bahuvacanavasena vutto nayo natthi. Tathā hi tattha “saddhā tiṭṭhati, saddhāyo tiṭṭhanti. Saddhaṃ passati, saddhāyo passati”ti ettakameva vuttaṃ, “saddhā”ti bahuvacanaṃ na āgataṃ. Kiñcāpi nāgataṃ, tathāpi “bāhā paggayha pakkandūṃ, sivikaññā samāgatā. Ahetu appaccayā purisassa saññā uppajjantipi nirujjhantipi”tiādipāḷidassanato **bāhakaññā saññā**saddādīnaṃ bahuvacanaṭā gahetabbā. **Cūlaniruttiyaṃ** “bhoti kaññe, bhoti kaññā”ti dve ekavacanāni vatvā “bhotiyo kaññāyo”ti ekaṃ bahuvacanaṃ vuttaṃ. **Niruttipiṭake** pana “bhoti saddhā”ti ekavacanaṃ vatvā “bhotiyo saddhāyo”ti ekaṃ bahuvacanaṃ vuttaṃ. Mayaṃ panettha “ehi bāle khamāpehi, kusarājaṃ mahabbalaṃ. Phussati varavaṇṇābhe. Ehi godhe nivattassu”tiādipāḷidassanato “bhoti kaññe, bhotiyo kaññā, kaññāyo”ti evaṃpakārāniyeva ālapanekavacanabahuvacanāni icchāma. Ettha “bhoti kaññe”ti ayaṃ nayo **ammā**ḍisu **mātā**ḍisu ca na labbhati.

Bhāvikā, bhāvikā, bhāvikāyo. Bhāvikāṃ, bhāvikā, bhāvikāyo. Bhāvikāya, bhāvikāhi, bhāvikābhi. Bhāvikāya, bhāvikānaṃ. Bhāvikāya, bhāvikāhi, bhāvikābhi. Bhāvikāya, bhāvikānaṃ. Bhāvikāya, bhāvikāyaṃ, bhāvikāsu. Bhoti bhāvike, bhotiyo bhāvikā, bhāvikāyo.

Evaṃ heṭṭhuddiṭṭhānaṃ sabbesaṃ **bhū**dhātumayānaṃ “bhāvanā vibhāvanā”iccevamādīnaṃ **ākā**rantapadānaṃ aññesañcā **ākā**rantapadānaṃ nāmikapadamālā yojetabbā. Etthaññāni **ākā**rantapadāni nāma **saddhā**dīni.

Saddhā medhā paññā vijjā, cintā mantā taṇhā’bhijjhā;  
Icchā pucchā jāyā māyā, mettā mattā sikkhā saṅkhā.

Jaṅghā bāhā gīvā jivhā, vācā chāyā gaṅgā nāvā;  
Niddā kantā sālā mālā, velā vīṇā bhikkhā lākhā.

Gāthā senā lekhā’pekkhā, āsā pūjā esā kaṅkhā;  
Aññā muddā khiḍḍā bhassā, bhāsā kīḷā sattā cetā.

Pipāsā vedanā saññā, cetanā tasiṇā pajā;  
Devatā vaṭṭakā godhā, balākā vasudhā sabhā.

Ukkā sephālikā sikkā, salākā vālikā sikkhā;  
Kāraṇā visikkhā sākhā, vacā vañjhā jaṭā ghaṭā.

Pīḷā soṇḍā vitaṇḍā ca, karuṇā vanitā latā;  
Kathā nindā sudhā rādhā, vāsanā siṃsapā papā.

Pabhā sīmā khamā ejā,  
Khattiyā sakkharā surā;  
Dolā tulā silā līlā,  
Lāle’lā mekhalā kalā.

Vaḷavā suṇisā mūsā, mañjūsā sulasā disā;  
Nāsā juṅhā guhā ṭhā, lasikā parisā nisā;  
Mātikiccādayo ceva, **bhāvikā**padasādisā.

Ammannambā ca tātā ca, kiñcideva samā siyuṃ;  
Mātā dhītā panattādī, puthageva ito siyuṃ.

**Parisā**saddassa pana sattamīṭhāne “parisāya, parisāyaṃ, parisati, parisāsū”ti yojetabbaṃ

“ekamidaṃ bho gotama samayaṃ todeyyassa brāhmaṇassa parisati parūpārambhaṃ vattenti”ti pālīdassanato. **Ammā**dīnaṃ pana “ammā, ammā, ammāyo”tiādīnā **kaññā**ṇayena vatvā avasāne “bhoti amma, bhoti ammā, bhotiyo ammā, ammāyo”tiādīnā yojettabbaṃ.

Mātā, mātā, mātāro. Mātaraṃ, mātāro. Mātārā, mātuyā, matyā, mātūhi, mātūbhi. Mātu, mātuyā, matyā, mātārānaṃ, mātānaṃ, mātūnaṃ. Mātārā, mātuyā, matyā, mātūhi, mātūbhi. Mātu, mātuyā, matyā, mātārānaṃ, mātānaṃ, mātūnaṃ. Mātari, mātuyā, matyā, mātuyāṃ, matyāṃ, mātūsu. Bhoti mātā, bhotiyo mātā, mātāro.

Ettha pana yasmā pāliyaṃ itthilingānaṃ sakārantāni rūpāni **ehi ebhi esukārantādīni** ca **enantādīni** ca na dissanti, tasmā kehici vuttānīpi “mātussa mātarehī”tiādīni na vuttāni, esa nayo itaresupi. “Yaṃkiñcithikataṃ puññaṃ, mayhañca mātuyā ca te. Anuññāto ahaṃ matyā”ti pālīdassanato pana karaṇasampadānanissakkasāmibhumavacanaṭṭhāne “mātuyā, matyā”ti ca vuttaṃ itthilingaṭṭhāne samānagatikattā tesam vacanānaṃ. Tathā hi **ummādantijātake** “matyā”ti padaṃ pañcamītiyekavacanasena āgataṃ, yathā pana “khattiyā”ti padaṃ majjhasaralopavasena “khatyā”ti bhavati, tathā “mātuyā mātuyā”nti ca padaṃ “matyā, matyā”nti bhavati, ayaṃ nayo **dhītusaddādīsu** na labbhati.

Dhītā, dhītā, dhītāro. Dhītaṃ, dhītaraṃ, dhītāro. Dhītuyā, dhītūhi, dhītūbhi. Dhītu, dhītuyā, dhītārānaṃ, dhītānaṃ, dhītūnaṃ. Dhītārā, dhītuyā, dhītūhi, dhītūbhi. Dhītu, dhītuyā, dhītārānaṃ, dhītānaṃ, dhītūnaṃ. Dhītari, dhītuyā, dhītuyāṃ, dhītūsu. Bhoti dhītu, bhoti dhītā, bhotiyo dhītā, dhītāro. Ettha pana.

“Jāliṃ kaṇhājinaṃ dhītaṃ, maddideviṃ patibbatam;  
Cajamāno na cintesiṃ, bodhiyāyeva kāraṇā”ti

Pāliyaṃ “dhīta”nti dassanato upayogavacanaṭṭhāne “dhīta”nti vuttaṃ, tasmā idaṃ sārato gahetabbaṃ, tathā pāliyaṃ “assamañi hoti asakyadhītārā”ti samāsapadassa dassanato tatiyekavacanaṭṭhāne “setṭhidhītārā”tiādikaṃ paṭhamekavacanaṭṭhāne samāsapadaṃ gahetabbameva, **niruttipiṭake** pana “mātā dhītā”ti padadvayaṃ **saddhā**ṇaye pakkhitta, tamamhehi “saddhāyā”ti padassa viya “mātāyā”tiādīnaṃ pālīdāsu byāse adassanato visuṃ gahitaṃ samāseyyeva hi īdisiṃ saddagatiṃ passāma “rājamātāya rājadhītāya setṭhidhītāyā”ti. Evaṃ **kaññā**ṇayopi ekadesena labbhati, tathā “acchariyaṃ nandamāte, abbhutaṃ nandamāte”ti pāliyaṃ “nandamāte”ti dassanato “bhoti rājamāte, bhoti rājadhīte”ti evamādinayopi labbhati, tatra **nandamāte**ti nandassa mātā nandamātā, bhoti nandamāte, evaṃ samāseyyeva īdisi saddagati hoti, tasmā samāsapadatte “mātu dhītu duhītu”iccetesam pakatirūpānaṃ dve koṭṭhāsā gahetabbā paṭhamam dassitarūpakoṭṭhāso ca **kaññā**ṇayo rūpakoṭṭhāso cāti. **Nattā**dīni padāni na kevalam pulliṅgāniyeva honti, atha kho itthilingānīpi. Tathā hi “visākhāya nattā kālaṅkatā hoti. Catasso mūsikā gādham kattā, no vasitā”tiādīni payogāni sāsane dissanti.

Nattā, nattā, nattāro. Nattaṃ, nattāraṃ, nattāro. Nattārā, nattuyā, nattūhi, nattūbhi. Nattu, nattuyā, nattārānaṃ, nattānaṃ, nattūnaṃ. Nattārā, nattuyā, nattūhi, nattūbhi. Nattu, nattuyā, nattārānaṃ, nattānaṃ, nattūnaṃ. Nattari, nattuyā, nattuyāṃ, nattūsu. Bhoti natta, bhoti nattā, bhotiyo nattā, nattāro.

Evaṃ “kattā vasitā bhāsitā” iccādīsipi samāsapadatte pana “rājamātāya nandamāte”tiādīni viya “rājanattāya, rājanatte”tiādīni rūpāni bhavanti.

Savinicchayoyaṃ **ākārantukārantitthilingānaṃ** pakatirūpassa nāmikapadamālāvibhāgo.

Ākārantukārantatāpakatikam

Ākārantitthilingam niṭṭhitam.



Tatra “pokkharāṇī dāsī, brāhmaṇī”ccādīnaṃ gati;  
Aññathāpi siyā gāthā-cuṇṇiyesu yathārahaṃ.

“Kusāvati”tiādīnaṃ, gāthāsveva visesato;  
Rūpāni aññathā honti, ekavacanato vade.

“Kāsī avanti”iccādī, bahuvacanato vade;  
“Candavati”tiādīni, payogassānurūpato.

Tathā hi “pokkharāṇī sumāpitā. Tā ca sattasatā bhariyā, dāsyo sattasatāni ca. Dārake ca ahaṃ  
nessaṃ, brāhmaṇyā paricārake. Najjo sandanti. Najjā nerañjarāya tīre. Lakkhyā bhava nivesanaṃ.

Bārāṇasyaṃ mahārāja, kākarājā nivāsako;  
Asītiyā sahassehi, supatto parivārīto.

Rājā yathā vessavaṇo naḷiṇṇā”nti

Evamādīnaṃ pālīnaṃ dassanato **pokkharāṇī** iccādīnaṃ nāmikapadamālāyo savisesā yojetabbā.  
Kathaṃ? ‘Pokkharāṇī, pokkharāṇī, pokkharāṇiyo, pokkharāṇī. Pokkharāṇī”ntiādīnā vatvā  
karaṇasampadānanissakkasāmivacanaṭṭhāne “pokkharāṇiyā, pokkharāṇī”ti ekavacanāni  
vattabbāni. Bhumavacanaṭṭhāne pana “pokkharāṇiyā, pokkharāṇī, pokkharāṇiyaṃ,  
pokkharāṇī”nti ca ekavacanāni vattabbāni. Sabbattha ca padāni paripuṇṇāni kātabbāni. Tathā  
“dāsī, dāsī, dāsīyo, dāsyo. Dāsīṃ, dāsīyaṃ, dāsī, dāsīyo, dāsyo”ti vatvā karaṇavacanaṭṭhānādīsu  
“dāsīyā, dāsīyā”ti ekavacanāni vattabbāni. Bhumavacanaṭṭhāne pana “dāsīyā, dāsīyā, dāsīyaṃ,  
dāsīyā”nti ca ekavacanāni vattabbāni. Sabbattha padāni paripuṇṇāni kātabbāni. Ettha pana “yaṭṭhiyā  
paṭikoṭeti, ghare jātaṃva dāsīyaṃ. Phusissāmi vimuttiya”nti payogānaṃ dassanato **aṃ**vacanassa  
**yamā**desavasena “dāsīya”nti vuttaṃ. Tesu ca “ghare jātaṃva dāsīya”nti ettha **aṃ**vacanassa  
**yamā**desato aññopi saddanayo labbhati. Kathaṃ? Yathā daharī eva “dahariyā”ti vuccati, evaṃ dāsī  
eva “dāsīyā”ti.

Ettha pana “passāmi vohaṃ dahariṃ, kumāriṃ cārudassana”nti ca “ye taṃ jīṇṇassa pādaṃsu,  
evaṃ dahariyaṃ sati”nti ca pālī nidassanaṃ, upayogavacanicchāya “dāsīya”nti vuttaṃ, imasmiṃ  
panāhippāye “dāsīyā, dāsīyā, dāsīyāyo. Dāsīyaṃ, dāsīyā, dāsīyāyo. Dāsīyāyā”ti **kaññā**nayeneva  
nāmikapadamālā bhavati “kumāriyā”ti saddasseva. Tathā hi “kumāriye upaseniye”ti pālī dissati.  
Tathā “pupphavatiyā, pupphavatiyaṃ, pupphavatiyāya, pupphavatiyāyaṃ, bhoti pupphavatiye”ti  
**kaññā**nayanissitena ekavacananayena nāmikapadamālā bhavati.

Ettha pana “atīte ayaṃ bārāṇasī pupphavatiyā nāma ahoṣi. Rājāsī luddakamma, ekarājā  
pupphavatiyāyaṃ. Uyyassu pubbena pupphavatiyāyā”ti pālī ca aṭṭhakathāpāṭho ca nidassanaṃ.  
Aparo nayo – “dāsīyā dahariyā kumāriyā”tiādīsu **ka**kārassa **ya**kārādesopi daṭṭhabbo.  
**Brāhmaṇī**saddassa tu “brāhmaṇī, brāhmaṇī, brāhmaṇiyo, brāhmaṇyo. Brāhmaṇī”ntiādīni vatvā  
karaṇavacanaṭṭhānādīsu “brāhmaṇiyā, brāhmaṇiyā”ti ekavacanāni vattabbāni, sabbattha ca padāni  
paripuṇṇāni kātabbāni. **Nadī**saddassa “nadī, nadī, nadiyo, najjo. Nadi”ntiādīnā vatvā “nadiyā,  
najjā”ti ca “nadiyaṃ, najjā”nti ca vattabbaṃ, sabbattha ca padāni paripuṇṇāni kātabbāni.  
Ithiliṅgesu hi paccatabhuvacane diṭṭheyaṃ upayogabahuvacanaṃ anāgatampi diṭṭhameva hoti,  
tathā upayogabahuvacane diṭṭheyaṃ paccatabhuvacanaṃ anāgatampi diṭṭhameva hoti,  
karaṇasampadānanissakkasāmibhumavacanaṃ aññatarasmiṃ diṭṭheyaṃ aññatarasmiṃ  
diṭṭhameva hoti. Tathā hi “dāsā ca dāsyo anujīvino cā”ti ettha “dāsyo”ti paccatabhuvacane  
diṭṭheyaṃ aparampi “dāsyo”ti upayogabahuvacanaṃ taṃsadisattā diṭṭhameva hoti.

“Sakko ca me varaṃ dajjā, so ca labbhettha me varo;  
Ekarattaṃ dvirattaṃ vā, bhavēyyaṃ abhipārako;  
Ummādantiyā ramitvāna, sivrājā tato siya”nti

Ettha “ummādantiyā”ti karaṇavacane diṭṭheyaṃ taṃsadisāni

sampadānanissakkasāmibhummavacanānīpi diṭṭhānīyeva honti. “Brāhmaṇyā paricārake”ti ettha “brāhmaṇyā”ti sāmivacane diṭṭheyyeva taṃsadisāni karaṇasampadānanissakkabhummavacanānīpi diṭṭhānīyeva honti. “Seti bhūmyā anutthuna”nti ettha “pathabyā cārupubbaṅgī”ti ettha ca “bhūmyā, pathabyā”ti sattamiyā ekavacane diṭṭheyyeva taṃsadisāni karaṇasampadānanissakkasāmivacanānīpi diṭṭhānīyeva honti. “Bārāṇasyaṃ mahārājā”ti ettha “bārāṇasya”nti bhummavacane diṭṭheyyeva taṃsadisāni aññānīpi “brāhmaṇyaṃ ekādasyaṃ pañcamya”ntiādīni bhummavacanāni diṭṭhānīyeva honti.

Gaṇhanti ca tādisāni rūpāni pubbācariyāsabhāpi gāthābhisankharaṇavasena. Sāsanepi pana etādisāni rūpāni yebhuyyena gāthāsu sandissanti.

Kusāvati. Kusāvatiṃ. Kusāvatiyā, kusāvatyā. Kusāvatiyaṃ, kusāvatyāṃ. Bhoti kusāvati.

Bārāṇasī. Bārāṇasiṃ. Bārāṇasiyā, bārāṇasyā. Bārāṇasiyaṃ, bārāṇasyāṃ, bārāṇassaṃ iccapi, bhoti bārāṇasi.

Naḷinī. Naḷiniṃ. Naḷiniyā, naḷiññā. Naḷiniyaṃ, naḷiññaṃ. Bhoti naḷini. Aññānīpi yojetabbāni.

Gāthāvisayaṃ pana patvā “kusāvatiṃhi, bārāṇasiṃhi, naḷiniṃhi”tiādīnā saddarūpānīpiyojetabbāni. Tathā hi pāḷiyaṃ “kusāvatiṃhi”ādīni **mhi**antāni itthilingarūpāni gāthāsuyeva paññāyanti, na cuṇṇiyapadaracanāyaṃ. Akkharasamaye pana tādisāni rūpāni anivāritāni “nadimhā cā”tiādīdassanato. Yaṃ pana aṭṭhakathāsu cuṇṇiyapadaracanāyaṃ “sammādiṭṭhimhī”tiādikaṃ itthilingarūpaṃ dissati, taṃ akkharavipallāsavasena vuttanti daṭṭhabbaṃ cuṇṇiyapadaṭṭhāne “sammādiṭṭhiyaṃ paṭisandhiyaṃ sugatiyaṃ duggatiya”ntiādīdassanato. Ayaṃ panettha niyamo sugatasāsane gāthāyaṃ cuṇṇiyapadaṭṭhāne ca “kaññā ratti itthī yāgu vadhū”ti evaṃ pañcantehi itthilingehi saddhiṃ **nā sa smā smiṃ mhā mhi**iccete saddā sarūpato parattaṃ na yanti. **Mhis**saddo pana gāthāyaṃ **ivaṇṇ**antehi itthilingehi saddhiṃ parattaṃ yāti. Tatrīdaṃ vuccati –

“Gāthāyaṃ cuṇṇiye cāpi, **nā sasmā**dī sarūpato;  
**Nā**kāraṇtaivaṇṇanta-itthīti parattaṃ gatā.

**Mhis**saddo pana gāthāyaṃ, **ivaṇṇ**antitthibhī saha;  
Ya’to parattametassa, payogāni bhavanti hi.

Yathā balākayonimhi, na vijjati pumo sadā;  
Kusāvabhimhi nagare, rājā āsi mahīpati”ti.

Evaṃ **kusāvati** iccādīni aññathā bhavanti, nagaranāmettā panekavacanānīpi, na janapadanāmāni viya bahuvacanāni. “Kāsī, kāsīyo. Kāsīhi, kāsībhi. Kāsīnaṃ. Kāsīsu. Bhotiyo kāsīyo. Evaṃ avantī avantiyo”tiādīnāpi nāmikapadamālā yojetabbā. Aññānīpi padāni gahetabbāni. Evaṃ **kāsī**iccādīni janapadanāmettā rūḷhīvasena bahuvacanāneva bhavanti atthassa ekattepi.

Candavatī, candavatiṃ, candavatiyā, candavatiyaṃ, bhoti candavati, evaṃ ekavacanavasena vā, candavatiyo, candavatiyo, candavatihi, candavatiḥhi, candavatiṇaṃ, candavatisu, bhotiyo candavatiyo, evaṃ bahuvacanavasena vā nāmikapadamālā veditabbā, aññānīpi padāni yojetabbāni. “Candavati”iccādīni hi ekissā bahūnañcittṭhīnaṃ paṇṇattibhāvato payogānurūpena ekavacanavasena vā bahuvacanavasena vā yojetabbāni bhavanti. Esa nayo aññatrāpi.

Savinicchayoyaṃ **ī**kārantitthilingānaṃ pakatirūpassa nāmikapadamālāvibhāgo.

**ī**kārantatāpakatikaṃ **ī**kārantitthilingaṃ niṭṭhitaṃ.

Idāni **bhū**dhātumayānaṃ **ukā**rantitthilingānaṃ appasiddhattā aññena **ukā**rantitthilingena nāmikapadamālāṃ pūressāma –

Yāgu, yāgū, yāguyo. Yāguṃ, yāgū, yāguyo. Yāguyā, yāgūhi, yāgūbhi. Yāguyā, yāgūnaṃ. Yāguyā, yāgūhi, yāgūbhi. Yāguyā, yāgūnaṃ. Yāguyā, yāguyāṃ, yāgūsu. Bhoti yāgu, bhotiyo yāgū, yāguyo.

Evam “dhātu dhenu kāsu daddu kaṇḍu kacchu rajju”iccādīni. Tatra **dhātusaddo** rasarudhiramaṃsamedanhāruaṭṭhiatṭhimiñjasukkasaṅkhādhātuvācako pulliṅgo, sabhāvavācako pana sugatādīnaṃ sārīrikavācako lokadhātuvācako ca cakkhādivācako ca itthiliṅgo, **bhū hū karapacādisaddavācako** itthiliṅgoceva pulliṅgo ca. Atra panitthiliṅgo adhippeto.

Savinicchayoyamaṃukārantitthiliṅgānaṃ nāmikapadamālāvibhāgo.

Ukārantatāpakatikaṃ ukārantitthiliṅgaṃ niṭṭhitaṃ.

Idāni **bhūsaddādīnaṃ** nāmikapadamālaṃ vakkhāma pubbācariyamataṃ purecamaṃ katvā –

Jambū, jambū, jambuyo. Jambuṃ, jambū, jambuyo. Jambuyā, jambūhi, jambūbhi. Jambuyā, jambūnaṃ. Jambuyā, jambūhi, jambūbhi. Jambuyā, jambūnaṃ. Jambuyā, jambuyāṃ, jambūsu. Bhoti jambu, bhotiyo jambū, jambuyo. **Yamakamahātheramataṃ.**

Ettha **jambūsaddassa** itthiliṅgattaṃ “ambā sālā ca jambuyo”tiādīnā pasiddhaṃ. “Ime te jambukā rukkhā”ti ettha pana **rukhasaddaṃ** apekkhitvā “jambukā”ti pulliṅganiddeso katoti daṭṭhabbaṃ. Tathā hi jambūti kathetabbāti **jambukā. Ke re ge** saddeti dhātu. Atha vā itthiliṅgavasena jambū eva jambukā, jambukā ca tā rukkhā cāti jambukārukkhā, yathā laṅkādiṭṭho, pulliṅgapakkhe vā samāsavasena “jambukārukkhā”ti vattabbe gāthāvisayattā chandānurakkhaṇatthaṃ dīghaṃ katvā “jambukārukkhā”ti vuttaṃ “saraṇāgamane kañcī”ti ettha viya.

Bhū, bhū, bhuyo. Bhuṃ, bhū, bhuyo. Bhuyā, bhūhi, bhūbhi. Bhuyā, bhūnaṃ. Bhuyā, bhūhi, bhūbhi. Bhuyā, bhūnaṃ. Bhuyā, bhuyāṃ, bhūsu. Bhoti bhu, bhotiyo bhū, bhuyo.

Evam “abhū, abhū, abhuyo. Abhuṃ, abhū, abhuyo. Abhuyā”tiādīnā yojetabbā. Atra “abhuṃ me kathaṃ nu bhaṇasi, pāpakaṃ vata bhāsasi”ti nidassanapadaṃ.

“Vadhū ca sarabhū ceva, sarabū sutanū camū;  
Vāmūrū nāganāsūrū”, iccādī **jambuyā** samā.

Idaṃ pana sukhumāṃ ṭhānaṃ suṭṭhu manasi kātabbaṃ. “Vadaññū, vadaññū, vadaññuyo. Vadaññuṃ, vadaññū, vadaññuyo. Vadaññuyā”ti **jambūsamaṃ** yojetabbā. Evam “maggaññū dhammaññū kataññū”iccādīsūpi.

Nanu ca bho –

“Sohaṃ nūna ito gantvā, yoniṃ laddhāna mānusiṃ;  
Vadaññū sīlasampanno, kāhāmi kusalaṃ bahu”nti

Evamādiṭṭhāyogadassanato **vadaññūsaddādīnaṃ** pulliṅgabhāvo pasiddho, evaṃ sante kasmā idha itthiliṅganayo dassitoti? **Vadaññū**iccādīnaṃ ekantapulliṅgabhāvābhāvato dviliṅgāni tesam vāccaliṅgattā. Tathā hi –

“Sāhaṃ gantvā manussattaṃ, vadaññū vītamaccharā;  
Saṅghe dānāni dassāmi, appamattā punappuna”nti ca,

“Kodhanā akataññū cā”ti ca itthiliṅgapayogikā bahū pāḷiyo dissanti, tasmā evaṃ nīti amhehi ṭhapitā.

Savinicchayoyam **ū**kārantitthilingānam pakatirūpassa nāmikapadamālāvibhāgo.

Ūkārantatāpakatikaṃ **ū**kārantitthilingaṃ niṭṭhitaṃ.

Okārantapadaṃ **bhū**dhātumayaṃ itthilingamappasiddhaṃ, aññaṃ **pano**kāraṇaṃ itthilingaṃ pasiddhaṃ.

Okāraṇaṃ itthilingaṃ, **go**saddoti vibhāvaye;  
**Go**saddasseva pulliṅge, rūpamassāhu kecana;

Tathā hi keci “go, gāvo, gavo. Gāvu”ntiādinā nayena vuttāni pulliṅgassa **go**saddassa rūpāni viya itthilingassa **go**saddassa rūpāni icchanti, tesam mate majjhe bhinnasuvannaṇānaṃ vaṇṇavisesābhāvo viya rūpavisesābhāvato **go**saddassa itthilingabhāvapaṭipādanaṃ anijjhānakkhamaṃ. Kasmāti ce? Yasmā **mātugā**masaddassa “mātugāmo, mātugāmā. Mātugāma”ntiādinā nayena dve padamālā katvā ekā pulliṅgassa padamālā, ekā itthilingapadamālāti vuttavacanaṃ viya idaṃ vacanaṃ amhe paṭibhāti, tasmā anijjhānakkhamaṃ.

Apica itthilingassa **go**saddassa rūpesu pulliṅgassa **go**saddassa rūpehi samesu santesu kathaṃ **go**saddassa itthilingabhāvo siyā? Rūpamālāvisesābhāvato. Yathā hi **ratti aggi aṭṭhi**saddānaṃ ikāraṇatabhāvena samattepi itthilingapumanapūṃsakaliṅgalakkhaṇabhūto rūpamālāviseso dissati. Yathā pana dvinnaṃ **dhātu**saddānaṃ pumitthilingapariyāpannaṃ rūpamālāviseso dissati, na tathā tehācariyehi abhimatassa itthilingassa **go**saddassa rūpamālāviseso dissati. Yathā pana dvinnaṃ **dhātu**saddānaṃ pumitthilingapariyāpannaṃ rūpamālāviseso bhavati, yathā dvinnaṃ **go**saddānaṃ pumitthilingapariyāpannaṃ rūpamālāvisesena bhavitabbaṃ, yathā ca dvinnaṃ **āyus**saddānaṃ punnapūṃsakaliṅgapariyāpannaṃ rūpamālāviseso dissati, tathā dvinnaṃ **go**saddānaṃ pumitthilingapariyāpannaṃ rūpamālāvisesena bhavitabbaṃ. Avisesatte sati kathaṃ tesam pumitthilingavavatthānaṃ siyā, kathaṃca visadāvisadākāravohāratā siyā. Idaṃ ṭhānaṃ atīva saṇhasukhamaṃ paramagambhīraṃ mahāgahanaṃ na sakkā sabbasattānaṃ mūlabhāsābhūtāya sabbaññujineritāya māgadhikāya sabhāvaniruttīyā nayaṃ sammā ajānanta akataññaṇasambhārena kenaci ajjhogāhetuṃ vā vijātetuṃ vā, amhākaṃ pana mate dvinnaṃ **go**saddānaṃ rūpamālāviseso ceva dissati, pumitthilingavavatthānaṃca dissati, visadāvisadākāravohāratā ca dissati, napūṃsakaliṅgassa tadubhayamuttākāravohāratā ca dissatīti daṭṭhabbaṃ.

Idāni imassatthassa āvibhāvattaṃ imasmimṃ ṭhāne imaṃ nītiṃ ṭhapessāma. Evañhi sati pariyaṭṭisāsane paṭipannaṃ nikkāṅkhabhāvena na kilamissanti. Ettha tāva atthaggaṇe viññūnaṃ kosalluppādanattaṃ tisso nāmikapadamālāyo kathessāma – seyyathidaṃ?

Gāvī, gāvī, gāvīyo. Gāvīṃ, gāvī, gāvīyo. Gāvīyā, gāvīhi, gāvībhi. Gāvīyā, gāvīnaṃ. Gāvīyā, gāvīhi, gāvībhi. Gāvīyā, gāvīnaṃ. Gāvīyā, gāvīyaṃ, gāvīsu. Bhoti gāvī, bhotiyo gāvī, gāvīyo.

Ayaṃ **go**saddato vihitassa ipaccayassa vasena nipphannassa itthivācakassa ikāraṇantitthilingassa **gāvī**saddassa nāmikapadamālā.

Go, gāvo, gavo. Gāvūṃ, gāvāṃ, gavaṃ, gāvo, gavo. Gāvena, gavena, gohi, gobhi. Gāvassa, gavassa, gavaṃ, gunnaṃ, gonaṃ. Gāvā, gāvasmā, gāvamhā, gavā, gavasmā, gavamhā, gohi, gobhi. Gāvassa, gavassa, gavaṃ, gunnaṃ, gonaṃ. Gāve, gāvasmimṃ, gāvamhi, gave, gavasmimṃ, gavamhi, gāvesu, gavesu, gosu. Bho go, bhavanto gāvo, gavo.

Ayaṃ pumavācakassa okāraṇapulliṅgassa **go**saddassa nāmikapadamālā.

Go, gāvī, gāvo, gāvī, gavo. Gāvāṃ, gavaṃ, gāvīṃ, gāvo, gāvī gavo. Gohi, gobhi. Gavaṃ, gunnaṃ, gonaṃ. Gohi, gobhi. Gavaṃ, gunnaṃ, gonaṃ. Gosu. Bhoti go, bhotiyo gāvo, gāvī, gavo. Ayaṃ pumitthivācakassa okāraṇantitthipulliṅgassa **go**saddanāmikapadamālā.

Ettha pana ‘‘gāvu’’nti padaṃ ekantapumavācakattā na vuttanti daṭṭhabbaṃ, ekantapumavācakattañcassa āhaccapāḷiyā ñāyati ‘‘idha pana bhikkhave vassūpagataṃ bhikkhuṃ itthi nimantesi ‘ehi bhante, hiraññaṃ vā te demi, suvaṇṇaṃ vā te demi, khettaṃ vā te demi, vatthūṃ vā te demi, gāvuṃ vā te demi, gāviṃ vā te demi. Dāsaṃ vā te demi, dāsiṃ vā te demi, dhītaraṃ vā te demi bhariyatthāya, ahaṃ vā te bhariyā homi, aññaṃ vā te bhariyaṃ ānemi’ti’’ evaṃ āhaccapāḷiyā ñāyati.

Ettha hi ‘‘gāvu’’nti vacanena pumā vutto, ‘‘gāvi’’nti vacanena itthi, yaṃ pana imissaṃ okārantitthiliṅgapadamālayaṃ ‘‘gāvī’’ti padaṃ catukkhattūṃ vuttaṃ, taṃ ‘‘kañña’’ti padaṃ viya itthiliṅgassa avisadākāravohāratāviññāpane samatthaṃ hoti. Na hi itaresu liṅgesu samānasutikabhāvena catukkhattūṃ āgatapadaṃ ekampi atthi, ‘‘gāvī gāvī’’nti ca imesaṃ saddānaṃ katthaci thāne itthipumesu sāmāññavasena pavattiṃ upari kathayissāma. Yā panamhehi okārantitthiliṅgassa ‘‘go, gāvī, gāvo, gāvī, gavo. Gāvaṃ, gavaṃ, gāvi’’ntiadinā nayena padamāla katā, tatha gosaddato siyonaṃ ikārādeso amvacanassa ca imkārādeso bhavati, tena okārantitthiliṅgassa ‘‘gāvī gāvī gāvī’’nti rūpāni dassitāni. Tathā hi mukhamattadīpaniyaṃ saddasatthavidunā vajirabuddhācariyena niruttinaye kosallavasena gosaddato yonamīkārādeso vutto. Yathā pana gosaddato yonamīkārādeso bhavati, tathā sissīkārādeso amvacanassa ca imkārādeso bhavati. Atrimā nayaggāhaparidīpaniyo gāthā –

Ipaccayā siddhesvapi, ‘‘gāvī gāvī’’tiādisu;  
Paṭhamekavacanādi-antesu jinasāsane.

Vadatā yonamīkāraṃ, gosaddasitthiyaṃ pana;  
Avisadattamakkhātūṃ, nayo dinnoti no ruci.

Kiñca bhiyyo aṭṭhakathāsu ca –

‘‘Gāvo’’ti vatvā ‘‘gāvī’’nti-vacanena panitthiyaṃ;  
Avisadattamakkhātūṃ, nayo dinnoti no ruci.

Tathā hi samantapāsādikādīsu aṭṭhakathāsu ‘‘cheko hi gopālako sakkharāyo ucchaṅgena gahetvā rajjudandaḥattho pātova vajaṃ gantvā gāvo piṭṭhiyaṃ paharivā palighathambhamatthake nisinno dvāraṃ pattam pattam gāviṃ ‘eko dve’ti sakkharaṃ khipitvā gaṇeti’’ti imasmiṃ padese ‘‘gāvo’’ti vatvā ‘‘gāvī’’nti vacanena itthipumavācakassa okārantitthiliṅgassa gosaddassa avisadākāravohāratā vihitā. ‘‘Gāvo’’ti hi iminā sāmāññato itthipumabhūtā goṇā gahitā, tathā ‘‘gāvī’’nti imināpi itthibhūto pumabhūto ca goṇo. Evaṃ ‘‘gāvo’’ti ca ‘‘gāvī’’nti ca ime saddā saddasatthavidūhi aṭṭhakathācariyehi niruttinayakusalatāya samānaliṅgavasena ekasmiṃyeva pakaraṇe ekasmiṃyeva vākye piṇḍikatā. Yadi hi itthiliṅge vattamānassa itthipumavācakassa okārantitthiliṅgassa gosaddassa padamālayaṃ ‘‘gāvī gāvī’’miccetāni rūpāni na labbheyyuṃ, aṭṭhakathāyaṃ ‘‘gāvo’’ti vatvā ‘‘gāva’’nticceva vattabbaṃ siyā, ‘‘gāvī’’nti pana na vattabbaṃ. Yathā ca pana aṭṭhakathācariyehi ‘‘gāvo’’ti itthipumavasena sabbesaṃ gunnaṃ saṅgāhakavacanāṃ vatvā teyeva gāvo sandhāya puna ‘‘dvāraṃ pattam pattam gāvī’’nti saddaracanaṃ kubbimsu, tasmā ‘‘gāvī’’nti idampi sabbasaṅgāhakavacanamevāti daṭṭhabbaṃ. Asabbasaṅgāhakavacanāṃ idaṃ gāvīsaddena itthiyāyeva gahetabbattāti ce? Na, pakaraṇavasena atthantarassa viditattā. Na hi sabbavajesu ‘‘itthiyoyeva vasanti, na pumāno’’ti ca, ‘‘pumānoyeva vasanti, na itthiyo’’ti ca sakkā vattūṃ. Apica ‘‘gāvimpī disvā palāyanti ‘bhikkhū’ti maññaṃānā’’ti pāḷi dissati, etthāpi ‘‘gāvī’’nti vacanena itthibhūto pumabhūto ca sabbo go gahitoti daṭṭhabbaṃ. Itarathā ‘‘itthibhūtoyeva go bhikkhūti maññitabbo’’ti āpajjati. Iti pāḷinayena itthiliṅge vattamānamhā itthipumavācakasmā gosaddato amvacanassa imkārādeso hotīti viññāyati.

Vajirabuddhācariyenapi gosaddato ipaccaye kātabbepi akatvā yonamīkārādeso kato. Tassāhippāyo evaṃ siyā gosaddato ipaccaye kate sati ipaccayavasena ‘‘gāvī’’ti nipphanasaddo yattha katthaci visaye ‘‘migī morī kukkuṭī’’iccādayo viya itthivācakoyeva siyā, na katthacipi itthipumavācako, tasmā sāsanānukūlappayogavasena yonamīkārādeso kātabboti. Iti vajirabuddhācariyamate gosaddato yonaṃ ikārādeso hotīti ñāyati.



Kiñca bhiyyo – yasmā aṭṭhakathācariyehi “gāvo piṭṭhiyaṃ paharivā”tiādinā nayena racitāya “dvāraṃ pattaṃ pattaṃ gāvīṃ ‘eko dve’ti sakkharaṃ khipitvā gaṇeti”ti vacanapariyosānāya saddaracanāyaṃ “eko gāvī, dve gāvī”ti atthayojanānayo vattabbo hoti, “gāvī”nti upayogavacanañca dissati. Iti aṭṭhakathācariyānaṃ mate **gosaddato siyonamīkārādeso am**vacanassa **im**kārādeso hotīti nīyati. Tasmāyevamhehi yā sā **okārantatāpakatikassa** itthilingassa **gosaddassa** “go, gāvī, gāvo, gāvī, gavo, gāvaṃ, gāvī”ntiādinā nayena padamālā ṭhapitā, sā pālinayānukūlā aṭṭhakathānāyānukūlā kaccāyanācariyamataṃ gahetvā padanipphattijanakassa garuno ca matānukūlā, “gāvī”ti padassa catukkhattum āgatattā pana **okārantitthilingassa** **gosaddassa** avisaḍākāravohārattañca sādheti. Iccesā pālinayādīsu nīṇena sammā upaparikkhiyamānesu atīva yujjati, natthettha appamattakopi doso. Ettha pana paccattopayogālanānaṃ bahuvacanaṭṭhāne “gāvīyo”ti padañca karaṇasampadānānissakkasāmīnamekavacanaṭṭhāne “gāvīyā”ti padañca karaṇanissakkānaṃ bahuvacanaṭṭhāne “gāvīhi gāvībhi”ti padāni ca sampadānasāmīnaṃ bahuvacanaṭṭhāne “gāvīna”nti padañca bhummavacanaṭṭhāne “gāvīyā, gāvīyaṃ, gāvīsū”ti padāni cāti imāni vitthārato soḷasa padāni ekantena **īpaccayavasena** siddhattā ekantitthivācakattā ca na vuttānīti daṭṭhabbaṃ.

Ayaṃ panettha nicchayo vuccate sotūnaṃ nikkāṅkhabhāvāya – itthilingapadesu hi “gāvī gāvī”nti imāni **īpaccayavasena** vā **īkārīmkārādesavasena** vā sījjhanti. Etesu pacchimanayo idhādhippeto, pubbanayo aññattha. Tathā “gāvī gāvī”nti imāni **īpaccayavasena** siddhattā yebhuyyena itthivācakāni bhavanti **īkārīmkārādesavasena** siddhattā. Katthaci ekakkhaṇeyeva sabbasāṅgāhakavasena itthipumavācakāni bhavanti. Etesupi pacchimoyeva nayo idhādhippeto, pubbanayo aññattha. “Gāvīyo. Gāvīyā, gāvīhi, gāvībhi. Gāvīnaṃ. Gāvīyaṃ, gāvīsū”ti etāni pana **īpaccayavasena** siddhattā sabbathāpi itthīnaṃyeva vācakāni bhavanti. Itthibhūtesveva godabbesu lokasāṅketavasena viśesato pavattattā ekantato itthidabbesu pavattāni “migī morī kukkuṭī”iccādīni padāni viya. Kiñcāpi pana “nadī mahī”iccādīni itthilingāni **īpaccayavasena** siddhāni, tathāpi tāni aviññāṇakattā tadatthānaṃ itthidabbesu vattantīti vattum na yujjati. Itthipumanapūṃsakabhāvarahitā hi tadatthā. Yasmā pana itthilinge **gosadde enayogo esukāro** ca na labbhati, tasmā “gāvena gavena gāvesu gavesū”ti padāni na vuttāni. Yasmā ca itthilingena **gosaddena** saddhiṃ **sasmāsmiṃ**vacanāni sarūpato parattaṃ na yanti, tasmā “gāvassa gavassa gāvasmā gavasmā gāvasmīṃ gavasmī”nti padāni na vuttāni. Yasmā ca tattha **smāv**vacanassa ādesabhūto **ākāro** ca **mhākāro** ca na labbhati, tasmā “gāvā gavā gāvamhā gavamhā”ti padāni na vuttāni. Yasmā ca **smiṃ**vacanassa ādesabhūto **ekāro** ca **mhikāro** ca na labbhati, tasmā “gāve gave gāvamhi gavamhi”ti padāni na vuttāni. Apica “yāya tāyā”tiādīhi samānādhikaraṇapadehi yojetum ayuttattāpi “gāvena gavenā”tiādīni itthilingaṭṭhāne na vuttāni. Tathā hi “yāya tāyā”iccādīhi saddhiṃ “gāvena gavenā”tiādīni na yojetabbāni ekantapullīngarūpattā.

Keci panettha vadeyyum – yā tumhehi **okārantatāpakatikassa** itthilingassa **gosaddassa** “go, gāvī, gāvo, gāvī, gavo”tiādinā nayena padamālā ṭhapitā, sā “mātugāmo itthī mātugāmā itthīyo”ti vuttasadisā ca hotīti? Tanna. **Mātugāmaitthī**saddā hi nānālingā pumitthilingabhāvena, nānādhātukā ca **gamu isudhātu**vasena, imasmīṃ pana ṭhāne **go gāvīs**saddā ekalingā itthī lingabhāvena, **ekadhātukā** ca **gamudhātu**vasenāti. Yajjevaṃ **goṇas**saddassa **gosaddasādesavasena kaccāyanena** vuttattā tadādesattaṃ ekadhātukattañcāgama tenāpi saddhiṃ missetvā padamālā vattabbāti? Na, **goṇas**saddassa accantapullīngattā **akārantatāpakatikattā** ca. Tathā hi so viṣum pullīngaṭṭhāne uddiṭṭho. Ayaṃ pana “go, gāvī, gāvo, gāvī, gavo”tiādīkā padamālā **okārīkār**antapadāni missetvā katāti na sallakkhetabbā, atha kho vikappena **gosaddato paresaṃ si yo am**vacanānaṃ **īkārīmkārādesavasena** vuttapadavantattā **okārantitthilingapadamālā** icceva sārato paccetabbā.

Idāni **gosaddassa** itthilingabhāvasādhakāni suttapadāni lokikappayogāni ca kathayāma – “seyyathāpi bhikkhave vassānaṃ pacchime māse saradasamaye kiṭṭhasambādhe gopālako gāvo rakkheyya, tā gāvo tato tato daṇḍena ākoṭeyya.

Annadā baladā cetā, vaṇṇadā sukhadā ca tā;  
Etamatthaṃ vasaṃ nītvā, nāssu gāvo haniṃsu te.

Sabbā gāvo samāharati. Gamissanti bhante gāvo vacchagiddhiniyo”ti imāni suttapadāni. “Gosu

duyhamānāsu gato’’tiādīni pana lokikappayogāni. Iti **gos**saddassa itthilingabhāvopi pulliṅgabhāvo viya sārato paccetabbo.

Tatra “go, gāvī, gāvo, gāvī, gavo’’tiādīni kiñcāpi itthilingabhāvena vuttāni, tathāpi yathāpayogaṃ “pajā devatā’’tipadāni viya itthipurisavācakāneva bhavanti, tasmā itthilingavasena “sā go’’ti vā “tā gāvo’’ti vā vutte itthipumabhūtā sabbepi goṇā gahitāti veditabbā. Na hi īdise ṭhāne ekantato liṅgaṃ padhānaṃ, atthoyeva padhāno. “Vajegāvo duhantī’’ti vutte kiñcāpi “gāvo’’ti ayaṃ saddo pumepi vattati, tathāpi duhanakriyāya pume asambhavato atthavasena itthiyo ñāyante. “Gāvī duhantī’’ti vutte pana liṅgavasena atthavasena ca vacanato ko saṃsayamāpajjissati viññū. “Tā gāvo carantī’’ti vutte itthilingavasena vacanato kadāci kassaci saṃsayo siyā “nanu itthiyo’’ti, pulliṅgavasena pana “te gāvo carantī’’ti vutte saṃsayo natthi, itthiyo ca pumāno ca ñāyante pulliṅgabahuvacanena katthaci itthipumassa gahitattā. “Athettha sīhā byagghā cā’’tiādīsu viya “gāvī caratī’’ti ca “gāviṃ passatī’’ti ca vutte itthī viññāyate **gāvīs**saddena itthiyā gahetabbattā. Lokikappayogesū hi sāsānikappayogesū ca **gāvīs**saddena itthī gayhati. Ekaccaṃ pana sāsānikappayogaṃ sandhāya “gāvī’’ti, “gāvī’’nti ca “itthipurisasādhāraṇavacanamavocumha. Tathā hi “seyyathāpi bhikkhave dakkho goghātako vā goghātakantevāsī vā gāviṃ vadhitvā catumahāpathe bilaso vibhajitvā nisinnō assā’’ti pāli dissati. Aṭṭhakathāsu ca “gāvo’’ti itthipumasādhāraṇaṃ saddaracanaṃ katvā puna tadeva itthipumaṃ sandhāya “dvāraṃ pattamaṃ pattamaṃ gāvī’’nti racitā saddaracanaṃ dissati.

Ettha hi gojātiyaṃ ṭhitā itthīpi pumāpi “gāvī’’ti saṅkhaṃ gacchati. Visesto pana “gāvī’’ti idaṃ itthiyā adhivacanaṃ. Tathā hi tattha tattha pālippadesādīsu “acirapakkantassa bhagavato bāhiyaṃ dārucīriyaṃ gāvī taruṇavacchā adhipatitvā jīvitā voropesī’’ti, “gāvumaṃ vā te demī, gāviṃ vā te demī’’ti ca “tiṇasiho kapotavaṇṇagāvīsadiso’’ti ca payogadassanato itthī kathiyatīti vattabbaṃ. **Gos**saddena pana “goduanaṃ. Gadduanaṃ. Gokhīraṃ godhano gorūpāni cā’’ti dassanato itthīpi pumāpi kathiyatīti vattabbaṃ.

Idāni **okā**rantassa itthilingassa **gos**saddassa padamālāyaṃ pāḷinayādinissito atthayuttinayo vuccate viññūnaṃ kosallajananatthaṃ –

Sā go gacchati, sā gāvī gacchati, tā gāvo, gāvī, gavo gacchanti. Taṃ gāvaṃ, gāviṃ, gavaṃ passati, tā gāvo, gāvī, gavo passati. Tāhi gohi, gobhi kataṃ. Tāsaṃ gavaṃ, gunnaṃ, gonaṃ deti. Tāhi gohi, gobhi apeti. Tāsaṃ gavaṃ, gunnaṃ, gonaṃ siṅgāni. Tāsu gosu patiṭṭhitaṃ. Bhoti go tvaṃ tiṭṭha, bhotiyo gāvo gāvī, gavā tumhe tiṭṭhatha.

Aparopi vuccate –

Sā go nadiṃ tarantī gacchati, sā gāvī nadiṃ tarantī gacchati, tā gāvo, gāvī, gavo nadiṃ tarantiyo gacchanti. Taṃ gāvaṃ, gāviṃ, gavaṃ nadiṃ tarantiṃ passati, tā gāvo, gāvī, gavo nadiṃ tarantiyo passati. Tāhi gohi, gobhi nadiṃ tarantihi kataṃ. Tāsaṃ gavaṃ, gunnaṃ, gonaṃ nadiṃ tarantiṇaṃ deti. Tāhi gohi, gobhi nadiṃ tarantihi apeti. Tāsaṃ gavaṃ, gunnaṃ, gonaṃ nadiṃ tarantiṇaṃ santakaṃ. Tāsu gosu nadiṃ tarantiṃ patiṭṭhitanti.

Tatra yā sā “go, gāvī, gāvo, gāvī, gavo’’tiādīnā **okā**rantassitthilingassa **gos**saddassa padamālā ṭhapitā, sā “go, gāvo gavo’’tiādīnā vuttassa **okā**rantapulliṅgassa **gos**saddassa padamālāto savisesā paccattopayogālapanaṭṭhāne catunnaṃ **kaññās**saddānaṃ viya **gāvīs**saddānaṃ vuttattā. Yasmā panāyaṃ viseso, tasmā imassa **okā**rantitthilingassa **gos**saddassa aññesamitthilingānaṃ viya avisadākāravohāratā sallakkhetabbā, na pulliṅgānaṃ viya visadākāravohāratā, nāpi napuṃsakalingānaṃ viya ubhayamuttākāravohāratā sallakkhetabbā. Ettha nicchayakaraṇī gāthā vuccati –

Duvinnaṃ **dhātu**saddānaṃ, yathā dissati nānatā;  
**Gos**saddānaṃ tathā dvinnaṃ, icchitabbāva nānatā.

Tathā hi pumitthilingavasena dvinnaṃ **dhātu**saddānaṃ viseso dissati. Taṃ yathā?



Nanu ca bho “tassā kumārikāya saddhi”nti ettha “tassā”ti idaṃ vibhattivipallāsena vuttaṃ, “tāyā”ti hissa attho, tathā “kassāhaṃ kena hāyāmī”ti idampi vibhattivipallāsena vuttaṃ. “Kāyā”ti hissa attho. “Aññatarissā itthiyā paṭibaddhacitto”ti etthāpi “aññatarissā”ti idaṃ vibhattivipallāsena vuttaṃ. “Aññatarissa”nti hissa atthoti? Tanna, idisesu cuṇṇiyapadavisayesu vibhattivipallāsassa anicchitabbattā. Nanu ca bho cuṇṇiyapadavisayepi “saṅghe gotami dehi”tiādīsu “saṅghassā”ti vibhattivipallāsattamaṃ vadanti garūti? Saccamaṃ, tathāpi tādisesu thānesu dve adhippāyā bhavanti ādhārapaṭiggāhakabhāvena bhummāsampadānānamicchitabbattā. Tathā hi “saṅghassa dethā”ti vattukāmassa sato “saṅghe dethā”ti vacanaṃ na virujjhati, yujjatiyeva. Tathā “saṅghe dethā”ti vattukāmassapi sato “saṅghassa dethā”ti vacanampi na virujjhati, yujjatiyeva, yathā pana **alābu lābus**addesu viṣuṃ viṣuṃ vijjamānesupi “lābūni sīdanti silā plavanti”ti ettha chandānurakkhaṇatthamaṃ akāralopo hotīti akkharalopo buddhiyā kariyati. Tathā “saṅghe gotami dehi”tiādīsupi buddhiyā vibhattivipallāsassa parikkappaṇaṃ katvā “saṅghassā”ti vipallāsattamicchanti ācariyā. Tasmā “saṅghe gotami dehi. Vessantare vamaṃ datvā”tiādīsu vibhattivipallāso yutto “tassā kumārikāyā”tiādīsu pana na yutto, vibhattivipallāso ca nāma yebhuyyena “neva dānaṃ viramissa”ntiādīsu gāthāsu icchitabbo.

Tathāpi vadeyya yā sā tumhehi “tassā methunaṃ dhammaṃ paṭisevatī”ti pālī ābhatā, na sā sattamīpayogā. “Tassā”ti hi idaṃ chaṭṭhiyantapadaṃ “tassāmakkaṭṭiyāāṅgajāte methunaṃ dhammaṃ paṭisevatī”ti atthasambhavatoti? Tanna, **aṭṭhakathāyaṃ** “tassāti bhummavacana”nti vuttattā. Kiñca bhiiyo – aṭṭhakathāyaṃyeva “tassā ca sikkhāya sikkhaṃ paripūrento sikkhati, tasmīñca sikkhāpade avītikkamanto sikkhati”ti imasmiṃ padese “tassā”ti bhummavacanaṃ niddeso katoti. Nanu ca bho tathāpi “tassā”ti idaṃ vibhattivipallāsavasena bhummatthe sāmivacananti? “Ativiya tvaṃ vibhattivipallāsanaṃye kusalosi, vibhattivipallāsiko nāma”ti bhavaṃ vattabbo. Yo tvaṃ dhammasaṅgāhakattherehi vuttapaḷīmpī ullaṅghasi, aṭṭhakathāvacaṇampi ullaṅghasi, aparaṃpi te **niddesapāḷiṃ** āharissāma. Sace tvaṃ paṇḍitajātiko, saññattim gamissasi. Sace apaṇḍitajātiko, attano gāhaṃ amuñcantoyeva saññattim na gamissati, sāsane cittim katvā suṇohīti. “Tasmā hi sikkhetha idheva jantū”ti imissā pāḷiyā atthamaṃ niddisantaṇa pabhinnapaṭisambhidena satthukappena aggasāvakena dhammasenāpatinā **āyasmatā sārīputtena** “idhāti imissā diṭṭhiyā imissā khantiyā imissā ruciyā imasmiṃ ādāye imasmiṃ dhamme”ti evaṃ “imissā”ti padaṃ bhummavacanaṃvasena vuttaṃ. Tañhi “idhā”ti padassa atthavācakattā sattamiyā rūpanti viññāyati. Iti “imissā”ti sattamiyā rūpe diṭṭheyeva “sabbassā katarissā”tiādīni sattamiyā rūpāni pāḷiyaṃ anāgatānīpi diṭṭhāniyeva nāma.

Aparaṃpi te sabbalokānukampakena sabbaññunā āhaccabhāsitaṃ pāḷiṃ āharissāma, cittim katvā suṇohi, “aṭṭhānametaṃ bhikkhave anavakāso, yaṃ ekissā lokadhātuyā apubbaṃ acarimaṃ dve arahanto sammāsambuddhā uppajjeyyu”nti ettha “ekissā”ti idaṃ sattamiyā rūpaṃ. Evaṃ “ekissā”ti sattamiyā rūpe diṭṭheyeva “sabbassā katarissā”tiādīni sattamiyā rūpāni pāḷiyaṃ anāgatānīpi diṭṭhāniyeva nāma. Na hi sabbathāpi vohārā sarūpato pāḷiādīsu dissanti, ekacce dissanti, ekacce na dissantiyeva. Atridaṃ vuccati –

“Tassā”iccādayo saddā, “tāyā”iccādayo viya;  
Ñeyyā pañcasu thānesu, tatiyādīsu dhīmatā.

Tiṇṇannaṃ pana **nādīnaṃ**, hoti **sabyapadesato**;  
“Tassā kassā”tiādīni, bhavanti tatiyādīsu.

Atra panāyaṃ pāḷinayavibhāvanā aṭṭhakathānayavibhāvanā ca – tassā kaññāya saddhim gacchati, tassā kaññāya kataṃ, tassā kaññāya deti, tassā kaññāya apeti, tassā kaññāya ayaṃ kaññā hīnā, tassā kaññāya ayaṃ kaññā adhikā, tassā kaññāya santakamaṃ, tassā kaññāya patiṭṭhitanti. Dullabhāyaṃ nīti sādhukaṃ cittim katvā pariyāpuṇitabbā sāsanaṃ ciraṭṭhitatthamaṃ. Evaṃ sabbathāpi pāḷiaṭṭhakathānayānusārena itthilingassa avisadākāravohārā nātābbā.

Evaṃ pana ñatvā viññujātīnā “dvinnamaṃ gosaddānaṃ rūpamālavisesena liṅganānattaṃ hoti”ti niṭṭhametthāvagantabbaṃ. Gosaddo hi “puriso mātugāmo orodho āpo satthā”tiādāyo viya na niyogā visadākāravohāro, nāpi “kaññā ratti itthī”tiādāyo viya niyogā avisadākāravohāro. Tathā hi ayaṃ

pulliṅgabhāve **dhātu**saddo viya visadākāravohāro, itthiliṅgabhāve avisadākāravohāro. Iti imassa atthassa sotūnaṃ ñāpanena paramasaṅhasukhumaññaṅappaṭilābhattaṃ “go, gāvī gāvo. Gāvīṃ, gavo”tiādīnā okārantassa itthiliṅgassa **gos**saddassa āveṇikā nāmikapadamālā vuttā. Ettha pana “gāvī”nti ekakkhattumāgataṃ, “go gohī”tiādīni dvikkhattum, “gāvo gāvī gāva”nti tikkhattum, “gāvīyā”ti pañcakkhattum, evamettha pañcakkhattum āgatapadānaṃ vasena avisadākāro dissatīti idaṃ itthiliṅganti gahetabbaṃ. Imañhi nayaṃ muñcitvā natthi añño nayo yena **gos**saddo itthiliṅgo siyā. Tasmā idameva amhākaṃ mataṃ sārato paccetabbaṃ. Pumiṭthiliṅgasaṅkhātānaṃ dvinnam **gos**saddānaṃ rūpamālāya nibbisesataṃ vadantānaṃ pana ācariyānaṃ mataṃ pulliṅge vattamānena **gos**saddeni’tthiliṅge vattamānassa **gos**saddassa rūpamālāya sadisatte sati **mātugāmas**saddassa nāmikapadamālāyo samaṃ yojetvā pumiṭthiliṅgabhāvaparikkappaṇaṃ viya hotīti na sārato paccetabbaṃ.

Ettha pana kiñci liṅgasaṃsandanaṃ kathayāma – heṭṭhā niddiṭṭhassa okārantapulliṅgassa **gos**saddassa nāmikapadamālāyaṃ “gāvum gāvaṃ gāvenā”tiādīni ekakkhattumāgatāni, “go gohī”tiādīni dvikkhattum, “gāvo gavo gava”nti imāni pana “satthā rājā”tiādīni viya tikkhattum, catukkhattum vā panettha pañcakkhattum vā āgatapadāni na santi. Tadabhāvato visadākāro dissati. **Purisa**saddassa nāmikapadamālāyampi “puriso purisa”ntiādīni ekakkhattumāgatāni, “purise”tiādīni dvikkhattum, “purisā”ti tikkhattum. Evaṃ visadākāro dissati. **Ākāra**ntitthiliṅgassa pana “kañña”ntiādīni ekakkhattumāgatāni, “kaññāhī”tiādīni dvikkhattum, “kaññāyo”tiādīni tikkhattum, “kaññā”ti idaṃ catukkhattum, “kaññāyā”ti idaṃ pana pañcakkhattum. Evaṃ avisadākāro dissati. **Ākāra**ntapulliṅgassatu “satthari”tiādīni ekakkhattumāgatāni, “satthū”tiādīni dvikkhattum, “satthā”tiādīni tikkhattum, evaṃ visadākāro dissati. Iminā nayena sabbāsupi pumiṭthiliṅgapadamālāsu visadākāro ca avisadākāro ca veditabbo. Napuṃsakaliṅgassa pana nāmikapadamālāyaṃ “cittena”tiādīni ekakkhattumāgatāni, “citta”ntiādīni dvikkhattum, “cittāni”ti idaṃ tikkhattum āgataṃ. **Aṭṭhi āyu**saddādīsipi eseva nayo. Ettha ubhayamuttākāro dissati. Kiñcāpettha catukkhattum pañcakkhattum vā āgatapadānaṃ abhāvato visadākāro upalabbhamāno viya dissati, tathāpi yasmā “cittaṃ aṭṭhi āyū”tiādīni napuṃsakāni “gacchaṃ aggi bhikkhū”tiādīnaṃ pulliṅgānaṃ nayena appavattanato visadākāraṅca, “ratti yāgū”tiādīnaṃ itthiliṅgānaṃ nayena appavattanato avisadākāraṅca ubhayamanupagamma visesato “cittaṃ, cittāni, cittā. Cittaṃ, cittāni, citta”tiādīnā **sanikā**rāya rūpamālāya rūpavantāni bhavanti, tasmā tesamākāro ubhayamuttoti daṭṭhabbo.

Tividhopāyaṃ ākāro sakkaṭabhāsāsu na labbhati. Tenesa sabbesupi byākaraṇasatthesu na vutto. Sabbasattānaṃ pana mūlabhāsābhūtāya jineritāya māgadhikāya sabhāvaniruttīyā labbhati. Tathā hi ayaṃ niruttimañjūsāyaṃ vutto –

Kiṃ panetaṃ liṅgaṃ nāma? Keci tāva vadanti –

“Thanakesavatī itthī, massuvā puriso siyā. Ubhinnamantaraṃ etaṃ, itaro’bhayamuttako’ti

Vuttatā visiṭṭhā thanakesādayo liṅga”nti, etaṃ na sabbattha, gaṅgāsālārukkadhānaṃ thanādīnā sambandhābhāvato.

Apare vadanti – “na liṅgaṃ nāma paramatthato kiñci atthi, lokasaṅketarūḷho pana vohāro liṅgaṃ nāmā”ti. Idamettha sannitṭhānaṃ. Sabbaliṅgikopi saddo hoti **taṭṭaṃ taṭṭi taṭṭoti**. Yadi ca paramatthato liṅgaṃ nāma siyā, kathaṃ aññamaññaviruddhānaṃ tesam ekattha samāveso bhavati, tasmā yassa kassaci atthassa avisadākāravohāro itthiliṅgaṃ, visadākāravohāro pulliṅgaṃ, ubhayamuttākāravohāro napuṃsakaliṅganti veditabbanti.

Ettha pana nāmikapadamālāsaṅkhātapabandhavaseneva avisadākāravohārādītā gahetabbā, na ekekapadavasena. Tathā hi “kaññā puriso citta”nti ca, “kaññāyo purisā cittāni”ti ca evamādikassa ekekapadassa avisadākāravohārādītā na dissati. Yasmā pana pabandhavasena visadākāravohārādibhāve siddheyeva samudāyāvayavattā ekekapadassapi avisadākāravohārādītā sijjhateva.

Keci pana nāmikapadamālāsankhātāṃ pabandhaṃ aparāmasitvā ekekapadavaseneva avisadākāravohārādikaṃ icchanti, te vattabbā “yadi ekekapadasseva avisadākāravohārādītā siyā, evaṃ sante ‘kaññā purisā satthā guṇavā rājā’ tiādīnaṃ padānaṃ ākārasutivasena, ‘puriso satthāro kaññāyo’ tiādīnaṃ pana okārasutivasena, ‘cittaṃ purisaṃ kaññā’ ntiādīnaṃ anusārasutivasena aññamaññaṃ samānasutisambhavā kathaṃ avisadākāravohārādītā siyā’ ti? Kiñcāpi te evaṃ vadeyyuṃ “siyā eva, nānattaṃ pana tesāṃ duppaṭivedha’ nti. Te vattabbā “mā tumhe evamavacuttha, dujjānatarampi nibbānaṃ kathanasamatthaṃ puggalaṃ nissāya jānanti, tasmā sutṭhu upaparikkhitvā vadethā’ ti. Evañca pana vatvā tato uttari te pañhaṃ pucchitabbā “**bodhisaddo āyusaddo** ca kataraliṅgo’ ti. Te jānantā evaṃ vakkhanti “**bodhisaddo** itthiliṅgo ceva pulliṅgo ca, **āyusaddo** ca pana napuṃsakaliṅgo ca pulliṅgo cāti dviliṅgā ete saddā’ ti. Te vattabbā “yadi **bodhisaddo** ca **āyusaddo** ca dviliṅgā ete saddā, evaṃ sante dvinnaṃ **bodhisaddānaṃ** ekapadabhāvena vavattitānaṃ accantasamānasutikānaṃ kathaṃ avisadākāravohārātā ca visadākāravohārātā ca siyā, kathañca pana dvinnaṃ **āyusaddānaṃ** ekapadabhāvena vavattitānaṃ accantasamānasutikānaṃ ubhayamuttākāravohārātā ca visadākāravohārātā ca siyā’ ti? Evaṃ vuttā te addhā kiñci uttari apassantā niruttarā bhavissanti. Saddasatthavidū pana saddasatthato nayaṃ gahetvā vadanti –

“Ese’ sā eta’ miti ca,  
Pasiddhi atthesu yesu lokassa;  
Thīpumanapuṃsakānī’ ti,  
Vuccante tāni nāmānī’ ti.

Tesaṃ kira ayamadhippāyo – “eso puriso, eso mātugāmo, eso rājā, esā itthī, esā latā, etaṃ napuṃsakaṃ, etaṃ citta’ nti evaṃ purisādīsu yesu atthesu lokassa “eso esā eta’ nti ca pasiddhi hoti, tesu atthesu tāni nāmānī “pumitthinapuṃsakaliṅgānī’ ti vuccanti, taṃdvārena aññānipīti. Evaṃ vadantehi tehi “iminā nāma ākārena ‘eso esā eta’ nti nāmānī aññānī ca pulliṅgādīnaṃ labhanti’ ti ayaṃ viseso na dassito, saddhammanayaññūhi pana neruttikehi dassito “yassa kassaci atthassa avisadākāravohāro itthiliṅga’ ntiādīnā.

Keci pana “avisadākārānaṃ atthānaṃ vācako vohāro itthiliṅga’ ntiādīni vadanti, taṃ na gahetabbāṃ. Yadi hi avisadākārānaṃ atthānaṃ vācako vohāro itthiliṅgaṃ, evaṃ sante mātugāmakaḷattakantaṅgagumbādayopi vohārā itthiliṅgānī siyuṃ avisadākārattā tadatthānaṃ. Yadi pana visadākārānaṃ atthānaṃ vācako vohāro pulliṅgaṃ, evaṃ sante “devatā saddhā ñāṇa’ miccādayopi vohārā pulliṅgānī siyuṃ visadākārattā tadatthānaṃ. Atha vā yadi avisadākārānaṃ atthānaṃ vācako vohāro itthiliṅgaṃ, visadākārānaṃ panatthānaṃ vācako vohāro pulliṅgaṃ, evaṃ sante ekassevatthassa ekakkhaṇe dvīhi liṅgehi na vattabbatā siyā –

“Atthakāmosi me yakkha, hitakāmāsi devate;  
Karomi te taṃ vacanaṃ, tvamāsi ācariyo mamā’ ti.

Yadi ca ubhayamuttākārānaṃ atthānaṃ vācako vohāro napuṃsakaliṅgaṃ, evaṃ sante ubhayamuttākārānaṃ atthānaṃ tiṇarukkhādīsu “idaṃ nāmā’ ti niyamābhāvato liṅgavacanaṃ viruddhaṃ siyā. Apica “paññāratanaṃ. Sāriputtamoggallānaṃ sāvakaḷyuga’ nti ca ādinā napuṃsakaliṅgavacanaṃ tadatthānampi ubhayamuttākārātā vuttā siyā. Apica ekampi tīraṃ “taṭṭaṃ taṭṭi taṭṭo’ ti tīhi liṅgehi na vattabbāṃ siyā. Ekampi ca ñāṇaṃ “paññānaṃ paññā pajānaṃ amoho’ tiādīnā tīhi liṅgehi na vattabbāṃ siyā, tasmā taṃ nayaṃ aggahetvā yathāvuttoyeva nayo gahetabbo.

Lokasmiñhi itthīnaṃ heṭṭhimakāyo visado hoti, uparimakāyo avisado, uramaṃsaṃ avisadaṃ, gamanādīnīpi avisadānī. Itthīyo hi gacchamānā avisadaṃ gacchanti, tiṭṭhamānā nipajjamānā nisīdamānā khādāmānā bhuñjamānā avisadaṃ bhuñjanti. Purisampi hi avisadaṃ disvā “mātugāmo viya gacchati tiṭṭhati nipajjati nisīdati khādati bhuñjati’ ti vadanti. Iti yathā itthīyo yebhuyyena avisadākārā, tathā yassa kassaci saviññānakassa vā aviññānakassa vā atthassa ye vohārā yebhuyyena avisadākārā, teyeva itthiliṅgānī nāma bhavanti. Taṃ yathā? “Kaññā devatā dhītalikā dubbā saddhā ratti itthī yāgu vadhū’ iccevamādīni. Purisānaṃ pana heṭṭhimakāyo avisado hoti, uparimakāyo

visado, uramamsaṃ visadaṃ, gamanādīnipi visadāni honti. Purisā hi gacchamānā visadaṃ gacchanti, tiṭṭhamānā nipajjamānā nisīdamānā khādamānā bhuñjamānā visadaṃ bhuñjanti. Itthimpī hi gamanādīni visadāni kurumānaṃ disvā “puriso viya gacchati” tiādīni vadanti. Iti yathā purisā yebhuyyena visadākārā, tathā yassa kassaci saviññāṇakassa vā aviññāṇakassa vā atthassa ye vohārā yebhuyyena visadākārā, teyeva pullingāni nāma bhavanti. Taṃ yathā? “Puriso mātuḡāmo orodho āpo rukkho moho satthā” iccevamādīni. Yathā ca pana napuṃsakā ubhayamuttākārā, tathā yassa kassaci saviññāṇakassa vā aviññāṇakassa vā atthassa ye vohārā ubhayamuttākārā, teyeva napuṃsakalingāni nāma bhavanti. Taṃ yathā? “Cittaṃ rūpaṃ itthāgāraṃ kalattaṃ nāṭakaṃ ratanaṃ ñāṇaṃ aṭṭhi āyu” iccevamādīni. Icevaṃ nāmikānaṃ sabbesampi vohārānaṃ –

Visadāvisadākārā, ākāro’bhayamuttako;  
Liṅgassa lakkhaṇaṃ etaṃ, ñeyyaṃ syādippabandhato.

Idaṃ thānaṃ dubbini vijjhaṃ mahāvanagahanaṃ niggumbaṃ nijjaṭaṃ katvā dassitaṃ sādhukaṃ manasi kātabbaṃ. Iti sabbesaṃ nāmikapadānaṃ pabandhanissitena avisadākāravohārādibhāvena itthilingādibhāvassa sambhavato dvinnampi gosaddānaṃ pabandhanissitena avisadākāravohārādibhāvena yathāsakaṃ itthilingādibhāvo veditaḃbo.

Savinicchayoyaṃ okārantitthilingassa nāmikapadamālāvibhāgo.

Okārantatāpakatikaṃ okārantitthilingaṃ niṭṭhitaṃ.

Evamaṃ sabbathāpi ākāraṇta ivaṇṇanta uvaṇṇantokāraṇtavasena chabbidhāni itthilingāni niravasesato gahitāni bhavanti. Etesu pana kesañci ākāraṇtānaṃ ikāraṇtānañca katthaci paccattekavacanassa ekāraṇdesavasena yo pabhedo dissati, so idāni vuccati. Tathā hi –

“Na tvaṃ rādha vijānāsi, aḍḍharatte anāgate;  
Abyayataṃ vilapasi, viratte kosiyāyane” ti

Imasmiṃ rādha jātaka “virattā” ti ākāraṇtavasena vattabbe paccattavacanassa ekāraṇdesavasena “viratte” ti vuttaṃ. Tathā “kosiyāyāni” ti ikāraṇtavasena vattabbe paccattavacanassa ekāraṇdesavasena “kosiyāyane” ti vuttaṃ. Tena aṭṭhakathācariyo “viratte kosiyāyaneti mātā no kosiyāyanī brāhmaṇī virattā amhākaṃ pitari nippemā jātā” ti atthaṃ saṃvaṇṇesi. Nanu ca bho pāliyaṃ “viratte” ti, “kosiyāyane” ti ca paccattavacanassa dassanato “ekāraṇtampi itthilingaṃ atthi” ti vattabbanti? Na vattabbaṃ ākāraṇtikāraṇtogadharūpavisesattā tesāṃ rūpānaṃ. Ādesavasena hi siddhattā viṣuṃ ekāraṇtaṃ itthilingaṃ nāma natthi, tasmā itthilingānaṃ yathāvuttā chabbidhatāyeva gahetabbā.

Icevaṃ itthilingānaṃ, pakiṇṇanayasālinī;  
Padamālā vibhattā me, sāsanatthaṃ sayambhuno.

Saddanītisūriyoyaṃ,  
Anekasavinicchayarasmi kalāpo;  
Saṃsayandhakāraṇudo,  
Kassa matipadumaṃ na vikāse.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe

Itthilingānaṃ nāmikapadamālāvibhāgo

Aṭṭhamo paricchedo.





viya dissati, tathāpi na gahetabbaṃ. Na hi so bhagavā liṅgaṃ naññāsi, na ca “sabbā mālā upenti ma”nti dve padāni itthilingāni katvā vattuṃ na sakkhi. Yo evaṃ visadisalingāni padāni uccāresi. Jānantoyeva pana bhagavā vattuṃ sakkontoyeva ca “sabbe mālā upenti ma”nti visadisalingāni padāni uccāresi, tasmā pulliṅgabhūtaṃ **sabbesaddaṃ** “sabbānī”ti napuṃsakalingavasena parivattetvā **vibhaṅgapāliyaṃ** “tīṇindriyā”ti padaṃ viya luttanikārena napuṃsakalingena **mālāsaddena** yojetvā “sabbāni mālāni”ti attho gahetabbo katthaci “yassa ete dhanā atthi”ti ettha viya. Ettha hi yassa etāni dhanānīti attho. Idampettha sallakkhitabbaṃ. **Mālāsaddo** dvilingo itthinapuṃsakavasena. Tiṭṭhatu tassitthilingattaṃ suviññeyyattā, napuṃsakatte pana tīni mālāni. “Mālehi ca gandhehi ca bhagavato sarīraṃ pūjentī”tiādayo napuṃsakappayogānipi bahū sandissantīti.

Yadi pana bho **mālāsaddo** itthinapuṃsakavasena dvilingo, “sabbe mālā upenti ma”nti ettha **mālāsaddassa** itthilingabhāvaparikkappane ko doso atthīti? Attheva itthilingasaddassa pulliṅgabhūtena sabbanāmikapadena saddhiṃ samānādhikaraṇabhāvassābhāvato, napuṃsakalingassa pana pulliṅgabhūtena sabbanāmikapadena saddhiṃ samānādhikaraṇabhāvassa upalabbhanato. Teneva ca “ete dhanā”tiādayo payogā pāvacane bahudhā diṭṭhā. Etthāpi pana vadeyyuṃ “dhanātiādīni vipallāsavasena pulliṅgāniyeva “ete”tiādīhi samānādhikaraṇapadehi yojitattā”ti. Na, napuṃsakāniyevetāni. Yadi hi “dhanā”tiādīni pulliṅgāni siyuṃ, katthaci paccattekavacanaṭṭhāne “eso”tiādīhi **okārantasamānādhikaraṇapadehi** yojitā **okārantadhanasaddā**dayo siyuṃ. Tathārūpānaṃ abhāvato pana “dhanā indriyā viññāṇā”tiādayo saddā napuṃsakalingāniyeva honti. Ayaṃ nayo paccattabahuvacanaṭṭhāneyeva labbhati. Napuṃsakalingāni hi visadākārāni pulliṅgarūpāni viya hutvā pulliṅgehipi saddhiṃ caranti, napuṃsakā viya purisavesadhārino purisehīti niṭṭhametthāvagantabbaṃ.

Athāpi te pubbe vuttavacanaṃ puna parivattetvā evaṃ vadeyyuṃ “citto gahapati, cittā itthī”tiādīsu cittaṃ etassa atthīti citto, cittaṃ etissā atthīti cittā yathā “saddho, saddhā”ti evaṃ assatthīti atthavasena gahetabbato liṅgavipallāso nicchitabbo, “satipaṭṭhāno dhammo, citto dhammo, cittā dhammā”tiādīni pana evarūpassa atthassa aggahetabbato “satipaṭṭhānaṃ dhammo, cittaṃ dhammo, cittāni dhammā”ti vattabbe liṅgavipallāsena “satipaṭṭhāno dhammo, citto dhammo, cittā dhammā”tiādī vuttanti liṅgavipallāso icchitabbo”ti? Tanna, “citto gahapati”tiādīsu pana “satipaṭṭhāno dhammo”tiādīsu ca **cittasatipaṭṭhānasaddādīnaṃ gahapati dhammādīnaṃ** apekkhanavasena niccaṃ pulliṅgabhāvassa icchitattā.

Tathā hi ekantanapuṃsakalingopi **puññasaddo** abhisankhārāpekkhanavasena “puñño abhisankhāro”ti pulliṅgo jāto, tathā ekantanapuṃsakalingāpi **paduma maṅgalasaddā**dayo aññassatthasāpekkhanavasena “padumo bhagavā, padumā devī, maṅgalo bhagavā, maṅgalā itthī”ti ca pumitthilingā jātā. Ekantapulliṅgāpi hatthivisesavācakā **kālāvaka gaṅgeyyasaddā**dayo **kulāpekkhanavasena** “kālāvakaṅca gaṅgeyya”ntiādīnā napuṃsakalingā jātā. Tadapekkhanavasena hi **aṭṭhakathāyaṃ** “kālāvako ca gaṅgeyyo”tiādī pulliṅganiddeso dissati. Evaṃ taṃtadatthānamapekkhanavasena taṃtampakatilingaṃ nāsetvā aparaṃ liṅgaṃ patiṭṭhāpetvā niddeso dissati, na ca tāni sabbānīpi liṅgāni taddhitavasena aññalingāni jātāni, atha kho **gahapatidhammādīnaṃ** apekkhanavaseneva aññalingāni jātāni, tasmā “petāni bhoti puttāni, khādamānā tuvaṃ pure. Siviputtāni cavhaya. Evaṃ dhammāni sutvāna, vipasīdanti paṇḍitā”tiādīsuyeva liṅgavipallāso icchitabbo anaññāpekkhakattā vuttadhammasaddādīnaṃ, na pana “citto gahapati, cittā itthī, satipaṭṭhāno dhammo, citto dhammo, cittā dhammā”tiādīsu **cittasaddādīnaṃ** vipallāso icchitabbo **gahapati dhammādīnaṃ** apekkhakattā tesanti niṭṭhametthāvagantabbaṃ, idaṅca ekaccānaṃ sammohaṭṭhānaṃ, tasmā saddhammaṭṭhitiyā ayaṃ nīti saddhāsampannehi kulaputtehi sādhukaṃ manasi katabbā.

Badaratitthavīhāravāsī **ācariyadhammapālo** pana “aparimāṇā padā aparimāṇā akkharā aparimāṇā byañjanāti pālīppadese ‘padā akkharā byañjanā’ti liṅgavipallāso katoti daṭṭhabba”nti āha. Etthāpi mayāṃ “padā”ti idaṃ “indriyā rūpā”tiādīni viya napuṃsakalingamevāti vadāma **okārantavasena** paṭhamekavacanaṭṭhābhāvabhāvato, itaradvayaṃ pana napuṃsakalingantipi pulliṅgantipi gahetabbaṃ niggahītantokārantavasena paṭhamekavacanaṭṭhābhāvassūpalabbhanato. Tathā hi “puttāni latāni pabbatāni dhammāni”tiādīnaṃyeva liṅgavipallāsāni icchitabbāni

niggahītantavasena paṭhamekavacananatātāya anupaladdhito, tesañcokārantākārantavasena paṭhamekavacananatādassanato. “Jarādhammaṃ mā jīrī”ti idaṃ pana aññapadatthavasena napuṃsakam jātanti daṭṭhabbam.

Bhūtaṃ, bhūtāni, bhūtā. Bhūtaṃ, bhūtāni, bhūte. Bhūtena, bhūtehi, bhūtebhi. Bhūtassa, bhūtānaṃ. Bhūtā, bhūtasma, bhūtamaḥ, bhūtehi, bhūtebhi. Bhūtassa, bhūtānaṃ. Bhūte, bhūtasmiṃ, bhūtamhi, bhūtesu. Bho bhūta, bhavanto bhūtāni, bhavanto bhūtā. Evaṃ cittaṇayena nāmikapadamālā bhavati.

Iminā nayena “mahābhūtaṃ bhavittaṃ bhūnaṃ bhavana”miccādīnaṃ **bhūdhātumayānaṃ** niggahītantapadānaṃ aññesañca “vatta”miccādīnaṃ niggahītantapadānaṃ nāmikapadamālā veditabbā.

Vattaṃ rūpaṃ sotaṃ ghānaṃ, dukkhaṃ pupphaṃ jhānaṃ ñānaṃ;  
Dānaṃ sīlaṃ puññaṃ pāpaṃ, vajjaṃ saccam yānaṃ chattaṃ.

Sakaṭaṃ kanakaṃ tagaraṃ nagaraṃ, taraṇaṃ caraṇaṃ dharaṇaṃ maraṇaṃ;  
Nayanaṃ vadaṇaṃ karaṇaṃ lavaṇaṃ, vasaṇaṃ pavanaṃ bhavanaṃ gaganam.

Amataṃ puḷinaṃ mālaṃ, āsanaṃ savanaṃ mukhaṃ;  
Padumaṃ uppalaṃ vassaṃ, locanaṃ sādhanam sukhaṃ.

Tāṇaṃ mūlaṃ dhanam kūlaṃ, maṅgalaṃ naḷinaṃ phalaṃ;  
Hiraññaṃ ambujaṃ dhaññaṃ, jālaṃ līngaṃ padaṃ jalaṃ.

Aṅgaṃ paṇṇaṃ susānaṃ saṃ, āvudhaṃ hadayaṃ vanaṃ;  
Sopānaṃ cīvaraṃ pānaṃ, alātaṃ indriyam kulaṃ.

Lohaṃ kaṇaṃ balaṃ pīṭhaṃ, aṇḍaṃ ārammaṇaṃ puraṃ;  
Araññaṃ tīraṃmassattha-miccādīni samuddhare.

Imāni cittaṣaddena sabbathāpi sadisāni, imāni pana visadisāni. Seyyathidaṃ –

“Cammaṃ vesma”ntiādīni, ekadhāyeva bhijjare;  
“Kammaṃ thāmaṃ guṇava”nti-ādīni tu anekadhā.

Kathaṃ?

Camme, cammasmiṃ, cammamhi, cammani, vesme, vesmasmiṃ, vesmamhi, vesmani,  
ghamme, ghammasmiṃ, ghammamhi, ghammani. Evaṃ aññāniyo yojetabbāni.

Kammaṃ, kammāni, kammā. Kammaṃ, kammāni, kamme. Kammena, kammunā, kammanā,  
kammehi, kammehi. Kammasma, kammuno, kammānaṃ. Kammasma, kammamaḥ, kammunā,  
kammehi, kammehi. Kammasma, kammuno, kammānaṃ. Kamme, kammasmiṃ, kammamhi,  
kammani, kammesu. Bho kamma, bhavanto kammāni, bhavanto kammā.

**Thāmasaddassa** pana tatiyekavacanaṭṭhānādīsu “thāmena, thāmunā, thāmassa, thāmuno”ti ca,  
“thāmā, thāmasma, thāmamaḥ, thāmunā”ti ca yojetabbam.

**Vantu mantu imantupaccayavataṃ** pana niggahītantasaddānaṃ “guṇavaṃ cittaṃ, rucimaṃ  
pupphaṃ, pāpimaṃ kulaṃ” iccādiyaogavasena –

Guṇavaṃ, guṇavantāni, guṇavantā, guṇavanti. Guṇavantaṃ, guṇavantāni, guṇavante guṇavanti.  
Guṇavatā, guṇavanteṇa, guṇavantehi, guṇavantebhi. Guṇavato, guṇavantaṃ, guṇavataṃ,

guṇavantānaṃ. Guṇavatā, guṇavantā, guṇavantasmā, guṇavantamhā, guṇavantehi, guṇavantebhi. Guṇavato, guṇavantassa, guṇavataṃ, guṇavantānaṃ. Guṇavati, guṇavante, guṇavantasmim, guṇavantamhi, guṇavantesu. Bho guṇava, bhavanto guṇavantāni, guṇavanti.

Evam “rucimaṃ, rucimantāni, rucima”ntiiccādinā, “pāpimaṃ, pāpimantāni, pāpima”nti iccādinā ca yojetabbaṃ. Apicettha “guṇavaṃ balavaṃ yasavaṃ satimaṃ gatimaṃ”iccādinā payogā vitthāretabbā.

**Karontasaddassa** “karontaṃ cittaṃ, karontaṃ kula”nti payogavasena –

Karontaṃ, karontāni, karontā, karonti. Karontaṃ, karontāni, karonte, karonti. Karotā, karontena, karontehi, karontebhi. Karoto, karato, karontassa, karontānaṃ, karontaṃ. Karotā, karontā, karontasmā, karontamhā, karontehi, karontebhi. Karoto, karato, karontassa, karontānaṃ, karontaṃ. Karoti, karonte, karontasmim, karontamhi, karontesu. Bho karonta, bhavanto, karontāni, karontā, karontūti yojetabbaṃ.

Gacchantasaddassa tu “gacchantāṃ cittaṃ, gacchantāṃ kula”nti payogavasena –

Gacchantāṃ, gacchantāni, gacchantā. Gacchantāṃ, gacchantāni, gacchante. Gacchatā, gacchantena, gacchantehi, gacchantebhi. Gacchato, gacchantassa, gacchantānaṃ, gacchataṃ. Gacchatā, gacchantā, gacchantasmā, gacchantamhā, gacchantehi, gacchantebhi. Gacchato, gacchantassa, gacchantānaṃ, gacchataṃ. Gacchati, gacchante, gacchantasmim, gacchantamhi, gacchantesu. Bho gacchaṃ, bho gacchantā, bhavanto gacchantāni, gacchantāti yojetabbaṃ.

Evam “carantaṃ dadantaṃ tiṭṭhantaṃ cintayanta”ntiādīsupi nāmikapadamālā yojetabbā.

**Mahantasaddassa** pana koci bhedo, tathā hi “bārāṇasirajjaṃ nāma mahā”ti evam “mahā”iti napuṃsakapayogadassanato “mahantaṃ, mahā, mahantāni, mahantā. Mahantaṃ, mahantāni, mahante. Mahatā”ti kamo veditabbo. Sabbānetāni **cittasaddena** visadisāni.

Savinicchayoyaṃ niggahītantaṃnapuṃsakaliṅgānaṃ pakatirūpassa nāmikapadamālāvibhāgo.

**Avanṇukārantatāpakatikaṃ** niggahītantaṃ

Napuṃsakaliṅgaṃ niṭṭhitaṃ.

Idāni tassīlatthassa katarassassa **atthavibhāvi** iccetassa saddassa nāmikapadamālaṃ vakkhāma pubbācariyamataṃ purecaraṃ katvā –

Aṭṭhi, aṭṭhī, aṭṭhīni. Aṭṭhim, aṭṭhī, aṭṭhīni. Aṭṭhinā, aṭṭhīhi, aṭṭhībhi. Aṭṭhissa, aṭṭhino, aṭṭhīnaṃ. Aṭṭhinā, aṭṭhīhi, aṭṭhībhi. Aṭṭhissa, aṭṭhino, aṭṭhīnaṃ. Aṭṭhismim, aṭṭhimhi, aṭṭhīsu. Bho aṭṭhi, bhavanto aṭṭhī, bhavanto aṭṭhīni. **Yamakamahātheramataṃ.**

Kiñcāpettha nissakkavacanaṭṭhāne “aṭṭhismā, aṭṭhimhā”ti padāni anāgatāni, tathāpi tattha tattha taṃsadisappayogadassanā gahetabbāni. Yathā pana **aṭṭhisaddassa**, evam “satthi dadhi vāri akkhi acchi”iccādinampi rūpāni bhavanti.

Atthavibhāvi, atthavibhāvī, atthavibhāvīni. Atthavibhāvīṃ, atthavibhāvī, atthavibhāvīni. Atthavibhāvīnā, atthavibhāvīhi, atthavibhāvībhi. Atthavibhāvīssa, atthavibhāvīno, atthavibhāvīnaṃ. Atthavibhāvīnā, atthavibhāvīsmā atthavibhāvīmhā, atthavibhāvīhi, atthavibhāvībhi. Atthavibhāvīssa, atthavibhāvīno, atthavibhāvīnaṃ. Atthavibhāvīsmim, atthavibhāvīmhi, atthavibhāvīsu. Bho atthavibhāvī, bhavanto atthavibhāvī, bhavanto atthavibhāvīni.

Evam “dhammavibhāvi, cittānuparivatti, sukhakāri”iccādinipi. Tattha **aṭṭhi satthi**ādīni

padhānalingāni anaññāpekkhakattā, **atthavibhāvi dhammavibhāvi**ādīni appadhānalingāni aññāpekkhakattā.

Savinicchayoyaṃ ikārantanapuṃsakalingānaṃ pakatirūpassa nāmikapadamālāvibhāgo.

Ivaṇṇantatāpakatikaṃ ikārantanapuṃsakalingaṃ niṭṭhitaṃ.

Idāni katarassassa **gotrabhu** iccetassa saddassa nāmikapadamālaṃ vakkhāma pubbācariyamataṃ purecaraṃ katvā –

Āyu, āyū, āyūni. Āyuṃ, āyū, āyūni. Āyunā, āyūhi, āyūbhi. Āyussa, āyuno, āyūnaṃ. Āyunā, āyūhi, āyūbhi. Āyussa, āyuno, āyūnaṃ. Āyusmiṃ, āyumhi, āyūsu. Bho āyu, bhavanto āyū, bhavanto āyūni. **Yamakamahāthera**matam.

Kiñcāpettha nissakkavacanaṭṭhāne “āyusmā, āyumhā”ti padāni anāgatāni, tathāpi tattha tattha taṃsadisappayogadassanato gahetabbāni. Ettha ca **āyusaddo** puṃnapuṃsakalingo daṭṭhabbo. Tathā hi pāḷiyaṃ aṭṭhakathāsu ca tassa dvilingatā dissati. “Punarāyu ca me laddho, evaṃ jānāhi mārisa. Āyu cassā parikkhīṇo ahoṣī”tiādīsu hi **āyusaddo** pulliṅgo, tabbasena “āyu, āyū, āyavo”tiādīnā **bhikkhunayena** yathāsambhavaṃ nāmikapadamālā yojetabbā. “Aggaṃ āyu ca vaṇṇo ca. Kittakaṃ panassa āyū”tiādīsu pana napuṃsakalingo, tabbasena “āyu, āyū, āyūni”ti yojitā.

Gotrabhu, gotrabhū, gotrabhūni. Gotrabhuṃ, gotrabhū, gotrabhūni. Gotrabhunā, gotrabhūhi, gotrabhūbhi. Gotrabhusa, gotrabhuno, gotrabhūnaṃ. Gotrabhunā, gotrabhusmā, gotrabhumhā, gotrabhūhi, gotrabhūbhi. Gotrabhusa, gotrabhuno, gotrabhūnaṃ. Gotrabhusmiṃ, gotrabhumhi, gotrabhūsu. Bho gotrabhu, bhavanto gotrabhū, bhavanto gotrabhūni. Bho gotrabhū, bho gotrabhūni, evaṃ bahuvacanaṃ vā. Ayamamhākaṃ matam, evaṃ “cittasahabhu”iccādīnaṃ **bhūdhātumayānaṃ** ukārantasaddānaṃ aññesampi taṃsadisānaṃ nāmikapadamālā yojetabbā. Puggalavācako pana ukāraṃto **gotrabhūsaddo** pulliṅgapariyāpannattā **sabbaññūnaye** pavitṭho. Tatraññe saddā nāma “cakkhu vasu dhanu dāru tipu madhu siṅgu hiṅgu cittagu”iccādayo.

Savinicchayoyaṃ ukārantanapuṃsakalingānaṃ pakatirūpassa nāmikapadamālāvibhāgo.

**Uvaṇṇokārantatāpakatikaṃ**

Ukārantanapuṃsakalingaṃ niṭṭhitaṃ.

Evaṃ niggahītanta ikāraṃta ukārantavasena tividhāni napuṃsakalingāni niravasesato gahitāneva honti. Tesu kesañci niggahītantaṃ kvaci paccattekavacanassa bahuvacanassa ekārādesavasena bhedo dissati. Seyyathidaṃ? “Sukhe dukkhe. Ekūnapaññāsa ājīvakasate ekūnapaññāsa paribbājakasate”iccevaṃmādi. Nanu bho evaṃvidhānaṃ rūpānaṃ pāḷiyaṃ dassanato “ekāraṃtampi napuṃsakalingaṃ atthī”ti vattabbanti? Na vattabbaṃ niggahītantogadharūpavisesattā tesam rūpānaṃ. Ādesavasena hi siddhattā viṣuṃ ekāraṃtaṃ napuṃsakalingaṃ nāma natthi. Tasmā napuṃsakalingānaṃ yathāvuttā tividhatāyeva gahetabbāti.

Napuṃsakānamicevaṃ, lingānaṃ nayasālinī;  
Padamālā vibhattā me, sāsanatthaṃ mahesino.

Yassesā paguṇā sadda-nītiressā subhāvitā;  
Sāsane kulaputtānaṃ, saraṇaṃ so parāyaṇaṃ.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparāṇe

Napuṃsakalingānaṃ pakatirūpassa nāmikapadamālāvibhāgo

Navamo paricchedo.

## 10. Liṅgattayamissakanāmikapadamālā

Adhikūnakato ceka-kkharato ca ito paraṃ;  
Tīṇi liṅgāni missetvā, padamālananākulaṃ.

Nānāsukhumasaṅketa-gatesvatthesu viññunaṃ;  
Gambhīrabuddhicāratthaṃ, pavakkhāmi yathābalaṃ.

Itthī thī ca pabhā bhā ca, girā rā pavanaṃ vanam;  
Udakañca dakaṃ kañca, vitakko iti cādayo.

Bhū bhūmi ceva araññaṃ, araññānīti cādayo;  
Paññā paññāṇaṃ ñāṇaṇca, iccādī ca tidhā siyuṃ.

Ko vi sā ceva bhā rā ca, thī dhī ku bhū tatheva kaṃ;  
Khaṃ go mo mā ca saṃ yaṃ taṃ, kimiccādī ca ekikāti.

Ayaṃ liṅgattayamissako nāmikapadamālāuddeso. Tatra itthī, itthī, itthiyo. Itthiṃ...pe...  
bhotiyo itthiyo.

Thī thī, thiyo. Thiṃ, thī, thiyo. Thiyā, thīhi, thībhi. Thiyā, thīnaṃ. Thiyā, thīhi, thībhi. Thiyā,  
thīnaṃ. Thiyā, thiyaṃ, thīsu. Bhoti thi, bhotiyo thī, bhotiyo thiyo. Ettha –

“Kukkuṭā maṇayo daṇḍā, thiyo ca puññalakkhaṇā;  
Uppajjanti apāpassa, katapuññassa jantuno;  
Thiyā guyaṃ na saṃseyya; Thīnaṃ bhāvo durājāno”’ti

Ādīni nidassanapadāni.

Pabhā, pabhā, pabhāyo. Pabhaṃ...pe... bhotiyo pabhāyo.

Bhā, bhā, bhāyo. Bhaṃ, bhā, bhāyo. Bhāya, bhāhi, bhābhi. Bhāya, bhānaṃ. Bhāya, bhāhi,  
bhābhi. Bhāya, bhānaṃ. Bhāya, bhāyaṃ, bhāsu. Bhoti bhe, bhotiyo bhā, bhotiyo bhāyo. Ettha ca  
“bhākarō bhānu”’iccādīni nidassanapadāni.

Girā, girā, girāyo. Giraṃ...pe... bhotiyo girāyo. “Vācā girā byappatho. Ye vohaṃ kittayissāmi,  
girāhi anupubbaso”’ti imāni **girās**addassa itthilingabhāve nidassanapadāni.

Suvaṇṇavācako **rās**saddo pulliṅgo, idha pana saddavācako **rās**saddo itthilingo.

Rā, rā, rāyo. Raṃ, rā, rāyo. Rāya, rāhi, rābhi. Rāya, rānaṃ. Rāya, rāhi, rābhi. Rāya, rānaṃ.  
Rāya, rāyaṃ, rāsu. Bhoti re, bhotiyo rā, bhotiyo rāyo.

Rā vuccati saddo. Aggaññasuttaṭṭikāyañhi “rā saddo tiyati chijjati etthāti ratti, sattānaṃ saddassa  
vūpasamakālo”’ti vuttaṃ. Tasmā **rās**saddassa saddavācakatte “rattī”’ti padaṃ nidassanaṃ.

Pavanaṃ, pavanāni, pavanā. Pavanaṃ, pavanāni, pavane.

Vanam, vanāni, vanā. Vanam, vanāni, vane. Sesam sabbam neyyam.

**Pavana vanasaddā** kadāci samānatthā kadāci bhinnatthā. Te hi araṅṅavācakkatte samānatthā “te dhamme paripūrento, pavanaṃ pāvisiṃ tadā. Saputto pāvisiṃ vana’ntiādīsu. Yathākkamaṃ pana te vāyutaṅhāvanavācakkatte bhinnatthā “paramaduggandhapavanavicarite. Chetvā vanañca vanathaṃ, nibbanā hotha bhikkhavo”tiādīsu.

Udakaṃ, udakāni, udakā. Udakaṃ, udakāni, udake.

Dakaṃ, dakāni, dakā. Dakaṃ, dakāni, dake. Sesam sabbam neyyam.

“Ambapakkam dakaṃ sītam. Thalajā dakajā pupphā”tiādīnettha nidassanapadāni. “Nīlodaṃ vanamajjhato. Mahodadhi. Udabindunipātena, udakumbhopi pūrati”ti pālīppadesesu pana samāsantagatanāmattā **udasaddeneva** udakattho vutto “rittassāda”nti vattabbaṭṭhāne “rittassa”nti saddena rittassādattho viya. Pālīyañhi kevalo **udasaddo** na diṭṭhapubbo. Atthi ce, suṭṭhu manasi kātabbo.

Kaṃ, kāni, kā. Kaṃ, kāni, ke. Kena, kehi, kebhi. Kassa, kānaṃ. Kā, kasmā, kamhā, kehi, kebhi. Kassa, kānaṃ. Ke, kasmim, kamhi, kesu. Bho ka, bhavanto kā, bhavanto kāni. **Bhosaddena** vā bahuvacanaṃ yojetabbaṃ “bho kāni, bho kā”ti.

Ettha **kaṃ** vuccati udakaṃ sīsam sukhañca. Atra “kantāro kandaro kevaṭṭā kesā karuṇā nāko”tiādīni payogaṇi veditabbāni. Tatra **kantāro**ti kaṃ vuccati udakaṃ, tena taritabbo atikkamitabboti kantāro, nirudakappadeso. Corakantārantiādīsu pana rūlhiyā duggamanaṭṭhānepi kantārasaddo pavattatīti daṭṭhabbaṃ. **Kandaroti** etthāpi kaṃ vuccati udakaṃ, tena dārito bhinnoti kandaro. **Kevaṭṭā**tiādīsu pana ke udake vattanato gahaṇattham pavattanato kevaṭṭā. Ke sīse senti uppajantīti **kesā**. Kaṃ sukham rundhatīti **karuṇā**. **Nākoti** saggo. **Kanti** hi sukham, na kaṃ akaṃ, dukkham, tam natthi etthāti nākoti attho gahetabbo. Yathettha **itthi**saddādīnaṃ nāmikapadamālā yojitā, evaṃ “vitakko vicāro ābhā padīpo”tiādīnampi yojetabbā.

Bhū, bhū, bhuyo. Bhuṃ, bhū, bhuyo. Bhuyā, bhūhi, bhūbhi. Bhuyā, bhūnaṃ. Bhuyā, bhūhi, bhūbhi. Bhuyā, bhūnaṃ. Bhuyā, bhuyam, bhūsu. Bhoti bhu, bhotiyo bhū, bhotiyo bhuyo. Ettha ca “bhūruho bhūpālo bhūbhūjo bhūtala”nti nidassanapadāni.

Bhūmi, bhūmī, bhūmiyo; Sesam vitthāretabbaṃ;  
Araññaṃ, araṅṅāni, araṅṅā; Sesam vitthāretabbaṃ.

**Araṅṅāni** vuccati mahāaraṅṅam, “gahapatāni”ti padamiva inīpaccayavasena sādhetabbaṃ padaṃ itthilingaṅca. “Araṅṅāni”ti hi aṭṭhakathāpāṭhopi dissati.

Araṅṅāni, araṅṅāni, araṅṅāniyo. Araṅṅāniṃ, araṅṅāni, araṅṅāniyo. Araṅṅāniyā, araṅṅānihi, araṅṅānihi. Araṅṅāniyā, araṅṅāniṃ. Araṅṅāniyā, araṅṅānihi, araṅṅānihi. Araṅṅāniyā, araṅṅāniṃ. Araṅṅāniyā, araṅṅāniyam, araṅṅāniṃ. Bhoti araṅṅāni, bhotiyo araṅṅāni, bhotiyo araṅṅāniyo.

Yathettha uttarādhikavasena yojitā, evaṃ “sabhā, sabhāya”ntiādīsipi yojetabbā. **Sabhāyanti** sabhā eva, līngabyattayavasena pana evaṃ vuttam. “Sabhāye vā dvāramūle vā vatthabba”nti pālī ettha nidassanam.

Paññā, paññā, paññāyo. Paññam, paññā, paññāyo. Paññāya.

Paññānaṃ, paññānāni, paññāṇā. Paññānaṃ, paññānāni, paññāṇe. Paññāṇena.

“Tathā hi bhante bhagavato sīlapaññānaṃ. Sādhu paññānavā naro”tiādīnettha nidassanapadāni.

Ñāṇam, ñāṇāni, ñāṇā. Ñāṇam, ñāṇāni, ñāṇe. Ñāṇena. Sesam sabbam neyyam. “Aggi aggini

gini’’iccādīsupi uttarādhikavasena nāmikapadamālā yojetabbā.

**Ko vī sādīsupi** ekakkharesu **ko** vuccati brahmā vāto ca sarīrañca, tassa tabbācakatte ime payogā. Seyyathidaṃ?

‘‘Jinena yena ānītaṃ, lokassa amitaṃ hitaṃ;  
Tassa pādambujaṃ vande, kamoḷialisevitaṃ.

Kakudharukkho. Karajakāyo’’ iccevamādayo. Tattha **kamoḷialisevitaṃ** vandantānaṃ anekasatānaṃ brahmānaṃ moḷibhamarasevitaṃ kavayo icchanti. **Kakudharukkhoti** ettha pana **ko** vuccati vāto, tassa yo kujjhati, vātarogāpanayanavasena taṃ nivāreti, tasmā so rukkho kakudhoti vuccatībhi ācariyā. **Karajakāyoti** ettha tu **ko** vuccati sarīraṃ, tattha pavatto rajo karajo. Kiṃ taṃ? Sukkasoṇitaṃ. Tañhi ‘‘rāgo rajo, na ca pana reṇu vuccatī’’ti evaṃ vuttarāgarajaphalattā sarīravācakena **kasaddena** visesetvā phalavohārena ‘‘karajo’’ti vuccati. Tena sukkasoṇitasāṅkhātena karajena sambhūto kāyo karajakāyoti ācariyā. Tathā hi ‘‘kāyo mātāpettikasambhavo’’ti vutto, **mahāassapūrasuttaṭṭhikāyaṃ** pana ‘‘kariyati gabbhāsaye khipiyatīti karo, sambhavo. Karato jātoti karajo, mātāpettikasambhavoti attho. Mātuādīnaṃ saṅghāpanavasena karato jātoti apare, ubhayathāpi karajakāyanti catusantatirūpamāhā’’ti vuttaṃ. Ayaṃ panattho idha nādhippeto, purimoyevattho adhippeto **kasaddādhikārattā**.

Ko, kā. Kaṃ, ke. Kena, kehi, kebhi. Kassa, kānaṃ. Kā, kasmā, kamhā, kehi, kebhi. Kassa, kānaṃ. Ke, kasmīṃ, kamhi, kesu. Bho ka, bhavanto kā.

Tatra **vi** vuccati pakkhī. Tathā hi pakkhīnaṃ issaro supaṇṇarājā vindoti kathiyati. Etamatthañhi sandhāya pubbācariyenapi ayaṃ gāthā bhāsītā –

‘‘Saddhānate muddhani saṅghapemi, muninda nindāpagataṃ tavaggaṃ;  
Devindanāgindanarindavinda-na taṃ vibhinnaṃ caraṇāravinda’’nti.

Tattha vīnaṃ indoti **vindo**, pakkhijātiyā jātānaṃ supaṇṇānaṃ rājāti attho.

Vīṃ, vī, vayo. Vīṃ, vī, vayo. Vinā, vīhi, vībhi. Vissa, vino, vīnaṃ. Vinā, vismā, vimhā, vīhi, vībhi. Vissa, vino, vīnaṃ. Vismīṃ, vimhi, vīsu. Bho vi, bhavanto vayo.

**Sā** vuccati sunakho, ‘‘mātā me atthi, sā mayā posetabbā’’tiādīsū pana **sāsaddo** sabbanāmikapariyāpanno parammukhavacano **tasaddena** sambhūto daṭṭhabbo. **Sāsaddassa bhā rā thī bhū kasaddānañca** nāmikapadamālā heṭṭhā pakāsītā.

**Dhī** vuccati paññā. Ettha ca ‘‘amacce tāta jānāhi, dhīre atthassa kovide’’ti. ‘‘Dhīmā, dhīmati, sudhī, sudhinī, dhīyutta’’nti ca ādīni nidassanapadāni.

Dhī, dhī, dhiyo. Dhīṃ, dhī, dhiyo. Dhiyā, dhīhi, dhībhi. Dhiyā, dhīnaṃ. Dhiyā, dhīhi, dhībhi. Dhiyā, dhīnaṃ. Dhiyā, dhiyaṃ, dhīsu. Bhoti dhi, bhotiyo dhī, bhotiyo dhiyo.

**Ku** vuccati pathavī. Ettha ca ‘‘kudālo. Kumudaṃ. Kuñjaro’’ti imāni nidassanapadāni. Tatra kuṃ pathaviṃ dālayati padāleti bhindati etenāti **kudālo**. Kuyaṃ pathaviyaṃ modatīti **kumudaṃ**. Kuṃ jaratīti **kuñjaro**. Tathā hi **vimānavatthuaṭṭhakathāyaṃ** vuttaṃ ‘‘kuṃ pathaviṃ tadabhighātena jarayatīti kuñjaro’’ti.

Ku, kū, kuyo. Kuṃ, kū, kuyo. Kuyā, kūhi, kūbhi. Kuyā, kūnaṃ. Kuyā, kūhi, kūbhi. Kuyā, kūnaṃ. Kuyā, kuyaṃ, kūsu. Bhoti ku, bhotiyo kū, bhotiyo kuyo.

**Kha**’mindriyaṃ pakathitaṃ, **kha**’mākāsamudīritaṃ;  
Saggaṭṭhānampi **khaṃ** vuttaṃ, suññattampi ca **khaṃ** mataṃ.

Tatrindriyaṃ cakkhuviññāṇādīnaṃ gatiniṅgābhāvato ‘kha’nti vuccati, ākāsaṃ vivittaṭṭhena. Saggo katasucaritehi ekantena gantabbatāya ‘kha’nti saṅkhaṃ gacchati. ‘Khago yathā hi rukkhagge, nilīyantova sākhino. Sākhāṃ ghaṭṭeti’ ti ca, ‘khe nimmito acari aṭṭhasataṃ sayambhū’ ti ca ādi ettha nidassanaṃ.

Khaṃ, khāni, khā. Khaṃ, khāni, khe. Khena, khehi, khebhi. Khassa, khānaṃ. Khā, khaṃ, khamhā, khehi, khebhi. Khassa, khānaṃ. Khe, khaṃ, khamhi, khesu. Bho kha, bhavanto khāni, bhavanto khā.

**Gosaddassa atthuddhāro vuccate –**

Go goṇe cindriye bhūmyaṃ, vacane ceva buddhiyaṃ;  
Ādicce rasmiyañceva, pānīyepi ca vattate;  
Tesu atthesu goṇe thi-pumā ca itare pumā.

Tathā hi ‘gosu dūyamānāsu gato. Gopañcama’ tiādīsu gosaddo goṇe vattati. Gocaroti etthindriyepi vattati gāvo cakkhādīnindriyāni caranti etthāti gocarō. Tathā hi porāṇā kathayīmsu ‘gāvo caranti etthāti gocarō, gocarō viya gocarō, abhiṅhaṃ caritabbatṭhānaṃ. Gāvovācakkhādīnindriyāni, tehi caritabbatṭhānaṃ gocarō’ ti. ‘Gomatiṃ gotamaṃ name’ ti porāṇakaviracānāyaṃ pana pathaviyaṃ vattati. ‘Bhūripaṇṇāṃ gotamaṃ sammāsambuddhaṃ vandāmī’ ti hi attho. Tathā **suttanipātaṭṭhakathāya** vāseṭṭhasuttasaṃvaṇṇanappadesa ‘**gorakkhanti** khettarakkhaṃ, kasirakkhanti vuttaṃ hoti. Pathavī hi ‘go’ ti vuccati, tappabheda ca khetta’ ti vuttaṃ.

‘Gottavasena gotamo’ ti ettha tu vacane buddhiyañca vattati. Tenāhu porāṇā ‘gaṃ tāyatīti gottam. Gotamoti hi pavattamānaṃ gaṃ vacanaṃ buddhiñca tāyati ekaṃsīkavisayatāya rakkhatīti gottam. Yathā hi buddhi ārammaṇabhūtena atthena vinā na vattati, evaṃ abhidhānaṃ abhidheyyabhūtena, tasmā so gottasaṅkhāto attho tāni tāyati rakkhatīti vuccati. Ko pana soti? Aññakulaparamparāsādhāraṇaṃ tassa kulassa ādipurisasamudāgataṃ taṃkulapariyāpannasādhāraṇaṃ sāmāññarūpanti daṭṭhabba’ ti. Tathā hi taṃgottajātā suddhodanamahārājādayopi gotamotveva vuccanti. Bhena bhagavā attano pitaraṃ suddhodanamahārājānaṃ ‘atikkantavarā kho gotama tathāgatā’ ti avoca. Vessavaṇopi mahārājā bhagavantaṃ ‘vijjācaraṇasampannaṃ, buddhaṃ vandāma gotama’ ti avoca, āyasmāpi vaṅgīso āyasmantaṃ ānandaṃ ‘sādhu nibbāpanaṃ brūhi, anukampāya gotamā’ ti avoca. Evaṃ idaṃ sāmāññarūpaṃ gaṃ tāyatīti gottanti vuttaṃ. Taṃ pana gotamagottakassapagottādivasena bahuviddhaṃ.

Tathā gosaddo ādicce vattati. ‘Gogottaṃ gotamaṃ name’ ti porāṇakaviracānā ettha nidassanaṃ, ādiccabandhuṃ gotamaṃ sammāsambuddhaṃ vandāmīti attho. Ādiccopi hi gotamagotte jāto bhagavāpi, evaṃ tena samānagottatāya tattha tattha ‘ādiccabandhū’ tiādīnā bhagavato thomañā dissati ‘pucchāmi taṃ ādiccabandhu, vivekaṃ santipadañca mahesi’ ti ca, ‘vande jetavanaṃ niccaṃ, vihāraṃ ravibandhuno’ ti ca, ‘lokekabandhu’ maravindasahāyabandhu’ ti ca. ‘Uṇhagū’ ti ettha pana gosaddo rasmiyaṃ vattati. Uṇhā gāvo rasmiyo etassāti uṇhagū, sūriyo. Pubbācariyāpi hi **chandovicitisatthe** imamevatthaṃ byākariṃsu.

‘Gosītacandana’ ti ettha pānīye vattati. Gosaddena hi jalaṃ vuccati. Go viya sītaṃ candanaṃ, tasmīṃ pana uddhanato uddharitapakkuṭhitatelaṃhi pakkhitte taṅkhaṇaṇṇeva taṃ telaṃ susītaṃ hoti.

Ettheke vadanti ‘kasmā bho ‘gopadatthe vattamāno gosaddo itthiliṅgo ceva pulliṅgo cā’ ti vadatha, kasmā ca pana ‘indriyapathavīvacanabuddhisūriyasmipānīyesu vattamāno pulliṅgo’ ti vadatha, etesu sūriyatthe vattamāno pulliṅgo hotu, nanu indriyavacanapānīyesu vattamānena pana gosaddena napuṃsakaliṅgena bhavitabbaṃ, pathavībuddhirasmīsu vattamānena itthiliṅgena bhavitabbaṃ indriyādiṭṭhāvādīpadatthesu vattamānānaṃ **indriyasaddādīpathavīsaddādīnaṃ**



napuṃsakitthiliṅgavasena niddesassa dassanato’’ti? Tanna, niyamābhāvato. Itthipadatthe vattamānassāpi hi sato kassaci saddassa pulliṅgavasena niddeso dissati yathā “orodho’’ti. Purisapadatthe vattamānassāpi ca sato kassaci itthiliṅgavasena niddeso dissati, yathā “atthakāmosi me yakkha, hitakāmāsi devate’’ti. Itthipurisapadatthesu pana avattamānānampi satam kesañci saddānaṃ ekasmiṃyeva ñāṇādiatthe vattamānānaṃ itthipumanapuṃsakaliṅgavasena niddeso dissati yathā “paññā amoho ñāṇa’’nti, “taṭamtaṭitaṭo’’ti ca. Tathā hi anitthibhūtopi samāno “mātulā’’ti itthiliṅgavasena rukkhopi nāmaṃ labhati, tabbasena nagarampi. Tenāha **cakkavattisuttaṭikāyaṃ** “**mātulā**ti itthiliṅgavasena laddhanāmo eko rukkho, tāya āsannappadese māpitattā nagarampi ‘mātulā’ tveva paññāyittha. Tena vuttaṃ mātulāyanti evaṃnāmake nagare’’ti.

**Gosaddassa nāmikapadamālā heṭṭhā pakāsītā.**

**Mo** vuccati cando, **aṭṭhakathāyaṃ** pana “mā vuccati cando’’ti ākārantapāṭho dissati, **okārantapāṭhena** tena bhavitabbaṃ sakkaṭabhāsāya **ekakkharakosato** nayaṃ gahetvā “mo sivo candimā cevā’’ti **okārantavasena** vattabbattā. Ettha ca **okārantavasena** vuttassa **masaddassa** candavācakatte “puṇṇamī, puṇṇamā’’ti ca nidassanapadāni. Tattha puṇṇo mo etthāti puṇṇamī, evaṃ puṇṇamā, rattāpekkhaṃ itthiliṅgavacanaṃ. Ettha pana “visākhapuṇṇamāya rattiyā paṭhamayāme pubbenivāsaṃ anussarī’’ti idaṃ nidassanaṃ. Ettha siyā – yadi “puṇṇamā’’ti ayaṃsaddo rattāpekkho itthiliṅgo.

‘Puṇṇamāye yathā cando, parisuddho virocāti;  
Tatheva tvaṃ puṇṇamano, viroca dasasahasiyaṃ.

Anvaddhamāse pannarase, puṇṇamāye uposathe;  
Paccayaṃ nāgamāruya, dānaṃ dātumupāgami’’nti

Ādisu kathaṃ “puṇṇamāye’’ti padasiddhīti? **Yakārassa** **yekārādesavasena**. Dhammissarena hi bhagavatā “puṇṇamāyā’’ti vattabbe “puṇṇamāye’’ti vadatā **yakārassa** **ṭhāne** **yekāro** paṭhito itthiliṅgavisaye **ttākārassa** **ṭhāne** **ttekāro** viya, **nīkārassa** **ṭhāne** **nekāro** viya ca. Tathā hi yathā “abyayataṃ vilapasi viratte kosiyāyane’’ti imasmim **rādhajātaka** “virattā’’ti vattabbe “viratte’’ti vadantena **ttākārassa** **ṭhāne** **ttekāro** paṭhito, “kosiyāyanī’’ti ca vattabbe “kosiyāyane’’ti vadantena **nīkārassa** **ṭhāne** **nekāro** paṭhito. Evaṃ “puṇṇamāyā’’ti vattabbe “puṇṇamāye’’ti vadatā **yakārassa** **ṭhāne** **yekāro** paṭhito. Yathā ca “dakkhitāye aparājitasanṅha’’nti imasmim **mahāsamayassuttappadese** “dakkhitāyā’’ti vattabbe “dakkhitāye’’ti vadatā **yakārassa** **ṭhāne** **yekāro** paṭhito, evamidhāpi. Yathā pana “sabhāye vā dvāramūle vā’’ti ettha “sabhāya’’nti liṅgabyattayavasena sabhā vuttā, na tathā idha “puṇṇamāya’’nti liṅgabyattayena **puṇṇamā** vuttā, atha kho “puṇṇamā’’ti **ākārantitthiliṅgavasena** vuttā. Tathā hi “puṇṇamāyo’’ti padaṃ **yakāraṭṭhāne** **yekārūccāraṇavasena** sambhūtaṃ bhumavacanaṃti daṭṭhabbaṃ.

**Mā** vuccati sirī. Tathā hi **vidvamukhamaṇḍanaṭikāyaṃ** “mālinī’’ti padassatthaṃ vadatā “mā vuccati lakkhī, alinī bhamarī’’ti vuttaṃ. **Lakkhīsaddo** ca **sirīsaddena** samānattho, tena “mā vuccati sirī’’ti attho amhehi anumato, tathā porāṇehipi “maṃ sirim dhāreti vidadhāti cāti mandhātā’’ti attho pakāsito, tasmā “mālinī mandhātā’’ti ca imānettha nidassanapadāni. Tatra pulliṅgassa tāva **masaddassa** ayaṃ nāmikapadamālā –

Mo, mā. Maṃ, me. Mena, mehi, mebhi. Massa, mānaṃ. Mā, masmā, mamhā, mehi, mebhi. Massa, mānaṃ. Me, masmim, mamhi, mesu. Bho ma, bhavanto mā.

Ayaṃ pana itthiliṅgassa **māsaddassa** nāmikapadamālā –

Mā, mā, māyo. Maṃ, mā, māyo. Māya, māhi, mābhi. Māya, mānaṃ. Māya, māhi, mābhi. Māya, mānaṃ. Māya, māyaṃ, māsu. Bhoti me, bhotiyo māyo.

Ettha pana sirīvācako **māsaddo** ca saddavācako **rāsaddo** cāti ime samānagatikā ekakkharattā

niccamākārantapakatikattā itthilingattā ca.

Tatra **saṃ** vuccati santacitto puriso. Yaṃ loke “sappuriso”ti ca, “ariyo”ti ca, “paṇḍito”ti ca vadanti, tassetāṃ adhivacaṇaṃ yadidaṃ “sa”nti. Evaṃ sappurisāriyapaṇḍitavācākassa **saṃ**saddassa paccattavacaṇavasena atthibhāve “sameti asatā asa”nti idaṃ payoganidassanaṃ. Ettha hi “na saṃ asa”nti samāsacintāya sappurisāsappurisapadatthā **saṃ asaṃ**saddehi vuttāti ñāyanti, tasmā “sappurisapadattho paccattavacaṇena **saṃ**saddena vutto natthī”ti vacanaṃ na vattabbaṃ. Ye “natthī”ti vadanti, tesāṃ vacanaṃ na gahetabbaṃ. Nāmikapadamālā panassa “saṃ, santaṃ, sante”tiādīnā heṭṭhā pakāsītā. Napuṃsakalingatte **saṃ** vuccati dhanāṃ, “manussassaṃ. Parassaṃ. Sabbassaṃ. Sabbassaharaṇaṃ. Parassaharaṇa”ntiādīnettha nidassanapadāni. Tattha manussassa saṃ manussassaṃ. Evaṃ parassa saṃ parassaṃ. Sabbassa saṃ sabbassaṃ. Tassa haraṇaṃ parassaharaṇaṃ sabbassaharaṇanti samāso. Tathā **saṃ** vuccati sukhaṃ santi ca. Vuttañhi tabbācakattaṃ porāṇakaviraṇāyaṃ –

“Devadevo saṃdehī no, hīno devātidehato;  
Hatopapātasamsāro, sāro saṃ detu dehina”nti.

Tasmā ayamettha gāthā, “sakalalokasaṅkaro dīpaṅkaro”ti ettha “saṅkaro”ti padañcanidassanaṃ. “Saṃ, sāni, sā. Saṃ, sāni, se. Sena”iccādi pubbe pakāsitanayena ñeyyaṃ. Ettha ca sotūnaṃ sugatamatavare kosallajananatthaṃ samāsantagatassa **saṃ**saddassa nāmikapadamālaṃ paripuṇṇaṃ katvā kathayāma –

Manussassaṃ, manussassāni, manussassā. Manussassaṃ, manussassāni, manussasse. Manussassena, manussassehi, manussassebhi. Manussassassa, manussassānaṃ. Manussassā, manussassasmā, manussassamhā, manussassehi, manussassebhi. Manussassassa, manussassānaṃ. Manussasse, manussassasmim, manussassamhi, manussassesu. Bho manussassa, bhonto manussassāni, manussassā. Esa nayo “parassaṃ sabbassa”ntiādīsūpi, sabbānetāni padāni abhidheyalingānīti gahetabbāni.

**Yaṃ taṃ** kimitisaddānaṃ, nāmamālaṃ panattari;  
Sabbanāmaparicchede, pakāsissaṃ tilīngato.

Icevaṃ heṭṭhā uddiṭṭhānaṃ **ko vi sādīnaṃ** nāmikapadamālā saddhiṃ atthantaranidassanapadehi vibhattā. Tatridaṃ līngavavatthānaṃ –

**Ko vi sā** honti pullīnge, **bhā rā thī dhī ku bhū** thiyaṃ;  
**Kaṃ khaṃ** napuṃsake **go** tu, pume cevithilīngake.

**Mo** pume itthilīnge **mā, saṃ** pume ca napuṃsake;  
**Yaṃ taṃ** kimiti sabbatra, līngesveva pavattare.

Ito aññānīpi ekakkharāni upaparikkhitvā gahetabbāni.

Evaṃ viññūnaṃ nayaññūnaṃ saddaracaṇāvisaye paramavisuddhavipulabuddhipaṭilābhatthaṃ paramasaṇhasukhumatthesu payogesū asammohatthaṃ suvaṇṇatale sīhavijambhanena kesarīsīhassa vijambhanamiva tepiṭake buddhavacane ñāṇavijambhanena vijambhanatthañca adhikūnekakkharavasena līngattayaṃ missetvā nāmikapadamālā vibhattā.

Sadde bhavanti kusalā na tu keci atthe,  
Atthe bhavanti kusalā na tu keci sadde.

Kosallameva paramaṃ dubhayattha tasmā,  
Yogaṃ kareyya satatāṃ matimā varanti.

Iti navaṅge sātṭhakathe piṭakattaye byappathagatīsu

Viññūnaṃ kosallatthāya kate saddanītipakaraṇe

Liṅgattayamissako nāmikapadamālāvibhāgo

Dasamo paricchedo.

## 11. Vāccābhidheyyalingādiparidīpananāmikapadamālā

Vāccābhidheyyalingādi-vasenapi ito paraṃ;  
Bhāsissaṃ padamālāyo, bhāsitaṣṣānurūpato.

Tattha **vāccalingānī**ti appadhānalingāni, guṇanāmasaṅkhātāni vā liṅgāni. **Abhidheyyalingānī**ti padhānalingāni, guṇīpadasaṅkhātāni vā liṅgāni. Yasmā pana tesu vāccalingāni nāma abhidheyyalingānuvattakāni bhavanti, tasmā sabbāni **bhūdhātumayāni** ca vāccalingāni abhidheyyalingānurūpato yojetabbāni. Tesam **bhūdhātumayāni** vāccalingāni sarūpato nāmikapadamālāya ayojitānīpi tattha tattha nayato yojitāni, tasmā na dāni dassessāma. **Abhūdhātumayānīpi** kiñcāpi nayato yojitāni, tathāpi sotārānaṃ payogesu kosallajananatthaṃ kathayāma, nāmikapadamālāñca nesam dassessāma kiñci payogaṃ vadantā.

Dīgho rasso nīlo pīto,  
Sukko kaṇho seṭṭho pāpo;  
Saddho suddho ucco nīco,  
Katotīto iccādīni.

Dīghā jāgarato ratti, dīghaṃ santassa yojanaṃ;  
Dīgho bālāna saṃsāro, saddhammaṃ avijānataṃ.

Dīgho, dīghā. Dīghaṃ, dīghe. Dīghena, dīghehi, dīghebhi. Dīghassa, dīghānaṃ. Dīghā, dīghasmā, dīghamhā, dīghehi, dīghebhi. Dīghassa, dīghānaṃ. Dīghe, dīghasmiṃ, dīghamhi, dīghesu. Bho dīgha, bhavanto dīghā. “Dīghāti maṃ pakkoseyyāthā”ti idamettha nidassanaṃ.

Dīghā, dīghā, dīghāyo. Dīghaṃ, dīghā, dīghāyo. Dīghāya. Sesam **kaññā**na yena ñeyyaṃ.

Dīghaṃ, dīghāni, dīghā. Dīghaṃ, dīghāni, dīghe. Dīghena. Sesam **cittā**na yena ñeyyaṃ. **Rassādīni** ca evameva vitthāretabbāni. Ayaṃ vāccalingānaṃ nāmikapadamālā, “guṇanāmānaṃ nāmikapadamālā”ti vattum vaṭṭati.

Abhidheyyakalingesu, savisesāni yāni hi;  
Tesam dāni yathāpālīṃ, padamālaṃ kathessaṃ.

Katamāni tāni padāni, yāni savisesāni?

**Bhavābhavā**dikaṃ **laṅkā-dīpo** iccādīkāni ca;  
**Bodhi sandhī**ti cādīni, savisesāni honti tu.

Etesu hi –

**Bhavābhavapadaṃ** deka-vaco bahuvaco kvaci;  
Samāse asamāsepi, sambhavo tassa icchito.

Viggahañca padatthañca, vatvā padassimassa me;

Vuccamānamavikkhittā, padamālaṃ nibodhatha.

Bhavo ca abhavo ca **bhavābhavaṃ**. Atha vā bhavo ca abhavo ca bhavābhavāni, ayaṃ viggaho. Tatra **bhavoti** khuddako bhavo. **Abhavoti** mahanto bhavo. Vuddhatthavācako hettha akāro. Ettha ca sugatiduggativasena hīnapañītavasena ca khuddakamahantatā veditabbā. Atha vā **bhavoti** vuddhi. **Abhavoti** avuddhi. Ayaṃ padattho. Ayaṃ pana nāmikapadamālā –

Bhavābhavaṃ, bhavābhavaṃ, bhavābhavena, bhavābhavassa, bhavābhavā, bhavābhavasmā, bhavābhavamhā, bhavābhavassa, bhavābhave, bhavābhavasmim, bhavābhavamhi, bho bhavābhava. Iti **bhavābhavapadaṃ** ekavacanaṃ bhavati. Dissati ca tassekavacanaṭā pāliyaṃ aṭṭhakathāyañca –

“Atītakappe caritaṃ, ṭhapayitvā bhavābhave;  
Imasmim kappe caritaṃ, pavakkhissaṃ suṇohi me”

Iti vā,

“Evaṃ bahūvidhaṃ dukkhaṃ, sampattiñca bahūvidhaṃ;  
Bhavābhave anubhavitvā, patto sambodhimuttamaṃ”

Iti vā evaṃ pāliyaṃ **bhavābhava** padassa ekavacanaṭā diṭṭhā.

Aṭṭhakathāyaṃpi –

“Asambudhaṃ buddhanisevitaṃ yaṃ,  
Bhavābhavaṃ gacchati jīvaloko;  
Namo avijjādikilesajāla-  
Viddhaṃsino dhammavarassa tassā”ti

Evaṃ tassekavacanaṭā diṭṭhā.

Bhavābhavāni, bhavābhavā, bhavābhavāni, bhavābhave, bhavābhavehi, bhavābhavebhi, bhavābhavānaṃ, bhavābhavehi, bhavābhavebhi, bhavābhavānaṃ, bhavābhavesu, bhavanto bhavābhavāni. Iti **bhavābhavapadaṃ** bahuvacanaṃpi bhavati. Dissati ca tassa bahuvacanaṭā pāliyaṃ “dhonassa hi natthi kuhiñci loke. Pakappikā diṭṭhi bhavābhavesū”ti. Ubhayampi nayaṃ vomissetvā nāmikapadamālā yojetabbā. Kathaṃ? “Bhavābhavaṃ, bhavābhavāni. Bhavābhavaṃ, bhavābhavāni. Bhavābhavena, bhavābhavehi, bhavābhavebhi”iccevamādinā **cittanayena** yojetabbā.

Napuṃsakekavacana-bahuvacanaṃ imā;  
Padamālā samāsatte, katāti paridīpaye.

Samāsakapadañceva, asamāsakameva ca;  
**Bhavābhavapadaṃ** dvedhā, iti vidvā vibhāvaye.

Napuṃsakaṃ samāsatte, pulliṅgamarattane;  
Napuṃsakaṃ tu pāyena, ekavacanaṃ vade.

“Bhavo ca abhavo cā”ti, samāsattaṃ vade budho;  
“Bhavato bhava”miccatthaṃ, asamāsassa bhāsaye.

Pulliṅgattamhi so ñeyyo, nissakkaupayogato;  
Evaṃ visesato jaññā, **bhavābhavapadaṃ** vidū.

Yathā cettha **bhavābhavapadaṃ** nāmikapadamālā yojitā, evaṃ “kammākammaṃ phalāphala”ntiādīnaṃpi nāmikapadamālā yojetabbā. Atthopi nesam yathārahaṃ vattabbo.

Yebhuyenetāni ekavacanakāni bhavanti. Evaṃ tāva **bhavābhavapadādīnaṃ** visesavantatā daṭṭhabbā.

Laṅkā dīpo, laṅkā dīpaṃ, laṅkā dīpena, laṅkā dīpassa, laṅkā dīpā, laṅkā dīpasmā, laṅkā dīpamhā, laṅkā dīpassa, laṅkā dīpe, laṅkā dīpasmim, laṅkā dīpamhi, bho laṅkā dīpa. Ayaṃ samāsatte nāmikapadamālā. Asamāsattepi pana yojetabbā.

Laṅkā dīpo, laṅkaṃ dīpaṃ, laṅkāya dīpena, laṅkāya dīpassa, laṅkāya dīpā, laṅkāya dīpasmā, laṅkāya dīpamhā, laṅkāya dīpassa, laṅkāya dīpe, laṅkāya dīpasmim, laṅkāya dīpamhi, bhoti laṅke dīpa. Ayaṃ byāse nāmikapadamālā. Ayaṃ nayo “jambudīpo”ti ettha na labbhati kevalena **jambūsaddena** jambudīpassa akathanato, yathā kevalena **laṅkā**saddena laṅkā dīpo kathyati. Ayaṃ pana byāse padamālanayo visesato kabbaracanāyaṃ kavīnaṃ upakārāya saṃvattati sāsanaṃ. Tathā hi byāsavasena porāṇakaviracanaṃ dissati –

“Vandāmi selamhi samantakūṭe,  
Laṅkāya dīpassa sikhāyamāne;  
Āvāsabhūte sumanāmarassa,  
Buddhassa taṃ pādavaḷaṅjamagga”nti.

Sāsanepi byāsavasena “dibbo ratho pāturahu, vedehassa yasassino”tiādikā pāḷi dissati.

Yathā pana “jambudīpo”ti ettha ayaṃ nayo na labbhati, tathā “nāgadīpo”tiādīsipi kevalena **jambūsaddena** jambudīpassa akathanamiva kevalena **nāgasaddādīnā** nāgadīpādīnaṃ akathanatoti. Nanu ca bho “buddhassa jambunadaramsino taṃ, dāṭhaṃ mayam jambunarā namāmā”ti porāṇakaviracanaṃ **jambūsaddena** jambudīpo vutto “jambudīpanarā”ti atthasambhavatoti? Saccaṃ “jambudīpanarā”ti attho sambhavati, kevalena pana **jambūsaddena** jambudīpatthaṃ na vadati, kintu “jambudīpanarā”ti vattabbe gāthāvisayattā adhikakkharadosaṃ parivajjantena **dīpasaddalopaṃ** katvā “jambunarā”ti vuttaṃ, evaṃ uttarapadalopavasena vutto **jambūsaddo narasaddaṃ** paṭicca samāsabalena “jambudīpanarā”ti atthappakāsane samattho hoti, na kevalo byāsakāle, tathā hi “jambū”ti vutte jambudīpo na ñayati, atha kho jamburukkho yeva ñayati.

Kim pana bho “kāko dāso, kākaṃ dāsaṃ, kākena dāsenā”ti ayaṃ nayo labbhati, na labbhatīti? Labbhati, **kākasaddena** kākanāmakassa dāsassa kathanam hoti. Yadi evaṃ “jambudīpo”ti etthāpi “jambunāmako dīpo”ti atthaṃ gahetvā “jambū dīpo, jambuṃ dīpaṃ, jambuyā dīpenā”ti ayaṃ nayo labbhatīti? Na labbhati **jambūsaddassa** paṇṇattivasena dīpe appavattanato. **Jambūsaddo** hi rukkheyeva paṇṇattivasena pavattati, na dīpe. Yathā pana **cittavohāro** cittaṃ make gahapatimhipi manepi pavattati “citto gahapati. Cittaṃ mano mānasa”ntiādīsu. Yathā ca **kusavohāro** kusanāmake raññepi kusatiṇepi pavattati –

“Pabhāvatiṅca ādāya, maṇim verocanaṃ kuso;  
Kusāvatiṃ kusarājā, agamāsī mahabbalo;  
Kuso yathā duggahito, hatthamevānukantī”ti

Ādīsu, tathā **kākasaddopi** vāyase, evaṃ nāmāmake dāsepi pavattati “kāko ravati, kāko nāma dāso saṭṭhiyojanāni gacchatī”tiādīsu. **Jambūsaddo** pana gahapatimanādīsu **citta kusa kākasaddā** viya paṇṇattivasena dīpasmim na pavattati, tasmā yathāvuttoto yeva nayo manasikaraṇīyo.

Yathā panettha “laṅkā dīpo”ti saddassa nāmikapadamālā samāsavasena byāsavasena ca yojitā, evaṃ “pubbavidehadīpo, aparagoyānadīpo, uttarakurudīpo, assayujanakkhattaṃ, citramāso, vessantararājā, setavatthaṃ, dibbaratho”tiādīnampi nāmikapadamālā samāsavasena byāsavasena ca yojetabbā. **Pubbavidehā**disaddehi pubbavidehadīpādīnaṃ kathanāṅca veditabbaṃ. “Dibbaratho”tiādīnaṃ samāsagatapadānaṃ payojane sati byāsavasena visuṃ kattabbatā ca veditabbā. Tathā hi byāsavasena “dibbo ratho”tiādīnā dvinnam dvinnam padānaṃ samānādhikaraṇavasena paccekavibhattiyuttabhāve sati gāthāsu vuttipālanasukhuccāraṇaṃ bhavati. So ca sāsanaṃ hi ayaṃ nayo ṭhapito. Tathā hi pāvacaṇe “dibbo ratho pāturahu,

vedehassa yasassino’’tiādikā pāḷiyo bahū dissanti, evaṃ **laṅkāḍīpā**disaddānaṃ visesavantatā bhavati.

Idāni **bodhisandhi**ādīnaṃ visesavantatā vuccati –

Bodhi sandhi vibhattā’yu, dhātuyeva pajāpati;  
Dāmā dāmaṃ tathā saddhā, saddhaṃ taṭaṃ taṭī taṭo.

Byañjanaṃ byañjano attho, atthamakkharamakkharo;  
Ajjavaṃ ajjavo ceva, tathā maddavagāravā.

Vaco vacīti cādīni, samarūpā sarūpato;  
Dvittiliṅgāni sambhonti, yathāsambhavamuddise.

Etesu hi **bodhisaddassa** tāva ‘‘bodhi rājakumāro’’ti ca, ‘‘ariyasāvako ‘bodhī’ti vuccati, tassa bodhissa aṅgoti bojjaṅgo’’ti ca evaṃ puggalavacanassa ‘‘bodhi, bodhī, bodhayo. Bodhiṃ, bodhī, bodhayo. Bodhinā’’ti pulliṅge **aggin**ayena nāmikapadamālā bhavati.

Rukkhamaggaṇibbānasabbaññutaññānavacanassa pana ‘‘bodhi, bodhī, bodhiyo. Bodhiṃ, bodhī, bodhiyo. Bodhiyā’’ti itthiliṅge **rattin**ayena nāmikapadamālā bhavati.

Keci pana ‘‘rukkhavacano bodhisaddo pulliṅgo’’ti vadanti, taṃ āgamaṇa viruddhaṃ viya dissanato vicāretabbaṃ. Na hi āgame rukkhavacanassa **bodhisaddassa** pulliṅgabhāvo dissati, puggalavacanassa pana dissati. Yadi ca ‘‘sālo dhavo khadīro’’tiādīnaṃ viya rukkhavacanassa **bodhisaddassa** pulliṅgattaṃ siyā, **jambū simbalī pāṭalī**saddādīnaṃ rukkhavācakattā pulliṅgattaṃ siyā, na tesam imassa ca rukkhavācakattepi pulliṅgabhāvo upalabbhati. Yadi hi rukkhavacano **bodhisaddo** pulliṅgo, evaṃ sante nibbānavacano sabbaññutaññānavacano ca **bodhisaddo** napuṃsakaliṅgo siyā ‘‘nibbāna’’ntiādīnā napuṃsakaliṅgavasena niddiṭṭhassa nibbānādino atthassa kathanato.

Ye evaṃ vadanti ‘‘rukkhavacano **bodhisaddo** pulliṅgo’’ti, te ‘‘bodhi vuccati catūsu maggesu ñānaṃ, taṃ ettha bhagavā pattoti rukkhopi bodhicceva vuccati’’ti vuttamatthaṃ cetasi sannidhāya ‘‘bujjhati etthāti bodhī’’ti nibbānavasena ‘‘kiṃ rukkhavacano **bodhisaddo** pulliṅgo na bhavissatī’’ti maññamānā vadanti maññe. Nevaṃ daṭṭhabbaṃ, evaṇca pana daṭṭhabbaṃ, ‘‘bodhi vuccati catūsu maggesu ñānaṃ, taṃ ettha bhagavā pattoti rukkhopi bodhicceva vuccati’’ti vadantehi garūhi ñānavacanam itthi liṅgabhūtaṃ bodhīti ñānassa nāmaṃ paṇṇattiantaraparikkappanentatthaṃ parikkappentena bujjhanatṭhānabhūte rukkhe āropetvā rukkho ‘‘bodhī’’ti vutto, tasmā īdisesu ṭhānesu nibbacane ādaro na kātabbo. Na hi ‘‘bujjhati etthāti bodhī’’ti nibbānakaraṇam rukkhavacanassa **bodhisaddassa** pulliṅgattaṃ kātuṃ sakkoti saṅketasiddhattā vohāraṇassa, tasmā rukkhaṃ sayam abodhimpī samānaṃ bodhiyā paṭilābhatṭhānattā saṅketasiddhena ‘‘bodhī’’ti itthiliṅgavohārena voharanti sāsanikā, bodhiyā vā kāraṇattā phalavohārena. Etamatthameva hi sandhāya ‘‘bodhi vuccati catūsu maggesu ñānaṃ, taṃ ettha bhagavā pattoti rukkhopi bodhicceva vuccati’’ti vuttanti daṭṭhabbaṃ, evaṃ ‘‘bodhī’’ti itthiliṅgavasena rukkhanāmaṃ pavattatīti. Tenāha **āyasmā sārīputto** dhammasenāpati anudhammacakkavattī vohārakusalo itthiliṅgavohārena ‘‘buddhānaṃ bhagavantānaṃ bodhiyā mūle saha sabbaññutaññānpaṭilābhā sacchikā paññatti yadidaṃ buddho’’ti. Apica tattha tattha ‘‘bodhiyā sākā’’ti ca, ‘‘kenatṭhena mahābodhi, kassa sambandhinī ca sā’’ti ca,

‘‘Hatthato muttamattā sā, asītīratanaṃ nabhaṃ;  
Uggantvāna tadā muñci, chabbaṇṇā rasmiyo subhā’’ti ca

Evaṃādayo rukkhavācakassa **bodhisaddassa** itthiliṅgabhāve payogā dissanti.

Atha vā rukkhavācako **bodhisaddo** dviliṅgo pumitthiliṅgavasena. Tathā hi

**samantapāsādikāyaṃ** vinayasamvaṇṇanāyaṃ mahāveyyākaraṇassa pāḷinayaviduno **buddhaghosā**cariyassa evaṃ saddaracanā dissati “sakkhissasi tvaṃ tāta pāḷaliputtam gantvā mahābodhinā saddhiṃ ayyam saṅghamittattheriṃ ānetu”nti ca, “sāpi kho mahābodhisamārūḷhā nāvā passato mahārājassa mahāsamuddatalaṃ pakkhandā”ti ca tassa rukkhavācakassa **bodhis**addassa “bujjhati etthāti bodhī”ti nibbācāvasena “bodhi, bodhī, bodhayo. Bodhiṃ, bodhī, bodhayo. Bodhinā”tiādinā padamālā veditabbā. Rukkhavācakasēva pana tassa ñāṇe pavattitthilingavohārena saṅketasiddhena rūḷhatthadīpakena “bodhi, bodhī, bodhiyo. Bodhiṃ, bodhī, bodhiyo. Bodhiyā”tiādinā padamālā veditabbā. Icevaṃ –

Puggalavācako **bodhi**-saddo pulliṅgiko bhavē;  
Ñāṇādivācako itthi-liṅgoyeva siyā sadā.

Bodhipādapavacano, pumitthilingiko bhavē;  
Evaṃ santēpi etassa, itthilingattameva tu;  
Icehitabbataraṃ yasmā, dhammasenāpatīritam.

**Sandhis**addādīnampi nayānusārena nāmikapadamālā yojetabbā. **Sandhis**saddo hi sarasandhiādivācako pulliṅgo, paṭisandhiyādivācako itthilingo “sandhino. Sandhiyā”tiādidassanato. **Vibhattis**saddo vibhajanavācako itthilingo, **syā**divācako pulliṅgo ceva itthilingo ca “vibhattissa. Vibhattiyā”tiādidassanato.

**Āyus**saddo pana jīvitindriyavācakoyeva hutvā punnapuṃsakaliṅgo, “punarāyu ca me laddho, evaṃ jānāhi mārisā”ti “ettakamyeva te āyu, cavanakālo bhavissati”ti ca dassanato.

**Dhātus**saddo sabhāvādivācako itthilingo, **karapacā**divācako pumitthilingo “cakkhudhātuyā. Karotissa dhātussa. Dhātuyo dhātuyā”ti dassanato.

**Pajāpatis**saddo devavisesavācako pulliṅgo, kalattajinamātucchāvācako itthilingo “pajāpatissa devarājassa dhajaggaṃ ullokeyyātha”, “attano pajāpatiyā saddhiṃ mahāpajāpatiyā”ti ca dassanato.

**Dāmā dāmaṃ** saddā mālatīdāmādibhedabhinnassa ekassa vatthussa yathākkamaṃ itthinapuṃsakaliṅgā. Tathā hi “mālatīdāmā lolāḷiṅgalīlā. Mālatīdāmaṃ. Singhitam dāmaṃ bhamarehi. Ratanadāmā. Ratanadāma”nti ca dvilingabhāve lokikappayogā dissanti sāsanānukūlā.

**Saddham** **saddhā**saddā pana bhinnavatthūnaṃ vācakā itthinapuṃsakaliṅgā, **saddhā**saddo pasādalakkaṇavācako itthilingo, **saddham**saddo matakabhattavācako napuṃsakaliṅgo “saddhā saddahanā. Mayamassubho gotamabrāhmaṇā nāma dānāni dema saddhāni karomā”ti dassanato. Imasmim̐ pana ṭhāne “saddho puriso, saddhā itthī, saddham kula”nti imāni vāccalingattā saṅghaṃ na gacchantīti daṭṭhabbāni.

**Taṭam taṭi taṭo**time saddā tīrasaṅkhāte ekasmim̐yevatthe thīpunnapuṃsakaliṅgā.

**Byañjanas**saddo upasecanalingavākyāveṇikasārīrāvayavavācako napuṃsakaliṅgo, akkharavācako punnapuṃsakaliṅgo. Tatrupasecane “sūpaṃ vā byañjanaṃ vā”ti napuṃsakaniddeso dissati. Tathā liṅge “itthibyañjanaṃ purisabyañjana”nti napuṃsakaniddeso. Vākye “padabyañjanāni sādhuṃ uggahetvā”ti napuṃsakaliṅganiddeso. Āveṇike “asīti anubyañjanāni”ti napuṃsakaniddeso. Sarīrāvayave “kilesānaṃ anu anu byañjanato pākāṭabhāvākaraṇato anubyañjana”nti evaṃ napuṃsakaniddeso. Ettha hi anubyañjanaṃ nāma hatthapādasitahasitakathitavilokitādibhedo ākāro. So eva “sarīrāvayavo”ti vuccatīti. Akkhare “byañjano. Byañjana”nti ca punnapuṃsakaniddeso.

**Atthas**saddo nibbānavacano napuṃsakaliṅgo, abhidheyadhanakāraṇapayojananivatyābhisandhānādivacano pana pulliṅgo. Tathā hi **kathāvattumhi** “atthattamhī”ti imissā pāḷiyā atthasamvaṇṇanāyaṃ “attham vuccati nibbāna”nti

napuṃsakalinganiddesena **atthasaddo** vutto. Iti **atthasaddo** dvilingo.

**Akkharasaddo** ca “yo pubbo akkharo akkharānī”ti ca dassanato. Apica **akkharasaddo** nibbānavacano nāmapaṇṇattivacano ca sabbadānapuṃsakalingo bhavati “padamaccutamakkharam, mahājanasammato kho vāsetṭha ‘mahāsammato’ tveva paṭhamam akkharam nibbatta”nti evamādīsu. “Akkharāya deseti, akkharakkharāya āpatti pācittiyassā”ti ettha pana pullīngotipi napuṃsakalingotipi vattabbo, itthilingoti pana na vattabbo. Ayañhi “asakkatā casma dhanañcayāya. Viramathāyasmanto mamavacanāyā”tiādīsu “dhanañcayāya, vacanāyā”ti saddā viya vibhattivipallāsena vutto, na līngavipallāsavasenāti.

**Ajjava maddava gāravasaddā** pana punnapuṃsakalingā. “Ajjavo ca maddavo ca. Ajjavamaddavaṃ. Gāravo ca nivāto ca. Saha āvajjite thūpe, gāravaṃ hoti me tadā”ti ca ādidassanato.

**Vacovaciśaddā** pana **ghaṭoghaṭisaddā** viya pumitthilingā, tattha **vacīśaddassa** “vacī, vacī, vaciyo. Vacim, vacī, vaciyo. Vaciyā”ti nāmikapadamālā yojetabbā. Keci “duccaritapayogaviññattisaddādīsu paresu **vacasaddassanto** ikāro hoti, tena “vacīduccarita”ntiādīni rūpāni dissantī”ti vadanti, taṃ na gahetabbaṃ **vacasaddato** visuṃ **vacīśaddassa** dassanato. Atrimāni pālīto ca aṭṭhakathāto ca nidassanapadāni. “Vacī vacīsañkhāro, vacīsañkhāro vacī, vacīñca vacīsañkhāre ca ṭhapetvā avasesā na ceva vacī, na ca vacīsañkhāro. Gadito vacībhi satimābhinande”ti imāni pālīto nidassanapadāni. “Copanasāñkhātā vacī eva viññatti vacīviññatti, vaciyā bhedo vacībhedo”ti imāni aṭṭhakathāto nidassanapadāni. Iminā nayena aññesampi sarūpāsārūpapadānaṃ yathārahaṃ dvitilingatā vavatthapetabbā. Evaṃ abhidheyyakalingesu savisesāni abhidheyyalingāni veditabbāni.

Idāni katthaci vāccalingabhūtānaṃ abhidheyyalingānañca taddhibhantalingānañca dhammādivasena nāmikapadamālā vuccate. Tathā hi –

Dhammabho puggalā ceva, dhammapuggalatopi ca;  
Ekantadhammato ceva, tathevekantapuggalā.

Padamālā siyuṃ tāsū, paccattādivasena tu;  
Padaṃ samaṃ visamañca, jaññā sabbasamampi ca.

Kathaṃ? “Micchādīṭṭhi, micchāsañkappo, micchāvācā, micchāvāco, micchādīṭṭhiko, micchāsañkappī” iccetesam nāmikapadamālā evaṃ veditabbā.

“Micchādīṭṭhi, micchādīṭṭhī, micchādīṭṭhiyo. Micchādīṭṭhim, micchādīṭṭhī, micchādīṭṭhiyo. Micchādīṭṭhiyā”ti evaṃ dhammato, “micchādīṭṭhi, micchādīṭṭhī, micchādīṭṭhino. Micchādīṭṭhim, micchādīṭṭhī, micchādīṭṭhino. Micchādīṭṭhinā”ti evaṃ puggalato, “micchāsañkappo, micchāsañkappā. Micchāsañkappa”nti evaṃ dhammapuggalato, “micchāvācā, micchāvācā, micchāvācāyo. Micchāvācam, micchāvācā micchāvācāyo. Micchāvācāya” evaṃ ekantadhammato, “micchāvāco, micchāvācā. Micchāvācam, micchāvāce. Micchāvācena” evaṃ ekantapuggalato, “micchādīṭṭhiko. Micchādīṭṭhikā. Micchādīṭṭhika”nti evampi ekantapuggalato, “micchāsañkappī, micchāsañkappino. Micchāsañkappi”nti evampi ekantapuggalato nāmikapadamālā bhavati. Paccattopayogavacanādivasena pana padaṃ sadisaṃ visadisaṃ sabbathā sadisampi ca bhavati. Esa nayo **sammādīṭṭhisammāsañkappādīsupi**.

Atrime āhaccabhāsītā payogā – avijjāgatassa bhikkhave aviddasuno micchādīṭṭhi pahoti. Micchādīṭṭhissa micchāsañkappo pahoti. Micchāsañkappassa micchāvācā pahoti. Micchāvācassa micchākammanto pahoti. Micchākammantassa micchāājīvo pahoti. Micchāājīvassa micchāvāyāmo pahoti. Micchāvāyāmassa micchāsati pahoti. Micchāsatisa micchāsamādhi pahotīti. Vijjāgatassa bhikkhave viddasuno sammādīṭṭhi pahoti. Sammādīṭṭhissa sammāsañkappo pahotīti vitthāro, evaṃ katthaci vāccalingabhūtānaṃ abhidheyyalingānañca taddhitantalingānañca nāmikapadamālā sappayogā kathitā.



Idāni nevābhidheyyalingassa **bhavitabba**saddassa ca abhidheyyalingānaṃ **sotthi suvatthi** saddānañca vāccalingābhidheyyalingassa **abbhuta**saddassa ca vāccalingassa **abhūta**saddassacāti imesaṃ kiñci visesaṃ kathayāma, nāmikapadamālañca yathārahaṃ yojessāma. Etesu hi **bhavitabba**saddo ekantabhāvavācako napuṃsakalingo ekavacanantoyeva hoti. Tatiyantapadehi **evaṃ**sadda **nasaddādīhi** ca yojetabbo ca hoti. Nāssa nāmikapadamālā labbhati, atrime ca payogā “saddhammagarukena bhavitabbaṃ, no āmisagarukena, iminā corena bhavitabbaṃ, imehi corehi bhavitabbaṃ, imāya coriyā bhavitabbaṃ, imāhi corīhi bhavitabbaṃ, anena cittena bhavitabbaṃ, imehi cittehi bhavitabbaṃ, evaṃ bhavitabbaṃ, aññathā bhavitabba”nti. Atridaṃ vuccati –

**Bhavitabbapadaṃ** niccaṃ, sabbaññuvarasāsane;  
Paṭhamekavaco bhāva-vācakañca napuṃsakaṃ.

Tatiyantapade**hevaṃ**-saddādīhi ca dhīmatā;  
Yojetabbaṃva sambhoti, iti vidvā vibhāvaye.

Ayaṃ “bhavitabba”nti padassa viseso.

Sotthi bhaddante hotu rañño, sotthiṃ gacchati nhāpito. Sotthināmi samuṭṭhito. Suvatthi, suvatthiṃ, suvatthinā, ayaṃ **dhasātthi**saddādīnaṃ viseso.

Ayaṃ pana “abbhutaṃ abhūta”nti dvinnaṃ viseso. **Bhū**saddassa bbhū, saṃyogapare paṭisedhatthavati aitinipāte upapade sati ekantena rassattamupayāti. Kvatthe? “Abhūtapubbaṃ bhūta”ntiādīsvatthesu. Tathāvidhe asaññogapare rassattaṃ na upayāti. Kvatthe? “Asacca”ntiādīsvatthesu. Tathā hi “abbhuta”nti padassa “abhūtapubbaṃ bhūta”ntipi attho bhavati, “abbhutakaraṇa”ntipi attho bhavati. “Abhūta”nti padassa pana “asacca”ntipi attho bhavati, “ajāta”ntipi attho bhavati. Tatra “acchariyaṃ vata bho abbhutaṃ vata bho. Accheram vata lokasmiṃ, abbhutaṃ lomahaṃsanaṃ” iccevamādayo “abhūtapubbaṃ bhūta”nti atthe payogā.

“Tvaṃ maṃ nāgena ālampa,  
Ahaṃ maṇḍūkachāpiyā;  
Hotu no abbhutaṃ tattha,  
Āsahashehi pañcahī”ti

Icevamādayo abbhutakaraṇatthe payogā. Evaṃ rassavasena, dīghavasena pana nissaṃyoge “abhūtaṃ atacchaṃ. Atathaṃ”iccevamādayo asaccatthe payogā, “abhūtaṃ ajātaṃ asañjāta”nti iccevamādayo ajātatthe payogā. Bhavanti catra –

“Abhūtapubbaṃ bhūta”nti, atthasmiṃ **abbhuta**ntidaṃ;  
Padaṃ viññūhi viññeyyaṃ, rassabhāvena saṅghitaṃ.

Abbhutakaraṇattheṇi, **abbhuta**nti padaṃ tathā;  
Saṅghitaṃ rassabhāvena, iti vidvā vibhāvaye.

**Abhūta**miti dīghatta-vasena kathitaṃ pana;  
Padaṃ samadhigantabba-masaccājātavācakaṃ.

Abbhutaṃ, abbhutāni. **Citta**na yena, abbhuto, abbhutā. Abbhutaṃ, **purisa**na yena, abbhutā, abbhutā, abbhutāyo. Abbhutaṃ. **Kaṇṇā**na yena ñeyyaṃ. Evaṃ **bhūta**saddassapi nāmikapadamālā tidhā gahetabbā. Atra “abbhuta”miti padaṃ vāccalingampi bhavati abhidheyyalingampi. “Abhūta”miti padaṃ pana vāccalingaṃ abhidheyyalingampi vā **sacca**saddo viya kathaṃ. Itissa yathārahaṃ ayampi sappayogā nāmikapadamālā kathitā.

Idāni āgamikānaṃ kosallajananatthaṃ padasamodhānavasena nāmikapadamālā vuccate – buddho bhagavā, buddhā bhagavanto. Buddhaṃ bhagavantaṃ, buddhe bhagavante. Buddhena

bhagavatā, sesaṃ vitthāretabbaṃ. Ayaṃ padamālā ekavacanabahuvacanavasena ñeyyā.

Devā tāvatimsā. Deve tāvatimse. Devehi tāvatimsehi. Sesaṃ vitthāretabbaṃ.  
Bahuvacanavasena ñeyyā padamālā.

So bhagavā jānaṃ passaṃ arahaṃ sammāsambuddho, taṃ bhagavantam jānantaṃ passantaṃ arahantaṃ sammāsambuddhaṃ, tena bhagavatā jānatā passatā arahatā sammāsambuddhena, tassa bhagavato jānato passato arahato sammāsambuddhassa. Sesaṃ vitthāretabbaṃ. Ekavacanavasena ñeyyā padamālā.

Rājā suddhodano, rājānaṃ suddhodanaṃ, raññā suddhodanena. Sesaṃ vitthāretabbaṃ.

Rājā passenadī kosalo, rājānaṃ passenadiṃ kosalaṃ, raññā passenadinā kosalena. Sesaṃ vitthāretabbaṃ.

Rājā māgadho seniyo bimbisāro, rājānaṃ māgadhaṃ seniyaṃ bimbisāraṃ, raññā māgadhena seniyeṇa bimbisāreṇa. Sesaṃ vitthāretabbaṃ.

Rājā māgadho ajātasattu vedehiputto, rājānaṃ māgadhaṃ ajātasattum vedehiputtam, raññā māgadhena ajātasattunā vedehiputtana. Sesaṃ vitthāretabbaṃ.

Mahāpajāpatī gotamī, mahāpajāpatiṃ gotamiṃ, mahāpajāpatiyā gotamiyāti pañcakkhattum vattabbaṃ. Mahāpajāpatiyaṃ gotamiyaṃ, bhoti mahāpajāpati gotami.

Makkhali gosālo. Makkhaliṃ gosālam. Makkhalinā gosālena. Sesaṃ vitthāretabbaṃ.

Sāriputtamoggallānaṃ sāvakayugaṃ. Sāriputtamoggallānaṃ sāvakayugaṃ, sāriputtamoggallānena sāvakayugena, sāriputtamoggallānassa sāvakayugassa. Sesaṃ vitthāretabbaṃ. Sabbāpetā padamālā ekavacanavasena ñeyyā. Sāriputtamoggallānā aggasāvakā, sāriputtamoggallāne aggasāvake, sāriputtamoggallānehi aggasāvakehi. Sesaṃ vitthāretabbaṃ. Bahuvacanavasena ñeyyā. Ito aññesupi eseṇa nayo.

So dāro, sā dārā. Saṃ dāraṃ, se dāre. Sena dārena. Sesaṃ vitthāretabbaṃ. Sā nārī, sā nāriyo. Saṃ nāriṃ, sā nāriyo. Sāya nāriyā. Sesaṃ vitthāretabbaṃ. Saṃ kammaṃ, sāni kammāni. Sena kammena. Saṃ phalaṃ, sāni phalāni. Sena phalena. Sesaṃ vitthāretabbaṃ.

Paṭhamaṃ jhānaṃ, paṭhamaṃ jhānaṃ, paṭhamena jhānena, paṭhamassa jhānassa. Sesaṃ vitthāretabbaṃ.

Catutthī disā, catutthiṃ disaṃ, catutthiyā disāya.

Dhammī kathā, dhammiṃ kathaṃ, dhammiyā kathāya, dhammiyaṃ kathāyaṃ. Evaṃ anupubbī kathā, evarūpī kathā. Iminā nayena aññesupi ṭhānesu padasamodhānavasena liṅgato ca antato ca vacanato ca apekkhitabbaṃ. Padato ca nānappakārā nāmikapadamālā yojetabbā.

Idāni ekappakārānaṃ saddānaṃ liṅgaantavasena nānattaṃ veditabbaṃ. Kathaṃ? Yādiso, yādisī, yādisaṃ. Tādiso, tādisī, tādisaṃ. Etādiso, etādisī, etādisaṃ. Kīdiso, kīdisī, kīdisaṃ. Īdiso, īdisī, īdisaṃ. Ediso, edisī, edisaṃ. Sadiso, sadisī, sadisaṃ. Kadāci pana ‘‘yādisā tādisā’’ti evamādīni itthiliṅgarūpāni bhavanti. Nāmikapadamālā nesaṃ **purisa itthī citta**naṃ yojetabbā.

Idāni samāsataddhitapadabhūtānaṃ **amamasaddādīnaṃ** nāmikapadamālā vuccate – amamo, amamā, amamaṃ, amame. Amamena. Sesaṃ vitthāretabbaṃ.

Mayhako, mayhakā. Mayhakaṃ, mayhake. Mayhakena. Sesaṃ vitthāretabbaṃ.

Āmā, āmā, āmāyo. Āmaṃ, āmā, āmāyo. Sesam vitthāretabbaṃ.

Tatra **amamoti** natthi taṇhāmamattaṃ diṭṭhimamattañca etassāti amamo, ko so, arahāyevāti vattum vaṭṭati. Apica yesatanhāpi sadiṭṭhīpi “mama ida”nti mamattaṃ na karonti, tepi amamāyeva. Ettha ca “manussā tattha jāyanti, amamā apariggahā”ti idaṃ sāsanaṃ nidassanaṃ. “Amamo nirahaṅkāro”ti idaṃ pana lokato nidassanaṃ. Itthiliṅge vattabbe “amamā, amamā, amamāyo”ti padamālā. Napuṃsake vattabbe “amamaṃ, amamāni”ti padamālā. Tatra **mayhakoti** “idampi mayhaṃ idampi mayha”nti vippalapatīti mayhako, eko pakkhiviseso. Vuttañhetam **jātake** –

“Sakuṇo mayhako nāma, girisānudarīcaro;  
Pakkaṃ pippalimāruya, ‘mayhaṃ mayha’nti kandatī”ti.

Itthiliṅge vattabbe “mayhakī, mayhakī, mayhakiyo”ti padamālā. Tatra **āmāti** “āma ahaṃ tumhākaṃ dāsī”ti evaṃ dāsibhāvaṃ paṭijānātīti āmā. Gehadāsī. Vuttañhetam **jātakesu** “yattha dāso āmajāto, ṭhito thullāni gacchatī”ti ca, “āmāya dāsāpi bhavanti loke”ti ca, tasmā imānevettha nidassanapadāni.

Idāni **kati katipaya katimī**saddānaṃ viseso vuccate yathārahaṃ nāmikapadamālā ca. Tatra **katimī**saddassa nāmikapadamālā na labbhati “ajja bhante katimī”ti evaṃ pucchāvasena āgatamattato. **Kati katipayasaddānaṃ** pana labbhateva, sā ca bahuvacanikā. **Visuddhimaggaṭikāyaṃ pana katipayasaddo** ekavacaniko vutto. Kati purisā tiṭṭhanti, kati purise passati. Kati itthiyo, kati kulāni. Kati lokasmiṃ chiddāni yattha cittaṃ na tiṭṭhati. Kati kusalā. Kati dhātuyo. Kati āyatanāni. Katihi khandhehi katihāyatanehi katihi dhātūhi saṅgahitaṃ. Katibhi rajamāneti, katibhi parisujjhati. Katipayā purisā, katipayā itthiyo, katipayāni cittaṃ. Imā pana nāmikapadamālā.

Kati. Katihi, katibhi. Katiṇaṃ. Katisu.

Katipayā. Katipayehi, katipayebhi. Katipayānaṃ. Katipayesu. Katipayāyo. Katipayāhi, katipayābhi. Katipayānaṃ. Katipayāsu. Katipayāni. Katipaye. Katipayehi, katipayebhi. Katipayānaṃ. Katipayesūti. Sabbāpetā sattanaṃ vibhattīnaṃ vasena ñeyyā, samāsavidhimhipi **kati katipayasaddā** bahuvacanaseneva yojetabbā. “Katisaṅgātigo bhikkhu, oghatiṇṇoti vuccati. Katipayajanakata”ntiādīsu hi “kati kittakā saṅgā katisaṅgā”tiādīnā sabbadā bahuvacanasamāso daṭṭhabbo.

Idāni rūlḥīsaddānaṃ nāmikapadamālā vuccate – idha **rūlḥīsaddā** nāma **yevāpanakasaddā**dayo. Yevāpanako, yevāpanakā. Yevāpanakaṃ. Yevāpano, yevāpanā. Yevāpanaṃ. Yaṃvāpanakaṃ, yaṃvāpanakāni. Sesam sabbattha vitthāretabbaṃ. Tatra **yevāpanakoti** “phasso hoti vedanā hotī”tiādīnā vuttā phassādayo viya sarūpato avatvā “ye vā pana tasmīṃ samaye aññepi atthi paṭiccasamuppannā arūpino dhammā”ti evaṃ “yevāpanā”ti padena vutto yevāpanako, evaṃ “yevāpano”ti etthāpi. Tathā “yaṃ vā panaññampi atthi rūpa”nti evaṃ “yaṃvāpanā”ti padena vuttaṃ **yaṃvāpanakaṃ**. Esa nayo yathārahaṃ **yassakaṃ yatthakanti**ādīsupi netabbo.

Ettha siyā – nanu ca bho **panasaddo** nipāto, nipātānañca abyayabhāvo siddho tīsu liṅgesu sabbavibhattivacanesu ca vayābhāvato, so kasmā “yevāpano”ti okāranto jātoti? Saccam **panasaddo** nipāto, so ca kho “ye vā pana tasmīṃ samaye”ti vā, “yaṃ vā panaññampī”ti vā, “brāhmaṇā panā”ti vā evamādīsu nipāto, “yevāpanako”ti vā, “yevāpano”ti vā evamādīsu nipāto nāma na hoti. Anukaraṇamattañhetam, tasmā idisesu **panasaddasahitā** payogā rūlḥīsaddāti gahetabbā. Yajjevam kasmā nibbacanamudāhaṭanti? Atthassa pākāṭikaraṇattham.

Tayodhammajātakam. Tayodhammajātakam. Tayodhammajātakena. Tayodhammajātakassa. Tayodhammajātakā, tayodhammajātakasmā. Sesam vitthāretabbaṃ.

Tayosāṅkhārā. Tayosāṅkhāre. Tayosāṅkhārehi, tayosāṅkhārebhi. Tayosāṅkhārānaṃ. Sesam

vitthāretabbaṃ.

Cattāripurisayugo saṅgho. Cattāripurisayugaṃ saṅghaṃ. Cattāripurisayugena saṅghena. Cattāripurisayugassa saṅghassa. Sesāṃ vitthāretabbaṃ.

Satokārī, satokārī, satokārino. Satokāriṃ, satokārī, satokārino. Satokārinā, satokārīhi, satokārībhi. Satokārissa. Sesāṃ vitthāretabbaṃ. Ettha **satokārīti** saraṭīti sato, sato eva hutvā karaṇasīloti satokārī.

Aparesampi rūḷhīsaddānaṃ nāmikapadamālā vuccate saddhimatthavibhāvanāya. Aṅgā. Aṅge. Aṅgehi, aṅgebhi. Aṅgānaṃ. Aṅgehi, aṅgebhi. Aṅgānaṃ. Aṅgesu. Bhonto aṅgā.

Aṅgā janapado. Aṅge janapadaṃ. Aṅgehi, aṅgebhi janapadena. Aṅgānaṃ janapadassa. Aṅgehi, aṅgebhi janapadasmā. Aṅgānaṃ janapadassa. Aṅgesu janapade. Bhonto aṅgā janapada. Evaṃ **magadhakosalādīnampi** yojetabbā.

Itthiliṅge kāsī, kāsīyo, kāsī, kāsīyo. Kāsīhi, kāsībhi. Kāsīnaṃ. Kāsīhi, kāsībhi. Kāsīnaṃ. Kāsīsū. Bhotiyo kāsīyo. Atrāyamatthavibhāvanā – kāsī, kāsīyo janapado. Kāsī, kāsīyo janapadaṃ. Kāsīhi, kāsībhi janapadena. Kāsīnaṃ janapadassa. Kāsīhi, kāsībhi janapadasmā. Kāsīnaṃ janapadassa. Kāsīsū janapade. Bhotiyo kāsīyo janapada. Evaṃ **avantīceti vajjī** iccetesampi padānaṃ yojetabbā. Tenāhu **aṭṭhakathācariyā** “kurūsū janapade”ti. Evaṃ **aṅgādīni** atthassa ekattepi janapadanāmattā rūḷhīvasena bahuvacanāneva bhavanti. Tathā hi tattha tattha “aṅgesu viharati. Magadhesu cārikaṃ caramāno”tiādinā, “aṅgānaṃ magadhānaṃ kāsīnaṃ kosālāna”ntiādinā ca bahuvacanapāḷiyo dissanti. Evaṃ rūḷhīsaddānaṃ nāmikapadamālā bhavanti.

Idāni aparāpi ito savisesatarā saddabhede sammohavidhamaṇṣanakārikā paramasukhumaññāvaḥā nāmikapadamālāyo kathayāma sotūnaṃ atthabyañjanaggahaṇe paramakosallasampādanatthaṃ. Tā ca kho “sambuddho paṭijānāsī. Kassako paṭijānāsī. Upāsako paṭijānāsī. Sammāsambuddhassa te paṭijānato ime dhammā anabhisambuddhā”tiādayo pālinaye nissāyeva. Tattha **sambuddhopaṭijānāsīti** “tvam ‘ahaṃ sammāsambuddho’ti paṭijānāsī”ti **itisaddalopavasena** attho gahetabbo. Esa nayo “kassako paṭijānāsī”tiādisupi. “Sammāsambuddhassa te paṭijānato”ti ettha pana “ahaṃ sammāsambuddho”ti paṭijānantassa tavāti evaṃ **itisaddalopayojanāvasena añño saddasanniveso** teneva añño atthapaṭivedho ca bhavati. “Khīṇāsavassa te paṭijānatoti”ādīsupi eseva nayo. **Aṭṭhakathāyaṃ** pana **sammāsambuddhassa te paṭijānatoti** “ahaṃ sammāsambuddho, sabbe dhammā mayā abhisambuddhā”ti evaṃ paṭijānato tavāti yo attho vutto, sopi yathādassito atthoyeva. Evaṃpakāraṃ ñatvā paṇḍitajātiyena kulaputtana amhehi vuccamānā “ahaṃ sammāsambuddho”ti tvam paṭijānāsī”ti etasmiṃ atthe sakriyāpadā yaṃ padamālā vavatthapetabbā –

Sammāsambuddho tvam paṭijānaṃ tiṭṭhasi. Sammāsambuddhaṃ taṃ paṭijānantam passati. Sammāsambuddhena te paṭijānatā dhammo desito. Sammāsambuddhassa te paṭijānato dīyate. Sammāsambuddhasmā tayā paṭijānatā apeti. Sammāsambuddhassa te paṭijānato dhammo. Sammāsambuddhasmiṃ tayi paṭijānante patiṭṭhitanti. Tathā “khīṇāsavo tvam paṭijānāsī”tiādināpi vitthāretabbaṃ.

Iddhimā bhikkhu ekopi hutvā bahudhā hoti, bahudhāpi hutvā eko hoti. Iddhimanto bhikkhū ekopi hutvā bahudhā honti, bahudhāpi hutvā eko hontīti imasmiṃ panatthe ayampi sakriyāpadā padamālā vavatthapetabbā –

Ekopi hutvā bahudhā honto bahudhāpi hutvā eko honto bhikkhu tiṭṭhati, ekopi hutvā bahudhā hontā bahudhāpi hutvā eko hontā bhikkhū tiṭṭhanti. Ekopi hutvā bahudhā hontam bahudhāpi hutvā eko hontam bhikkhum passati, ekopi hutvā bahudhā honte bahudhāpi hutvā eko honte bhikkhū passati. Ekopi hutvā bahudhā hontena bahudhāpi hutvā eko hontena bhikkhunā dhammo desito, ekopi hutvā bahudhā hontehi bahudhāpi hutvā eko hontehi bhikkhūhi dhammo desito. Ekopi hutvā bahudhā hontassa bahudhāpi hutvā eko hontassa bhikkhuno dīyate. Sesāṃ vitthāretabbaṃ. Bho

ekopi hutvā bahudhā hontā bahudhāpi hutvā eko hontā bhikkhu tvaṃ dhammaṃ desehi, bhonto ekopi hutvā bahudhā hontā bahudhāpi hutvā eko hontā tumhe dhammaṃ desethāti. Imasmiṃ ṭhāne **kevaṭṭasuttaṃ** sādhaṃ. “Idha kevaṭṭa bhikkhu anekavihiṭṭaṃ iddhividhaṃ paccanubhoti. Ekopi hutvā bahudhā hoti, bahudhāpi hutvā eko hoti, āvibhavaṃ...pe... tamenāṃ aññataro saddho pasanno passati taṃ bhikkhuṃ anekavihiṭṭaṃ iddhividhaṃ paccanubhontaṃ ekopi hutvā bahudhā hontaṃ bahudhāpi hutvā eko honta”nti idaṃ kevaṭṭasuttaṃ.

Ekoekāya mātugāmena saddhiṃ raho nisajjaṃ kappento bhikkhu evaṃ vadati, ekoekāya mātugāmena saddhiṃ raho nisajjaṃ kappentā bhikkhū evaṃ vadanti. Ekoekāya mātugāmena saddhiṃ raho nisajjaṃ kappentaṃ bhikkhuṃ passati, ekoekāya mātugāmena saddhiṃ raho nisajjaṃ kappente bhikkhū passati. Sabbāṃ vitthāretabbaṃ. Ettha pana “na tveva ekoekāya, mātugāmena sallape”tiādikaṃ pālīpadaṃ sādhaṃ. Ettha hi **ekoekāyā**ti idaṃ abyayapadasadisāṃ rūlhipadanti gahetabbaṃ, **aññamañña**ti saddassa viya ca ekapadattūpagamanañcassa veditabbaṃ. Bhikkhu viṇā dutiyena sayāṃ eko hutvā ekāya itthiyā saddhinti imasmiṃ atthe “ekoekāyā”ti idaṃ padaṃ na rūlhipadanti daṭṭhabbaṃ. Evaṃ santepi na “eko”ti saddo “bhikkhū”ti padena samānādhikaraṇo. Yadi samānādhikaraṇo siyā, “nisajjaṃ kappenta”ntiādi na vattabbaṃ siyā. “Ekāyā”ti saddopi na ajjhāharitabbena “itthiyā”ti padena samānādhikaraṇo. Yadi samānādhikaraṇo siyā, “mātugāmena”ti na vattabbaṃ siyā visesābhāvato dviruttabhāvāpajjanato ca. Kiñca bhiyyo “mātugāmena”ti vuttatā “ekenā”ti vattabbaṃ siyā, ekantato pana “ekoekāyā”ti idaṃ padaṃ pumitthisaṅkhātāṃ atthaṃ apekkhati, na samānādhikaraṇapadaṃ, tasmā “dve jānipatayo aññamaññaṃ sallapenti”tiādīsu “aññamañña”nti padassa viya ca “ekoekāyā”ti imassa ekapadattañca nisajjaṃ kappentassa bhikkhuno visesanattañca veditabbaṃ. Atha vā yassaṃ nisajjakriyāyaṃ bhikkhupi ekova hoti, itthīpi ekāva. Sā kriyā rūlhipavasena “ekoekāyā”ti vuccati, tādisāya ekoekāya nisajjakriyāya bhikkhu mātugāmena saddhintipi attho gahetabbo. Iminā nayena aññesampi rūlhisaddānaṃ nāmikapadamālā yathāpayogaṃ ekavacanabahuvacanavasena yojetabbā. Icevaṃ vāccābhidheyyalingādīnaṃ nāmikapadamālā nānappakārato pakāsītā.

Sumadhuratarasaddanitiṃ imaṃ,  
Paṭutaramatitaṃ susikhe varaṃ;  
Viduvimatitamopahariṃ raviṃ,  
Matikumudapabodhinisāpatiṃ.

Kataviññūjanassāsa-sāsanassābhivuddhiyā;  
Dhiyā nītimimaṃ sādhu, sādhuḥkaññeva lakkhaye.

Iti navāṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipparaṇe

Vāccābhidheyyalingādīparidīpano nāmikapadamālāvibhāgo

Ekādasamo paricchedo.

Ettāvata **bhū**dhātumayānaṃ pulliṅgānaṃ itthilingānaṃ napuṃsakalingānañca nāmikapadamālā yathārahaṃ liṅgantarehi saddantarehi atthantarehi ca saddhiṃ nānappakārato dassitā. Sabbanāmāni hi ṭhapetvā nayato aññāni kānici nāmāni aggahitāni nāma natthi.

## 12. Sabbanāmatamaṃsadisanāmanāmikapadamālā

Ito paraṃ pavakkhāmi, sabbanāmañca tassamaṃ;  
Nāmañca yojitaṃ nānā-nāmeheva visesato.

Yāni honti tilingāni, anukūlāni yāni ca;  
Tilingānaṃ visesena, padānetāni nāmato.

“Sabbasādhāraṇakāni, nāmāni” cceva atthato;  
**Sabbanāmāni** vuccanti, sattavīsati saṅkhato.

Tesu kānici rūpehi, sesāññehi ca yujjare;  
Kānici pana saheva, etesaṃ lakkhaṇaṃ idaṃ.

Etasmā lakkhaṇā muttaṃ, na padaṃ sabbanāmikaṃ;  
Tasmā<sup>ti</sup>dayo saddā, **guṇanāmāni** vuccare.

Sabbanāmāni nāma – sabba katara katama ubhaya itaraañña aññatara aññatama pubba para apara dakkhiṇa uttara adharayata eta ima amukiṃ eka ubha dviti catu tumha amha iccetāni sattavīsa.

Etesu **sabbasaddo** sakalattho, so ca sabbasabbādivasena ñeyyo. **Katara katamasaddā** pucchanatthā. **Ubhayasaddo** dviavayavasamudāyavacano. **Itarasaddo** vuttapaṭiyogīvacano. **Aññasaddo** adhiḡatāparavacano. **Aññatara aññatamasaddā** aniyamatthā. **Pubbādayo uttarapariyantā** disākālādivavattahāvacaṇā. Tathā hi **pubba parā para dakkhiṇuttarasaddā** pulliṅgatte yathārahaṃ kāladesādivacaṇā, itthiliṅgatte disādivacaṇā, napuṃsakaliṅgatte ṭhānādivacaṇā. **Adharasaddopi** heṭṭhimatthavācako vavattahāvacaṇoyeva, so ca tiliṅgo “adharo patto. Adharā araṇī, adharaṃ bhājana” miti, **yamsaddo** aniyamattho. **Tamsaddo** parammukhāvacaṇo. **Etasaddo** samīpavacano. **Imasaddo** accantasamīpavacano. **Amusaddo** dūravacano. **Kimisaddo** pucchanattho. **Ekasaddo** saṅkhādivacaṇo. Vuttañhi –

**Ekasaddo** aññatthaseṭṭhaasahāyasaṅkhādīsū dissati. Tathā hesa “sassato attā ca loko ca, idameva saccaṃ moghamaññanti, ittheke abhivadanti” tiādīsū aññatthe dissati. “Cetaso ekodibhāva” ntiādīsū seṭṭhe. “Eko vūpakaṭṭho” tiādīsū asahāye. “Ekova kho bhikkhave khaṇo ca samayo ca brahmacariyavāsāyā” tiādīsū saṅkhāyanti.

Yatthesa saṅkhāvacaṇo, tatthe kavacaṇantova. **Ubhasaddo** dvisaddapariyāyo. **Dviticatusaddā** saṅkhāvacaṇā, sabbakālaṃ bahuvacaṇantāva. **Tumhasaddo** yena katheti, tasmīṃ vattabbavacaṇaṃ. **Amhasaddo** attani vattabbavacaṇaṃ.

Idāni tesam nāmikapadamālaṃ kathayāma –

Sabbo, sabbe. Sabbaṃ, sabbe. Sabbena, sabbehi, sabbebhi. Sabbassa, sabbesaṃ, sabbesaṇaṃ. Sabbasmā, sabbamhā, sabbehi, sabbebhi. Sabbassa, sabbesaṃ, sabbesaṇaṃ. Sabbasmīṃ, sabbamhi, sabbesu. Bho sabba, bhavanto sabbe.

Tatra “sabbo bhūto, sabbe bhūtā” tiādīnā, “sabbo puriso, sabbe purisā” tiādīnā ca nayena sabbāni pulliṅganāmehi saddhiṃ yojetabbāni. Yāni pana **yamakamahātherena** punnapuṃsakavisaye **sabba katara katamādīnaṃ** aññānīpi rūpāni vuttāni. Taṃ yathā?

“Sabbā” iccādikaṃ rūpaṃ, nissakke bhummake pana;  
“Sabbe” iccādikaṃ rūpaṃ, **yamakena** pakāsitaṃ.

Tañce upaparikkhitvā, yuttaṃ gaṇhantu yogino;  
Sabbanāmikarūpañhi, vividhaṃ dubbudhaṃ yato.

Sabbā, sabbā, sabbāyo. Sabbaṃ, sabbā, sabbāyo. Sabbāya, sabbassā, sabbāhi, sabbābhi. Sabbāya, sabbassā, sabbāsaṃ. Sabbāya, sabbassā, sabbāhi, sabbābhi. Sabbāya, sabbassā, sabbāsaṃ. Sabbāyaṃ, sabbassā, sabbassaṃ, sabbāsu. Bhoti sabbe, bhotiyo sabbā, sabbāyo. Itthiliṅgatte nāmikapadamāla.

Ettha “sabbā bhāvikā, sabbā bhāvikāyo” ti, “sabbā kaññā, sabbā kaññāyo” ti ca ādinā itthiliṅgasabbanāmāni sabbehi itthiliṅgehi saddhiṃ yojetabbāni. Ettha ca “sabbassā” ti padaṃ

tatiyācatutthīpañcamīchaṭṭhīsattamīvasena pañcadhā vibhattam “tassā kumārikāya saddhi”nti karaṇappayogādiddassanato. Sabbassā kaññāya kataṃ. Sabbassā kaññāya deti. Ayam kaññā sabbassā kaññāya hīnā virūpā. Ayam kaññā sabbassā kaññāya uttamā abhirūpā. Sabbassā kaññāya apeti, sabbassā kaññāya dhanam. Sabbassā kaññāya patiṭṭhitam.

Sabbaṃ, sabbāni. Sabbaṃ, sabbāni. Sabbena, sabbehi, sabbebhi. Sabbassa, sabbesaṃ, sabbesaṇaṃ. Sabbasmā, sabbamhā, sabbehi, sabbebhi. Sabbassa, sabbesaṃ, sabbesaṇaṃ. Sabbasmiṃ, sabbamhi, sabbesu. Bho sabba, bhavanto sabbāni. Napuṃsakalingatte nāmikapadamālā.

Ettha “sabbaṃ bhūtaṃ, sabbāni bhūtāni. Sabbaṃ cittaṃ, sabbāni cittāni”ti ca ādinā napuṃsakalingasabbanāmāni sabbehi napuṃsakalingehi saddhiṃ yojetabbāni. Evaṃ **sabbasaddassa** līngattayavasena padamālā bhavati.

Idānissa parapadena saddhiṃ samāso veditabbo “sabbasādhāraṇo sabbaverī”iti. Tattha sabbesaṃ sādāraṇo **sabbasādhāraṇo**. Sabbesaṃ verī, sabbe vā verino yassa soyaṃ **sabbaverī**ti samāsaviggaho. Yathā pana **sabbasaddassa** padamālā līngattayavasena yojitā, evaṃ **katarasaddādīnampi adharasaddapariyantānaṃ** yojetabbā.

Tatrāyaṃ **ubhayasaddavajjito** pullīngapeyyālo –

Kataro, katāre. Kataraṃ...pe... bho katara, bhavanto katāre. Katamo, katame. Itaro, itare. Añño, aññe. Aññataro, aññatāre. Aññatamo, aññatame. Pubbo, pubbe. Paro, pare. Aparo, apare. Dakkhiṇo, dakkhiṇe. Uttaro, uttare. Adharo, adhāre...pe... bho adhāra, bhavanto adhāreti.

Ayam pana **ubhayasaddasahito** napuṃsakalingapeyyālo –

Kataraṃ, katarāni. Kataraṃ...pe... bho katara, bhavanto katarāni. Katamaṃ. Ubhayaṃ. Itaraṃ. Aññaṃ. Aññatarāṃ. Aññatamaṃ. Pubbaṃ. Paraṃ. Aparāṃ. Dakkhiṇaṃ. Uttaraṃ. Adharaṃ, adhārāni. Adharaṃ...pe... bho adhāra, bhavanto adhārāni.

Idāni punnapuṃsakalingānaṃ **parasaddādīnaṃ rūpantarāniddeso** vuccati. **Kaccāyana**smiñhi “purisā”ti viya “parā”ti paṭhamābahuvacanaṃ dissati. Evarūpo nayo **aparasabbakatarādīsu aññatama**pariyosānesu navasu appasiddho, labbhamāno **pubbadakkhiṇuttarādharesu** catūsu labbheyya. Tathā “purise”ti viya pālīādīsu “pubbe”ti saccasaṅkhepe “itare”ti, **kaccāyane** ca “pare”ti sattamīekavacanaṃ dissati. Evarūpo nayo **sabba añña**saddesu appasiddho, labbhamāno **katarakatamādīsu** sesesu **adharapariyosānesu** dvādasasu labbheyya. Tathā “purisā”ti viya **sabbā katarā** iccādi pañcamīekavacananayo pālīādīsu appasiddho. Evaṃ santepi ayam nayo punappunaṃ upaparikkhitvā yutto ce, gahetabbo.

Ayam pana **ubhayasaddasahito** itthilīngapeyyālo –

Katārā, katārā, katārāyo. Kataraṃ...pe... bhoti katāre, bhotiyo katārā, katārāyo. Katamā. Ubhayā. Itarā. Aññatarā. Aññatamā. Pubbā. Parā. Aparā. Dakkhiṇā. Uttarā. Adharā, adhārā, adhārāyo. Adharaṃ...pe... bhoti adhāre, bhotiyo adhārā, adhārāyoti.

Yasmā panetesu **itara añña aññatara aññatamānaṃ** pālīyādīsu “itarissā”tiādiddassanato koci bhedo vattabbo, tasmā catutthīchaṭṭhīnaṃ ekavacanaṭṭhāne “itarissā, itarāya, aññissā, aññāya. Aññatarissā, aññatarāya, aññatamissā, aññatamāyā”ti yojetabbaṃ. Tathā tatiyāpañcamīnamekavacanaṭṭhāne “tassā kumārikāya saddhiṃ. Kassāhaṃ kena hāyāmī”ti karaṇanissakkappayogadassanato sattamiyā panekavacanaṭṭhāne “itarissā, itarissaṃ, itarāya, itarāyaṃ, aññissā, aññissaṃ, aññāya, aññāyaṃ, aññatarissā, aññatarissaṃ, aññatarāya, aññatarāyaṃ, aññatamissā, aññatamissaṃ, aññatamāya, aññatamāyā”nti yojetabbaṃ “aññataro bhikkhu aññatarissā itthiyā paṭibaddhacitto hotī”ti pālīdassanato.

Tatra **sabbasaddo** sabbasabbaṃ, padesasabbaṃ, āyatanasabbaṃ, sakkāyasabbanti catūsu visayesu diṭṭhappayogo. Tathā hesa “sabbe dhammā sabbākārena buddhassa bhagavato ñāṇamukhe āpāthamāgacchanti” tiādīsu sabbasabbaṃ āgato. “Sabbesaṃ vo sārīputtā subhāsitaṃ pariyāyena” tiādīsu padesasabbaṃ. “Sabbāṃ vo bhikkhave desessāmi, taṃ suṇātha sādhukaṃ manasi karotha, bhāsissāmi...pe... katamañca bhikkhave sabbaṃ cakkhuñceva rūpā ca...pe... mano ceva dhammā cā” ti ettha āyatanasabbaṃ. “Sabbāṃ sabbaṃ sañjānāti” tiādīsu sakkāyasabbaṃ. Tattha sabbasabbaṃ āgato nippadeso, itaresu tīsu sappadesoti veditabbo. Iccevaṃ –

Sabbasabbapadesesu, atho āyatanepi ca;  
Sakkāye cāti catūsu, **sabbasaddo** pavattati.

**Katara katamasaddesu katarasaddo** appesu ekaṃ vā dve vā tīni vā bhīyō vā appamupādāya vattati. **Katamasaddo** bahūsu ekaṃ vā dve vā tīni vā bahuṃ vā upādāya vattati. **Katarasaddo** hi appavisayo, **katamasaddo** bahuvisayo. Tatrime payogā “katarena maggena gantabbaṃ. Samuddo katara ayaṃ. Katamo tasmīṃ samaye phasso hoti. Katame dhammā kusalā. Disā catasso vidisā catasso, uddhaṃ adho dasa disatā, imāyo, katamaṃ disaṃ tiṭṭhati nāgarājā”. Iccevamādayo bhavanti. Ubhayo. Ubhayaṃ. Ubhayo. Ubhayena. Sesāṃ pulliṅge **sabbasaddasamaṃ**. Ubhayo janā tiṭṭhanti. Ubhayo jane passati. Yathā ubho puttā. Ubho putteti. “Ubhayo” ti hi padaṃ “ubho” ti padamiva bahuvacanantabhāvena pasiddhaṃ, na tvekvacanantabhāvena. Ettha hi –

“Ekarattena ubhayo, tuvañca dhanusekha ca;  
Annamevābhinandanti, ubhayo devamānusa”

“Ubhayo te pitābhātaro” ti tadatthasādhakāni nidassanapadāni veditabbāni. Yadā panāyasmanto “ubhayo” ti ekavacanantaṃ passeyyātha, tadā sādhukaṃ manasi karotha. Ko hi samattho anantanayapaṭimaṇḍite sātthakathe tepiṭake jinasāsane niravasesato nayaṃ daṭṭhuṃ dassetuñca aññatra āgamādhigamasampanna pabhinnapaṭisambhidena. Idañcethupalakkhitabbaṃ –

**Aññasaddo pubbasaddo, dakkhiṇo cuttaro paro;**  
Sabbanāmesu gayhanti, asabbanāmikēsipi.

Etesañhi sabbanāmesu saṅgaho vibhāvitova.

Idāni asabbanāmesu saṅgaho vuccate – tattha **aññasaddo** tāva yadā bālavācako, tadā sabbanāmaṃ nāma na hoti. Asabbanāmattā ca sabbathāpi **purisa kaññā citta** nāyeneva yojetabbo. Tathā hi na jānātīti añña, bālo puriso. Na jānātīti añña, bālā itthī. Na jānātīti aññaṃ, bālaṃ kulanti vacanatto. Evaṃ viditvā pulliṅgaṭṭhāne “añña, añña. Aññaṃ, añña” tiādīnā **purisanāyeneva** nāmikapadamālā yojetabbā. Itthiliṅgaṭṭhāne “añña, añña, aññāyo” tiādīnā **kaññānāyeneva**, napuṃsakaliṅgaṭṭhāne “aññaṃ, aññāni” tiādīnā **cittanāyeneva** yojetabbā.

Imasmiñhi atthavisese bālaṃ vattukāmena “añña janā” ti avatvā “añña janā” ti vutte tassa taṃ vacanaṃ adhippetatthaṃ na sādheti aññathā atthassa gahetabbatā. Tathā “aññānaṃ janāna” nti avatvā “aññesaṃ janānaṃ, aññesaṃ janāna” nti vā vutte tassa taṃ vacanaṃ adhippetatthaṃ na sādheti. Tathā “aññānaṃ itthīna” nti avatvā “aññesaṃ itthīna” nti vuttepi, “aññānaṃ kulāna” nti avatvā “aññesaṃ kulānaṃ, aññesaṃ kulāna” nti vā vuttepi. Sabbanāmikavasena pana adhiḡatāparavacanicchāyaṃ “añña janā” tiādīnā vattabbaṃ, na “añña janā” tiādīnā. Tathā hi “añña janā” tiādīnā vuttavacanaṃ adhippetatthaṃ na sādheti aññathā atthassa gahetabbatā. Iti yattha “añña janā” tiādivacanaṃ upapajjati, “añña janā” tiādivacanaṃ nupapajjati, yattha pana “añña janā” tiādivacanaṃ upapajjati, “añña janā” tiādivacanaṃ nupapajjati. Yā etasmiṃ atthavisese sallakkhaṇā pañña, ayaṃ nītiyā maggo yuttāyuttivīcāraṇe hetuttā, lokasmiñhi yuttāyuttivīcāraṇā **nīti** vuttā. Sā ca vinā paññāya na sijjhati. Evaṃ **aññasaddo** asabbanāmikopi bhavati.

**Pubba dakkhiṇuttara parasaddesu pubbasaddo** yattha padhānavācako, yattha ca “semhaṃ pubbo” tiādīsu lohitakopajavācako, tattha asabbanāmikō. Paṭhamatthe tiliṅgo, dutiyatthe ekaliṅgo.



Uttamatthavācako pana **uttarasaddo** ca **parasaddo** ca asabbanāmiko tilīṅgoyeva. Tathā “dakkhiṇassā vahantima”nti ettha viya susikkhitatthacaturatthavācako **dakkhiṇasaddo**. “Petānaṃ dakkhiṇaṃ dajjā”tiādīsu pana deyyadhammavācako **dakkhiṇāsaddo** niyogā itthiliṅgo asabbanāmikoyeva. Evaṃ **añña pubba dakkhiṇuttara parasaddā** asabbanāmikāpi santīti tesam sabbanāmesupi asabbanāmesupi saṅgaho veditabbo.

Idāni **katarasaddādīnaṃ** parapadena saddhiṃ samāso nīyate “kataragāmavāsī katamagāmavāsī. Ubhayagāmavāsino, itaragāmavāsī aññataragāmavāsī, pubbadisā, parajano, dakkhiṇadisā, uttaradisā, adharapatto”ti. Tatra “kataro gāmo kataragāmo, katamo gāmo katamagāmo, ubhayo gāmā ubhayagāmā”tiādīnā yathārahaṃ samāsaviggaho, **katarasaddassa** pana **katamasaddena** saddhiṃ samāsaṃ icchanti dvidhā ca rūpāni garū “kataro ca katamo ca katarakatame katarakatamā vā”ti. Tasmā sabbanāmikanayena suddhanāmikesu **purisanayena** ca **katara katamasaddassa** nāmikapadamālā yojetabbā, tenassa sampadānasāmivacanaṭṭhānesu “katarakatamesaṃ, katarakatamesānaṃ, katarakatamāna”nti tīṇi rūpāni siyuṃ “katarā ca katamā ca katarakatamā”ti evaṃ itthiliṅgavasena katasamāse pana sabbanāmikanayena, suddhanāmikesu **kaññānayena** ca yojetabbā. “Katarāṅca katamaṅca katarakatamāni”ti evaṃ napuṃsakaliṅgavasena katasamāse sabbanāmikanayena, suddhanāmikesu **cittanayena** ca yojetabbā.

Ayaṃ panettha visesopi veditabbo – **pubbāparādisaddā** dvandasamāsādividhiṃ patvā sehi rūpehi rūpavanto na honti, taṃ yathā? Pubbāparā, adharuttarā, māsapubbā purisā, diṭṭhapubbā purisā, tathāgataṃ diṭṭhapubbā sāvakā, idaṃ pulliṅgatte paṭhamābahuvacanarūpaṃ. **Etthekāro** ādesabhūto na dissati. Pubbāparānaṃ adharuttarānaṃ, māsapubbānaṃ purisānaṃ, idaṃ pulliṅgatte catutthīchaṭṭhīnaṃ bahuvacanarūpaṃ. Ettha **saṃ sānamiccete** ādesabhūtā na dissanti. Tathāgataṃ diṭṭhapubbānaṃ sāvakānaṃ, tathāgataṃ diṭṭhapubbānaṃ sāvikānaṃ, kulānaṃ vā, idaṃ tilīṅgatte catutthīchaṭṭhīnaṃ bahuvacanarūpaṃ. Etthāpi **saṃ sānamiccete** ādesabhūtā na dissanti. Māsapubbāyaṃ māsapubbāya, piyapubbāyaṃ piyapubbāya, idamitthiliṅgatte sattamīcatutthīchaṭṭhīnaṃ ekavacanarūpaṃ. Etthādesabhūtā **saṃ sā** na dissanti. Māsapubbānaṃ itthīnaṃ, piyapubbānaṃ itthīnaṃ, idamitthiliṅgatte catutthīchaṭṭhībahuvacanarūpaṃ. Ettha panādesabhūto **samicceso** na dissati. Aññānīpi yathāsambhavaṃ yojetabbāni, **pubbāparādīnaṃ** samāsaviggahaṃ samāsaparicchede pakāsessāma.

Idāni **yaṃsaddassa** nāmikapadamālā vuccate –

Yo, ye. Yaṃ, ye. Yena, yehi, yebhi. Yassa, yesaṃ, yesānaṃ. Yasmā, yamhā, yehi, yebhi. Yassa, yesaṃ, yesānaṃ. Yasmīṃ, yamhi, yesu. Idaṃ pulliṅgaṃ. Yaṃ, yāni. Yaṃ, yāni. Yena. Sesam pulliṅgasadisam. Atha vā yaṃ, yāni, yā. Yaṃ, yāni, ye. Yena. Sesam pulliṅgasadisam. Katthaci hi **nikāralopo** bhavati. Atha vā pana **nikārassa ākārekārādesāpi** gāthāvisaye.

“Yā pubbe bodhisattānaṃ, pallaṅkavaramābhujē;  
Nimittāni padissanti, tāni ajja padissare”ti ca,

“Kiṃ māṇavassa ratanāni atthi, ye taṃ jinanto hare akkhadhutto”ti ca idamettha pālīnidassanaṃ. Idaṃ napuṃsakaliṅgaṃ.

Yā, yā, yāyo. Yaṃ, yā, yāyo. Yāya, yāhi, yābhi. Yāya, yassā, yāsaṃ. Yāya, yāhi, yābhi. Yāya, yassā, yāsaṃ. Yassaṃ, yāyaṃ, yāsu. Itthiliṅgaṃ. Evaṃ **yaṃsaddassa** liṅgattayavasena padamālā bhavati. Etthālapanaṃ padāni na labbhanti. Tathā **taṃsaddādīnaṃ** padamālādīsipi.

Ettha pana **yanti** saddassa atthuddhāro vuccate – **yanti** saddo “yaṃ me bhante devānaṃ tāvatīṃsānaṃ sammukhā sutam sammukhā paṭiggahitaṃ, ārocemi taṃ bhante bhagavato”tiādīsu paccattavacane dissati. “Yantaṃ apucchimha akittayī no, aññaṃ taṃ pucchāma tadiṅgha brūhī”tiādīsu upayogavacane. “Aṭṭhā nametaṃ bhikkhave anavakāso, yaṃ ekissā lokadhātuyā”tiādīsu karaṇavacane. “Yaṃ vipassī bhagavā arahaṃ sammāsambuddho loke udapādī”tiādīsu bhummavacane dissati. Etthedaṃ vuccati –

“Paccatte upayoge ca, bhumme ca karaṇepi ca;  
Catūsvetesu ṭhānesu, yanti saddo pavattatī”ti.

Parapadena saddhiṃ **yam**saddassa samāsoṇi veditabbo “yamkhandhādi, yamguṇā, yagguṇā”ti. Tatha yo khandhādi **yamkhandhādi**, ye guṇā **yamguṇā**ti samāsaviggaho. Tathā hi **visuddhimagge** “yamguṇanemittikañcetaṃ nāmaṃ, tesam guṇānaṃ pakāsanattham imaṃ gātham vadantī”ti etasmiṃ pade “ye guṇā yamguṇā, yamguṇā eva nimittam yamguṇanimittam, tato jātam ‘bhagavā’ti idaṃ nāmanti **yamguṇanemittika**”nti nibbācanamicchitabbaṃ. **Yagguṇā**ti ettha pana “yassa guṇā yagguṇā”ti nibbācanam. Tathā hi –

“Api sabbaññutā paññā, yagguṇantaṃ na jāniyā;  
Atha kā tassa vijaññā, taṃ buddham bhūguṇam name”ti

Porāṇakaviracānāyam “yassa guṇā yagguṇā”ti nibbācanamicchitabbaṃ.

**Yas**saddassa samāsamhi, saddhiṃ parapadehi ve;  
Niggahītāgamo vātha, dvibhāvo vā siyā dvidhā.

Evam **yas**saddassa samāso sallakkhitabbo.

Idāni **tas**saddassa nāmikapadamālā vuccate –

So, te. Naṃ, taṃ, ne, te. Nena, tena, nehi, tehi, nebhi, tebhi. Assa, nassa, tassa, ‘nesam, tesam (āsam). Asmā, nasmā, tasmā, namhā, tamhā, nehi, tehi, nebhi, tebhi. Assa, nassa, tassa, nesam, tesam (āsam). Asmiṃ, nasmīṃ, tasmīṃ, amhi, namhi, tamhi, tyamhi, nesu, tesu. Idaṃ pulliṅgam. Ettha ca **āsam**saddassa atthibhāve “nevāsam kesā dissanti, hatthapādā ca jālino”ti gāthā nidassanam, so ca tilingo datṭhabbo. **Tyamhī**ti padassa atthibhāve –

“Yadāssa sīlam paññañca, soceyyañcādhigacchati;  
Atha vissāsa te tyamhi, gūhañcassa na rakkhatī”ti

Ayam gāthā nidassanam. Ayam ettha rūpaviseso sallakkhitabbo – ariyavinayeti vā sappurisavinayeti vā. Ese se eke ekaṭṭheti pāḷipadesa paccattekavacānakānameta **tas**saddānam ekārantaniddesopi dissatīti.

Ettha pana **tes**saddassa atthuddhāro vuccate – **tes**saddo “na te sukham pajānanti, ye na passanti nandana”ntiādīsu **tam**saddassa vasena paccatbahuvacane āgato, “te na passāmi dārake”tiādīsu upayogabahuvacane. “Namo te purisājāñña, namo te purisuttama. Namo te buddha vīratthū”ti ca ādīsu **tum**hasaddassa vasena sampadāne, tuyhanti atthoti vadanti. “Kinte diṭṭham kinti te diṭṭham, upadhī te samatikkantā, āsavā te padālītā”ti ca ādīsu karaṇe. “Kinte vatam kiṃ pana brahmacariya”ntiādīsu sāmīatthe, tavāti atthoti vadanti. Etthetam vuccati –

“Paccatte upayoge ca, karaṇe sampadāniye;  
Sāmimhi cāti **tes**saddo, pañcasvatthesu dissatī”ti.

Tam, tāni. Tam, tāni. Nena, tena iccādi. Sesam pulliṅgasadisam. Idaṃ napuṃsakaliṅgam.

Sā, tā, tāyo. Naṃ, taṃ, nā, tā, nāyo, tāyo. Nāya, tāya, nāhi, tāhi, nābhi, tābhi. Assā, nassā, (tissā,) tassā, nāya, tāya, nāsam, tāsam, sānam, āsam. Assā, nassā, tassā, nāya, tāya, nāhi, tāhi, nābhi, tābhi. Assā, nassā, (tissā,) tassā, nāya, tāya, nāsam, tāsam, sānam, āsam. Nāya, tāya, assam, nassam, tissam, tassam, nāyam, tāyam, nāsu, tāsu, tyāsu. Idaṃ itthiliṅgam.

Ettha pana “abhikkamo sānam paññāyati, nāsam kujjhanti paṇḍitā. Khiddā pañihitā tyāsu, rati tyāsu patiṭṭhitā. Bījāni tyāsu ruhantī”ti payogadassanato “sānam āsam tyāsu”ti imāni vuttāni

akkharacintakānaṃ ñāṇacakkhusammuyhanaṭṭhānabhūtāni. Evaṃ parammukhavacanassa **taṃ**saddassa nāmikapadamālā bhavati.

Ettha ca idaṃ vattabbaṃ –

“Taṃ tvaṃ gantvāna yācassu”, iccādīsu padissare;  
Ādo **taṃ** tetiādīni, **nanti**ādīni no tathā.

**Naṃ** ne **nenā**tiādīni, **vo** **no**iccādayo viya;  
Padato parabhāvamhi, diṭṭhāni jinasāsane.

“Atha naṃ atha ne āha, na ca naṃ paṭinandati”;  
Iccādīni payogāni, dassetabbāni viññunā.

Ko cettha vadeyya –

“Yathā nadī ca pantho ca, pānāgāraṃ sabhā papā;  
Evaṃ lokitthiyo nāma, nāsaṃ kujjhanti paṇḍitā”ti

Ettha –

Padato aparattepi, **nāsaṃ**saddassa dassanā;  
Ādopi icchitabbāva, **naṃ** **ne**iccādayo iti.

So panevantu vattabbo, “tava vāde na labbhati;  
**Nāsaṃ**saddo **na**saddo ca, **āsaṃ**saddo ca labbhare.

Tasmā ‘āsaṃ na kujjhanti, itthīnaṃ paṇḍitā’iti;  
Atthova bhavate evaṃ, suṭṭhu dhārehi paṇḍitā’iti.

Atha vā yasmā **niruttipiṭake** “**naṃ** purisaṃ passati, ne purise passati”tiādīnā padato aparattepi “naṃ, ne” iccādīni padāni vuttāni, tasmā tenāpi nayena padato aparānīpi tāni kadāci siyuṃ. Mayaṃ pana pālinayānusārena tesam pavattiṃ vadāma, idaṃ ṭhānaṃ suṭṭhu vicāretabbaṃ.

Ettha pana **ta**saddassa parapadehi saddhiṃ samāsopi veditabbo “taṃputto, taṃsadiso, tanninno, tappoṇo, tappabbhāro, tabbhūto, tagguṇo, tassadiso”ti.

**Ta**saddassa samāsamhi, saddhiṃ parapadehi ve;  
Niggahītāgamo pubba-pade dvittantu pacchime.

Evaṃ **ta**saddassa samāso sallakkhitabbo.

Idāni **eta**saddassa nāmikapadamālā vuccate –

Eso, ete. Etaṃ, ete. Etena, etehi, etebhi. Etassa, etesaṃ, etesānaṃ. Etasmā, etamhā, etehi, etebhi. Etassa, etesaṃ, etesānaṃ. Etasmiṃ, etamhi, etesu. Idaṃ pulliṅgaṃ.

Etaṃ, etāni. Etaṃ, etāni. Sesam pulliṅgasadisam, idaṃ napuṃsakaliṅgaṃ.

Esā, etā, etāyo. Etaṃ, etā, etāyo. Etāya, etāhi, etābhi. Etāya, etissā, etissāya, etāsaṃ. Etāya, etāhi, etābhi. Etāya, etissā, etissāya, etāsaṃ. Etāya, etissaṃ, etāsu. Idaṃ itthiliṅgaṃ. Evaṃ **eta**saddassa nāmikapadamālā bhavati.

Parapadenettha saddhiṃ samāsopissa veditabbo “etadatthāya lokasmiṃ, nidhi nāma nidhiyyati.

Etapparamāyeva devatā sannipatitā ahesu’ntiādīsu.

Samāse **etas**saddassa, saddhiṃ parapadehi ve;  
Niggahītāgamo pubba-pade hoti na hoti ca.

Idāni **idaṃ**saddassa nāmikapadamālā vuccate –

Ayaṃ, ime. Imaṃ, ime. Anena, iminā, ehi, ebhi, imehi, imebhi. Assa, imassa, esaṃ, esānaṃ, imesaṃ, imesānaṃ. Asmā, imasmā, imamhā, ehi, ebhi, imehi, imebhi. Assa, imassa, esaṃ, esānaṃ, imesaṃ, imesānaṃ. Asmiṃ, imasmiṃ, amhi, imamhi, esu, imesu. Idaṃ pulliṅgaṃ.

Idaṃ, imāni. Sesam pulliṅgasadisam. Idaṃ napuṃsakaliṅgaṃ.

Ayaṃ, imā, imāyo. Imaṃ, imā, imāyo. Imāya, imāhi, imābhi. Assā, assāya, imissā, imissāya, imāya, imāsaṃ. Assā, imissā, imāya, imāhi, imābhi. Assā, assāya, imissā, imissāya, imāya, imāsaṃ. Assam, imissaṃ, imāya, imāyaṃ, imāsu. Idaṃ itthiliṅgaṃ. Evaṃ **idaṃ**saddassa nāmikapadamālā bhavati.

**Kaccāyane** tu “imassidamaṃsisu napuṃsake”ti **imas**saddoyeva pakatibhāvena vutto, idha pana **idaṃ**saddoyeva “idappaccayatā”ti ettha “ida”nti pakatiyā dassanato. Tathā hi “imesaṃ paccayā idappaccayā, idappaccayā eva **idappaccayatā**, idappaccayānaṃ vā samūho idappaccayatā”ti vuttaṃ. Ettha ca idappaccayā eva idappaccayatāti **tā**saddena padaṃ vaḍḍhitam na kiñci atthantaram yathā devo eva devatāti. Idappaccayānaṃ samūho idappaccayatāti samūhattham **tā**saddamāha yathā janānaṃ samūho janatāti. **Cūlaniruttiyaṃ niruttiṭṭhake** ca **idaṃ**saddoyeva pakatibhāvena vutto.

Samāse **idaṃ**saddassa, saddhiṃ parapadena ve;  
Idappaccayatātveva, rūpaṃ dvittam siyuttare.

Idāni **amu**saddassa nāmikapadamālā vuccate –

Asu, amu, amū. Amuṃ, amū. Amunā, amūhi, amūbhi. Amussa, dussa, amūsaṃ, amūsānaṃ. Amusmā, amumhā, amūhi, amūbhi. Amussa, dussa, amūsaṃ, amūsānaṃ. Amusmiṃ, amumhi, amūsu. Idaṃ pulliṅgaṃ.

Aduṃ, amūni. Sesam pulliṅgasadisam. Idaṃ napuṃsakaliṅgaṃ.

Asu, amu, amū, amuyo. Amūṃ, amū, amuyo. Amuyā, amūhi, amūbhi. Amussā, amuyā, amūsaṃ, amūsānaṃ. Amuyā, amūhi, amūbhi. Amussā, amuyā, amūsaṃ, amūsānaṃ. Amuyā, amuyam, amussaṃ, amūsu. Idaṃ itthiliṅgaṃ. Evaṃ **amu**saddassa nāmikapadamālā bhavati, samāso pana appasiddho.

Tatra “dussa me khettpālassa, rattibhattam apābhata”nti payogadassanato “dussā”ti padamamehi ṭhapitam. **Kakārāgamavasena** aññānīpi asabbanāmikarūpāni bhavanti. Tesam vasena ayaṃ liṅgattayassa nāmikapadamālā vuccate –

“Asuko, asukā. Asukaṃ, asuke”tiādīnā, “amuko, amukā. Amukaṃ, amuke”tiādīnā ca **purisanayopi** labbhati. “Asukā, asukāyo”tiādīnā, “amukā, amukāyo”tiādīnā ca **kaññānāyopi** labbhati. “Asukaṃ, asukānī”tiādīnā, “amukaṃ, amukānī”tiādīnā ca **cittanayopi** labbhati. Imānettha padāni asabbanāmikānīpi **kakārāgamavasena** nānattadassanattham vuttāni.

Idāni **kiṃ**saddassa nāmikapadamālā vuccate –

Ko, ke. Kaṃ, ke. Kena, kehi, kebhi. Kassa, kissa, kesam. Kasmā, kamhā, kehi, kebhi. Kassa, kissa, kesam. Kasmīṃ, kismiṃ, kamhi, kimhi, kesu. Idaṃ pulliṅgaṃ.

Rūpavisesopettha veditabbo “ke gandhabbe ca rakkhase nāge, ke kimpurise ca mānuse, ke paṇḍite sabbakāmadade, dīghaṃ rattamaṃ bhattā me bhavissati, ke ca chhave pāthikaputte, kā ca tathāgatānaṃ arahantānaṃ sammāsambuddhānaṃ āsādanā”ti pālīdassanato. Yasmā pana ke gandhabbe ca rakkhase nāge itiādīsu pālīsu “ke”ti paccattavacanaṃ ekārantampi dissati, tasmā “ke”ti rūpabhedo cettha ñeyyo. Tathā “kissassa ekadhammassa, vadhamaṃ rocesi gotama. Kismiṃ me sivayo kuddhā. Kamhi kāle tayā vīra, patthitā bodhimuttamā”tiādīni ca nidassanapadāni ñeyyāni. Apica –

“Ko te balaṃ mahārāja”, itiādīsu pālīsu;  
Kvasaddatthe vattatīti, ñeyyā **ko** iccayamaṃ suti.

Petaṃ taṃ sāmamaddakkhiṃ, ko nu tvaṃ sāma jīvasi;  
Iti pāthe **kathaṃ**saddā-bhidheyye vattatīti ca.

Etesu dvīsu atthesu, diṭṭho **ko** iccayamaṃ ravo;  
Nipātoti gahetabbo, sutisāmaññato ruto.

Napuṃsakaliṅge kaṃ, kāni. Kaṃ, kāni. Sesamaṃ pulliṅgasadisamaṃ yojetabbaṃ. Atha vā “kiṃ cittamaṃ. Kiṃ rūpamaṃ. Kiṃ parābhavato mukhamaṃ. Kiṃ icchasi”tiādīpayogadassanato pana “kiṃ, kāni. Kiṃ, kāni”ti vatvā sesamaṃ pulliṅgasadisamaṃ yojetabbaṃ. Ayaṃ nayo yuttataro, idaṃ napuṃsakaliṅgamaṃ.

Kā, kā, kāyo. Kaṃ, kā, kāyo. Kāya, kāhi, kābhi. Kāya, kassā, kāsamaṃ, kāsānaṃ. Kāya, kassā, kāhi, kābhi. Kāya, kassā, kāsamaṃ kāsānaṃ. Kāya, kassā, kāyamaṃ, kassamaṃ, kāsu.

Ettha pana **kāyoti** padassa atthibhāve “kāyo amoghā gacchantī”ti nidassanaṃ daṭṭhabbaṃ. Idaṃ itthiliṅgamaṃ. Evaṃ **kiṃ**saddassa nāmikapadamālā bhavati. Etthetassa atthuddhāro vuccate – **kiṃ** saddo “kiṃ rājā yo lokamaṃ na rakkhati. Kiṃ nu kho nāma tumhe maṃ vattabbaṃ maññathā”tiādīsu garahane āgato. “Yamaṃ kiñci rūpamaṃ atītānāgatapaccuppanna”ntiādīsu aniyame. “Kinte vakkali iminā pūtikāyena diṭṭhena, yo kho vakkali dhammaṃ passati, so maṃ passatī”tiādīsu nippayojanatāyamaṃ. “Kiṃ na kāhāmi te vaco”tiādīsu sampañicchane. “Kimsūdha vittaṃ purisassa seṭṭha”ntiādīsu pucchāyamaṃ, **pucchā** ca nāma kāraṇapucchādivasena anekavidhā, ato kāraṇapucchādivasenapi **kiṃ**saddassa pavatti vitthārato ñeyyā. Tathā hi ayaṃ “kiṃ nu santaramānova, kāsamaṃ khaṇasi sārathi. Kiṃ nu jātiṃ na rocesi. Kena tetādiso vaṇṇo”tiādīsu kāraṇapucchāyamaṃ vattati. “Kiṃ kāsuyā karissatī”tiādīsu kiccapucchāyamaṃ. “Kiṃ sīlamaṃ. Ko samādhī”tiādīsu sarūpapucchāyamaṃ. “Kiṃ khādasī. Kiṃ pīvasī”tiādīsu vatthupucchāyamaṃ. “Khādasī kiṃ pīvasī ki”ntiādīsu kriyāpucchāyamaṃ vattati. Adīṭṭhajotanāpucchāti evamādikā pana pañcavidhā pucchā **kiṃ**saddassa atthuddhāre anāharitabbattā anāgatāti daṭṭhabbaṃ. Etthetamaṃ vuccati –

Garahāyamaṃ aniyame, nippayojanatāya ca;  
Sampañicchanapucchāsu, **kiṃ**saddo sampavattati.

Parapadena saddhiṃ samāsupissa veditabbo “kimsamudayo, kiṃvedano, kimsaññojano”ti. Ettha “ko, ke. Kā, kā, kāyo. Kiṃ, kāni”ti evamaṃ liṅgattayavasena vibhattāni **kiṃ**saddamayāni padāni samāsupadatte puna **kiṃ**iti pakatibhāveneva tiṭṭhanti. **Nāmas**saddena pana samāse tesamaṃ dvidhā gati dissati “**kinnāmo, konāmo**”ti. Sabbāni panetāni itthinapuṃsakaliṅgavasena bahuvacanavasena ca yojetabbāni.

**Kiṃ**saddassa samāsamhi, saddhiṃ **nāma**ravena ve;  
“Kinnāmo” iti “konāmo”, iti cevaṃ gati dvidhā.

“Konāmo te upajjhāyo”, iccādettha nidassanaṃ;  
Sahaññena samāsamhi, “kiṃ kiṃ”iceva suyyate.

Tathā hi “kiṃcitto tvaṃ bhikkhu. Kiṃkārapaṭissāvīnī”tiādīsu **kiṃsaddo** sarūpamavijahanto tiṭṭhati. Tattha hi kiṃcittam yassa so **kiṃcitto**. “Kiṃ karomi sāmī”ti evaṃ kinti kāro karaṇaṃ saddanicchāraṇaṃ kiṃkāro, taṃ paṭissāveṭṭi **kiṃkārapaṭissāvīnī**tiādi nibbananamicchitabbaṃ. “Kinnaro. Kiṃpakkamiva bhakkhita”ntiādīsu pana nibbananamappasiddhaṃ, **kiṃsaddo**eva padāvayavabhāvena suto. Tathā hi so katthaci padāvayavabhāvena katthaci **nu su nukho kāraṇā**disaddehi saha cāribhāvena ca suyyati. Atrime payogā – esā te itthī kiṃ hoti. Ete manussa tumhākaṃ kiṃ honti. Kimpurisānuciṇṇo. Kiṃ nu bhītova tiṭṭhasi. Kiṃsuchetvā sukhaṃ seti. Kiṃ nukho kāraṇaṃ. Kiṃ kāraṇā amma tvaṃ pamajjasi, kiñhi nāma cajantassa, vācāya adadamappakanti evamādayo. Atridaṃ vuccati –

“Visuṃ padāvayavo vā, hutvā **nvādīhi** vā pana;  
Yutto saddehi **kiṃsaddo**, diṭṭho sugatasāsane.

Pāḷinayānusārena, sesānaṃ sambhavopi ca;  
Ñeyyo viññūhi saddhamma-nayaññūhi pabhedato”ti.

Idāni sabbanāmikabhāve ṭhitehi **ko kaṃsaddo** samānasutikānaṃ aññesaṃ **ko kaṃsaddānaṃ** nāmikapadamālāviseso vattabbo siyā, so heṭṭhā liṅgattayamissakaparicchede vutto. Asabbanāmikattā pana **purisa cittanayeneva** vibhatto. Tathā hi yadā **kosaddo** brahmavātakāyatthavācako, **kaṃsaddo** pana sirojalasukhatthavācako, tadā tāni padāni asabbanāmikāni, kasmā? **Akiṃsaddamayattā** sabbanāmikarūpasāṅkhātehi asādhāraṇarūpehi virahitattā pucchathato atthantaravācakattā ca. Ettha pana samānasutivasena atthantaraviññāpanatthaṃ **kosaddo kaṃsaddo**ti ca vuttaṃ, ekantato pana sabbanāmikatte **kiṃsaddo**eva, suddhanāmatte **kasaddo**evāti gahetabbaṃ. Icevaṃ –

Kāye brahmani vāte ca, sīse jalasukhesu ca;  
**Kasaddo** vattatī tīsu, pumā tīsu napuṃsako.

Evaṃ sabbanāmabhūtānaṃ **kiṃkasaddānaṃ** pavatti veditabbā.

Idha vuttappakārānaṃ, atthānaṃ dāni saṅgaho;  
Paññāvepullakaraṇo, ekadesena vuccate.

Kiṃ kiṃpakkena sadisaṃ, kāyo kiṃpabhavo vada;  
Kiṃpakkasadiṣo kāmo, kāyo taṇhādisambhavo.

Uṇhakāle ka’micchanti, ka’micchanti pipāsītā;  
Paccāmittā ka’micchanti, ka’micchanti dukhaṭṭitā.

Kāyassa kassa ko āyo,  
Ko nātho kassa bhūtale;  
Kassa kaṃ jhānaṃ sātāṃ,  
Kassaṅgesu ca kaṃ paranti.

Yā pana tā heṭṭhā amhehi liṅgattayavasena **kiṃsaddo** sabbanāmikasāññitassa nāmikapadamālā vibhattā, etāsu pulliṅganapuṃsakaliṅgaṭṭhāne “kebhi, kissa, kasmā, kamhā, kamhī”ti imāni padāni pahāya itthiliṅgaṭṭhāne “kāyo, kābhi, kāsānaṃ, kāyaṃ, kassa”nti imāni ca padāni pahāya tato tato sesapadato yathāsambhavaṃ **cisaddaṃ canasaddaṃ canaṃsaddaṃ** nāni nīpātetvā evarūpāni rūpāni gahetabbāni. Seyyathidaṃ?

Koci, keci, kecana. Kiñci, kiñcanaṃ, keci, kecana. Kenaci, kehici. Kassaci, kesañci. Pañcamiyā ekavacanaṃ ūnaṃ pāḷiyaṃ anāgatattā. Kehici. Kassaci, kesañci. Kasmīñci, kismici, kesuci. Pulliṅganapuṃsakaliṅgavasena daṭṭhabbāni. Atra **kismicīti** anusāralopavasena vuttaṃ.

Itthiliṅgavasena pana kāci itthī, kāci itthiyo. Kāci, kāci. Kiñci, kāci. Kāyaci, kāhici. Kāyaci,

kassāci, kāsāñci. Kāyaci, kāhici. Kāyaci, kassāci, kāsāñci. Kāyaci, kāsucīti rūpāni.

Ettha “iti bhāsanti kecana, na naṃ hiṃsāmi kiñcana”ntiādayo payogā veditabbā. Iti līngattayavasena vuttāni **koci kāci kiñcī**tiādīni appamattakānaṃ saṅgāhakavacanānīti veditabbāni.

Punetāniyeva yathārahaṃ **yaṃ**saddena yojetvā dassessāmi –

Yo koci, ye keci. Yaṃ kiñci, ye keci. Yena kenaci, yehi kehici. Yassa kassaci, yesaṃ kesañci. Yasmā kasmāci, yehi kehici. Yassa kassaci, yesaṃ kesañci. Yasmiṃ kasmiñci, yesu kesuci.

Ettha “yo koci maṃ aṭṭhi katvā suṇeyya. Ye kecime atthi rasā pathabyā, saccaṃ tesam sādhitaraṃ rasāna”ntiādayo payogā veditabbā. Pullīngarūpāni.

Yaṃ kiñci, yāni kānici. Yaṃ kiñci, yāni kānici. Sesam pullīngasadisam. Ettha “yaṃ kiñci ratanaṃ atthi, dhataratṭhanivesane. Yaṃ kiñci vittaṃ idha vā huram vā. Yāni kānici rūpāni”tiādayo payogā veditabbā. Napuṃsakalīngarūpāni.

Yā kāci itthī, yā kāci itthiyo. Yaṃ kiñci, yā kāci. Yāya kāyaci, yāhi kāhici. Yāya kāyaci, yāsam kāsāñci. Yāya kāyaci, yāhi kāhici. Yāya kāyaci, yāsam kāsāñci. Yāya kāyaci, yāsu kāsuci.

Ettha “yā kāci vedanā atītānāgatapaccuppanā”tiādayo payogā veditabbā. Itthilīngarūpāni. Iti līngattayavasena vuttāni **yo koci, yā kāci, yaṃ kiñcī**tiādīni anavasesapariyādānavacanānīti veditabbāni. Sabbāni cetāni na nipātapadāni, nipātapatirūpakā saddagatīyoti veditabbāni. Yadi nipātapadāni siyuṃ, tīsu līngesu sattuvasu vibhātīsu ekākārena tiṭṭheyuṃ, na ca tiṭṭhanti, tasmā na nipātapadāni, nipātapatirūpakā saddagatīyoyeva.

Apica **ya ta kiṃ eta**iccetehi sabbanāmehi līngānurūpato **ttakattika**paccaye katvā vatticchāyaṃ yāni padāni sijjhanti, tāni paricchavedavacanāni asabbanāmikāniyeva bhavanti. Tesam nāmikapadamālā **purisa citta kaññā**nyena yojetabbā. Taṃ yathā?

Yattako jano, yattakaṃ cittaṃ, yattikā itthī. Tattako, tattakaṃ, tattikā. Kittako, kittakaṃ, kittikā. Ettako, ettakaṃ, ettikāti. Imāni padāni asabbanāmikānīpi paccayavasena sambhūtatthantaresu viññūnaṃ kosallatthaṃ vuttāni.

Idāni saṅkhādivacanassa **ekasaddassa** nāmikapadamālā vuccate –

**Ekasaddo** hi saṅkhāvacano ca hoti asadisavacano ca asahāyavacano ca ekaccavacano ca missībhūtavacano ca. Yadā saṅkhā’sadisā’sahāyavacano, tadā ekavacanako bhavati.

Eko, ekaṃ, ekena, ekassa, ekasmā, ekamhā, ekassa, ekasmiṃ, ekamhīti. Evaṃ saṅkhādivacano **ekasaddo** ekavacanako. Tathā hi “eko dve tayo”ti saṅkhāvisaye **ekasaddo** ekavacanakova. “Ekomhi sammāsambuddho. Eko rāja nipajjāmī”ti asadisāsahāyakathanepi ekavacanakova. Ayaṃ ekavacanikā sabbanāmikapadamālā.

Yadā pana saṅkhatthā ca asahāyā ca bahū vattabbā siyuṃ, tadā **ekasaddato kakārāgamaṃ** katvā ekakā, ekake, ekakehi, ekakebhi. **Purisanaye** bahuvacanavasena nāmikapadamālā yojetabbā. Tathā hi saṅkhatthāpi bahū honti. “Cattāro ekakā siyu”nti hi vuttaṃ. Asahāyāpi bahū honti. Tathā hi “ayampi gahapati ekova āgato, ayampi ekova āgato”ti vattabbe “ime gahapatayo ekakā āgatā”ti vattabbatā dissati. Ayaṃ nayo sabbanāmikapakkhaṃ na bhajati asādhāraṇarūpābhāvato, atthantaraviññāpanatthaṃ pana vutto.

Yadā ekaccavacano, tadā “eke, eke, ekehi, ekebhi ekesaṃ, ekehi, ekebhi, ekesaṃ, ekesu”ti vattabbaṃ. Ayaṃ bahuvacanikā sabbanāmikapadamālā. Ettha **eketi** ekacce. Esa nayo sesesupi. Yadā pana missībhūtavacano, tadā “ekā, eke, ekehi, ekebhi, ekāna”nti **purisanaye**

bahuvacanavasena vattabbaṃ. “Pañcālo ca videho ca, ubho ekā bhavantu te”ti pāḷi dissati. Ayaṃ nayo sabbanāmikapakkhaṃ na bhajati asādhāraṇarūpābhāvato, atthantaraviññāpanatthaṃ pana vutto. Tattha **ekā bhavantūti** ekībhavantu missībhavantu, gaṅgodakena yamunodakaṃ viya aññadatthu saṃsandantu samentūti vacanattho.

Ācariyā pana evaṃ vibhāgaṃ adassetvā **ekasaddassa** sabbanāmattameva gahetvā **sabbasaddassa** viya nāmikapadamālaṃ yojenti. Kathaṃ?

Eko, eke. Ekaṃ, eke. Ekena, ekehi, ekebhi. Ekassa, ekesaṃ, ekesānaṃ. Ekasmā, ekamhā, ekehi, ekebhi. Ekassa, ekesaṃ, ekesānaṃ. Ekasmim, ekamhi, ekesūti. Ayaṃ sabbanāmikapadamālāti veditabbā.

Keci “**ekasaddo** saṅkhyātulyāsahāyaññavacano. Yadā saṅkhyāvacano, tadā sabbatthekavacanantova, aññattha bahuvacanantopi, eko ekā ekaṃ iccādi sabbattha sabbasaddasamaṃ. Saṃsāsvēva viseso”ti liṅgattaye yojanānayaṃ vadanti. Evaṃ vadantā ca te vibhāgaṃ adassetvā vadanti. Mayaṃ pana sotūnaṃ payogesū kosalluppādanatthaṃ vibhāgaṃ dassetvā vadāma.

Apicettha ayaṃ visesopi sallakkhitabbo “eke ekaṃthe same samabhāge”ti pāḷippadesē paccattekavacanassa **ekasaddassa** ekārantaniddesopi dissati”ti. Pulliṅgarūpāni.

Ekaṃ, ekāni. Ekaṃ, ekāni. Sesāṃ pulliṅgasadisāṃ. Tattha **ekānīti** ekaccāni. Esa nayo sesabahuvacanesupi, napuṃsakaliṅgarūpāni.

Ekā, ekā, ekāyo. Ekaṃ, ekā, ekāyo. Ekāya, ekāhi, ekābhi. Ekāya, ekissā, ekāsaṃ. Ekāya, ekāhi, ekābhi. Ekāya, ekissā, ekāsaṃ. Ekāya, ekāyaṃ, ekissaṃ, ekāsu. Ettha bahuvacanaṭṭhāne **ekāti** ekaccā, **ekāhīti** ekaccāhi, **ekāsanti** ekaccānaṃ **ekāsūti** ekaccāsu. Itthiliṅgarūpāni. Sabbānetāni sabbanāmāni ekavacanabahuvacanavasena vuttāni.

Apica **ekasaddē** vicchāvasena vattabbe liṅgattayarūpāni ekavacanāneva bhavanti. Kathaṃ?

Ekeko, ekekaṃ, ekekena, ekekassa, ekekasmā, ekekamhā, ekekassa, ekekasmim, ekekamhīti pulliṅgarūpāni.

Ekekaṃ, ekekaṃ. Sesāṃ pulliṅgasadisāṃ, napuṃsakaliṅgarūpāni. Ekekā, ekekaṃ, ekekāya, ekekissā, ekekāya, ekekissā, ekekāyaṃ, ekekissaṃ. Itthiliṅgarūpāni.

Sabbānetāni vicchāsabbanāmānīti vattuṃ vaṭṭati. Bahuvacanāni panettha na santi payogābhāvato. Iti imesu vicchāvasena vuttēsu liṅgattayarūpesu samāsacintā na uppādetabbā anibbacaṇīyattā vicchāsaddānaṃ. Tathā hi “pabbaṃ pabbaṃ sandhi sandhi odhi odhi hutvā tattakapāle pakkhittatīlā viya taṭataṭāyāntā saṅkhārā bhijjanti”tiādīsu **pabbapabbasaddādānaṃ** samāsakaraṇavasena nibbacaṇaṃ pubbācariyehi na dassitaṃ. Yasmā ca vicchāyaṃ vattamānaṃ dvirutti lokato eva siddhā, na lakkhaṇato, tasmā tattha samāsacintā na uppādetabbā.

Idāni **ekacca ekatiya ekacciyasaddānaṃ** nāmikapadamālāyo vuccante – pulliṅge tāva ekacco, ekacce. Ekaccaṃ, ekacce. Sesāṃ **purisasaddasamaṃ**. Ettha **ekacceti** paccattabahuvacanameva sabbanāmikarūpasamaṃ asādhāraṇarūpattā. “Idhekacco kulaputto. Idhekacce moghapurisā”ti nidassanapadāni.

Ekatiyo, ekatiye. Ekatiyaṃ, ekatiye. Sesāṃ **purisasaddasamaṃ**. Idhāpi **ekatiyeti** paccattabahuvacanameva sabbanāmikarūpasamaṃ asādhāraṇarūpattā. Ekatiye manussā.

“Na vissase ekatiyesu eva,  
Agārisu pabbajitesu cāpi;



Sādhūpi hutvāna asādhu honti;  
Asādhu hutvā puna sādhu hontī”ti

Nidassanapadāni. **Ekacciyasaddassa** atthitāyaṃ pana –

“Saccam kirevamāhaṃsu, narā ekacciyā idha;  
Kaṭṭham niplavitaṃ seyyo, na tvevekacciyo naro.

Ekacciyam āhāra”nti nidassanapadāni. Ekacciyo, ekacciyā. Ekacciyam, ekacciyeti sabbathāpi **purisanayo**. Pulliṅgarūpāni.

Ekaccam, ekaccāni. Ekaccam, ekaccāni. Sesam pulliṅgasadisam. Ekatiyam, ekatiyāni. Ekatiyam, ekatiyāni. Sesam pulliṅgasadisam. Ekacciyam, ekacciyāni. Ekacciyam, ekacciyāni. Sesam pulliṅgasadisam. Napuṃsakaliṅgarūpāni.

“Ekaccā, ekaccā, ekaccāyo”ti **kaññā**na yena, tathā “ekatiyā, ekatiyā, ekatiyāyo. Ekatiya”nti ca, “ekacciyā, ekacciyā, ekacciyāyo. Ekacciya”nti ca **kaññā**na yena yojetabbaṃ. Itthiliṅgarūpāni.

Idāni **ekākī ekākiyasaddavasena** nāmikapadamālā vuccante –

Ekākī, ekākī, ekākino. Ekākīṃ, ekākī, ekākino. **Daṇḍī**na yena ñeyyā. Ekākīyo, ekākīyā. Ekākīyam, ekākīye. Ekākīyena. **Purisanayena** ñeyyam. Pulliṅgarūpāni.

Ekākī kulaṃ, ekākī, ekākīni. Ekākīṃ, ekākī, ekākīni. Sesam pulliṅgasadisam. Ekākīyam, ekākīyāni. Ekākīyam, ekākīyāni. Sesam pulliṅgasadisam. Napuṃsakaliṅgarūpāni.

Ekākīnī, ekākīnī, ekākīniyo. Ekākīniṃ, ekākīnī, ekākīniyo. Ekākīniyāti **itthī**sadisam. Ekākīyā, ekākīyā, ekākīyāyo. Ekākīyam, ekākīyā, ekākīyāyo. Ekākīyāyāti **kaññā**sadisam. Itthiliṅgarūpāni. Sabbāni panetāni asabbanāmikarūpāni atthantaraviññāpanattham vuttānīti daṭṭhabbāni.

Idāni **dvisaddapariyāyassa** sadā bahuvacanantassa sabbanāmikapadassa **ubhasaddassa** nāmikapadamālā vuccate –

“Ubho, ubho, ubhohi, ubhobhi, ubhinnaṃ, ubhohi, ubhobhi, ubhinnaṃ, ubhosū”ti ayam pālīnayānurūpena vuttapadamālā. Atrime payogā – ubho kumārā nikkītā. Ubho itthiyo tiṭṭhanti, ubho cittāni tiṭṭhanti, ubho putte adāsi. Ubho kaññāyo passati. Ubho pādāni bhindivā, saññamissāmi vo ahaṃ. Ubhohi hatthehi. Ubhohi bāhāhi, ubhohi cittehi, ubhinnaṃ janānaṃ, ubhinnaṃ itthīnaṃ, ubhinnaṃ cittānaṃ, ubhosu purisesu, ubhosu itthīsu, ubhosu passesūti, ayamasmākaṃ ruci. Ācariyā pana “ubhehi, ubhehi, ubhesū”tipi icchanti. **Kaccāyanepi** hi “ubhe tappurisā”ti vuttaṃ. Sabbānipi etāni manasi kātābbāniyeva. **Ubhasaddassa** samāso appasiddho. Liṅgattayasādhāraṇarūpāni.

Idāni saṅkhāvacanānaṃ **dviti catusaddānaṃ** sadā bahuvacanantānaṃ sabbanāmānaṃ nāmikapadamālāyo vuccante –

Dve, dve, dvīhi, dvībhi, dvinnaṃ, duvinnaṃ, dvīhi, dvībhi, dvinnaṃ, duvinnaṃ, dvīsu. **Cūlaniruttīyam** pana “dvinnanna”nti padamālā āgatā. Imāni **ahaṃ**saddādīni viya itthi liṅgādibhāvavinimuttānīpi tīsu liṅgesu yujjante “dve purisā, dve itthiyo, dve cittāni”iccevamādīnā. Imānipi liṅgattayasādhāraṇāni rūpāni.

“Dve”ti rūpaṃ **dvisaddassa**, yaṃ samāsamhi taṃ bhava;  
Dvippakatikaṃyeva, nānādesehi sā siyā.

Dvibhāvo ceva dvebhāvo, dvirattaṅca duvassako;  
Dohaḷīni dupattaṅca, taddhitatte dvayaṃ dvayaṃ.

Tayo, tayo, tīhi, tībhi, tiṇṇaṃ, tiṇṇannaṃ, tīhi, tībhi, tiṇṇaṃ, tiṇṇannaṃ, tīsu. Imāni pulliṅgarūpāni.

Tisso, tisso, tīhi, tībhi, tissannaṃ, tīhi, tībhi, tissannaṃ, tīsu. Imāni itthiliṅgarūpāni. **Cūlaniruttiyaṃ** “tissannaṃ”nti catutthīchaṭṭhīnaṃ bahuvacanamāgataṃ, **niruttipiṭake** pana “tiṇṇannaṃ”nti. Tāni sātṭhakathe tepiṭake buddhavacane punappunaṃ upaparikkhitvā dissanti ce, gahetabbāni.

Tīni, tīni, tīhi, tībhi, tiṇṇaṃ, tiṇṇannaṃ, tīhi, tībhi, tiṇṇaṃ, tiṇṇannaṃ, tīsu. Imāni napuṃsakaliṅgarūpāni. Katthaci pana pālīppadesa **tīṇisaddassa** **ṇikāralopopi** bhavati “dve vāti vā udakaphusitāni”ti. “Tiṇṇannaṃ kho bhikkhave indriyānaṃ bhāvitattā bahulīkatattā piṇḍolabhāradvajena bhikkhunā aññā byākātā”ti idaṃ “tiṇṇannaṃ”nti padassa atthibhāve nidassanaṃ.

Yāni rūpāni vuttāni, “tisso tīni tayo”’iti;  
Samāsavisaye tāni, **titippakatikā** siyuṃ.

Yasmā **tissa** samāsamhi, saddhiṃ parapadena ve;  
“Tivedanaṃ ticitta”nti, “tiloka”nti ca niddise.

Ettha napuṃsakattaṃva, pāsamsaṃ pāyavuttito;  
Pumattampettha icchanti, “tibhavo khāyate”’iti.

Cattāro, caturo, cattāro, caturo, catūhi, catūbhi, catubbhi, catunnaṃ, catūhi, catūbhi, catubbhi, catunnaṃ, catūsu. Imāni pulliṅgarūpāni.

Catasso, catasso, catūhi, catūbhi, catubbhi, catassannaṃ, catunnaṃ, catūhi, catūbhi, catubbhi, catassannaṃ, catunnaṃ, catūsu. Imāni itthiliṅgarūpāni. Itthiliṅgaṭṭhāne “catunnaṃ”nti padaṃ **cūlaniruttiyaṃ niruttiṭake pāliyaṃ aṭṭhakathāsu** ca dassanato vuttaṃ. Tathā hi cūlaniruttiyaṃ itthiliṅgaṭṭhāne “catunnaṃ”nti āgataṃ, niruttiṭake “catunnaṃ kaññānaṃ”nti āgataṃ. Pāliyaṃ pana soṇadantasuttādīsu “samaṇo gotamo catunnaṃ parisānaṃ piyo manāpo”’ti āgataṃ. Aṭṭhakathāsu ca pana suttantaṭṭhakathāyaṃ “catūhi acchariyabbhutadhammehi samannāgato catunnaṃ parisānaṃ piyo manāpo”’ti āgataṃ. Sattilaṅghajātakaṭṭhakathāyaṃ “ācariyo panassa catunnaṃ sattīnaṃ laṅghanaṃ sippaṃ jānātī”’ti āgataṃ.

Cattāri, cattāri, catūhi, catūbhi, catubbhi, catunnaṃ, catūhi, catūbhi, catubbhi, catunnaṃ, catūsu. Imāni napuṃsakaliṅgarūpāni.

“Cattāro”’ti “catasso”’ti, “cattāri”’ti ca sadditaṃ;  
Rūpaṃ samāsabhāvamhi, **catuppakatikaṃ** bhava.

Nidassanapadānettha, kamato kamakovido;  
“Catubbidhaṃ catussālaṃ, catusacca”nti niddise.

Imāni **dve**ādikāni sabbanāmikāni bahuvacanāniyeva bhavanti, na ekavacanāni. **Cūlaniruttiyaṃ** pana tīsu liṅgesu “catassannaṃ”nti vuttaṃ, taṃ anijjhānakkhamaṃ viya dissati.

Idāni **tumhaamhas**saddānaṃ nāmikapadamālā vuccante, tesu yena katheti, tassālapane **tumh**avacanāni bhavanti.

Tvaṃ, tuvaṃ, tumhe. Taṃ, tuvaṃ, tvaṃ, tavaṃ, tumhe. Tayā, tvayā, tumhehi, tumhebhi. Tuyhaṃ, tava, tumhaṃ, tumhākaṃ. Tayā, tvayā, tumhehi, tumhebhi. Tuyhaṃ, tava, tumhaṃ, tumhākaṃ. Tayi, tvayi, tumhesu. Tatra “tvaṃ puriso, tvaṃ itthī, tvaṃ citta”ntiādinā yojetabbāni.

Attayoge **amhavacanāni** bhavanti.

Ahaṃ, ahakaṃ, mayaṃ, amhe. Maṃ, mamaṃ, amhe. Mayā, amhehi, amhebbhi. Mayhaṃ, mama, amhaṃ, amhākaṃ, asmākaṃ. Mayā, amhehi, amhebbhi. Mayhaṃ, mama, amhaṃ, amhākaṃ, asmākaṃ. Mayi, amhesu, asmesu.

Ettha pana “kathaṃ amhe karomase”ti pālīdassanato “tumhe”ti paccattavacanassa viya “amhe”ti paccattavacanassapi atthitā veditabbā, “ahaka”nti rūpantarampi icchitabbaṃ. Tassa atthibhāve “ahakañca cittavasānugā bhāsissa”nti eṣā pālī nidassanaṃ. Ettha hi ahakanti ahaṃ iccevattho. Tatra “ahaṃ puriso, ahaṃ kaññā, ahaṃ citta”ntiādīnā yojetabbāni. Imānīpi līngattayasādhāraṇarūpāni.

**Kaccāyanacūlaniruttiniruttiṭṭakesu** pana “tumhākaṃ amhāka”nti ca dutiyābahuvacanaṃ vuttaṃ. Kaccāyane “tumhānaṃ amhāna”nti ca paṭhamādutiyābahuvacanaṃ, “tumhaṃ amha”nti ca catutthīchaṭṭhekavacanaṃ, paṭhamādutiyābahuvacanañca vuttaṃ, cūlaniruttiniruttiṭṭake pana “tumhaṃ amha”nti ca dutiyekavacanaṃ vuttaṃ, “tumhe amhe”ti ca catutthīchaṭṭhībahuvacanaṃ vuttaṃ. Etāni upaparikkhitvā sāṭṭhakathesu suttantesu dissanti ce, gahetabbāni.

**Tumhaamhasaddānaṃ** pana parapadehi saddhiṃ samāse “maṃdīpā”tiādayo payogā tathāgatādīmukhato sambhavanti. “Ete gāmaṇi maṃdīpā maṃleṇā maṃsaraṇā”ti hi tathāgatamukhato, “tāyogo mayyogo”ti niruttaññumukhato, **kābyādāse** ca “tvamṃmukhaṃ kamaleneva, tulyaṃ nāññena kenacī”ti ca “candena tvamṃmukhaṃ tulya”nti ca kavīmukhato.

Tattha hi ahaṃ dīpo etesanti **maṃdīpā**, ahaṃ leṇaṃ etesanti **maṃleṇā**, evaṃ **maṃsaraṇā**. Tumhena yogo **tāyogo**, **tumhasaddena** yogo iccevattho. Amhena yogo **mayyogo**, **amhasaddena** yogo iccevattho. Tava mukhaṃ **tvamṃmukhaṃ**. Bahuvacanavasena nībbacanīyaṃ “tumhākaṃ mukhaṃ tvamṃmukha”nti. Ettha ca pālīyaṃ “maṃdīpā”iccādidassanato “tvamṃdīpā”tiādīni **kābyādāse** ca “tvamṃmukha”nti dassanato **tvamṃvaṇṇo**, **tvamṃsaro**, **maṃmukhaṃ**, **maṃvaṇṇo**, **maṃsaro**ādīni gahetabbāni. Tattha tvamṃ dīpo etesanti **tvamṃdīpā**, tumhe vā dīpā etesanti **tvamṃdīpā**, tava vaṇṇo **tvamṃvaṇṇo**. Mama mukhaṃ **maṃmukhaṃ**, amhākaṃ vā mukhaṃ **maṃmukhanti** nībbacanāni. Esa nayo aññesu iḍisesu ṭhānesu.

Samāse **tumhaamhākaṃ**, honti parapadehi ve;  
“Tvamṃmukha”nti ca “maṃdīpā, tāyogo mayyogo”ti ca.

Etthāha “kiṃ ettakameva **tumhaamhasaddānaṃ** rūpaṃ, udāhu aññampi atthī”ti? Atthi “te me” iccādīni. Yadi evaṃ kasmā padamālā visuṃ na vuttāti? Avacane kāraṇamatthi. Atridaṃ kāraṇaṃ –

“Te me vo no”ti rūpāni, parāni padato yato;  
Tato nāmikapantīsu, na tu vuttāni tāni me.

Ettha ca mayaṃ me vo nosaddānamatthuddhāro vuccate – tesaddassa pana vuttova. Yasmā atṭhakathācariyā **mayamṃsaddaṭṭhānēpi** **mayāsaddo**, **mayāsaddaṭṭhānēpi** ca **mayamṃsaddo** icceva vadanti, tasmā mayampi tatheva vadāma. **Mayamṃsaddo** “anuññātapatiññātā, tevijjāmayamasubho”tiādīsu asmadatthe āgato. “Mayaṃ nissāya hemāya, jātā mandosisūpagā”ti ettha paññattiyāṃ. “Manomayā pītibhakkhā sayamṃpabhā”tiādīsu nībbattiatthe. Bāhirena paccayena vinā manasāva nībbattāti manomayā. “Yaṃnūnāhaṃ sabbamattikāmayamṃ kuṭīkaṃ kareyya”ntiādīsu vikāratthe. “Dānamayaṃ sīlamaya”ntiādīsu padapūraṇamatte. “Pīṭhaṃ te sovaṇṇamayamṃ uḷāra”nti ettha vikāratthe padapūraṇamatte vā daṭṭhabbo. Yadā hi suvaṇṇameva sovaṇṇanti ayamattho, tadā suvaṇṇassa vikāro sovaṇṇamayanti vikāratthe **mayasaddo** daṭṭhabbo. Nībbattiatthotipi vattum vaṭṭati. Yadā pana suvaṇṇena nībbattaṃ sovaṇṇanti ayamattho, tadā sovaṇṇameva sovaṇṇamayanti padapūraṇamatte **mayasaddo** daṭṭhabbo.

**Mesaddo** “kicchena me adhigataṃ, halaṃ dāni pakāsitu”ntiādīsu karaṇe āgato. Mayāti attho. “Tassa me bhante bhagavā saṃkhittena dhammaṃ desetū”tiādīsu sampadāne, mayhanti atthoti vadanti. “Pubbeva me bhikkhave sambodhā anabhisambuddhassa bodhisattasseva sato”tiādīsu sāmīatthe, mamāti atthoti ca vadanti. Etthetaṃ vuccati –

Karaṇe sampadāne ca, sāmīatthe ca āgato;  
**Mesaddo** iti viññeyyo, viññunā nayadassinā.

Ettha pana ɳatvā aɳhakathācariyehi kate **te mesaddānamatthavivarāṇe** vinicchayaṃ brūma tesamadhīppāyappakāsanavasena sotūnaṃ saṃsayasamugghātanatthaṃ. Tathā hi aɳhakathācariyā **temesaddānaṃ** sampadānatthavasena “tuyhaṃ mayha”nti atthaṃ saṃvaṇṇesuṃ, sāmīatthavasena pana “tava mamā”ti. Evaṃ yvāyaṃ tehi asaṅkarato niyamo dassito, so sāɳhakathe tepītake buddhavacane kuto labbhā. Tathā hi **temesaddatthavācākā tuyhaṃ mayhaṃsaddā tava mamasaddā** ca sampadānasāmīatthesu aniyamato pavattanti.

Tatrima payogā – idaṃ tuyhaṃ dadāmi. Tuyhaṃ vikappemi. Tuyhaṃ maṃsena medena, matthakena ca brāhmaṇa, āhutiṃ paggahessāmi. Esa hi tuyhaṃ pitā naraśīho. Tuyhaṃ pana mātā kahanti. Mayhameva dānaṃ dātabbaṃ, na aññesaṃ, mayhameva sāvakānaṃ dānaṃ dātabbaṃ, na aññesaṃ. Na mayhaṃ bhariyā esā. Assamo sukato mayhaṃ. Sabbaññutaṃ piyaṃ mayhaṃ. Tāta mayhaṃ mātu mukhaṃ aññādisaṃ, tumhākaṃ aññādisaṃ. Mayhaṃ sāmiko idāni marissati. Tava dīyate, tava silāghate, mama silāghate, pabbajjā mama ruccati. Tava putto. Ubho mātāpitā mamāti evaṃ aniyamato pavattanti.

**Cūlaniruttīyañhi yamakamahātherena** catutthīchaɳhīnaṃ anaññarūpattaṃ vuttaṃ “catutthīchaɳhīnaṃ sabbattha anaññaṃ, tatiyāpañcamīnaṃ bahuvacanañcā”ti. Yadi evaṃ aɳhakathācariyā “namo te purisājañña. Namō te buddha vīratthū”tiādīsu **tuyhaṃsaddassa** vasena sampadāne, tuyhanti hi attho. “Kinte vataṃ kiṃ pana brahmacariya”ntiādīsu sāmīatthe, tavāti hi attho”tiādīni vadantā “ayuttaṃ saṃvaṇṇanaṃ saṃvaṇṇesu”ntipi, “passitabbaṃ na passimsū”tipi āpajjantīti? Yuttaṃyeva te saṃvaṇṇayimsu, passitabbañca passimsu. Tathā hi te “saddasatthampi ekadesato sāsanaṇukūlaṃ hotī”ti paresamanukampāya saddasatthato nayaṃ gahetvā sampadānatthavasena **te mesaddānaṃ** “tuyhaṃ mayha”nti atthaṃ saṃvaṇṇayimsu, sāmīatthavasena pana “tava mamā”ti. Saddasatthe hi catutthīchaɳhīrūpāni sabbathā visadisāni, sāsane pana sadisāni. Tasmā sāsane sāmāññena pavattāni catutthīchaɳhīrūpāni saddasatthe visesena pavattehi catutthīchaɳhīrūpehi samānagatikāni katvā paresamanukampāya sampadānatthe **tuyhaṃ mayhaṃsaddānaṃ** pavattiniyamo, sāmīatthe ca **tava mamasaddānaṃ** pavattiniyamo dassito. Yasmā pana paresamanukampāya ayaṃ niyamo, tasmā karuṇāyevāyaṃparādho, na aɳhakathācariyaṇaṃ. Tāya eva hi tehi evaṃ saṃvaṇṇanā katāti.

Keci panettha evaṃ vadeyyuṃ – nanu ca bho aɳhakathācariyehi saddanayaṃ nissāya **te mesaddānaṃ** sāmīatthe vattamānānaṃ “tava mamā”ti atthavacanena “tuyhaṃ maṃsena medena, na mayhaṃ bhariyā esā”tiādīsu sāmivisayesu vibhattivipallāsanayo dassitoti sakkā vattuṃ, tathā saddanayaññeva nissāya **te mesaddānaṃ** sampadānatthe vattamānānaṃ “tuyhaṃ mayha”nti atthavacanena “bhattaṃ tava na ruccati. Pabbajjā mama ruccatī”tiādīsipi sampadānavisayesu vibhattivipallāsanayo dassitoti sakkā vattuntī? Na sakkā, gāthāsu viya cuṇṇiyapadaɳhānepi **tuyhaṃ mayhaṃ tava mamasaddānaṃ** aniyamena dvīsu atthesu pavattanato. Na hi īdise ɳhāne gāthāyaṃ vā cuṇṇiyapadaɳhāne vā vibhattivipallāso icchitabbo. “Tassa rajjassahaṃ bhīto. Kiṃ nu kho ahaṃ tassa sukhasa bhāyāmī”tiādīsuyeva pana ɳhānesu icchitabbo.

Yadi saddanayaṃ nissāya “tuyhaṃ maṃsena medenā”tiādīsu vibhattivipallāso icchitabbo siyā, “brāhmaṇassa piyaputtadānaṃ adāsī. Brāhmaṇassa pitā adāsī”tiādīsipi saddanayaṃ nissāya “brāhmaṇāyā”tiādīnā vibhattivipallāsatto vacanīyo siyā catutthīchaɳhīrūpānaṃ satthe visuṃ vacanato. Evañca sati ko dosoti ce? Attheva doso, yasmā **dāna**yoge vā **namo**yoge vā **āyā**desasahitāni catutthīchaɳhīrūpāni sāɳhakathe tepītake buddhavacane nupalabbhanti, tasmā “brāhmaṇāyā”tiādīnā vibhattivipallāsattohavacane ayaṃ doso yadidaṃ avijjamānaggahaṇaṃ. Yasmā pana īdisesu ɳhānesu vibhattivipallāsakaraṇaṃ sāvajjaṃ, tasmā “tuyhaṃ maṃsena medenā”tiādīsipi

vibhattivipallāso na icchitabbo.

Catutthīchaṭṭhīrūpāni hi anaññāni dissanti “purisassa adāsi, purisassa dhanam brāhmaṇānam adāsi, brāhmaṇānam santaka”nti. Tathā hi pāvacaṇe **sa nam**saddā sampadānasāmiatthesu sāmāññena pavattanti, tappavatti “aggassa dātā medhāvī”tiādīhi payogehi dīpetabbā. “Aggassa dātā medhāvī”ti ettha hi “aggassā”ti ayaṃ saddo yadā kriyāpaṭiggahaṇam paṭicca sampadānatthe pavattati, tadā “aggassa ratanattayassa dātā”ti atthavasena pavattati. Yadā pana kriyam paṭicca kammabhūte sāmīatthe pavattati, tadā “aggassa deyyadhammassa dātā”ti atthavasena pavattati. Evaṃ sabbathāpi vipallāso tumhākaṃ saraṇam na hotīti. Tathā saddanayaṃ nissāya “sampadānavacana”nti tumhehi dalham gahitassa **mayhaṃ**saddassa sāmīatthavasena paṇṇattiyam dassanato vibhattivipallāso tumhākaṃ saraṇam na hoteva. Tathā hi –

“Sakuṇo mayhako nāma, girisānudarīcaro;  
Pakkaṃ pipphalimārūya, ‘mayham mayha’nti kandatī”ti

Ettha **mayhakoti** ekāya sakuṇajātiyā nāmam. So hi loluppacāritāya “idampi mayham, idampi mayha”nti kāyati ravatīti mayhakoti vuccati **mayhasaddūpapadassa ke re ge** saddeti dhātussa vasena.

Atrāyam padasodhanā – yadi **tuyham** mayhaṃsaddā dhuvanā sampadānatthe, **tava mamasaddā** ca sāmīatthe bhaveyyum, evaṃ sante lokavohārukusalena sabbaññunā tassa sakuṇassa “mayhako”ti paṇṇatti na vattabbā siyā anantogadhasampadānatthattā, antogadhasāmyatthattā pana “mamako” icceva paññatti vattabbā siyā. Etthapi “mayhako”ti idaṃ vibhattivipallāsavasena vuttanti ce? Na, paṇṇattivisevā vibhattivipariṇāmassa aṭṭhānattā anavakāsattā.

Apicettha **mayhaṃ**saddo sarūpato vibhatyantabhāvena tiṭṭhati kasaddena ekapadattūpagamanato, evaṃ santepi “mayhako”ti ayaṃ sakuṇavisesavācako saddo paccattavacanabhāve ṭhitoyeva īsakaṃ sāmīatthampi jotayati **sujaṃpati rājapuris**saddā viya. Imināpi kāraṇena vibhattivipallāso tumhākaṃ saraṇam na hoti. Iti “mayhako”ti paṇṇattiyam vattamānassa padāvayavabhūtassa **mayhasaddassa** avipallāsavacanalesena **tuyham tava mamasaddesupi** vibhattivipallāso na icchitabboti siddham. Tasmā aṭṭhakathācariyehi sampadānasāmiatthesu sāmāññena pavattānampi samānānam **tuyham mayham tava mamasaddānam** saddanayaññeva nissāya paresamanukampāya vuttappakāro niyamo dassitoti avagantabbam. Icevaṃ –

“Tuyham mayha”ntime sadde, sampadāne garū vadum;  
“Tava mamā”ti sāmimhi, nayamādāya satthato.

Evaṃ santepi etesaṃ, niyamo natthi pāliyam;  
Koci tesam viseso ca, dīṭṭho amhehi tam suṇa.

Sāmyatthasampadānatthā, sambhavanti yaḥim duve;  
“Tuyham mayha”ntime saddā, te payogā na dullabhā.

“Tava mamā”time saddā, pāyā sāmimhi vattare;  
Sampadāne yaḥim honti, te payogā panappakā.

**Tavato mamato tuyham-mayhaṃ**saddāva sāsane;  
Pāṭhe nekasahassamhi, sāmīatthe pavattareti.

Sabbāpi imā nītiyo paramasukhumā sududdasā vīrajātinā sādhuṃkaṃ manasi kātabbā.

**Vo nosaddesu** pana **vosaddo** paccattaupayogakaraṇasampadānasāmivacanapadapūraṇesu dissati. “Kacci vo anuruddhā samaggā sammodamānā”tiādīsu hi paccatte dissati. “Gacchatha

bhikkhave paṇāmemi vo’’tiādīsu upayoge. ‘‘Na vo mama santike vatthabba’’ntiādīsu karaṇe. ‘‘Vanapatthapariyāyaṃ vo bhikkhave desessāmi’’tiādīsu sampadāne. ‘‘Sabbesaṃ vo sārīputtā subhāsita’’ntiādīsu sāmivacane. ‘‘Ye hi voariyā parisuddhā kāyakammantā’’tiādīsu padapūraṇamatte. Etthetaṃ vuccati –

‘‘Paccatte upayoge ca, karaṇe sampadāniye;  
Sāmiṣṣa vacane ceva, tatheva padapūraṇe;  
Imesu chasu ṭhānesu, vosaddo sampavattati’’.

Nosaddo paccattopayogakaraṇasampadānasāmivacanāvadhāraṇanusaddatthesu paṭisedhe nipātamatte ca vattati. Ayañhi ‘‘gāmaṃ no gaccheyyāmā’’ti ettha paccatte dissati. ‘‘Mā no ajja vikantiṃsu, rañño sūdā mahānase’’tiādīsu upayoge. ‘‘Na no vivāho nāgehi, katapubbo kudācana’’ntiādīsu karaṇe. ‘‘Saṃvibhajetha no rajjenā’’tiādīsu sampadāne. ‘‘Sathā no bhagavā anupatto’’tiādīsu sāmivacane. ‘‘Na no samaṃ atthi tathāgatenā’’ti ettha avadhāraṇe. ‘‘Abhijānāsi no tvaṃ mahārājā’’tiādīsu **nu**saddatthe, pucchāyantipi vattum vaṭṭati. ‘‘Subhāsitaññeva bhāseyya, no ca dubbhāsitaṃ bhaṇe’’tiādīsu paṭisedhe. ‘‘Na no sabhāyaṃ na karonti kiñcī’’tiādīsu nipātamatte. Etthetaṃ vuccati –

Paccatte cupayoge ca, karaṇe sampadāniye;  
Sāmyāvadhāraṇe ceva, **nu**saddatthe nivāraṇe;  
Tathā nipātamatamhi, **no**saddo sampavattati.

Idāni sabbanāmānaṃ yathārahaṃ saṃkhittena missakapadamālā vuccate –

Yo so, ye te. Yaṃ taṃ, ye te. Yena tena. Sesāṃ vitthāretabbaṃ. Yā sā, yā tā. Yaṃ taṃ, yā tā. Yāya tāya. Sesāṃ vitthāretabbaṃ. Yaṃ taṃ, yāni tāni. Sesāṃ vitthāretabbaṃ. Iminā nayena liṅgattayayojanā kātabbā.

‘‘Eso so, ete te. Ayaṃ so, ime te. So ayaṃ te ime’’tiādīnā yathāpayogaṃ padamālā yojetabbā. Tathā hi ‘‘yo so bhagavā sayambhū anācariyako. Ete te bhikkhave ubho ante anupagamma majjhimā paṭipadā tathāgatenā abhisambuddhā. Ayaṃ so sārathi etī’’ti evamādayo vicittappayogā dissanti. Iti sabbanāmikapadānaṃ missakapadamālā yojetabbā.

Mayā sabbatthasiddhassa, sāsane sabbadassino;  
Sabbattha sāsane suṭṭhu, kosallatthāya sotunaṃ.

Asabbanāmanāmehi, sabbanāmapadehi ve;  
Saha sabbāni vuttāni, sabbanāmāni pantito.

Etesu katayogānaṃ, sukhumatthavijānaṃ;  
Akicchapaṭivedhena, bhavissati na saṃsayo.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītipakaraṇe

Sabbanāmatamsadisanāmānaṃ nāmikapadamālāvibhāgo nāma

Dvādasamo paricchedo.

### 13. Savinicchayaśaṅkhyānāmanāmikapadamālā

Ito paraṃ pavakkhāmi, śaṅkhyānāmikapantiyo;  
**Bhū**dhātujehi rūpehi, aññehi cupayojitum.

Yā hi sā heṭṭhā amhehi **eka dviti catu**iccesam saṅkhyāsabbanāmānaṃ nāmikapadamālā kathitā, taṃ ṭhapetvā idha asabbanāmānaṃ **pañca cha sattā**dīnaṃ saṅkhyānāmānaṃ nāmikapadamālā **bhū**dhātumayehi aññehi ca rūpehi yojanattaṃ vuccate –

**Pañca**, pañcahi, pañcabhi, pañcannaṃ, pañcasu. Sattannaṃ vibhattīnaṃ vasena ñeyyaṃ. “Pañca bhūtā, pañca abhibhavitāro, pañca purisā, pañca bhūmiyo, pañca kaññāyo, pañca bhūtāni, pañca cittāni” tiādīnā sabbattha yojetabbaṃ. **Cha**, chahi, chabhi, channaṃ, chasu, chassu itipi. “Chassu loko samuppanno, chassu krubbati santhava” nti hi pāli. **Satta**, sattahi, sattaḥhi, sattannaṃ, sattu. **Aṭṭha**, aṭṭhahi, aṭṭhabhi, aṭṭhannaṃ, aṭṭhasu. **Nava**, navahi, navabhi, navannaṃ, navasu. **Dasa**, dasahi, dasabhi, dasannaṃ, dasasu. Evaṃ **ekādasa**. **Dvādasa**, **bārasa**. **Terasa**, **tedasa**, **teḷasa**. **Catuddasa**, **cuddasa**. **Pañcadasa**, **pannarasa**. **Soḷasa**. **Sattarasa**. **Aṭṭhārasa**, aṭṭhārasahi, aṭṭhārasabhi, aṭṭhārasannaṃ, aṭṭhārasasu. Sabbametaṃ bahuvacanasena gahetabbaṃ.

**Ekūnavīsati**, **ekūnavīsam** iccādiḥi. Ekūnavīsāya, ekūnavīsāyaṃ, ekūnavīsā bhikkhū tiṭṭhanti, ekūnavīsam bhikkhū passati, evaṃ “kaññāyo cittāni” ti ca ādinā yojetabbaṃ. Ekūnavīsāya bhikkhūhi dhammo desito, ekūnavīsāya kaññāhi kataṃ, ekūnavīsāya cittehi kataṃ, ekūnavīsāya bhikkhūnaṃ cīvaraṃ deti, ekūnavīsāya kaññānaṃ dhanam deti, ekūnavīsāya cittānaṃ rucati, ekūnavīsāya bhikkhūhi apeti. Evaṃ kaññāhi cittehi. Ekūnavīsāya bhikkhūnaṃ santakaṃ, evaṃ kaññānaṃ cittānaṃ. Ekūnavīsāyaṃ bhikkhūsu patiṭṭhitaṃ. Evaṃ “kaññāsu cittaṃ” ti yojetabbaṃ. **Ekūnavīsati**, ekūnavīsatiṃ, ekūnavīsatiyā, ekūnavīsatiyaṃ.

**Vīsati**, vīsatiṃ, vīsatiyā, vīsatiyaṃ. **Vīsa**, vīsam, vīsāya, vīsāyaṃ. Tathā **ekavīsa dvāvīsa bāvīsa tevīsa catuvīsa** iccādisupi. **Ṭīmsa**, ṭīmsam, ṭīmsāya, ṭīmsāyaṃ. **Cattālīsa**, cattālīsam, cattālīsāya, cattālīsāyaṃ. **Cattārīsa** iccādiḥi. **Paññāsa**, paññāsam, paññāsāya, paññāsāyaṃ. **Paññāsa**, paññāsam, paññāsāya, paññāsāyaṃ. **Saṭṭhi**, saṭṭhiṃ, saṭṭhiyā, saṭṭhiyaṃ. **Sattati**, sattatiṃ, sattatiyā, sattatiyaṃ. **Sattari** iccādiḥi. **Asīti**, asītiṃ, asītiyā, asītiyaṃ. **Navuti**. Navutiṃ, navutiyaṃ, navutiyaṃ.

Itthañca aññathāpi saṅkhyārūpāni gahetabbāni. Ekūnavīsehi, ekūnavīsānaṃ, ekūnavīsesu. “Channavutīna” nti ca ādināpi saṅkhyārūpānaṃ katthaci dassanato keci saddasatthavidū **ūnavīsatis**addam sabbadāpi ekavacananantamitthilingameva payuñjanti. Keci “**vīsati**ādayo **ānavuti** ekavacananantā itthilingā” ti vadanti. Keci panāhu –

“Saddā saṅkhyeyyasāṅkhāsu, ekatte **vīsati**ādayo;  
Saṅkhatthe dvibahuttamhi, tā tu **cānavuti**ttihiyo” ti.

Ettha dvivacanaṃ chaḍḍetabbaṃ buddhavacane tadabhāvato. Sabbesampi ca tesam yathāvuttavacanaṃ kiñci pālippadesam patvā yujjati, kiñci pana patvā na yujjati **vīsativīsamṭīmsam** iccādināñhi saṅkhatthānaṃ saddānaṃ bahuvacanaṃ appayogavasena pālīyaṃ dassanato, **kaccāyane** ca yovacanasambhūtarūpavantaṭṭadassanato. Tasmā yathāsambhavaṃ yathāpāvacanāñca itthilingabhāve tesamekavacananantatā veditabbā **atthi natthis**addānaṃ viya.

**Atthinatthis**addā hi nipātattā ekattepi bahuttepi pavattanti “puttā matthi dhanammatthi. Natthi attasamaṃ pemaṃ. Natthi samaṇabrāhmaṇā” tiādīsu. Alingattepi panetesam katthaci itthilingabhāvo diṭṭho. **Abhidhamme hi dhammasenāpatinā** anudhammacakkavattinā vohāraṅkusaleṇa vohāraṅkusalaśādhakena “atthiyā nava. Natthiyā navā” ti ekavacananantaṃ itthilingarūpaṃ dassitaṃ, tasmā **vīsativīsati**miccādinampi yathāsambhavaṃ yathāpāvacanāñca itthilingabhāve ekavacananantatā veditabbā.

Tattheke “hetuyā adhipatiyā” ti ca idaṃ liṅgavipallāsavasena gahetabbaṃ maññanti. Tammativasena “hetumhi adhipatimhi” ti pulliṅgabhāvo paṭipādetabbo, “hetupaccaye adhipatipaccaye” iccevattho. Atha vā “hetuyā adhipatiyā” ti dvayamidaṃ itthilingarūpapaṭibhāgaṃ pulliṅgarūpanti gahetabbaṃ “hetuyo jantuyo” tiādīnaṃ itthilingarūpapaṭibhāgānaṃ pulliṅgarūpanampi vijjamañattā, “atthiyā natthiyā” ti idaṃ pana liṅgavipallāsavasena vuttanti na

gahetabbaṃ **atthi natthisaddānaṃ** aliṅgabhedattā. Na hi **atthi natthisaddā** tīsu liṅgesu ekasmimpi antogadhā. Etesu hi **atthisaddo** ākhyātanipātavasena bhijjati “atthi santi saṃvijjati. Atthikhīrā brāhmaṇī” tiādīsu, **natthisaddo** pana nipātoyeva. Icevaṃ **atthi natthisaddānaṃ** nipātānañca liṅgavacanavasena kathanāṃ yujjati itthiliṅgādivasena ekattādivasena ca appavattanato. Vuttañca –

“Sadisaṃ tīsu liṅgesu, sabbāsu ca vibhattisu;  
Vacanesu ca sabbesu, yaṃ na byeti **tadabyaya**”nti.

Ettha siyā – nanu ca bho “atthi sakkā labbhā iccete paṭhamāyā” ti vacanato **atthisaddo** paṭhamāyā vibhattiyā yutto, evaṃ sante kasmā “sadisaṃ tīsu liṅgesū” tiādi vuttanti? Saccam **atthisaddo** paṭhamāyā vibhattiyā yutto, tathā **natthisaddo atthisaddassa** vacanalesena gahetabbattā yugaḷapadattā ca. Idaṃ pana “sadisaṃ tīsu liṅgesū” tiādivacanāṃ upasagganipātasāṅkhāte asāṅkhyāsadde sandhāya vuttaṃ, na ekekamasāṅkhyāsaddaṃ sandhāya. Tathā hi “asāṅkhyā” ti ca “abyayā” ti ca laddhavohāresu upasagganipātesu **upasaggā** sabbepi sabbavibhattivacanakā. **Nipātānaṃ** pana ekacce paṭhamādīsu yathārahaṃ vibhattiyuttā, ekacce avibhattiyuttā. Tattha ye yadaggena vibhattiyuttā, te tadaggena tabbacanakā. Upasagganipātesu hi paccekam “idaṃ nāma vacana”nti laddhuṃ na sakkā, sabbasaṅgāhakavasena pana “sadisaṃ tīsu liṅgesū” tiādi pubbācariyehi vuttaṃ. **Kaccāyanācariyenapi** imamevatthaṃ sandhāya “sabbāsamāvusopasagganipātādīhi cā” ti vuttaṃ. Na hi **āvusosaddato** sabbāpi vibhattiyo labbhanti, atha kho ālapanatthavācakattā ekavacanikaanekavacanikā paṭhamāvibhattiyoyeva labbhanti. Ayamasmākaṃ khanti.

Keci pana sabbehipi nipātehi sabbavibhattilopaṃ vadanti, taṃ na gahetabbaṃ. “**Atthi sakkā labbhā** iccete paṭhamāyā. **Divā bhiiyo namo** iccete paṭhamāyā ca dutiyāyā cā” tiādivacanato, padapūraṇamattānañca avibhattiyuttānaṃ **atha khalu vata vatha** iccādīnaṃ nipātānaṃ vacanato. Etthāpi siyā “nanu ca bho avibhattiyuttānampi nipātānaṃ sambhavato **atthi natthisaddānaṃ** avibhattiko niddeso kātabbo, atha kimatthaṃ ‘atthiyā nava, natthiyā navā’ ti savibhattiko niddeso kato” ti? Sabbathā vibhattīhi vinā atthassa niddisitumasakkuṇeyyattāti.

Yadi evaṃ “atthi sakkā labbhā iccete paṭhamāyā” ti vacanato **atthi natthisaddā** luttāyā paṭhamāyā vibhattiyā vasena paṭhamāvibhattikāyeva niddisitabbā, evamakativā kasmā sattamyantavasena “atthiyā natthiyā” ti niddiṭṭhāti? Saccam, **atthi natthisaddā** paṭhamāvibhattiyuttāyeva niddisitabbā, tathāpi “atthipaccaye nava, natthipaccaye navā” ti etassatthassa paridīpane paṭhamāyā okāso natthi, sattamiyāyeva pana atthi, tasmā “atthiyā nava, natthiyā navā” ti vuttaṃ. Iti **atthiyānatthiyāsaddānaṃ** sattamyantabhāve siddheyeva tatiyācatutthīpañcamīchaṭṭhiyantabhāvopi siddhoyeva hoti. Tasmā “atthibhāvo atthitā” tiādīsūpi atthiyā bhāvo **atthibhāvo**, natthiyā bhāvo **natthibhāvo**, atthiyā bhāvo **atthitā** bhīadīnaṃ samāsataddhitaviggaho avassamicchitabbo. Yadidamamhehi vuttaṃ, taṃ “pāḷiyā virujjhatī” ti na vattabbaṃ pāḷinayānusārena vuttattāti.

Evaṃ hotu, kasmā bho “atthiyā, natthiyā” ti itthiliṅganiddeso kato, nanu nipātopasaggā aliṅgabhedāti? Saccam, idaṃ pana ṭhānaṃ atīva sukhumāṃ, tathāpi pubbācariyānubhāvāññeva nissāya vinicchayaṃ brūma. Yathā hi **vīsati** iccādīnaṃ sāṅkhyāsaddānaṃ sarūpato adabbavācakattepi dabbavācakānaṃ **latāmatirattiitthī yāguvadhū** saddānaṃ viya itthiliṅgabhāvo saddasatthavidūhi anumato, evaṃ adabbavācakattepi **atthi natthisaddānaṃ** katthaci itthiliṅgabhāvo saddhamavidūhi anumato. Tenāha āyasmā **dhammasenāpati** “atthiyā nava, natthiyā navā” ti. Atha vā “atthiyā, natthiyā” ti imāni liṅgabhāvavinimuttāni sattamiyantāni nipātapadānīti gahetabbāni, na ettha codetabbaṃ, evarūpāni nipātapadāni pubbācariyehi vuttāni na santi, tasmā chaḍḍetabbamidaṃ vacananti.

Pāvacanasmīṅhi garūhi aniddiṭṭhānīpi anekavihitāni nipātapadāni sandissanti, nāpi “hetuyā, adhipatiyā, atthiyā, natthiyā” ti evamādīsu “apasaddā ime” ti virodho uppādetabbo. Na hi acinteyyānubhāvena pāramitāpuññaena nipphannaena anāvaraṇāññaena sabbam ñeyyamaṅḍalaṃ hatthatale āmalakaṃ viya paccakkaṃ katvā passato buddhassa vacane aññesaṃ vācāvippalāpo



avassam labbhatīti. Nanu ca bho ‘‘hetuyā, adhipatiyā, atthiyā, natthiyā’’ti ca idaṃ **sāriputtathera**vacanaṃ tena nikkhattatā. Tathāgatena hi tāvatimsabhapane desitakāle imāni padāni na santi, evaṃ sante kasmā ‘‘buddhavacana’’nti vadathāti? Buddhavacanaṃyeva nāma. Āyasmato hi sāriputtassa tathāgatena nayo dinno, tenapī pabhinnapaṭisambhidena satthukappena aggasāvakena satthu santikā nayaṃ labhitvā byañjanaṃ suropitaṃ kataṃ. Sabbepi hi paṭisambhidappattā ariyā dunniruttiṃ na vadanti niruttipabhedasmiṃ sukusalattā, tasmā aññesamavisayo esa ariyānaṃ vohāroti daṭṭhabbaṃ.

Idāni **satā**dīnaṃ nāmikapadamālā vuccate –

**Satam**, satāni, satā. Satam, satāni, sate. Satena, satehi, satebhi. Satassa, satānaṃ. Satā, satasmā, satamhā, satehi, satebhi. Satassa, satānaṃ. Sate, satasmim, satamhi, satesu. Evaṃ **sahassam**, sahasānīti yojetabbam. **Dasasahassam satasahassam dasasatasahassanti** etthāpi eseva nayo. Ayaṃ panettha payogo ‘‘satam bhikkhū, satam itthiyo, satam cittāni. Bhikkhūnaṃ satam, itthīnaṃ satam, cittānaṃ satam. Sahassādīsupi eseva nayo. Itthañca aññathāpi saddarūpāni bhavanti. **Koṭi**, koṭī, koṭiyo. **Rattinayena** ñeyyaṃ.

Ekappabhutito yāva, dasakā yā pavattati;  
Saṅkhyā tāva sā saṅkhyeyya-ppadhānāti garū vadum.

Vīsatiito yāva satā, yā saṅkhyā tāva sā pana;  
Saṅkhyāppadhānā saṅkhyeyya-ppadhānāti ca vaṇṇayum.

Apica –

**Vīsato** yāva **koṭiyā**, saṅkhyā tāva hi sā khalu;  
Saṅkhyāppadhānā saṅkhyeyya-ppadhānā cāti niddise.

Tathā hi ‘‘asīti koṭiyo hitvā, hiraññassāpi pabbaji’’nti, ‘‘khīñāsavā vītamaḷā, samimsu satakoṭiyo’’ti ca pāli dissati.

Imasmim pana ṭhāne sabbesaṃ saṅkhyāsaddarūpānaṃ pākāṭikaraṇena viññūnaṃ sukhumaññapaṭilābhatthaṃ sātṭhakathaṃ **udānapālī**ppadesaṃ aññañca pālīppadesamaṭṭhakathāvacanañca āharitvā dassayissāmi –

‘‘Yesam kho visāke satam piyāni, satam tesam dukkhāni, yesam navuti piyāni, navuti tesam dukkhāni. Yesam asīti...pe... yesam sattati. Yesam satthi. Yesam paññāsam, yesam cattārisam, yesam timsam. Yesam kho visāke vīsam piyāni, vīsati tesam dukkhāni. Yesam dasa. Yesam nava. Yesam aṭṭha. Yesam satta. Yesam cha. Yesam pañca. Yesam cattāri. Yesam tīni. Yesam dve. Yesam ekaṃ piyam, tesam ekaṃ dukkha’’nti.

Tattha **satam piyānī**ti satam piyāyitabbavatthūni. ‘‘Satam piya’’ntipi keci paṭhanti. Ettha ca yasmā **ekato** paṭṭhāya yāva **dasa**, tāva saṅkhyāsaṅkhyeyyappadhānā, tasmā ‘‘yesam dasa piyāni, dasa tesam dukkhāni’’tiādīnā pāli āgatā. Keci pana ‘‘yesam dasa piyānaṃ, dasa tesam dukkhāna’’ntiādīnā paṭhanti, taṃ na sundaraṃ. Yasmā pana **vīsatiito** paṭṭhāya yāva **satam**, tāva saṅkhyeyyappadhānā saṅkhyāppadhānā ca, tasmā tatthāpi saṅkhyeyyappadhānaṃyeva gahetvā ‘‘yesam kho visāke satam piyāni, satam tesam dukkhāni’’tiādīnā pāli āgatā. Sabbesampi ca yesam ekaṃ piyam, ekaṃ tesam dukkhanti pāṭho, na pana dukkhassāti. Ekasmiñhi padakkame ekarasāva bhagavato desanā hotīti. Tasmā yathāvuttanayāva pāli veditabbā. Ayaṃ tāva sātṭhakatho udānapālīppadeso.

Idāni añño pālīppadeso aṭṭhakathāpāṭhappadeso ca nīyate –

‘‘Satam hatthī satam assā, satam assatarīrathā;

Sataṃ kaññā saḥassāni, āmukkamaṇikuṇḍalā;  
Ekassa padavītiḥārassa, kalamā nāgghanti soḷasi”nti

Pāli. Ettha “sataṃ hatthī”tiādīni visesitāni, “saḥassāni”ti visesanaṃ, tasmā **sataṃsaddaṃ saḥassasaddena** yojetvā “hatthī”tiādīni pana upapadaṃ katvā attho gahetabbo. Hatthī sataṃ saḥassāni. Assā sataṃ saḥassāni. Assatarīrathā sataṃ saḥassāni. Āmukkamaṇikuṇḍalā kaññā sataṃ saḥassāni. Idaṃ saṅkhyeyyappadhānavasenaṭṭhagahaṇaṃ. Saṅkhyāppadhānavasena pana ayampi attho gahetabbo “hatthīnaṃ sataḥassaṃ, assānaṃ sataḥassaṃ, assatarīrathānaṃ sataḥassaṃ, āmukkamaṇikuṇḍalānaṃ kaññānaṃ sataḥassa”nti. Ayaṃ nayo aññesupi īdisesu ṭhānesu netabbo. “Yojanānaṃ satānucco, himavā pañca pabbato”ti ayamattḥakathāpāṭho. Ettha “pañcā”ti saddaṃ **satasaddena** saddhiṃ yojetvā “sippikānaṃ sataṃ natthī”ti ettha viya himavā pabbato yojanānaṃ pañca satāni uccoti saṅkhyāppadhānavasena attho gahetabbo. “Pañca satāni”ti ca addhuno accantasamyogavasena upayogavacanāṃ. Ayaṃ nayo aññesupi īdisesu ṭhānesu netabbo. **Satamiti** saddo “sataṃ homi, saḥassaṃ homi”tiādīsu ekavacano. “Athetthekasataṃ khatyā, anuyantā yasassino”tiādīsu bahuvacano. Evaṃ **saḥassādīnaṃ**pi ekavacanabahuvacanatā labbhati. Tathā hi “bhiyyo naṃ sataḥassaṃ, yakkhānaṃ payirupāsati”ti ettha “sataḥassa”nti ekavacanāṃ. “Parosaḥassaṃ kho panassa puttā bhavissanti”ti ettha **saḥassanti** bahuvacananti daṭṭhabbaṃ.

“Kappe ca sataḥasse, caturo ca asaṅkhiye;  
Amaraṃ nāma nagaraṃ, dassaneyyaṃ manorama”nti

Pāli. Ettha “kappe ca sataḥasse caturo ca asaṅkhiyeti sāmiatthe upayogabahuvacanāṃ, tasmā “mahākappānaṃ sataḥassānaṃ catunnaṃ asaṅkhiyānaṃ matthake”ti attho gahetabbo, “matthake”ti cettha vacanaseso. “Kappasataḥassādhikānaṃ catunnaṃ asaṅkhiyānaṃ matthake”iccevattho. Ayaṃ nayo aññesupi īdisesu ṭhānesu netabbo.

“Kappe ca sataḥasse, caturo ca asaṅkhiye;  
Etthantare yaṃ caritaṃ, sabbaṃ taṃ bodhipācana”nti

Pāli. Ettha “kappe”ti accantasamyogavasena upayogabahuvacanāṃ. “Sataḥasse kappe”ti **kappasaddasambandhena** cāyaṃ pullīganiddeso upayoganiddeso ca. Samānādhikaraṇāñhi idaṃ **kappasaddena**. “Caturo ca asaṅkhiye”ti acchantasamyogavasena upayogabahuvacanāni. Kassa pana asaṅkhiyeti? Aññassa avuttattā kappassa ca vuttattā pakaraṇato “kappāna”nti ayamattḥo viññāyateva. Na hi vuttaṃ vajjetvā avuttassa kassaci gahaṇaṃ yuttanti. **Casaddo** sampiṇḍanattho “mahākappānaṃ caturo asaṅkhyeyye sataḥasse ca mahākappe”ti. Ayaṃ nayo aññesupi īdisesu ṭhānesu netabbo.

“Ghaṭānekasaḥassāni, kumbhīnañca satā bahū”ti pāli. Ettha **ghaṭā**ti ghaṭānaṃ. Sāmiatthe hi idaṃ paccattavacanāṃ. “Ghaṭānaṃ anekasaḥassāni” iccevattho. **Kumbhīnañca satā bahū**ti anekāni ca kumbhīnaṃ satāni. Ettha **nikāralo**po daṭṭhabbo. Ayaṃ nayo aññesupi īdisesu ṭhānesu netabbo.

“Dasavīsasaḥassānaṃ, dhammābhisamayo ahu;  
Ekadvinnaṃ abhisamayo, gaṇanāto asaṅkhiyo”ti

Pāli. Ettha **dasavīsasaḥassānanti** dasasaḥassānaṃ vīsasaḥassānañca. **Dhammābhisamayoti** catusaccappaṭivedho. **Ekadvinnanti** sīsamatthakathanaṃ, tena “ekassa ceva dvinnañca tiṇṇaṃ catunnaṃ...pe... dasanna”ntiādīnā nayena asaṅkhyeyyoti attho. Ayaṃ nayo aññesupi īdisesu ṭhānesu netabbo.

“Cattāri sataḥassāni, chaḷabhiññā mahiddhikā;  
Dīpaṅkaraṃ lokaviduṃ, parivārenti sabbadā”ti

Pāli. Ettha **cattāri sataḥassānī**ti idaṃ līṅgabhedavasena “chaḷabhiññā mahiddhikā”ti imehi dvīhi

padehi samānādhikaraṇaṃ. Īdisesu hi thānesu asaṅkhyeyya vācakopi saddo napuṃsakova hoti, tasmā “cattāri satahassāni”ti ca “chaḷabhiññā”ti ca “mahiddhikā”ti ca etaṃ padattayaṃ samānādhikaraṇaṃ. Atha vā **chaḷabhiññā mahiddhikā**ti chaḷabhiññānaṃ mahaddhikānanti sāmīatthe paccattavacanaṃ daṭṭhabbaṃ. Imasmiṃ panatthe “cattāri satahassāni”ti ayaṃ saṅkhyāvacano bhavati. “Tīṇi satahassāni, nāriyo samalaṅkatā”tiādīsupi ayaṃ nayo netabbo. “Tā ca satta satā bhariyā, dāsyo satta satāni cā”ti pāli. Ettha **satā**ti “satāni”ti napuṃsakavasena gahetabbaṃ, na itthilingavasena. “Satā”ti hi “pañca citta vipākā”tiādīni viya napuṃsakarūpaṃ. Itthilingabhūtā hi **satas**saddo natthi, tathā pulliṅgabhūto. Yadi ca dvilingo **satas**saddo siyā, evañca sati “puriso, kaññā”ti ca **okārantapullīṅgā**okārantitthirūpehipibhavitaṃ. Rūpadvayampi **satas**saddassa natthi, tena ñāyati “**satas**saddo ekantanapuṃsako”ti.

Nanu ca bho “tā devatā sattasatā uḷārā”ti ettha **satas**saddo itthilingo hutvā dissatīti? Na, napuṃsakoyevāti. Nanu ca bho **devatā**saddena samānādhikaraṇoti? Saccam samānādhikaraṇo, tathāpi napuṃsakoyeva. Īdisesu hi saṅkhyāvisayesu samānādhikaraṇabhāvo appamaṇo. Tathā hi “pañca paccekabuddhasatāni imasmiṃ isigilismiṃ pabbate ciravāsino ahesu”nti napuṃsakaliṅgena pulliṅgassa samānādhikaraṇatā dissati, tasmā “tā devatā sattasatā uḷārā”ti etthāpi “sattasatāni”ti napuṃsakabhāvoyevāti avagantabbo. “Satta hatthisate datvā”tiādīsupi **satas**saddo napuṃsakoyeva. Ayaṃ nayo aññesupi Īdisesu thānesu netabbo.

“Navutikoṭisahashehi, parivāresi mahāmuni”ti pāli. Ettha “navutikoṭisahashehi bhikkhūhi”ti vā “bhikkhūnaṃ navutikoṭisahashehi”ti vā saṅkhyeyyasāṅkhyāpadhānavasena attho gahetabbo. Ayaṃ nayo aññesupi Īdisesu thānesu netabbo.

“Satahassavassāni, āyu tassa mahesino”ti pāli. Ettha “satahassavassāni”ti kālassa accantasamyo gavasena upayogavacanaṃ. Tathā “dasavassasahassāni, agāra majjha so vasī”ti pāliyampi. Ayaṃ nayo aññesupi Īdisesu thānesu netabbo.

“Ito satahassamhi, kappe uppajji nāyako”ti pāli, “ekavute ito kappe”ti pāli ca. Ettha **satahassamhi kappeti** satahassānaṃ kappānaṃ matthake. **Ekanavute kappeti** ekavutiyaṃ kappānaṃ matthaketi bhummavacanassa sāmibhummavacanasena attho gahetabbo. Tathā hi “bhagavati brahmacariyaṃ vussati”ti ettha bhummavacanassa “bhagavato santike”ti sāmibhummavacanasena attho gahito. Ayaṃ nayo aññesupi Īdisesu thānesu netabbo.

“Yadi tattha sahasāni, satāni nahutāni ca;  
Nevamhākaṃ bhayaṃ koci, vane vāḷesu vijjati”ti

Pāli. Ayametassā attho – tattha vane vāḷānaṃ sahasāni ca satāni ca nahutāni ca yadi vijjanti. Atha vā **sahasāni satāni**ti satahassāni, vāḷānaṃ satahassāni ca nahutāni ca yadi vijjanti, evaṃ vijjantesupi vāḷesu kociṭi kvaci. **Kocis**saddo hi “ko te balaṃ mahārājā”ti ettha **kos**saddo viya **kvas**saddatthe vattati, nimittatthe cāyaṃ niddeso. Tena “koci kvaci kismiñci vāḷe ekassapi vāḷamigassa kāraṇā nevamhākaṃ bhayaṃ vijjati”ti attho gahetabbo. Atha vā **koci**ti kiñci appamattakampi. Ettha pana “vāḷesū”ti nimittatthe bhummaṃ. Vāḷānaṃ kāraṇā appamattakampi amhākaṃ bhayaṃ na vijjati. Ayaṃ nayo aññesupi Īdisesu thānesu netabbo.

“Sabbam satahassāni, chattimsaparimaṇḍalaṃ;  
Dasañceva sahasāni, aḍḍhuḍḍhāni satāni cā”ti

Aṭṭhakathāpāṭho. Ettha yasmā saddato samānavibhattilingavacanānaṃ padānaṃ asamānavibhattilingavacanānaṃ vā atthato pana samānānaṃ dūre thitānampi ekasambandho hoti, itaresaṃ samīpe thitānampi na hoti, tasmā “sabba”ntidaṃ “parimaṇḍala”ntiminā sambandhitabbaṃ. “Chattimsā”ti idaṃ pana “satahassāni”timinā sambandhitabbaṃ. Ayaṃ nayo aññesupi Īdisesu thānesu netabbo.

“Duve satahassāni, cattāri nahutāni ca;  
Ettakaṃ bahalattena, saṅkhātāyaṃ vasundharā”ti

Aṭṭhakathāpāṭho. Ettha “duve”ti visesanam, “satasahassānī”ti visesitabbam. Tathā “cattārī”ti visesanam, “nahutānī”ti visesitabbam. Tathā hi “satasahassāni nahutāni cā”ti imāni “duve cattārī”ti imehi visesitabbattā “dvisatasahassam catunahuta”nti atthappakāsanāni bhavanti. Evaṃ santepi “duve”iccādīnam saṅkhyāsaddānam “satasahassānī”tiādīhi saṅkhyāsaddehi samānādhikaraṇatā pubbācariyehi na vuttā. Yasmā pana yathā “duve puthujjanā vuttā. Satasahassam bhikkhū”tiādīsu samānādhikaraṇatā labbhati dabbavācakkattā visesitabbapadānam, na tathā “duve satasahassānī”tiādīsu adabbavācakkattā visesitabbapadānam, tasmā īdisesu ṭhānesu samānādhikaraṇatā na icchitabbā yuttiyā abhāvato. Yadi evaṃ “kusalā, rūpaṃ, cakkhumā”tiādīnam viya imesamaññaṃ sambandharahitā siyāti? Na, visesanavisesitabbabhāvena gahittā. Yajjevam samānādhikaraṇabhāvo laddhabboti? Na, niyamābhāvato. Ekantena hi guṇaguṇīnamyeva visesanavisesitabbānam samānādhikaraṇabhāvo, na itaresam visesanavisesitabbattepi.

Tattha “ettaka”nti pamāṇavacanam. “Bahalattēnā”ti visesane tatiyā. Ubhayena imamattam dasseti “ayaṃ vasundharā bahalattēna yojanānam duve satasahassāni cattārī nahutāni ca ettakam saṅkhātā”ti. “Ettaka”nti padassa ca “duve satasahassāni cattārī nahutāni cā”ti imehi vā “vasundharā”ti iminā vā samānādhikaraṇatā na icchitabbā. **Ettakanti** hi bhāvanapūṃsakam, yaṃ saddasatthe kriyāvisesananti vadanti. Tassa “ettakena pamāṇena”iccevattho. Apica “duve satasahassāni cattārī na hutāni cā”ti imesampi “vasundharā”ti iminā samānādhikaraṇatā na icchitabbā “bhikkhūnam sata”nti ettha **satas**saddassa viya saṅkhyāvacanamattattā. Tathā hi “ettaka”nti vuttam. “Saṅkhātā”ti pana “aya”nti ca imesam “vasundharā”ti iminā samānādhikaraṇatā labbhati. Sabbopāyam nayo aññesupi īdisesu ṭhānesu netabbo.

“Dassettha rājiyo setā, dassanīyā manoramā;  
Cha piṅgalā pannarasa, haliddā tā catuddasā”ti

Pāḷi. Ettha **cha piṅgalā pannarasā**ti cha ca pannarasa cāti ekavīsati piṅgalā rājiyoti attho gahetabbo.

Tathā –

“Puttāpi tassa bahavo, ‘ekanāmā’ti me sutam;  
Asīti dasa eko ca, indanāmā mahabbalā”ti

Pāḷi. Ettha pana “ekanavutī”ti vattabbe “asīti dasa eko cā”ti vuttam. Vicitrasaddaracanañhi pāvacanam. Ayaṃ nayo aññesupi īdisesu ṭhānesu netabbo.

“Timsapurisanāvutyō, sabbevekekaniccitā;  
Yesam samaṃ na passāmi, kevalam mahi’maṃ cara”nti

Pāḷi. Ettha “purisānam timsasahassāni navuti ca satāni tiṃsa nāvutyō”ti vuccanti. Imasmiṃ pana ṭhāne **timsas**saddato **sahassas**saddassa **navutis**saddato ca **satas**saddassa lopam katvā “tiṃsa nāvutyō”ti vuttanti na gahetabbam. Evañhi gahaṇe sati yattha katthacipi edisī saddaracana kātābbā siyā, katāya ca edisāya saddaracanaṃ atthāvagamo vinā upadesena suṇantānam na siyā, tasmā nevaṃ gahetabbam. Evaṃ pana gahetabbam – “tiṃsa nāvutyō”ti idaṃ lokasaṅketarūḷham vacanam, saṅketarūḷhasa pana vacanassattho yasmā gahitapubbasaṅketehi sutvā ñāyate, na upadesato, tasmā brahmadattena raññā vuttakālepi satthārā tam katham āharitvā vuttakālepi sabbe manussā vināpi upadesena vacanattam jānantīti gahetabbam.

Tiṃsañceva sahasāni, navuti ca satāni tu;  
Tiṃsa nāvutyō nāma, vuttā umaṅgajātaka.

Yasmā pāvacane santi, nayā ceva acintiyā;  
Vohārā ca sugulhatthā, dayāpanna desitā.

Tasmā sātṭhakathe dhīro, gambhīre jinabhāsīte;

Upadesaṃ sadā gaṇhe, garuṃ sammā upaṭṭhahaṃ.

Garūpadesahīno hi, atthasāraṃ na vindati;  
Atthasāravihīno so, saddhammā parihāyati.

Garūpadesalābhī ca, atthasārasamāyuto;  
Saddhammaṃ paripārento, saddhammasmā na hāyati.

Saddhammatthāya me tasmā, saṅkhyāmālāpi bhāsītā;  
Sappayogā yathāyogaṃ, sahevattthavinicchayā.

Iti navaṅge sātṭhakathe piṭakattaye byappathagatīsu viññūnaṃ

Kosallatthāya kate saddanītippakaraṇe

Savinicchayo saṅkhyānāmānaṃ nāmikapadamālāvibhāgo

Nāma

Terasamo paricchedo.

## 14. Atthattikavibhāga

**Bhū**dhātu tāya nipphanna-rūpañcāti idaṃ dvayaṃ;  
Katvā padhānamamehi, sabbametam papañcitam.

**Bhav**atissa vasā dāni, vakkhāmatthattikaṃ varaṃ;  
Atthuddhāro tumantañca, tvādiyantaṃ tikaṃ idha.

Tasmā tāva **bhū**dhātuto pavattassa **bhū**tasaddassa atthuddhāro nīyate –

Khandhasattāmanussesu, vijjamāne ca dhātuyaṃ;  
Khīṇāsava rukkhādīmi, **bhū**tasaddo pavattati.

Uppāde cāpi viññeyyo, **bhū**tasaddo vibhāvinā;  
Vipule sopasaggoyaṃ, hīlane vidhamepi ca;  
Parājaye vediyane, nāme pākāṭatāya ca.

Vuttañhetam – **bhū**tasaddo pañcakkhandhāmanussadhātuvijjamānakhīṇāsavasattarukkhādīsū dissati. “**Bhū**tamidanti bhikkhave samanupassathā” tiādīsū hi ayaṃ pañcakkhandhesu dissati. “Yānīdha bhūtāni samāgatāni” ti ettha amanusse. “Cattāro kho bhikkhu mahābhūtā hetū” ti ettha dhātūsū. “**Bhū**tasmim pañcattiyā” ntiādīsū vijjamāne. “Yo ca kālaghaso bhūto” ti ettha khīṇāsave. “Sabbeva nikkhipissanti, bhūtā loke samussaya” nti ettha satte. “**Bhū**tagāmapātabyatāyā” ti ettha rukkhādīsūti. **Mūlapariyāyasuttaṭṭhakathāya** vacanaṃ idaṃ. **Ṭikāyam**ādisaddena uppādādīni gayhare. Vuttañhetam – “jātam bhūtam saṅkhata” ntiādīsū **bhū**tasaddo uppāde dissati. Saupasaggo pana “pabhūtamariyo pakaroti puñña” ntiādīsū vipule. “Yebhuyyena bhikkhūnaṃ paribhūtarūpo” tiādīsū hīlane. “Sambhūto sāvāsī” tiādīsū paññattiyam. “Abhibhūto māro vijito saṅgāmo” tiādīsū vidhamane. “Parābhūtarūpokho ayaṃ acelo pāthikaputto” tiādīsū parājaye. “Anubhūtam sukhadukka” ntiādīsū vediyane. “Vibhūtam paññāyā” tiādīsū pākāṭikaraṇe dissati, te sabbe “rukkhādīsū” tiādīsaddena saṅgahitāti daṭṭhabbāti.

Idāni tumantapadāni vuccante –

Bhavitum, ubbhavitum, samubbhavitum, pabhavitum, parābhavitum, atibhavitum, sambhavitum, vibhavitum, bhotum, sambhotum, vibhotum, pātubhavitum, pātubbhavitum vā, pātubhotum. Imāni akammakāni **tumantapadāni**.

Paribhotum paribhavitum, abhibhotum abhibhavitum, adhibhotum adhibhavitum, atibhotum atibhavitum, anubhotum anubhavitum, samanubhotum samanubhavitum, abhisambhotum abhisambhavitum. Imāni sakammakāni **tumantapadāni**, sabbānetāni suddhakattari bhavanti.

“Bhāvetum, pabhāvetum, sambhāvetum, vibhāvetum, paribhāvetum” iccevamādīni hetukattari **tumantapadāni**, sabbānīpi hetukattari **tumantapadāni** sakammakāniyeva bhavanti. Uddesoḃyam.

Tatra samānatthapadesu ekamevādīpadam gahetvā niddeso kātabbo – **bhavitunti** hotum vijjītum paññāyītum sarūpaḃ labhītum. Ettha vuttanayānusārena sesānampi **tumantānam** niddeso vitthāretabbo, sabbāni **tumantapadāni** catutthiyatthe vattanti “tvaḃ mama cittamaññāya, nettaḃ yācītumāgato” ti ettha viya. **Yācītunti** hi yācanatthāyāti attho. Tasmā **bhavituntī**ādīnampi “bhavanatthāyā” ti vā “bhavanattha” nti vā “bhavanāyā” ti vā ādinā attho gahetabbo. Apica “nekkhammaḃ daṭṭhu khemato” ti ettha “daṭṭhu” nti padassa “disvā” ti atthadassanato yathārahaḃ **tumantāni tvāsaddantapadatthavasēnapi** gahetabbāni. Etāni ca nipātapadesu saṅgahaḃgacchanti. Vuttañhi **niruttipiṭake** nipātapadaparicchede “tum itī catutthiyā” ti. Tatrāyamattho “tum itī etadanto nipāto catutthiyā atthe vattatī” ti.

#### Tumantakathā samattā.

Idāni **tvādiyantapadāni** vuccante –

Bhavitvā, bhavitvāna, bhavituna, bhaviya, bhaviyāna. Ubbhavitvā, ubbhavitvāna, ubbhavituna, ubbhaviya, ubbhaviyāna. Esa nayo “samubbhavitvā, parābhavitvā, sambhavitvā, vibhavitvā, pātubbhavitvā” ti etthāpi. Imāni akammakāni ussukkanatthāni **tvādiyantapadāni**.

Bhutvā, bhutvāna, paribhavitvā, paribhavitvāna, paribhavituna, paribhaviya, paribhaviyāna, paribhuyya. Abhibhavitvā, abhibhavitvāna, abhibhavituna, abhibhaviya, abhibhaviyāna, abhibhuyya. Esa nayo “adhibhavitvā, atibhavitvā, anubhavitvā” ti etthāpi. Idañcettha nidassanaḃ. “Tamavoca rājā anubhaviyāna tampi, eyyāsi khippaḃ ahamapi pūjaḃ kassa” nti. Anubhutvā, anubhutvāna. Adhibhotvā, adhibhotvāna.

“Saṭṭhi kappasahassāni, devaloke ramissati;  
Aññe deve adhibhotvā, issaraḃ kārayissatī” ti

Idamettha pālīnidassanaḃ, imāni sakammakāni ussukkanatthāni **tvādiyantapadāni**. Imāni cattāri suddhakattariyeva bhavanti.

“Bhāvetvā, bhāvetvāna. Pabhāvetvā, pabhāvetvāna. Sambhāvetvā, sambhāvetvāna. Vibhāvetvā, vibhāvetvāna. Paribhāvetvā, paribhāvetvāna” iccevamādīni sakammakāni ussukkanatthāni **tvādiyantapadāni** hetukattariyeva bhavanti. Uddesoḃyam.

Tatra samānatthapadesu ekamevādīpadam gahetvā niddeso kātabbo – **bhavitvāti** hutvā paññāyītvā sarūpaḃ labhītvā. Evaḃ vuttanayānusārena sesānampi **tvādiyantapadānam** niddeso vitthāretabbo. Ayaḃ pana viseso **bhutvāti** sampattim anubhutvāti sakammakavasena attho gahetabbo. **Bhutvā anubhutvāti** imesañhi samānatthataḃ saddhamavidū icchanti. Atridaḃ vuccati –

“Bhutvā bhutvāna” iccete, “anubhutvā” timassa hi;  
Atthaḃ sūcenti “hutvā” ti, padassa pana neva te.

Keci “bhūtvā”ti dīghattam, tassa icchanti sāsane;  
Dīghatā rassatā ceva, dvayampetaṃ padissati.

Saddasatthe ca “bhūtvā”ti, dīghattasañhitam padam;  
“Bhavitvā”ti padassattham, dīpeti na tu sāsane.

“Hutvā”iti padaṃyeva, dīpeti jinasāsane;  
“Bhavitvā”ti padassattham, natthi aññattha tam padam.

Icevaṃ savisesantu, vacanam sāraddassinā;  
Sāsane saddasatthe ca, viññunā pekkhitabbakam.

Evam ussukkanatthe pavattāni **tvā**diyantapadānīpi niddiṭṭhāni, sabbānetāni avibhattikānīti gahetabbāni. **Niruttipiṭake** hi nipātaparicchede avibhattikāni katvā **tvā**diyantapadāni vuttāni. Saddatthavidūnam pana mate paṭhamādivibhattivasena savibhattikāni bhavanti.

Imasmiñca pana **tvā**diyantādhikāre idañcupalakkhitabbam – bhutvā gacchati, bhutvā gato, bhutvā gamissasi, kasitvā vapati. Umañgā nikkhamitvāna, vedeho nāvamāruhi. Bhutvāna bhikkhu bhikkhassu iccādī samānakattukānaṃ dhātūnaṃ **pubbakāle tvā**disaddappayogā. “Bhutvā gacchati”ti ettha hi “bhutvā”ti idaṃ pubbakālakriyādīpakam padam. “Gacchati”ti idaṃ pana uttarakālakriyādīpakam, samānakattukāni cetāni padāni ekakattukānaṃ kriyānaṃ vācakattā. Tathā hettha yo gamanakriyāya kattā, so eva bhuñjanakriyāya kattubhūto daṭṭhabbo. Ayaṃ nayo aññatrāpi īdisesu ṭhānesu netabbo.

“Andhakāraṃ nihantvāna, uditoyaṃ divākaro;  
Vaṇṇam paññāvabhāsehi, obhāsetvā samugato”

Iccādīnīpi pana samānakattukānaṃ **samānakāle tvā**disaddappayogā. Ettha hi “nihantvānā”ti padaṃ samānakālakriyādīpakam padam. “Udito”ti idaṃ pana uttarakālakriyādīpakam padanti na vattabbam samānakālakriyāya idhādhippetattā. Tasmāyeva samānakālakriyādīpakam padanti gahetabbam. Ayaṃ nayo aññatrāpi īdisesu ṭhānesu netabbo.

Keci pana “mukham byādāya sayati, akkhiṃ parivattetvā passati”ti udāharanti. Apare “nisajja adhīte, ṭhatvā kathetī”ti. Tattha byādānaparivattanuttarakālo byādānūpasamalakkhaṇam passanakriyāya lakkhiyati. “Nisajja adhīte, ṭhatvā kathetī”ti ca samānakālatāyapi ajjhenakathanehi pubbepi nisajjaṭṭhānāni hontīti sakkā pubbuttarakālatā sambhāvetuṃ, tasmā purimāniyeva udāharaṇāni yuttāni. Udayasamakālameva hi tannivattanīyanivattananti.

“Dvāramāvaritvā pavisati”iccādī samānakattukānaṃ **aparakāle tvā**disaddappayogo. Yasmā panettha pavisanakriyā purimā, āvaraṇakriyā pana pacchimā, tasmā “āvaritvā”ti idaṃ aparakālakriyādīpakam padanti veditabbam. “Pavisati”ti idaṃ pana pubbakālakriyādīpakam padanti. Ayaṃ nayo aññatrāpi īdisesu ṭhānesu netabbo. Apare “dha’nti kacca patito daṇḍo”ti udāharaṇanti. Abhighātabhūtasamāyoge pana abhighātajasaddassa samānakālatā ettha labbhatīti idhāpi purimāniyeva udāharaṇāni yuttānīti.

“Pisācam disvā cassa bhayaṃ hoti. Paññāya cassa disvā āsavā parikkhīṇā”iccādī **asamāne** kattari payogo. Ettha hi pisācam disvā purisassa bhayaṃ hoti, paññāya disvā assa puggalassa āsavā parikkhīṇā. Evam samānakattukatā dhātūnaṃ na labbhati dassanakriyāya purisesu pavattanato, bhavanādikriyāya ca bhayādīsu pavattanatotī daṭṭhabbam. Ayaṃ nayo aññatrāpi īdisesu ṭhānesu netabbo.

Idampi panettha upalakkhitabbam “appatvā nadim pabbato, atikkamma pabbatam nadī”iccādī **parāparayogo**. “Sīham disvā bhayaṃ hoti, ghatam pivitvā balam jāyate, ‘dha’nti katvā daṇḍo patito”iccādī **lakkhaṇahetuādippayogo**. “Nhatvā gamanam, bhutvā sayanam. Upādāya

rūpa’’miccāpi **byattayena saddasiddhippayogoti.**

Icevaṃ sabbathāpi samānakattukānaṃ dhātūnaṃ pubbakāle **tvādisaddappayogo**, samānakattukānaṃ samānakāle **tvādisaddappayogo**, samānakattukānaṃ aparakāle **tvādisaddappayogo**, asamānakattukānaṃ **tvādisaddappayogo**, parāparayogo, lakkhaṇahetuādippayogo, byattayena saddasiddhippayogoti sattadhā **tvādiyantānaṃ padānaṃ** payogo veditabbo.

Yadi evaṃ kasmā **kaccāyane** ‘‘pubbakālekakattukānaṃ tuna tvāna tvā vā’’ti pubbakāleyeva ekakattukaggahaṇaṃ katanti? Yetuyyena **tvādiyantānaṃ padānaṃ purimakālakriyādīpanato**. Kaccāyane hi yebhuyyena pavattiṃ sandhāya ‘‘pubbakālekakattukāna’’nti vuttaṃ. Yasmā pana ‘‘iti katvā’’tiādīnaṃ padānaṃ hetuatthavasenāpi pubbācariyehi attho saṃvaṇṇito, tasmā ‘‘bhavitvā’’tiādīnaṃ **bhūdhātumayānaṃ tvādisaddantānaṃ padānaṃ aññesaṇca** ‘‘pacitvā’’tiādīnaṃ yathāpayogaṃ ‘‘bhavanahetu pacanahetū’’tiādīnā hetuatthopi gahetabbo. Atridaṃ vuccati –

Hetutthepi yato honti, saddā ussukkanatthakā;  
Tasmā hetuvasenāpi, vadeyyatthaṃ vicakkhaṇo.

‘‘Iti katvā’’ti saddassa, atthasaṃvaṇṇanāsu hi;  
‘‘Iti karaṇahetū’’ti, attho dhīrehi gayhati.

‘‘Gacchāmi dāni nibbānaṃ, yattha gantvā na socati’’;  
Iti pāṭhepi hetuttho, gayhate pubbaviññubhi.

‘‘Yasmiṃ nibbāne gamana-hetū’’ti hi kathīyate;  
Hetutthevaṃ yathāyoga-maññatṛāpi ayaṃ nayo.

Evaṃ **bhūtasaddassa** atthuddhāro ca **tumantapadaṇca tvādiyantapadaṇcāti** atthattikaṃ vibhattaṃ.

Yo imamatthatikaṃ suvibhattaṃ,  
Kaṇṇarasāyanamāgamikānaṃ;  
Dhārayate sa bhava gatakaṅkhā,  
Pāvacaṇamhi gate sukhumatthe.

Iti navāṅge sātthakathe piṭakattaye byappathagatūsu viññūnaṃ

Kosallatthāya kate saddanītipparaṇe

Atthattikavibhāgo nāma

Cuddasamo paricchedo.

Evaṃ nānappakārato **bhūdhāturūpāni** dassitāni.

Padamālā niṭṭhitā.